


RB336698



*Thomas Fisher
Rare Book Library*

UNIVERSITY OF TORONTO


32
B a



B

B

5



RELATION
DE CE QUI S'EST PASSE'
EN LA
NOVVELLE FRANCE
EN L'ANNE'E 1639.

Enuoyée au
R. PERE PROVINCIAL
de la Compagnie de IESVS
en la Prouince de France.

*Par le P. Paul Le Jeune, de la mesme Compagnie,
Superieur de la Residence de Kébec.*



A PARIS,
Chez SEBASTIEN CRAMOISY, Imprimeur
ordinaire du Roy, rue S. Iacques,
aux Cicognes.

M. DC. XL.
AVEC PRIVILEGE DU ROY

PROVINCIAL

DECEMBER 1852


PROVINCIAL

NUMBER 1

PROVINCIAL

DECEMBER 1852

PROVINCIAL



PROVINCIAL

PROVINCIAL




Extrait du Priuilege du Roy.

PAR Grace & Priuilege du Roy, il est permis à SEBASTIEN CRAMOY, Marchand Libraire luré, Imprimeur ordinaire du Roy, & Bourgeois de Paris, d'imprimer ou faire imprimer vn liure intitulé, *Relation de ce qui s'est passé en la Nouvelle France en l'année 1639. Enuoyée au R. P. Provincial de la Compagnie de IESVS en la Province de France, Par le P. Paul le Jeune de la mesme Compagnie, Superieur de la Residence de Kébec, & ce pendant le temps & espace de dix années consecutiues. Avec defenses à tous Libraires & Imprimeurs d'imprimer, ou faire imprimer ledit Liure, sous pretexte de déguisement, ou changement qu'ils ypourroient faire, à peine de confiscation, & l'amende portée par ledit Priuilege. Donnée à Paris le 14. iour de Decembre 1639.*

Par le Roy en Conseil.

CIBERET.



Permission du P. Provincial.

NOUS IACQUES DINET, Prouin-
cial de la Compagnie de IESVS en
la Prouince de Frâce, auons accordé pour
l'aduenir au sieur SEBASTIEN CRAMOISY,
Marchand Libraire, Imprimeur ordinaire
du Roy, l'impression des Relations de la
Nouvelle France. Faict à Paris le 20. De-
cembre 1639.

IACQUES DINET.




TABLE DES CHAPITRES contenus en ce Liure.

R ELATION de ce qui s'est passé en la Nouvelle Fran- ce en l'année 1639. page 1 Chapitre I. De la joye qu'a receu la Nouvelle France pour la Naissance de Monseign. le Daulphin, & d'un conseil que tin- drent les Sauvages. 2.
Chap. II. Des Religieuses nouvellement arrivées en la Nouvelle France, & de leur employ. 17
Chap. III. Des bonnes dispositions des Sauvages pour la Foy. 37
Chap. IV. Des Chrestiens ou Sauvages baptisez en general. 52
Chap. V. Des premieres Familles ren- duës Sedentaires. 63

Chap. VI. Du Baptisme d'un ieune
homme Algonquin. 91


Chap. VII. De la Conuerſion d'un
Capitaine, & de toute ſa Famille. 107

Chap. VII. De la Conuerſion & du
Baptisme d'un Sorcier. 116

Chap. IX. Du Seminaire des Sauvages.
130

Chap. X. De la creance des ſuperſti-
tions, & de quelques conſtumes des
Sauvages. 145

Chap. XI. Ramas de diuerſes choſes
qui n'ont pû eſtre rappportées ſous les
Chapitres precedents. 158



Relation de ce qui s'est passé dans
le Pais des Hurons en l'année
1638. & 1639.

Chap. I. De la situation du pays, &
du nom de Huron. 3

Chap. II. De l'employ en general des
Religieux de nostre Compagnie en ces
quartiers. 13

Chap. III. De l'Estat general du Chri-
stianisme en ces contrées. 25

Chap. IV. De ce qui est arriué de plus
remarquable en la Residence de la
Conception au bourg d'Ossossane, &
particulierement de la nouvelle Eglise de
ce bourg. 37

Chap. V. De la Residence de Saint
Ioseph au bourg de Teanaustayae. De
ce qui s'y est passé de plus remarquable,
& principalement de la Naissance &
establissement de la Nouvelle Eglise de
ce bourg. 61

Chap. VI. De ce qui s'est passé de plus
remarquable dans les Missions. 81

Chap. VII. De diuerses trauerses &
difficultez qui se sont rencontrées en la
naissance de ces Nouuelles Eglises. Et
de celles qui se presentent encore tous les
iours en leur établissement. 100

Chap. VIII. Du regne de Sathan en ces
contrées. Et des diuerses diableries qui
s'y trouuent introduites & établies, com-
me premiers principes & loix fonda-
mentales de l'estat & conseruation de
ces peuples. 123

FIN.



RELATION

de ce qui s'est passé en la

NOUVELLE FRANCE,

EN L'ANNEE 1639.



MON REVEREND PERE,

La naissance d'un Dauphin, les affections & les presents de nostre grand Roy pour nos Sauvages, les soins de Monseigneur le Cardinal pour ces contrées, & ses aumosnes pour la Mission des Hurons : les gratifications de Messieurs de la Nouvelle France pour nos Neophytes, ou nouveaux Chrestiens: la continuation de Monsieur le Chevalier de Montmagny dans son gouvernement : la venue des Religieuses : le secours qu'il a pleu à Vostre Reuerence de nous enuoyer : l'assistance de plusieurs personnes de merite & de condition : les

A

2 *Relation de la Nouvelle de France,*
vœux & les prieres des bonnes ames : les
sainctes Affociations que l'on fait pour at-
tirer les benedictions du Ciel sur ces peu-
ples, ont esté les suiets de nos entretiens
à l'abord des vaisseaux, non seulement en
public dans la conuersation des hommes,
mais encore en secret deuant Dieu. Toutes
ces ioyes m'ont esté d'autant plus sensibles,
que ie les ay goûtées avec la douce liberté
que ie respirois il y a long temps : & qu'en
fin V. R. m'a accordée nous enuoyant le R.
P. Vimont, la vertu duquel reparera tous
les defauts que j'ay commis dans la charge
que ie luy ay remise entre les mains. Il
m'a fait entendre que V. R. desiroit que ie
traçasse encore cette année la Relation,
commençons.

CHAPITRE PREMIER.

*De la joye qu'a receu la Nouvelle France
pour la Naissance de Monseign. le
Daulphin, & d'un conseil que
tindrent les Sauvages.*

LE retardement de la flotte bien ex-
traordinaire cette année nous iettoit

dans l'impatience, quand vn vaisseau paroissant quarante lieuës au dessous de Kébec, enuoya vn petit mot de lettre à Monseigneur nostre Gouverneur. Tout le monde accourt pour sçauoir des nouuelles, mais le papier ne disant mot de la naissance de Monseigneur le Daulphin arrestoit le cours de nostre joye. Nous auions appris l'an passé que la Reine estoit enceinte, & nous attendions vn enfant de benediction & de miracle; nous croyons tous que les dons de Dieu seroient parfaits, & que nous aurions vn Prince. Ce vaisseau qui nous deuoit donner cette premiere nouuelle n'en dit mot. Il nous aduertit seulement qu'il en venoit d'autres desquels il s'étoit separé sur mer dans des brunes fort épaissies. En fin les vents se rendans fauorables à nos desirs, nous apprismes que le Ciel nous auoit donné vn Dauphin. Ce mot de Dauphin ne sortit pas si tost de la bouche des Mellagers, que la ioye entra dans nos cœurs, & les actions de graces dedans nos ames. La nouuelle fut bien tost répandue par tout, on chante le *Te Deum laudamus*, on prepare des feux de rejouissance avec tout l'artifice possible en ces contrées. Messieurs de la Nouvelle France recommandoient les

4 *Relation de la Nouvelle France,*
actions de ioye, mais toute leur recomman-
dation ne seruit qu'à donner vne preuue de
leur amour enuers ce nouveau Prince; car
deuant que leurs lettres eussent paru, la ioye
s'estoit desia emparée de nos cœurs, & tous
les ordres estoient donnez par Monsieur
nostre Gouverneur, pour la faire paroistre
deuant Dieu, & deuant les hommes. On
fait voler des feux au Ciel, tomber des
pluyes d'or, briller des estoilles, les serpen-
taux brûlans courent par tout, les chan-
delles ardentes éclairent vné belle nuit :
bref, le Canon fait vn grand tonnerre dans
les Echos de nos grands bois. Les Hurons
qui se trouuerent presens mettoient la main
sur leur bouche en signe d'admiration &
d'étonnement. Ces pauures Sauvages
n'ayans iamais rien veu de semblable, croy-
oient que l'empire des François s'étendoit
iusques à la Sphere du feu, & que nous fai-
sions de cét Element tout ce qui nous ve-
noit en pensée.

En suite de merueille, on leur fit en-
tendre que Monseign. le Cardinal contri-
buoit puissamment à l'entretien des Ou-
riers Euangeliques qu'on enuoyoit en leur
pays; ce qui les fit passer au delà de l'eston-
nement; & n'étoit qu'ils sont Chrestiens,

iamais ils n'auroient pû croire qu'on peut rencontrer sur la terre des hommes qui voulussent faire des despenſes pour les ſecourir au bout du monde, ſans autre intereſt que le bien de leurs ames, & de la gloire de noſtre Seigneur, dont les barbares ne ſe ſoucioient guieres deuant que la foy leur euſt ouuert les yeux.

Noſtre joye ne ſe contint pas dans l'éclat de nos feux, nous fiſmes quelque temps apres vne proceſſion qui auroit rauy toute la France ſi elle auoit paru dans Paris. Deuant que d'en parler il faut que ie diſe deux mots des preſents de ſa Maieſté, qui parurent en ceſte action ſi ſaincte, que nous offriſmes à Dieu en action de graces de ſon Daulphin, & pour vne marque que la Nouvelle France reconnoiſſoit auec ſon Roy la Sainte Vierge, comme la Dame & Protectrice de ſa Courõne, & de tous ſes Eſtats. L'année paſſée vn Sauuage Canadien, fils d'un nommé *18anchy*, Capitaine Sauuage, bien connu des François, eſtant paſſé en France, fut veu d'un fort bon œil de ſa Maieſté, aux pieds de laquelle il poſa ſa Couronne de Porcelaine, pour marque qu'il reconnoiſſoit ce grand Prince au nom de tous ces peuples pour leur vray & legitime Mo-

marque. Le Roy & la Reine tous remplis d'amour pour le salut de ces pauvres peuples luy firent voir leur Daulphin; & apres plusieurs marques de bienueillances, luy firent presents de six paires d'habits vrayment royaux; Ce n'est que toile d'or, velours, satin, panne de soye, écarlatte, & le reste à l'aduenant. Ce ieune Sauvage estant de retour en son pays, monta iusques à Kebec avec vne escoüade de ses Compatriotes, vint trouuer monsieur le Cheualier de Montmagny, nostre Gouverneur, auquel ces presents furent apportez. Il se trouua pour lors des Sauvages Hurons, des Algonquins, & des Montagnets, qui tous ensemble admirerent la bonté de nostre Prince, qu'ils appelloient leur Roy. Or comme on vint à faire l'ouuerture de ces presents, on iugea à propos pour répandre l'honneur du Roy parmi ces peuples; & pour éviter la ialousie qui pourroit naistre parmy ces barbares si vne seule nation ioüissoit de ces faueurs de lesdistribuer à plusieurs, veu même que ce Sauvage estoit allé rendre hommage au Roy, non pas seulement au nom de son pere & de sa nation, mais encore au nom des autres nations du pays. On donna donc trois habits magnifiques à ce ieune

Sauuage, l'un pour luy, l'autre pour son fils, & le troisieme pour son Pere. Comme on songeoit à qui on distribueroit les trois autres, Monsieur nostre Gouverneur dit qu'il falloit choisir trois Chrestiens Sauuages de trois nations, que sa Maiesté agréeroit ce dessein, puis qu'elle mesme auoit demandé à ce Sauuage s'il n'étoit point encore baptisé, & s'il n'étoit point sedentaire, donnant à connoistre par cette demande l'affection qu'elle porte aux nouveaux Chrestiens arrestez aupres de nous pour professer nostre creance. Quand ie vins à declarer à trois de nos Chrestiens les presents que le Roy leur faisoit, les exhortans à prier pour sa Maiesté, & pour son Dauphin, ils furent tous estonnez : puis en prenant la parole, ils firent vne response que ie n'attendois pas de la bouche d'un Sauuage. Nikanis, dis à nostre Capitaine qu'il escriue à nostre Roy (c'est ainsi qu'ils parloient) que nous le remercions, & que nous l'admirons; & que quand il ne nous auroit rien enuoyé, nous ne laisserions pas de l'aimer. Au reste, garde toy mesme ces habits, car nous ne nous en voulons point seruir, sinon qu'ad on marchera en priant Dieu pour luy & pour son fils, & pour sa femme,

8 *Relation de la Nouvelle France,*

(il vouloit dire qu'ils ne s'en seruiroient point, sinon quand on feroit quelque Procession pour le Roy, pour la Reine, & pour Monseigneur le Daulphin) & quand nous serons morts, si toy ou tes freres, faites prier Dieu pour le Roy, faites porter ces habits à nos enfans, afin que ceux qui viendront apres nous sçachent l'amour que nostre Roy nous a porté. Venons maintenant à la premiere procession qui s'est faite avec ces habits magnifiques.

Le iour dédié à la glorieuse & triomphante Assomption de la sainte Vierge fut choisi : Dès le grand matin nos Neophytes Chrestiens vindrent entendre la sainte Messe, & se confesser & communier. Tous les autres Sauvages qui estoient pour lors es environs de Kebec se rassemblerent, nous les mismes dans l'ordre qu'ils deuoient tenir. La procession commençant à marcher, la Croix & la banniere passoient deuant : Monsieur Gand venoit apres, marchant en teste des hommes Sauvages, dont les six premieres estoient reuestus de ces habits royaux, ils alloient tous deux à deux fort posément, avec vne belle modestie. Apres les hommes marchoit la fondatrice des Ursulines, tenant à ses costez trois ou

quatre filles Sauvages vestuës à la françoise, & en suite venoient toutes les filles & femmes des Sauvages en leur propre habit, gardant parfaitement bien leur rang, suivoit le Clergé, apres lequel marchoit monsieur nostre Gouverneur, & nos François, & puis nos Françoises, sans autre ordre que celui de l'humilité.

Si tost que la Procession commença à marcher, les Canons firent vn tonnerre qui donna vne sainte frayeur à ces pauvres Sauvages, nous marchasmes à l'Hospital, où estans paruenus, tous les Sauvages se mirent à genoux d'vn costé, les François de l'autre, & le Clergé au milieu; alors les Sauvages prièrent tous ensemble pour le Roy, remercièrent Dieu de ce qu'il luy auoit donné vn Dauphin : Ils prièrent encore pour la Reine, & pour tous les François, & ensuite pour toute leur nation; puis se mirent à chanter les principaux articles de nostre creance. Cela fait, le Clergé, Monsieur le Gouverneur, & les principaux de nos François & des Sauvages entrèrent en la Chappelle dédiée au Sang de Iesus-Christ, où ils prièrent pour les mesmes sujets. Au sortir de l'Hospital, on tire droit aux Ursulines : Passant deuant le Fort, les

10 *Relation de la Nouvelle France*,
Mousquetaires firent vne saluë fort gentille,
& le Canon redoubla ses foudres & ses
tonnerres; nous gardasmes les mesmes ce-
remonies, les Religieuses chantants l'*Exau-*
diat, rauirent nos Sauvages, & resioüirent
fort nos François, voyât que deux Chœurs
de Vierges, chantoient les Grandeurs de
Dieu en ce nouveau monde. Au sortir des
Vrsulines, nous tirasmes droit à l'Eglise dás
la mesme modestie, & dans le mesme ordre
que nous en estions partis. Nous reïteras-
mes encore les prieres en langue sauuage à
la porte de la Chappelle, puis rentrans dans
l'Eglise, nous terminasmes la Procession, la-
quelle estant finie, monsieur le Gouverneur
fit vn festin à vne centaine de Sauvages,
ou enuiron; nous prîmes avec nous les fix
qui estoient vestus à la royale, que nous fis-
mes manger en nostre maison. Apres le dis-
ner, ils assisterent à Vespres avec les mesmes
liberalitez du Roy; quelques vns d'eux
n'auoient rien de sauuage que la couleur ba-
zannée, leur port & leur démarche étoit
pleine de grauité & de bonne grace. Les
Vespres dites, nous les pensions congédier,
mais l'vn d'eux me dit que les plus appa-
rens des Sauvages assemblez dans nostre
Salle, m'attendoient pour tenir conseil; ie

m'y transporte pour les écouter, voyant qu'ils entroient en discours, ie fis aduertir le R. P. Vimont de ce qui se passoit, lequel nous amena monsieur le Gouverneur, & Madame de la Pelterie, qui ne se pouvoit saouler de voir la deuotion de ces bonnes gens. Tout le monde estant assis, vn Capitaine me parla en cette sorte: Sois sage, Pere Le Jeune, demeure en repos, ne laisse point égarer ton esprit, afin que tu ne perdes rien de ce que ie vay dire. Ho, ho, luy fis- ie! m'accommodant à leur façon de faire; Ce n'est pas moy, dit-il, qui parle, ce sont tous ceux que tu vois là assis, lesquels m'ont donné charge de te dire que nous desirons tous croire en Dieu, & que nous souhaitons d'estre aydez à cultiuer la terre pour demeurer aupres de vous. Tn nous auois fait esperer qu'il te viendrait beaucoup de monde, & maintenant tu n'en as que fort peu. Sus donc, dis à nostre Capitaine qu'il écriue à nostre Roy, & qu'il luy dise ainsi; Tous les Sauuages vous remercient, ils s'estonnent que vous pensiez en eux; ils vous disent; Prenez courage, aydez nous puis que vous nous aimez, nous voulons nous arrester, mais nous ne sçaurions faire des maisons comme les vostres, si vous ne

12 *Relation de la Nouvelle France*,
nous aydez : Dis à ton frere qui est venu en
ta place qu'il écriue aussi, écris toy mesme,
afin qu'on croye que nous disons vray. Voi-
la le stile des Sauvages. Celui-cy ayant
finy sa harangue, vn autre prit la parole, &
dit ; Pere le Jeune, ie ne suis pas de ce pays
cy, voila ma demeure dans ces Montagnes
vers le Midy, il y a fort long temps que ie
n'estois venu à Kebec : Ces hommes que tu
vois m'estans venu visiter en mon pays,
m'ont dit que tu faisois bâtir des maisons
pour les Sauvages, que tu les aydois à culti-
uer la terre : Ils m'ont demandé si ie ne te
voulois point venir voir pour demeurer au-
pres de toy avec les autres : Ie suis venu,
i'ay veu que tu auois commencé, mais que tu
n'as pas fait beaucoup de choses pour tant de
personnes que nous sommes. Sus, prend
courage, tu dis de bonnes choses, ne ments
point, ie m'en vay encore dans les froidures
de nos Montagnes pour cét Hyuer, au Prin-
temps qu'il y aura encore de la neige sur la
terre, ie viendray voir si tu dis vray, & si tu
as des hommes pour nous ayder à cultiuer
la terre, afin que nous ne soyons plus com-
me les bestes qui vont chercher leur vie
dans les bois. A ces paroles tout le mon-
de fut touché de compassion : Monsieur le

Gouverneur promit de faire ce qu'il pourroit de son costé , le Reuerend Pere Vimont estoit quasi dans l'impatience , voyant que faute de secours temporel , Sathan tenoit tousiours ces pauvres ames sous son Empire : Madame de la Pelterie s'écria : Helas, que les dépenses d'vne seule collation de Paris, & d'vn seul ballet qui ne dure que deux ou trois heures saueroient d'ames en ce pays-cy ! ie n'ay guiere amené d'hommes de trauail , mais ie feray ce que ie pourray pour secourir ces bonnes gens ; Mon Pere, me dit elle, assurez - les que si ie les pouuois ayder de mes propres bras, ie le ferois de bon cœur, ie tascheray de planter quelque chose pour eux. Ces bons Sauvages entendants son discours, se mirent à rire, disans que les bleds qui seroient faits par des brs si foibles, seroient trop tardifs : **La conclusion** fut qu'on feroit vn effort pour les secourir au Printemps.

Ieles consolay merueilleusement, quand ie leur dis que le Capitaine qui auoit commencé la Residence de Saint Ioseph , auoit donné dequoy entretenir tousiours six ouuriers pour eux , & que même apres sa mort , les ouuriers ne

laisseroient pas de trauailler : ils ne pou-
uoient pas comprendre comment cela se
pouuoit faire , ny pourquoy ces ouuriers
n'alloient pas prendre tout à la fois l'argent
qu'il laissoit pour eux , ny comme vn
homme mort pouuoit faire trauailler des
hommes viuans ; car ils ne sçauent que c'est
de laisser des rentes ny des reuenus. Pleût
à Dieu que plusieurs personnes abondan-
tes en richesses voulussent prendre la de-
uotion de ce grand homme , ce n'est pas
perdre au change de donner la terre pour
le Ciel.

On demanda à mesme temps à Ioan-
ch^s , & à son fils qui auoit esté en Fran-
ce , s'ils ne vouloient point estre de la
partie , ils respondirent qu'ils s'en iroient
consulter leurs gens , que s'ils auoient de
l'affection de monter çà haut, ils les amene-
roient.

Or ie fus bien aise de parler des gran-
deurs de la France deuant vn Sauuage
qui en reuenoit. Reprochez moy main-
tenant mes menfonges , leur disois-ie ,
demandez à vostre Compatriote si ce que
ie vous ay dit de la grandeur de nostre
Roy , & de la beauté de nostre pais ,
n'est pas veritable : & ne reuoquez plus

en doute, ce que ie vous diray d'oresna-
uant. Ce bon Sauvage disoit des mer-
ueilles ; mais selon sa portée , & qaoy
qu'il eut bien admiré des choses, & en-
tre autres le grand peuple de Paris , grand
nombre de rotisseries , ce grand Saint
Christophle de Nostre Dame qui luy
donna de la terreur à son premier re-
gard , les Carosses qu'il appelloit des ca-
banues roulantes tirées par des Orignaux,
si est-ce qu'il auoit que rien ne l'auoit
tant touché que le Roy, le voyant mar-
cher le premier iour de l'an avec ses
gardes , il regardoit attentiuement tous
les soldats marchants en bon ordre, les
Suisses luy donnerent fort dans la veuë,
& leur tambour dans la teste ; Au sortir
de là , il demeura le reste du iour sans
parler , à ce que m'a dit le Pere qui l'ac-
compagnoit , ne faisant que peuser à ce
qu'il auoit veu. Il racontoit tout cela à
ses gens qui l'écoutoient avec auidité. La
pieté du Roy nous seruit puissamment
pour honorer nostre creance , car ce bon
Canadien confessa que la premiere fois
qu'il veit le Roy , ce fut en la maison de
prieres , où il prioit I E S V S comme on
le fait prier icy. Il dit encore publique-

16 *Relation de la Nouvelle France,*
ment que le Roy luy auoit demandé s'il
estoit baptizé, ce qui nous seruit & ser-
uira encore pour faire entendre à ces
pauures peuples l'état que fait ce grand
Prince de la doctrine qu'on leur ensei-
gne. Bref, si tost que ce Sauvage eut
veu le Roy, il dit au Pere qui le con-
duisoit, allons nous en, j'ay tout veu, puis-
que j'ay veu le Roy.

Pour conclusion de ce Chapitre, nos
Sauuages, notamment les Chrestiens,
voyans que sa Maiesté leur auoit enuoyé
des habits à la Françoisse, se determine-
rent d'enuoyer vne petite robe à la Sau-
uage à Monseigneur le Daulphin. Com-
me ils me la presenterent, ils eurent bien
l'esprit de me dire, ce n'est pas vn pre-
sent que nous luy faisons, car il a bien
d'autres richesses que les nostres, mais
c'est vn metagagan, vn petit ioüet pour
recreer son petit Fils qui prendra peut-
estre plaisir de voir comme nos enfans
sont vestus. Nous enuoyons ceste peti-
te robe à V. R. neantmoins comme la pe-
tite verolle attaque viuement nos Sauua-
ges, ie ne sçay s'il est à propos de la
presenter, de peur qu'elle ne porte tant
soit peu de mauuais air avec soy; il est
vray

vray que ie l'auois entre mes mains deuant
que le mal attaquaſt ceux qui me l'ont con-
fiée, mais quand il s'agiſt d'une perſonne
ſi ſacrée, il faut craindre de mille lieux
loing.

CH A P T. II.

*Des Religieuſes nouvellement ariuées en la
Nouvelle France, & de leur
employ.*

C'A donc eſté cette Année que Mada-
me la Duchefſe d'Aiguillon a dreſſé
& fondé vne maiſon à Dieu en ce nouveau
monde, pendant que Dieu luy en prepa-
re vn autre dans les Cieux : Et ils ſ'eſt trou-
ué vne Amazone qui a conduit & eſtably
des Vrfulines en ces derniers confins du
monde. Et c'eſt choſe bien remarqua-
ble, qu'en meſme temps que Dieu touchoit
à Paris le cœur de madame la Duchefſe
d'Aiguillon, & luy inſpiroit de baſtir vn
Hoſtel-Dieu pour nos Sauuages qui mou-
roient dans les bois abandonnez de tout
ſecours, & qu'elle iettoit les yeux pour

ce dessein sur les Religieuses Hospitalieres de Dieppe, il suscitoit en vn autre endroit de la France vne hōneste & vertueuse Dame, & l'inspiroit d'entreprendre le Seminaire des petites filles des Sauuages, & d'en donner le gouuernement aux Ursulines; & a tellemēt disposé les affaires, que sans que l'vne sceut rien du dessein de l'autre, il s'est trouué accompli en mesme temps, afin que ces bonnes Religieuses eussent la consolation de trauerser ensemble l'Ocean, & que les Sauuages receussent en mesme temps ce double seruice également necessaire. Je ferois tort au desir raisōnable de plusieurs, si ie ne disois icy vn mot de la conduite de cette hōneste Dame dans toute son entreprise, elle est natieue d'Alençon, & se nomme Magdelaine de Chauuigny, fille de feu Monsieur de Chauuigny, seigneur de Vaubegou, & Presidēt des Eleuz en l'Electiō d'Alençon: Dès son bas aage elle fit tout son possible pour entrer en Religion, & cōmēçoit deslors à practiquer les œuures de pieté & charité Chrestienne; Mais monsieur son pere l'obligea de se marier à vn honneste Gentil-homme nōmé Monsieur de la Pelterie, qui la laissa veufue cinq ans & demy apres le mariage, & sans enfans,

n'ayant eu d'elle qu'une fille, qui mourut
incontinēt apres le Baptême: Si tost qu'elle
se veit veufue, elle commença par la le-
cture des Relations que nous enuoyons
tous les ans à penser à bon escient aux
moyens de contribuer à l'instruction des
petites filles Sauvages, & fit faire à cette
intention quantité de prieres: car ayant re-
solu de se sacrifier entierement elle mes-
me, & tout ce qu'elle pouuoit legitime-
ment de son bien à la diuine Maïesté,
elle desiroit sçauoir de Dieu s'il auroit a-
greable que ce fut à la Nouvelle France;
comme elle estoit en ce doute, la prouiden-
ce de dieu se seruit d'une forte maladie qui
la mit si bas en peu de temps, que les Me-
decins desesperans de sa santé, l'abandon-
nerent: comme elle se veit en cēt estat, elle
se sentit fortement inspirée de faire vœu,
de consacrer ses moyens & sa personne à
la Nouvelle France sans en rien communi-
quer à personne. Un peu apres le Medecin
arriuant, la trouua en bien meilleur estat, &
sans sçauoir ce qu'elle venoit de faire, ny
chose aucune de son dessein, luy dit; Ma-
dame, vostre maladie est allée en Canada,
il parloit mieux qu'il ne croyoit, & fit rire
le malade, qui fut extremémēt aise de voir

20 *Relation de la Nouvelle France,*
par cét effect si extraordinaire que Dieu
acceptoit son sacrifice : Estant donc re-
uennë en pleine sante , elle ne fit plus que
penser à l'exécution de son dessein. Mais
Mr son Pere, qui viuoit encore, la pres-
soit cependant de se remarier, iusques - là
qu'il la menaça à bon escient de la deshe-
riter si elle ne luy obeyssoit : comme elle
veit que son Pere parloit à bon escient,
& qu'à taute d'vser de quelque cōdescen-
dance elle se mettoit en danger de rui-
ner tout son pieux dessein; elle prit resolu-
tion de feindre qu'elle vouloit se remarier,
& par ce moyen se remit en la bonne gra-
ce de son Pere , qui sur ces entrefaictes
passa de cette vie à l'autre. Lors sans dif-
ferer, ayant partagé son bien avec sa sœur,
elle vint à Paris en Ianuier, & là ayant con-
feré de son entreprise avec plusieurs
saints & doctes personages qui l'approu-
uerent, s'en alla à Tours, où il y auoit vne
Vrsuline de sa cognoissance fort vertueuse
& tres-zelée, qui depuis long-temps soupi-
roit apres la Nouvelle France. Il n'est pas
croyable comme elle fut bien receuë de
Monseigneur l' Illustissime & Reuerendis-
sime Archeuesque de Tours qu'elle alla sa-
luer , & luy declara naïfvement tout son

dessein. Ce venerable Prelat tres-affectionné au salut des Ames, admirant le courage & la vertu de cette Dame, & luy ayant fait paroistre les grandes affections qu'il auoit pour les missions de la Nouvelle France, luy promit tout le secours & l'assistance qui dépendoit de luy. Les Vrsulines d'autre part la receurent à bras ouuerts, & passant par dessus mille difficultez, luy accorderent la Religieuse qu'elle demandoit, & pour compagne luy dōnerent vne autre Religieuse pleine de courage & de vertu, fille de Monsieur de Sauoniere, Seigneur de la Troche & de Saint Germain en Anjou, qui ayant de premier abord résisté à ce choix qu'on auoit fait de sa fille pour ce dessein, y dōna par apres son consentement avec Madame sa femme, par des lettres si pleines de pitié & de vertu Chrestienne, qu'elles meritoient d'estre communiquées au public. Madame de la Pelterie ayant obtenu si heureusement à Tours ce qu'elle desiroit, s'en alla prendre congé de Monseigneur l'Archeuesque, & par son commandemēt, luy amena les deux Religieuses choisies pour ce dessein. Ce fut là qu'il receut vne singuliere cōsolation, contemplant ces trois charitables Ames com-

22 *Relation de la Nouvelle France,*

me trois victimes qui s'alloient immoler à tant de croix iusques au bout du monde; Et comme à raison de son infirmité il ne pouuoit celebrer la Saincte Messe, il voulut cōmunier avec elles à la Messe qu'il fit dire en sa Chappelle particuliere, & puis il leur donna sa saincte benediction, à laquelle il adiousta vne courte, mais tres feruente exhortation, entremeslée de larmes, pour leur recommander les vertus & la ferueur necessaire à cēte entreprise: la Nouvelle France luy aura à iamais de tres-particulieres obligations. Madame de la Pelterie bien contente s'en reuient à Paris, emmenant avec elles les deux Ursulines, où estāt arriuée, elle s'efforce d'obtenir vne troisiēme Ursuline de la Congregation de Paris, qui differe vn peu de celle de Tours, afin de dōner moyen aux vnes & aux autres de trauailler au salut des Sauuages, & peut estre commencer l'vnion des deux Congregations tant souhaittée, mais elles ne peurent obtenir ce qu'elles desiroient, nous n'en auons pas encore pū sçauoir la cause, seulement sçay-ie bien qu'ne tint point aux Ursulines de Paris, qui depuis douze ans sont dans vne ferueur incroyable pour la Nouvelle France, & qui au lieu d'vne re-

ligieuse, en eussent fourny plusieurs autres, & sont encore toutes prestes de les donner, aussi furent elles bien mortifiées se voyant priuées de ceste occasion qu'elles auoient si long temps attendu. La bonne Fondatrice ne perd pas pourtant courage, mais continuant dans le dessein qu'elle auoit de mener vne Ursuline de la Congregation de Paris, elle s'adresse à Monseigneur l'Illustrissime & Reuerendissime Archeueque de Rouen, le sollicitant par l'entremise, de quelque personne de vertus & de pieté de luy donner vne troisieme Ursuline du Conuent de Dieppe vny à celuy de Paris : ce qu'il accorda avec mesme zele qu'il auoit donné à Madame la Duchesse d'Aiguillon les trois Religieuses Hospitalieres. C'est vne double obligation que la Nouvelle France luy aura à iamais. Ainsi la Mere Cecile de la Croix, Ursuline, fut choisie dans le Conuent de Dieppe pour se ioindre aux deux autres qui en furent fort consolées, comme estant bien portées à l'vnion des deux Congregations. Et pour monstrier que Madame de la Pelerie n'auoit pas plus d'affection pour les vnes que pour les autres, elle n'a iamais voulu contracter avec aucune maison d'Ursuline de

24 *Relarion de la Nouvelle France,*
France, mais seulement avec les Ursulines
qui ont leur Obedience pour la Nouvelle
France, & a attaché sa donation à l'vniue
maison des Ursulines erigée en la Nouvel
le France. l'aurois icy à dire beaucoup de
choses de la vertu signalée, & du zele incō
parable de la personne de laquelle s'est fer
uie ceste bonne dame pour la conduite de
toute son entreprise qui rauroit les cœurs
de ceux qui le liroient, mais la modestie
ne me permet pas seulement de le faire co
gnoistre, il se contente que Dieu se soit
voulu seruir de luy pour assister en son des
sein ceste Dame incomparable, qui seruira
de modèle à tous ceux qui auront le cou
rage de l'imiter & ensuiure. Reuenons à
nostre Histoire.

Quand on nous vint donner auis qu'une
barque alloit surgir à Kebec, portant vn
College de Iesuites, vne maison d'Hospi
talieres, & vn Conuent d'Ursulines; la pre
miere nouvelle nous sēbla quasi vn songe,
mais en fin descendans vers le grād fleue,
nous trouuâmes que c'estoit vne verité.
Cette saincte troupe sortant du vaisseau,
se iette à deux genoux, beny le Dieu du
Ciel, baisans la terre de leur chere patrie,
c'est ainsi qu'ils appelloient ces contrées,

tout le monde regardoit ce spectacle dans vn silence : On voyoit sortir d'une prison flotante ces vierges consacrées à dieu, aussi fraisches & aussi vermeilles, que quād elles partirent de leurs maisons : Tout l'Océan avec ses flots & ses tempestes n'ayant pas alteré vn seul petit brin de leur santé. Monsieur le Gouverneur les receut avec tout l'accueil possible, nous le conduisîmes à la Chappelle, on chanta le *Te Deum laudamus*, le Canon retentit de tous costez, on beny le Ciel & la terre, & puis on les conduisit aux maisons destinées pour elles, en attendant qu'elles en ayent de plus propres pour leurs fonctions. Le lendemain on les mene en la Residence de Sillery, où se retirèrent les Sauvages. Quand elles veirent ces pauvres gens assemblez à la Chapelle faire leurs prieres, & chanter les articles de nostre creance, les larmes leur couloient des yeux; elles auoient beau se cacher, leur ioye se trouuant trop resserrée dans leur cœur, se respendoit par leurs yeux. Au sortir delà, ils visitēt les familles arrestées, & les Cabanes voisines. Madame de la Pelterie qui conduisoit la bande, ne rencōtroit petite fille Sauvage qu'elle n'ébaisast & ne baisast, avec des signes d'amour

26 *Relation de la Nouvelle France,*

si doux & si forts, que ces pauvres barbares en restoient d'autant plus estonnez & plus edifiez, qu'ils sont froids en leurs rencontres ; toutes ces bonnes filles faisoient le mesme sans prendre garde si ces petits enfans sauvages estoient sales ou non, ny sans demander si c'estoit la coutume du pays, la loy d'amour & de charité l'emportoit par dessus toutes les considerations humaines. On fait mettre la main à l'œuvre aux Peres nouvellement arriuez; on leur fait baptiser quelques Sauvages, Madame de la Pelterie est desia maraine de plusieurs, elle ne se pouvoit cōtenir, elle se vouloit trouver par tout, quand il s'agissoit des Sauvages. Il luy arriua bien tost apres qu'elle eut mis pied à terre, que se voulant communier, elle ne veit à la sainte Table que mōsieur le Gouverneur, & des Sauvages, qui faisoient leurs deuotions se iour-là : Elle se iette parmy eux, non sans larmes de consolation, voyant la simplicité & la deuotion de ces bōs neophites. En effect, c'est vn doux plaisir de voir ces bōnes gens s'approcher de Iesus-Christ parmy nos François. Il faut confesser que Dieu se fait sentir en ces rencontres, sa bonté veut que ceux qui cooperent au salut des Sauvages goûtent quelque pe-

tit brin des faueurs qu'il fait à ces ieunes
plantes de son Eglise. Ces visites bien-
tost passées, on dresse des Autels dans les
Chappelles de leurs maisons, on y va dire
la sainte Messe, & ces bones filles se ren-
fermēt dans leur closture. Dans l'Hospital,
les trois Hospitalieres enuoyées par Mon-
seigneur le Reuerendissime Archeuesque
de Rouen, tres-zelé au salut des ames, &
tres-desireux de tesmoigner à Madame
d'Aiguillon les inclinations qu'il a de con-
tribuer de tout son pouuoir aux bonnes
œuvres qu'elle fait, ne pouuant mieux l'o-
bliger qu'en obligeāt les pauures Sa uages
leur dōnant pour secours vn des plus pre-
cieux thresors de son Diocese; Car ces bō-
nes filles, outre qu'elles sont tres-exactes
en la discipline & obseruance reguliere,
sont sans doute excellentes au soin & trai-
temēt des malades, tant pour le temporel,
que pour le spirituel. Les trois Vrsulines
se retirerent dans vne maison particuliere,
apres s'estre mutuellement embrassées les
vnes & les autres. Bien-tost apres nous
fismes dōner six filles sauages à Madame
de la Pelterie, ou aux Vrsulines; & quelques
filles Fraçoises commencerent de les aller
voir pour estre instruites: Si bien que les

voila desia dans l'exercice de leur institut, mais si iamaïs elles ont vne maison bié capable, & bien dequoy nourrir les enfans sauvages, elles en auront peut-estre iusques à se lasser, Dieu veuille que les grands frais ne retardent leur dessein, les despences qu'on fait icy sont fort grandes, mais Dieu l'est encore plus.

Pour l'hospital, les Religieuses n'estoient pas encore logées, leur bagage n'estoit pas encore arrivé, qu'on leur amena des malades, il fallut prester nos paillasses & nos matelats pour exercer cette premiere charité. O que j'ay souvent souhaitté que madame la Duchesse d'aiguillon veist seulement pour trois iours ce qu'elle a commencé d'operer en ces contrées; les filles qu'elle nous a enuoyé ne se pouuoient contenir d'aïlle, elles auoient des malades, & n'auoient pas dequoy leur donner, mais la charité de Monsieur nostre Gouverneur est rauissante. Si fallut-il refuser de pauvres Sauvages affligez, on ne peut pas tout du premier coup, nous esperõs que Madame la Duchesse faisant croistre le secours, fera croistre la misericorde enuers les pauvres malades de sa maison, disons plustost de la maison de Dieu. Si les Sauvages sont

capables d'estonnement, c'est icy qu'ils le prennent; car parmy eux on ne tient conte des malades, notamment si on les iuge malades à la mort, on les regarde desia comme des gens de l'autre monde, avec qui on n'a, ny commerce, ny paroles. Or comme ils voyent les caresses & les soins qu'on a de leurs Compatriotes, cela leur fait concevoir vne grande estime de celuy pour lequel on leur preste ces grands secours, qui est I E S V S- C H R I S T nostre Sauueur.

Mais voyons, s'il vous plaist, les desseins qu'a eu Madame d'Aiguillon en la fondation de cette maison. Voicy comme elle en parle dans la lettre qu'elle rescriuit à la Mere Superieure des Hospitalieres qui s'ont icy passées: Ma bonne Mere, ie louë Dieu de la resolution que vous avez prise de passer en la Nouvelle France, dont ie vous suis extrememēt obligée, & aux deux bonnes sœurs qui vous y accompagnent. I'ay aussi beaucoup de ioye de ce que Nostre Seigneur vous a choisie pour cela, ayant vne tres-particuliere estime de vostre merite, i'espere que cela reparera tous les manquements qu'il y a de ma part, & que Dieu par sa bonté aura plus d'égard à vos vertus,

30 *Relation de la Nouvelle France,*
qu'à mes defauts. Je vous veux dire le
dessein que j'ay eu faisant cette fondation,
c'est de dedier cet Hospital au Sang du Fils
de Dieu, respandu pour faire misericorde
à tous les hommes, & pour luy demander
qu'il l'applique sur nos Ames, & sur celles
de ce pauvre peuple barbare. Je vous fais
part de mes intentiōs, afin que vous les of-
friez à nostre Seigneur, & qu'allant faire
la fondation, vous luy dediez selon cela,
& que vous faciez mettre sur la porte:
Hospital dedié au Sang du Fils de Dieu,
répandu pour faire misericorde à tous les
hommes. Si on ne trouue pas à propos
que ceste Inscription soit sur la porte, ie
desire que toutes les Religieuses sçachent
que c'est-là mon intention dans la fonda-
tion, & qu'elles s'employent au seruice des
pauures avec ceste intention. Je desire de
plus, que le Prestre qui dira tous les iours
la Messe ait pareille intention. J'ay bien
du regret de ne vous pouuoir embrasser &
vos bonnes Sœurs qui passent avec vous,
& vous prier moy mesme de demander à
nostre Seigneur qu'il me face misericorde.
Ce m'a esté vne grâde consolation de voir
ces bonnes Ursulines qui vont aussi à Ke-
bec avec Madame de la Pelterie, on m'a

en l'année 1639.

31

promis que vous serez toutes en mesme
vasselau. (Et plus bas) Assurez-vous, ma
Mere, que ie vous seruiray en vostre parti-
culier avec beaucoup de passion, & vostre
maison nouuelle, & que ie seray toute ma
vie,

Ma bonne Mere,

Vostre tres affectionnée à vous
faire seruice,

DV PONT.

En marge sont escrites ces paroles.

Ma bonne Mere, obligez moy de pren-
dre soin de faire demander aux Sauvages
que vous assisterez à la mort, le salut de
Monseigneur le Cardinal, celuy de quel-
ques personnes à qui i'ay de particulieres
obligations, & le mien, & que toutes vos
Relieuses me facent la mesme charité.

De Paris, ce 10. d'Avril 1639.

Les Lettres dont il luy a pleu m'honorer sont remplies de semblables affections, ie n'ay que ces deux mots à luy dire pour Responce.

Madame, que toute la France vous honore pour cette belle Couronne Ducale qui environne vostre Chef: ie vous assure que tous les diamants qui l'embellissent ne frappent ny mon cœur, ny mes yeux; leur esclat est trop foible pour trauerser la grandeur de l'Ocean, mais ie vous confesse que vostre cœur qui honore puissamment le Sang de I E S V S - C H R I S T me touche au vif, vous allez à la source de la vie, & personne ne peut aimer I E S V S, qu'il n'aime ceux qui cherissent & qui honorent son Sang. Sainte Terese ayant rendu quelque seruice à Nostre Seigneur, ce bon Prince luy dit ces belles paroles couchées à la fin du liure de sa vie: Ma fille, ie veux que mon Sang te profite, & que tu n'aye point de peur que ma misericorde te manque, ie l'ay respendu avec beaucoup de douleurs, & tu en ioüis avec de grandes delices comme tu vois. Ce sont, Madame les paroles que ie souhaite, que ce Roy des cœurs adresse à vostre cœur; seroit-il bien possible qu'une Ame qui honore

nore si amoureuxment le Sang de I E S V S-
CHRIST, n'en ressentist point les effects.
O mon Seigneur, ne le permettez pas
Amen, Amen.

Ceste grande Dame est desia payée de
ses aumosnes dès l'heure que i'escriis cecy,
plusieurs Sauvages ont desia prié pour elle
dans son Hospital, plusieurs y sont desia
morts, le premier auoit vescu comme vn
Saint depuis son Baptisme, il y est mort
comme vn Saint. Ce bon homme re-
gardoit la vie cōme vne prison, & la mort
comme vn passage à la vraye liberté. La
parole luy manqua par vne grande op-
pression de la poitrine, du moins on ne
l'entendoit quasi plus: mais quand on luy
eut recommandé de prier pour ceux qui le
secouroient si charitablement, s'efforça si
bien, qu'il pria tout haut pour M^oseigneur
le Cardinal, & pour Madame la Duchesse
d'Aiguillon, la mort luy couppa la parole
du corps, mais ne pût arrester la priere de
l'ame qu'il alla continuer dedās les Cieux.
Ie voulois faire porter son corps à Sillery
comme vn pretieux depest, & comme vne
Relique, mais les vents & la marée me con-
traignirent de le laisser à Kebec. Voicy vn

34 *Relation de la Nouvelle France,*
mot de Lettre du P. de Quen, qui fait voir
le bien qu'on fait à l'Hospital.

B Arnabémistikomã s'en retourne à Sil-
lery, sain du corps & de l'ame, cōme ie
croy, il s'est confessé & communié le ma-
tin en action de grace de sa santé, cela est
venu de luy mesme. Nous enterratmes hier
l'un des deux Algonquins que ie baptisay
auant hier, c'est celuy qui auoit vne playe
en la poictrine, son compagnon se porte
vn peu mieux qu'à l'ordinaire. Marie fem-
me de Noël Negabamat pensa mourir hier
au soir d'une grosse colique, & d'une forte
fièvre qui la trauaille encor, ie l'ay confes-
sé ce matin en intention de la communier,
mais la saignée l'en a empesché; Noël son
mary se porte mieux, il s'est confessé &
communié, ie croy qu'il vous retournera
voir dans peu de iours. Estienne Pyga-
rouïch voulant aller à la chasse aux Castors
vous a esté chercher iusques à Sillery pour
se confesser, ne vous ayant point trouué,
il m'est venu voir, ie l'ay confessé avec vne
grande satisfaction & contentement de
mon ame. Les autres malades vont à l'or-
dinaire, souuenez-vous à l'Autel de celuy

qui vous est, &c. Ne diroit-on pas que cet Hospital qui ne fait que de naistre est dressé depuis cent ans dans le cœur de la Chrestienté. Si la France voyoit la ioye, la modestie, & la charité des bonnes Religieuses qui le gouvernēt dans vne parfaicte closture & regularité, les Dames accoureroient à leur secours : c'est l'exercice des Emperieres & des Reines de secourir les pauvres de IESVS-CHRIST. Or il faut que ie dise en passant que voicy quatre grands ouvrages liez par ensemble d'un mesme nœud; l'arrest des Sauvages, l'Hospital, le Seminaire de petits garçons, & le seminaire des petites filles Sauvages. Ces trois derniers dépendent du premier. Faites que ces barbares soient tousiours vagabonds, leurs malades mourront dedans les bois, & leurs enfans n'entreront iamais au seminaire; rendez les sedentaires, vous peuplez ces trois maisons qui ont toutes besoin d'estre puissamment secouruës.

MESSIEURS de la Compagnie de la Nouvelle Frâce, pour inciter les Sauvages à s'arrester, ont accordé mesme faueur en leur magazin aux Chrestiens sedentaires, qu'aux François; ils ont encore

36 *Relation de la Nouvelle France,*
ordonné qu'on donneroit quelques terres défrichées aux ieunes filles qui se mari-
roient; de plus ils ont destiné tous les ans
vne somme d'argent pour faire quelques
présens aux Hurons Chrestiens qui vien-
dront se fournir de marchandises en leurs
magazins. Veritablement ces actions sont
louables, & dignes d'estre honorées des
hommes & des Anges.

Vn autre a bien secouru le seminaire des
petits garçons, & ceste année il s'est trou-
ué vne personne qui faisant vne aumosne
de cent escus, la fait employer en étoffes,
& en quelques viures, qui semblent auoir
esté enuoyez ceste année par vne tres par-
ticuliere prouidence de Dieu.

Vne personne de merite & de pieté a
fait donner cent escus pour le mariage
d'vne ieune fille Sauvage recherchée d'un
ieune homme François d'un fort bon na-
turel.

Messieurs de la Congregation de No-
stre Dame erigée à Paris donnent tous les
ans pour la nourriture d'un Sauvage. Ain-
si Dieu va tousiours disposant quelque
ame d'élite pour cooperer à son ouuage.

Je ne dis rien de la mission des Hurons
& des autres peuples sedentaires où la mois-

son est plus abondante: Toutes choses viendront en leur temps; ny le seminaire des filles, ny des garçons, ny l'Hospital, ny l'arrest des Sauvages, ny les missions es nations plus esloignez, ne manqueront point d'assistance. Bien-heureux ceux desquels le Dieu du Ciel se voudra servir pour ces grands ouvrages, soit y employâr leurs personnes, soit y contribuant de leurs biens, ou procurant que d'autres y contribuent.

CHAPITRE III.

Des bonnes dispositions des Sauvages pour la Foy.

TOUT ce que nous dismes l'an passé des benedictions que Dieu donne à ceste nouvelle Eglise, s'est augmenté sensiblement depuis ce temps-là malgré toutes les oppositions & tous les obstacles des Demons, & de leurs suppôts. Nous auons baptizé plus de Sauvages que les années precedentes. Les familles Sedentaires ont perseueré dans l'exercice du Chri-

38 *Relation de la Nouvelle France,*
stianisme, & en ont disposé d'autre à les
imiter : Les prieres se font publiquement
par tout. Les chants & les Tambours des
sorciens ou des jongleurs perdent leur cre-
dit. Le Nom de IESVS CHRIST se
va respendant comme vn baume odorife-
rant, qui se fait sentir bien loing dans ces
vastes contrées. Le bruit de nostre crean-
ce, & le secours qu'on a commencé de
donner à ceux qui se sont arrestez, a fait
descendre iusques aux trois Riuieres plus
de huit cens Algonquins, lesquels ont té-
moigné qu'ils ne s'approchoient de nous
que pour entrer dans la cognoissance du
vray Dieu, si bien que ie puis dire que nous
auons veu des Sauvages de plus de dix for-
tes de Nations fléchir le genoüil deuant
IESVS-CHRIST, prestans l'oreille à vn
langage qu'ils n'auoient iamais entendu: Je
ne dy pas qu'ils soient tous conuertis, mais
du moins ont-ils commencé à rendre quel-
que hommage à leur Dieu, assistans aux
prieres que leurs Compatriotes ou alliez
luy presentét en sa main. Or afin de garder
quelque ordre, voyons premierement les
obstacles que nous auons eu en l'instruction
des vns & des autres, & puis nous verrons
le bien que Dieu en a tiré.

Il ne faut pas penser que le Diable se rende , ny ses forteresses , sans combat. Quoy queles Sauvages témoignent qu'ils desirent estre instruits, ils n'ont pas tous vn mesme sentiment, ny la volonté également bonne. Les meilleurs d'entre eux sont preuenus dès le berceau de beaucoup d'erreurs , qui ne se déracent que petit à petit, à proportion que la lumiere & la grace entrent dans leurs ames. Comme ils ont esté affligez depuis quelques années de grandes maladies, & qu'ils s'imaginent quasi tous qu'ils ne meurent que par des sortileges. Deux étourdis d'entre eux voyans que tout le monde prestoit l'oreille à nostre creance, s'opposèrent à nous, crians que les prieres les faisoit mourir. L'vn deux vfa de menace enuers les Peres qui appelloient les Sauvages pour estre instruits en la Chappelle. Depuis, disoient-ils , que nous prions, nous voyons par experience que la mort nous enleue par tout ; d'autres adioustoient que les François estoient vindicatifs au dernier poinct , & qu'on nous auoit mandé de France que nous tirassions vengeance par vne mort generale de tous les pays de quelques François qui ont esté tuez par les

40 *Relation de la Nouvelle France,*
Sauuage il y a desia quelques années.

Vn certain forcier, ou plustost charlatan, homme de quelque credit parmy eux, voulut prouuer par nostre doctrine que nous leur causions la mort : Les François enseignent, disoit-il, que la premiere femme qui fut iamais a introduit la mort dedans le monde, ce qu'ils disent est vray, les femmes de leur païs sont capables de ceste malice, & c'est pour cela qu'ils les font passer en ces contrées pour nous faire perdre la vie à tous tant que nous sommes ; si le peu qu'ils ont desia fait venir a tant tué de monde ; celles qu'on attëd perdront tout le reste, (le Diable sentoit desia la venuë des Hospitalieres & des Vrsulines,) Tous ces mauuais bruits retardëent grandement la gloire de Nostre Seigneur, & le salut de ces pauures peuples, ç'a tousiours esté le dessein du malin esprit de decrier tant qu'il a pû ceux qui s'efforcent de tirer les ames des tenebres & du peché. La guerre qui est suruenüë lors que ces bruits sembloient assoupis, & la défaire des Algonquins, a puëssamment diuertty les esprits des bonnes penées que Dieu leur donnoit ; neantmoins comme pas vn de ceux qui sont baptisez n'a esté pris ou tué

dans le combat , ceste benediction en a confirmé plusieurs dans leur bonne volonté.

Bref, le peché ou l'accoustumance au vice est vne chaisne tres-difficile à rompre. Nous entendons tous les iours qui nous disent que nostre doctrine est bonne, mais que la pratique en est fascheuse. Les vns ont deux femmes qu'ils ayment, ou qu'ils leur sont vtiles pour leur ménage ; les autres sont en credit par quelque superstitiõ, qu'il faudroit quitter s'ils se faisoient baptizer. Les ieunes gens ne pensent pas pouoir perseuerer dans le mariage avec vne mauuaise femme, ou avec vn mauuais mary; ils veulent estre libres, & se pouoir repudier s'ils ne s'entr'ayment. Voila les principaux empêchemens exterieurs que nous auons eu dans l'exercice de nos fonctions ; Voyons maintenant comme les forces des Demons ne sont que des pailles, & comme les épines n'empeschent pas la naissance des roses.

Premierement , tous les Sauvages qui ont esté instruits, excepté fort peu , ont vne grande opinion de nostre creance: ils cryent qu'estre Chrestien , & ennemy des vices, c'est la même chose: C'est pour-

42 *Relation de la Nouvelle France,*
quoy quand on leur demande s'ils n'ont
point commis quelque mal, ils répondent:
ie prie Dieu, & par consequent ie ne com-
mets point ses actions : s'ils voyent quel-
que vice en vn François , ils disent fort
bien , qu'il ne croit pas , & qu'il descendra
dans les Enfers.

Ils viennent aux prieres publiques, ap-
portent leurs enfans pour estre baptisez,
demandent ce Sacrement avec affection;
i'entends ceux qu'on enseigne plus parti-
culieremēt; Bref on cognoist déjà par leur
déportemēs que la Foy opere dedans leurs
ames. Quand ces Algonquins arriuerent
aux trois Riuieres au nombre de plus de
cent canots, ils estoient extrememēt super-
bes & arrogans, notamment ceux de l'Isle.
Ayans ouïy la doctrine de IESVS-CHRIST,
on les a veu tellement changez , que nos
François mesme s'en estonnoient.

Vn certain de la petite Nation des Al-
gonquins ayant assisté aux prieres, & ouïy
chanter les Letanies des attributs de Dieu,
s'imprima cela si biē dans l'esprit, qu'il les
demanda par escrit; ce que luy estant ac-
cordé, il faisoit grand estat du papier qui
les contenoit : arriue que ce bon homme
retournant en son pays fit naufrage, tou-

ses ses marchandises furent perduës, luy & ses gens eurent la vie sauue; ce qui l'attristoit le plus, à ce qu'il dit par apres, estoit la perte de son papier, si bien qu'encor qu'il fut grandement éloigné de celuy qui luy auoit donné, il pensa retourner sur ses brizées pour luy en demander vn autre; mais il fut bien estonné quand il vit ce papier tout sain & entier entre les varangues de son canot réchappé du danger; il admiroit cela comme vn prodige, & le racontoit comme vn miracle à ses gens. Estant de retour en son pays, il assembloit tous les iours ses voisins dans vne grande cabane, pendoit ce papier à vne perche, & tous se mettans à l'entour, chantoient ce qu'ils sçauoient de ces Litanies, s'escrians tous à Dieu Chaserindamaginan ayez pitié de nous: Dieu prit plaisir à leur demande; car la maladie qui les affligeoit cessa entierement. Ce pauvre hommie reuenant voir nos Peres rapporta ce papier, & puis se retirant l'hyuer dans les bois pour faire sa prouision d'Elan, en demanda vn autre qu'il respectoit en la mesme façon. & comme il ne sçauoit pas encor par ceur les prieres qu'il faut presenter à Dieu, il luy offroi ce papier, & luy disoit avec tous les gens

44 *Relation de la Nouvelle France,*
si nous sçauions ce qui est dans ce papier,
nous te le dirions tous ; mais puisq̃ue nous
sommes ignorans , contente toy de nos
cœurs, & nous fais misericordē, toy qui
est nostre grand Capitaine. Estant par apres
de retour vers nos Peres , il leur dit que
rien ne luy auoit manqué, & que Dieu l'a-
uoit mis dans l'abondance.

Le Sorcier mesme , dont i'ay parlé cy-
dessus , lequel au commencement crioit
contre la venuë des femmes Françoises,
voyāt sa petite fille malade , n'eut point de
recours a son art , mais au Baptisme , qu'il
procura à son enfant ; & la santé du corps
luy estāt renduë avec la saincteté de l'ame,
ce charlatan ne cessoit de nous preconiser,
& nostre doctrine ; mais il faisoit comme
les cloches qui appellent le monde à l'Egli-
se, & n'y entrent iamais.

Vne chose nous attrista à la venuë de ces
Algonquins : Vn Capitaine Nipicirilien
venant aussi pour se faire instruire, tomba
si fort malade à la riuere des Prairies, en-
uiron trēte lieuës au dessus des trois Riuie-
res, qu'il en mourut : deuant que de rendre
l'ame, il dit à ses gens, Vous direz aux Fran-
çois que ie les allois voir pour apprendre
le chemin du Ciel, ie suis bien marry que ie

ne puis mourir auprès d'eux, ie me suis
presé tant que i'ay pû, mais la maladie ne
me permet pas de passer outre, pour vous
ne laissez pas de continuer vostre dessein
apres ma mort.

Vn autre Algonquin entendant parler
de Dieu, s'écria : Voila ce que ie desirois
entendre il y a long temps, & venant trou-
uer le Pere, il le pria de l'instruire plus par-
ticulieremēt, & pour ce faire, il venoit tous
les iours à nostre maison. A peine auoit-il
commencé cet exercice, que son fils tōba
fort malade, cela ne l'étonne point; il luy
pend au col vn chapelet, & venant voir le
Pere qui l'instruisoit, luy dit: Je n'ay rien de
si cher au monde que mes deux enfans,
voila desia mon fils malade, & en danger
de mort, quand luy & sa sœur mouroient,
ie ne quitteray point la resolution que i'ay
prise de prier Dieu, ie sçay bien qu'il est
le Maistre de nos vies; Ma femme & mes
enfans, & moy, adioustoit-il, estans tous
ensemble tombez dans vne grande mala-
die, il me vint vne pensée qu'il faillloit qu'il
y eut quelqu'un au monde qui eut soin des
hommes, ie l'inuoquay sans sçauoir son
nom, il nous guerit tous, quoy que nous
ne le cognussions pas, maintenant que nous

commençons à le cognoistre, il ne nous abandonnera pas; en effect son fils guerit bien tost apres, & il fut baptisé avec sa petite sœur, & leur grande mere. Ce pauvre homme voyant qu'il falloit partir sans Baptisme, la faim les pressât à cause qu'on ne leur pouuoit vendre de viures au magazin, disoit au Pere qui les auoit instruit, pourquoy me refusez vous le bié que vous auez accordé à mes enfans & à ma mere? toutes choses ont leur tēps, il ne se faut pas precipiter en choses de telle importance. C'est vne coûtume parmy ces peuples de faire festin à tout manger pour la guerison des malades: Or pour détourner petit à petit ceste superstition, vn de nos Peres ayāt prêché contre ces festins, dit publiquemēt que Dieu les haïssoit, mais qu'il se plaisoit aux œuures de charité, & par consequent qu'il falloit donner aux pauvres veufues & orphelins ce qu'on donnoit aux jongleurs & aux charlatans. Vn vieillard se souuenāt de cēt enseignement, & voyant sa fille malade, dit a son gendre qu'il s'en allast à la chasse, & qu'il demandast vn orignac à Dieu pour donner à manger aux pauvres, son gēdre obeït, tua ce grād animal; le bon vieillard fit son aumosne, & sa fille guerit.

Vne bande de Sauuages nous quittant p̄dant l'Automne pour aller hyuerner dedans les bois, nous racontoit au Printemps. comme Dieu les auoit secouru. Nous le prions tous les iours, disoient-ils, sans y manquer, si tost qu'on auoit tué quelque animal, on l'en remercioit sur la place même, comme celuy qui nous l'auoit donné; en effect il nous sembloit que nous tirions nostre nourriture comme d'une dépence piece apres piece: par exemple, ayans trouué vn Ours, nous estiōs quelque temps sans rien rencontrer, l'Ours estant mangé, nous disions à Dieu, nous n'auons plus rien, donne-nous nostre nourriture, tu es nostre Pere; aussi-tost nous trouuions de quoy viure, & Dieu nous a tenu fort long-temps comme cela, de sorte que nous nous en étournions, & disions que quād il n'y auroit plus rien dans nos sacs que Dieu en feroit venir. Si quelqu'un de nous faisoit quelque mal, aussi-tost les autres luy disoient; Fay ce que tu voudras, mais il faut que les Peres sçachent tout ce que nous faisons. De fait quand ils furent arriuez, ils nous declarent sans le demander tout le bien & le mal qu'ils auoient fait, se confessans tout haut deuant que d'estre baptisez.

48 *Relation de la Nouvelle France,*

J'ay fait mention cy-dessus des mauuais bruits & de la guerre qui retardoient le cours del'Euangile. Monsieur nostre Gouverneur mōtant aux trois Riuieres avecvne barque, & quelques chaloupes bien armées, leua ces obstacles; car encor biē que la contrarietē des vents, & la precipitation des Sauuages luy eussent ostē l'occasion de deffaire leurs ennemis qu'il alloit trouuer, neantmoins voyans la bōne volontē qu'un homme d'un tel merite auoit pour eux, ils se r'assemblerēt, & tindrent plusieurs conseils entr'eux, dans lesquels ils conclurent d'embrasser la foy Chrestienne, & de s'habiter aupres des François; en effect ils firent de bonnes & longues cabanes tout aupres de nostre habitatiō des trois Riuieres, nous dōnans vne belle occasion de les instruire. Les affaires de Dieu sont tousiours contrariées, tout procedoit heureusemēt, ils se rendoient assidus aux prieres qu'on leur faisoit faire à la Chappelle, & à l'explication du Catechisme qu'on faisoit le matin aux femmes, & le soir aux hommes. Quand la famine les contraignit d'aller chercher leur vie, qui deçà, qui delà dans les riuieres & dans les bois; le retardement des vaisseaux fut cause de ce malheur. Ce
nous

nous fut vne douleur bien sensible de voir partir d'aupres de nous bon nombre d'amestres-bien disposées faute de pouuoir secourir leurs corps. Enfin les vaisseaux ayans paru, apres auoir esté long temps attendus, ces pauvres ouïailles égarées se r'assemblerét petit à petit aupres de nous.

Comme ie finissois ce Chapitre, l'un des Peres de nostre Compagnie, qui sont aux trois Riuieres m'a r'écrit ce qui suit.

LA persecution recommence contre nous, la petite verolle, ou ie ne sçay quelle maladie semblable, s'estant iettée parmy les Sauvages, le Diable leur fait dire que c'est nous qui leur causons ceste cōtagion; ils disent tout haut que le Pere le Jeune est infailliblement l'autheur de la mort de Mantgetehîmat qui ne luy voulut pas obeïr; ils disent encor qu'il a fait mourir sa femme. Ils sont icy bon nombre de cabanes, & quelques vnes bien affligées, Ksiksiribabgych me presse de le baptizer auant que de partir d'icy, la crainte de mourir dans les bois luy fait desirer le Baptisme, luy donneray-je? Tous les Sauvages qui sont icy disent que c'est fait d'eux, & que pas vn ne verra le Printemps.

Vostre Reuerence sera-elle icy bien - tost? les meres Hospitalieres sont-elles venuës? le bruit court icy qu'elles sont arriuées; si les malades des trois Riuieres demandent d'estre portez à Kebec, que leur diray-je? Pourra-on secourir ceux de là bas, & ceux d'icy haut tout ensemble? Vn petit mot de réponse, s'il vous plaist.

Voila vne Lettre bien bigarrée. D'un costé on nous accuse de causer la mort, & de l'autre on nous demande le Sacrement de vie.

Je diray en passant que ce Mantgetchimat estoit vn meüchant Apostat, lequel ne se voulant pas ranger à son deuoir, ie luy dy que s'il s'attaquoit à Dieu, il ne seroit pas long-temps impuny; il me promit qu'il descendroit avec moy à Kebec, car i'estois pour lors aux trois Riuieres, ie croy qu'il auoit quelque bõne volonté, mais il ne tint pas sa parolle; à peine estois-je party que luy & sa femme, qui estoit aussi baptizée, & qui ne valoit pas mieux que son mary, moururent; cela fit dire aux Sauuages que ie leur auois causé la mort.

Il arriua quasi en mesme temps qu'un Sorcier ou Longleur soufflant vn malade sur les dix heures de nuict, pource qu'il ne l'osoit

faire de iour, ie l'entendy, i'y couru avec vn de nos Peres, ie le tançay, & le fis cesser, le menaçant de la part de Dieu. Deuant qu'il fut iour, ce miserable fut frappé de la cōtagion ou petite verolle, qui le rendit fort horrible; cela estonna les Sauuages, & fit croire à quelques vns que nous souhaittions leur mort, & que Dieu obeïssoit à nos desirs; i'auois beau leur dire que Dieu se fascheroit contre nous, & nous puniroit si nous voulions mal à quelqu'un. Quand vous tueriez quelqu'un de nous, nous disoient-ils, Dieu ne vous diroit rien, car vous le priez soir & matin, & à tout heure; & nous autres nous ne le sçauons pas prier, voila pourquoy il nous laissera mourir.

Pour ce qui touche l'Hospital, ie respondy que nous auions assez de malades à Kebec, & qu'il falloit attendre qu'on fût mieux accommodé, & qu'on eut plus de forces pour secourir tant de pauures miserables. Au reste, toutes ces contradictions sont les vrais arguments de la conuersion de ces peuples, nous commençons à si bien remarquer ceste verité, qu'elles ne nous font plus trembler; elles ressemblent aux froidures & aux vents, qui font pren-

52 *Relation de la Nouvelle France,*
dre de bonnes racines aux bleds & aux arbres, lors qu'ils paroissent deuoir tout rompre & tout perdre.

CHAPT. IV.

Des Chrestiens ou Sauvages baptisez en general.

NOUS auons de deux sortes de Chrestiens en ces contrées ; les vns ont esté baptisez en extrémité de maladie avec vne instruction assez legere, mais suffisante pour receuoir ce Sacremēt en cēt estat, les autres ont esté baptisez en pleine santé apres auoir esté bien instruits és principaux & plus necessaires articles de nostre creance: les vns & les autres montent iusques au nombre de quātre cent cinquante ou enuiron, comprenant les Hurons qui font bien la plus grāde partie. Or pour parler de ceux d'icy bas, ie diray en premier lieu que ie n'en sçay aucun de ceux qui ont esté baptisez en maladie, qui méprise apertemēt son Baptesme, il y en a bien deux ou trois qui se sont mariez à des femmes Sauvages non

Chrestiennes, pource qu'ils n'en trouuent point de baptisées qui les vueillent épouser, on agit doucement avec eux, on les laisse venir aux prières, mais on ne les reçoit pas encor aux Sacrements : *Lac potum vobis dedi*, on leur donne du laiët à boire comme à des enfans. L'experience nous apprend qu'il ne faut desespérer de personne.

Pour tous les autres, c'est vne benediction bien sensible de les voir assister aux prieres & aux instructions qu'on leur fait; se trouuer à la Messe les Festes, & les Dimanches, & quelques-vns les iours ouuriers; venir à Vespres quand on les chante en nostre Chappelle de Sillery, en la residence de Sainct Ioseph, chanter le *Pater*, & le *Credo*, les Commandemens de Dieu, & quelques Hymnes composés en leur Langue, se confesser avec vne candeur admirable, se communier avec deuotion & respect, reciter tous les iours leurs Chapelets à l'honneur de la sainte Vierge. C'est vne consolation bien sensible de voir des Sauvages dans ces saints exercices. Il y en a qui viennent demander à Nostre Seigneur sa sainte benediction dans la Chappelle, quand ils veulent

54 *Relation de la Nouvelle France,*
entreprendre quelque voyage ; & au retour luy viennent aussi rendre graces de les auoir conserué. En vn mot, ie reïtere ce que j'ay dit cent fois, si nous auions moyen de secourir fortement les Sauvages & les arrester, nous verrions vne grande benediction sur ces peuples beaucoup plus dociles aux choses de la Foy, que nous n'eussions osé esperer, comme on verra des remarques que ie fay faire.

J'ay sceu de bonne part que quelques femmes impudentes s'approchant la nuit de quelques hommes, les ont sollicitez à mal en secret, elles n'ont eu pour response que ces parolles : Je croy en Dieu, ie le prietous les iours; il defend ces actions, ie ne les scaurois commettre.

On louë tant la response de ceste seruante Chrestienne de l'Eglise de Lion, laquelle inuitée au peché par son maistre encor Payen, respondit ; *Christiana ego sum, nihil sceleris admittunt Christiani* : Je suis Chrestienne, les Chrestiens ne commettent point de crimes si enormes. J'ay appris que quelques ieunes femmes veufues Sauvages, & quelques filles sollicitées & pressées de s'abandonner à des Sauvages qui les secouroient & aydoient à viure, ont

respondu qu'elles estoient baptisées, & qu'elles ne commettoient iamais de telles offences : Cela n'est-il pas étōnant au pays de la barbarie?

Il y a vne tres-méchante coustume parmy les Sauvages : Ceux qui recherchent vne fille ou vne femme en mariage, luy vont faire l'amour la nuit, il y a bien du mal dās ces visites, mais non pas tousiours, car les femmes Sauvages de ces quartiers sont assez retenuës, craignant de ne point trouver party si elles se rendent communes. Or pour exterminer vne si méchante façon de faire, nous recommandons aux filles Chrestiennes de ne donner aucune responce à ceux qui les recherchent en ce temps-là, il s'en est trouué qui l'ont tres-bien gardé, rebutans ceux qui les venoient visiter, iusques à nous venir prier de leur defēdre semblables visites, croyans que ces ieunes gens nous obeïroient plustost qu'à elles. D'autres leur disoient seulement ce peu de paroles ; Allez vous-en trouver les Peres, faites-vous instruire, & baptiser, puis ie vous parleray, non pas la nuit, mais le iour. Trois ieunes Algonquins de l'Isle estant descendus à Kebec, & voulāt faire l'amour selon leur coustume,

56 *Relation de la Nouvelle France,*
s'adresserent à des filles Chrestiennes, ils furent bien estonnez quand ces filles leur dirent qu'ils s'adressassent à nous pour cét affaire, & qu'elles ne concluroiét rien sans nostre aui. Ces bonnes gens vindrent à la fin nous trouuer, & nous demanderent si nous gouuernions les filles Sauvages, au commencement nous ne sçauions pas ce qu'ils vouloient dire, enfin l'ayant conceu, nous leur fîmes entendre que ces visites ne valoient rien, & qu'ils ne pouuoient pas pretendre d'épouser aucune fille Chrestienne qu'ils ne fussent baptisez. Si toutes auoient la retenuë de celles dont ie viens de parler, ce seroit vne grande consolation; mais le mal-heur est que quelques-vnes estant éloignées de nos habitations, se marient à la sollicitation de leurs parents, & tous leurs mariages n'estans pas selon Dieu, se rompent aussi aisément qu'ils ont esté legerement contractez.

Nous en auons confirmé quelques vns dans leurs mariages depuis leur Baptême; ceux-là, comme nous espérons, seront fermes & constans. I'entendois vne fois vne femme instruire son mary sur la Confession, i'estois consolé de voir la candeur de

ces bons Neophytes. Donne-toy bien de garde, disoit elle, de cacher aucun de tes pechez, recherche les dans ta conscience, & les dy tous à Dieu, c'est à luy que tu parles, le Pere n'est là que pour tenir sa place, à cause que Dieu ne se fait pas voir en terre, mais sur tout sois bien marry del'auoir offensé, car si tu n'as douleur de tes offenses, il ne se fera rien.

Voicy vn poinct qui m'a fort consolé. Les hiroquois ayant paru proche des trois Riuieres, les Sauuages furent conuoquez de tous costez: estant r'assemblez, ils firent plusieurs festins de guerre, où il faut chanter, dancer, hurler, & tout cela par superstition pour auoir de l'auantage sur leurs ennemis, comme ils dancent les vns après les autres, ils se donnent le signal, choisissant celuy qu'ils veulent faire dancer apres eux: Il arriua que l'vn de ces dancurs porta le bouquet ou le signal à François Xauier, vn de nos nouveaux Chrestiens; luy le reiette, renonçant à ces dances superstitieuses: on le presente à Ignace Amiskape, il en fit de mesme: on le presente à quelques autres Chrestiens, tous imiterent la hardiesse de ces braues Athletes, se mocquans des badineries de

leurs Compatriottes, lesquels mettoient leurs esperances en des actions ridicules.

Vne autrefois quelqu'un de nos Peres ayant eu aduis qu'on faisoit vn grand Festin de viande vn iour de Vendredy dans vne cabane, demanda aux femmes qui en sortoient, filles Chrestiens n'estoient pas des conuiez, elles responderent qu'ils en estoient en effect, mais qu'ils ne mangeoient point, qu'ils se trouuoient là seulement pour s'entretenir & discourir avec les autres. Le Pere entrant dans la cabane sur la fin du banquet, trouua tous les Chrestiens avec leurs plats remplis de viande sans y auoir touché, ils la reçoient pour la donner à ceux qui ne sont pas encor baptisez; bref, toute l'assemblée pria le Pere de leur faire rendre graces à Dieu, & de leur declarer quelques poincts de nostre creance.

Ayant quitté la Residence de S. Ioseph pour quelques affaires, le Pere à qui j'en laissay le soin, me récriuit en ces termes;

On cognoist bien depuis vostre depart ceux des Sauvages qui veulent croire en verité, & ceux qui n'ont que de l'apparence: Ceux-là sont assidus aux prieres,

& ceux-cy n'y viennent quasi point depuis que vous estes party. Pour les Chrestiens ils donnent tres grande edification, ils ne manquent pas aux prieres publiques, & quelques vns d'eux assistent tous les iours à la sainte Messe dès quatre heures du matin, ce qui cōfond & encourage nos François qui sont icy.

Vne autre Pere laissé au mesme endroit, me manda ces parolles.

J'ay ce matin entendu de confession vingt-deux Sauvages Chrestiens, ilaborde icy tous les iours des canots, ie ne puis moy seul suffir à tous, pressez vostre retour, s'il vous plaist, &c.

Les Sauvages ayment vniquement leurs enfans, ils ressemblent au Cinge, ils les estouffent pour les embrasser trop estroitement, ils ont encor vn grand respect humain, n'osans donner leurs enfans de peur d'estre blasmez de leurs Compatriotes. Voyant vne bonne femme Chrestienne proche de la mort; ie luy demanday vne sienne petite fille pour la faire esleuer chez les Reuerendes Meres Ursulines, dōt nous auions eu nouuelle de Tadoussac; ceste bonne femme me dit: Pour moy i'en suis bien contente, ie sçay bien que vous auez

vn grand soin des pauvres orphelins; mais sçachez vn petit de son Oncle s'il en sera content: de bonne fortune cét Oncle estoit Chrestien, ie luy demanday s'il seroit content que nous fissions éleuer ceste petite fille avec ces bonnes Religieuses, il me repartit que c'estoit l'enfant de son propre frere, & qu'il ne la pouuoit quitter sans estre blasimé des siens. Alors ie luy repliquay, que i'estois bien aise qu'elle fust avec luy, & qu'il la feroit esleuer en la Foy, mais ie craignois seulement que Dieu ne luy demandast compte de cét enfant, à raison que sa femme ne la conseruoit pas comme il faut, & que pour moy ie m'en deschargeois sur luy: Ce bon homme estonné me l'a donna sur l'heure pour la presenter à ces bonnes Meres à leur arrivée; ceste action me fit cognoistre que la crainte de desplaire à Dieu s'enracinoit dans l'ame de ces pauvres Neophytes.

Vn François voulant faire trauailler vn iour de Feste vne femme Sauvage Chrestienne sans sçauoir qu'elle fust baptizée, ceste bonne femme luy dit: T'est-il permis de trauailler aujourd'huy? le François ayant respondu que non; pourquoy donc, dit elle, me veux-tu faire trauailler puisque

ie croy, & que ie prie Dieu, & que j'ay enuie d'aller au Ciel aussi bien que toy?

Non requiritur in Christiano initium, sed finis, dit vn grand Sainct, Ce n'est pastout de bien commencer, tout gist à bien conclure le dernier periode de sa vie. J'ay parlé es Relations presedentes d'un ieune homme appelé Paul Aniskaskgslit deuenueugle depuis son Baptisme; ce bon Neophyte est mort comme il auoit vescu depuis sa conuersion, c'est à dire, fort sainctement. Quand nous luy donnasmes le Sacrement de l'Extresme-Onction, il prenoit le Crucifix qu'on luy presentoit, le baisoit, l'apostrophoit tendrement; c'est toy qui m'a donné la vie, ie te la rends maintenant, tu es bon, ayez pitié de mon ame, ie ne te demande point la santé, tu es le maistre, fay comme tu voudras. Ce pauvre ieune homme a souffert avec la patience d'un Iob depuis son Baptisme, & nous a fait dire à sa mort, qu'il n'y a cœur si dur, que le feu du Ciel n'amolisse.

Ie vay coucher icy le bout d'une Lettre qui nous apprend que la Foy a bien de la force dans vn cœur, quoy que barbare. L'an passé nous baptisasmes vn ieune gar-

62 *Relation de la Nouvelle France,*

son aagé d'environ quatorze ans , nous estions bien en doute si nous luy accorderions ceste faueur , car il estoit assez peu instruit , mais comme il s'en retournoit en son pays , où se retire la nation des Attikamegues, nous le fismes Chrestien, il fut nommé Jacques ; ce pauvre ieune homme estât tombé malade, a instruit son pere le mieux qu'il a pû , l'a fait prier Dieu , & deuant que de rendre les derniers souspirs , luy a recommandé de se venir faire baptiser aux trois Riuieres , ce qu'il a fait : Voicy ce qu'on m'en escrit.

Les Attikamegues ou poissons blancs, c'est le nom de ceux de ceste nation, sont descendus aux trois Riuieres ; ie les ay vn peu instruits , ils m'ont fort contentez ; Vn vieillard entre autres nous a si bien pressé, que nous luy auons accordé le Baptisme ; c'est le pere de Jacques & Passéigā, que nous baptisâmes l'an passé, ce pauvre garçon a perseueré en la Foy , encor qu'il fut bien esloigné de nous , il a enseigné son Pere , & se voyant surpris d'une grosse maladie , il luy recondamanda à la mort de nous venir trouuer pour se faire instruire, il m'a estonné ; il estoit atten-

tif à merucille : Voila , disoit-il par fois, ce que ie deuois sçauoir il y a long-temps, iusques icy ie n'ay pas vescu, ie ressemblois à vn mort , mon fils a commencé à me donner la vie ; haste toy mon fils, disoit-il au Pere, de m'instruire, & de me baptiser, car ie ne veux pas aller dans le feu.

CHAPITRE V.

Des premieres Familles rendues Sedentaires.

CELUY qui a commencé de donner secours à nos Sauvages pour se loger, & defricher la terre, a ietté, comme nous esperons, les fondemens d'une bourgade Chrestienne, qui est toute remplie de benedictions en sa naissance. Les deux premieres Familles qui ont seruy de premieres pierres à cet edifice, ou à ceste nouvelle Eglise, non seulement ont perseueré dans leurs desseins, mais elles en ont encor attiré d'autres qui commencent de les imiter, tout gist à les ayder. Monsieur

Gand hōme vrayemēt charitable, voyant le grand bien qu'on opere dans leurs ames, a augmenté nostre secours de quelques hommes qu'il a gagé pour ceste année, & la suiuite. Il voit de ses yeux les difficultez du pays, le peu d'auance qu'on fait dans la longueur & la rigueur des hyuers, & cependant pour ioür du fruit qu'on recueille de ces nouuelles plantes, il faut de grands frais pour les cultiuer. Voicy les premices des deux premieres Familles qui se sont arrestées, & qui donne le branle aux autres : le les dédie de bon cœur à celuy qui leur a donné le premier secours & à tous ceux qui fauorisent ce grand dessein.

Premierement, tous ceux qui composent ces deux Familles sont regenez dans le Sang de I E S V S . C H R I S T. Secondement, quoy qu'ils soient en bon nombre tous logez dans vne mesme maison, hommes, femmes & enfans, n'ayans qu'un même foyer, & vne même table, si est-ce que iamais nous n'auons remarqué en eux aucun different, la paix qui loge si profondement chez eux, nous est vne marque assurée que Dieu n'en est pas loin : *Factus est in pace locus eius.* Ils font leurs prieres

en particulier, soir & matin à genouil, & ne laissent pas de venir aux publiques : Ils entendent pour l'ordinaire tous les iours la sainte Messe, & quelques-vns des quatre heures du matin. Ils frequentent les Sacrements avec amour & respect, & quelques-vns d'eux ont la conscience si tendre, qu'aussi-tost qu'ils pensent auoir commis quelque offence, ils s'en viennent accuser au Pere qui les gouuerne avec vne candeur nompareille.

Quelqu'un de nous sans estre veu entendoit vn iour les Chefs de ces deux Familles se donner courage l'un à l'autre d'accomplir la Loy Chrestienne. Ne perdons point cœur, disoient-ils, nous ne serons pas seuls, les principaux d'entre nous veulent croire & demeurer aupres de nous, quittons nos anciennes façons de faire pour prendre celles qu'on nous enseigne qui sont meilleures que les nostres.

Ils setrouuerent bien en peine comme ils pourroient garder l'abstinence des viandes Vendredis & Samedis, car lors que nous serons dans les bois pour faire nostre prouision d'Elan, disoient-ils nous n'aurons rien que de la chair à manger, que ferons-nous ? l'autre respondit, nous voila

bien en peine, puis qu'il n'y a que deux iours la sepmaine, il les faut passer sans rien manger, & par ce moyen nous garderons l'abstinence de viande: Ce conseil fut trouué bon, mais non pas du Pere qui les gouverne, lequel les instruisit de ce qu'ils devoient faire en telle occasion; Descendons plus en particulier.

Ces deux Familles estant partis pour aller chercher leur prouision de chair d'Elan, François Xavier, iadis nommé des siens Nanaskamat, retourna avec la plus grande partie de ses gens deux iours avant la sainte Quarantaine; comme il n'auoit que de la chair & de l'anguille boucanée, nous ne luy parlâmes point de l'abstinence de viande qu'on garde en ce temps là, mais luy l'ayant appris par la communication de nos François, nous dit qu'il desiroit garder ceste loy, puis qu'il estoit Chrestien; nous luy répondîmes, que n'ayant ny pain ny pois, en vn mot, n'ayât pour tous mets qu'un peu d'anguille seiche, qu'il n'estoit pas obligé à ceste rigueur: Il repartit, que les mesmes raisons qui nous induisent à ne point manger de viande, l'y obligeroient; puis qu'il n'auoit qu'une même créance avec nous, & qu'il auoit assez de force pour se

pouuoit passer à vn peu de poisson fumé. Ceste réposé nous toucha le cœur, & nous fit resoudre de le soulager luy & sa fille du peu que nous auions, c'est à dire, d'vn peu de pain & de pois, & quelquefois d'vn peu de moulë. Voila donc le pere & la fille dans l'abstinence, & par fois dans le ieusne, pendant que le reste de la Famille qui n'estoit pas encor toute baptisée, mangeoit de fort bonne viande. Entrant vn iour qu'ils ieusnoient dans leur chambre, ie les trouuay tous deux retirez à part, faisans collation sur le soir avec vn peu de pain, puis me tournant de l'autre costé, j'apperceu vne grãde marmite remplie de langues & de musles d'orignac, qui rendoient vne fort bonne odeur, ces viandes les plus delicates de la beste estoient preparées pour les gens : Je vous confesse que ce spectacle m'étonna, en effect c'est vne chose étonnante de voir vn homme chef de sa Famille, apres auoir bien peiné & sué à tuer tels animaux, en voir manger deuât ses yeux les plus frians morceaux, & se reduire au ieusne sans obligation ny contrainte ; & pour collation se contenter d'vn morceau de pain. Mais ce qui m'estõne dauantage, c'est qu'vne ieune fille aagée d'environ dix-huict à vngt ans,

imitant son pere passe ces quarante iours, particeu ieusne, & tousiours en abstinēce, & fort mal nourrie dās l'abondance. Nous luy demandasmes vne fois si cetēps ne luy sembloit pas bien long, & si elle n'auoit pas beaucoup de peine de se priuer des viandes qu'elle voyoit manger à ses cōpagnes; elle nous confessa qu'en effect elle en auoit eu vn peu au commencement, mais que cela s'estoit bien-tost passé. Vne autre fois cōme on faisoit vn bon festin en leur maison pour receuoir quelques vns de leurs amis, ie demanday à son pere s'il n'estoit pas tenté de goûter vn peu de ce festin, composé de fort bōnes pieces d'Elan, sur lesquelles iliettoit les yeux; il me respondit en souriant, Nikanis, au commencement du Carême ie mis mon cœur sous ceste table, c'est pourquoy mes yeux ont beau voir de la chair, ils n'en souhaitent pas; car ils n'ōt plus de cœur, & puis ne faut-il pas que nous souffrions vn petit aussi bien que les autres Chrestiens, nous voulons contenter Dieu aussi bien que vous autres. O Dieu qui eut iamais pensé que ces paroles deussent sortir de la bouche d'vn barbare! & que ceste abstinence eut deuë estre pracliquée par vn Sauvage qui s'est autrefois repen de chair

humaine! Dieu est Dieu, & sa bonté n'a pas de limites, elle se répand sur qui il luy plaist.

Voicy qui est encor dans le mesme étonnement: Ce bon homme s'estant engagé trop avant dans sa chasse, n'ayant porté qu'un peu de pain que nous luy auions donné, se trouua sans autre viure que les Elans qu'il auoit tué, il ayma mieux passer deux iours sans manger, que de rompre son abstinence de viande; & quoy que nous luy eussions dit qu'il n'estoit point obligé à ceste austerité, il ne laissa pas vne autrefois en semblable occasion de faire le mesme.

Sa fille estant allée, suiuant la coustume du païs, avec quelques-vnes de ses compagnes pour tirer des bois la viande des animaux que son pere auoit tué, fut retenue du mauuais téps plus de iours qu'elle ne pensoit, si bien qu'ayant consommé sa petite prouisiõ de Careme, elle se trouua sans autre nourriture que de la viande; il restoit encor enuiron deux iours de grand travail deuant que d'arriuer à la maison, il falloit tirer à viue force de grosses traînes de chair dessus les neiges; on la pressa fort d'en mâger, mais ceste pauvre fille, suiuant l'exemple de son pere, n'en voulut iamais goûter.

Ceux qui cognoissent plus particulièrement les Sauvages, & qui voyent ces actions sont contrainsts de cōfesser que la grace est plus forte que la nature. Quelques-vns de nos François voyans ceste coustume, disoient que si iamais ils repassoient en France, qu'ils reprocheroient cent & cent fois aux Heretiques & aux mauuais Catholiques que les Sauvages gardoient le Carefme, cependāt qu'ils mangeoient de la chair comme des chiens. Au reste, ces pauvres gens ne sont nullemēt obligez aux loix du ieusne, car ils n'ont le plus souuent que du poisson tout seul sans pain, ni autre saulce que de l'eau, ou de la viande toute seule, & le plus souuent ils n'ont rien du tout : Les deserts qu'ils ont commencē à défricher, les tireront avec le temps de ces grandes miseres.

Je serois trop long si ie voulois remarquer toutes les bōnes qualitez de cēt homme vrayemēt Chrestien : Il nous entretient quelquefois des regrets qu'il a devoir les sinistres opiniōs que quelques-vns de sa nation ont de nous autres : Il deplore la dureté du cœur de ceux qui ne prestent point l'oreille à l'Euangile : Du reste il est homme adroit, fort industrieux, bien éloigné de la paresse & de la faineantise naturelle

aux Sanuages; s'il estoit secondé, il se tire-
roit bien-tost de la misere commune à ses
barbares, mais il a fait rencōtre d'une fem-
me de fort peu de cōduite, le secours qu'on
luy donne maintenant, le fera reüssir. Il ad-
mire nos façons de faire. C'est chose étran-
ge, disoit-il vn iour, que vous sçachiez
tout ce que vous devez faire par le son d'une
cloche sans qu'on vous die rien, & sans
vous parler les vns aux autres: Si-tost que
vous entēdez ceste clōche, les vns sortent,
les autres entrent; les vns vont au trauail,
les autres vont prier, elle vous fait leuer &
coucher, & sans parole elle fait par vn mes-
me son tous les commandemens qu'il faut
faire: Il n'en est pas de mesme parmy nous
autres, si ie veux induire mes gens au tra-
uail, il faut bien dire des paroles, & apres
tout cela ie ne suis guieres obey.

Vn ieune homme de sa nation luy de-
mandāt sa fille en mariage, il luy dit; main-
tenant que ie suis Chrestien, ie respecte
Dieu, ie luy veux obeyr, or il ne veut pas
que ie donne ma fille sinon à vne personne
qui croye en luy, & qui se resoluë de ne la
quitter iamais s'il l'épouse: regarde si tu as
assez de courage pour te resoudre à ces deux
conditions, le ieune homme répōdit, qu'il

n'auoit pas assez d'esprit pour retenir tout ce que nous enseignons ; & qu'il n'osoit quasi esperer le Baptesme. Le Neophyte luy repartit : Ce n'est pas le defaut de ta memoire qui t'empêchera de iouir de ce bonheur ; au commencement i'estois dans le mesme erreur, mais i'ay recognu par apres que quand on prioit Dieu, il donnoit de l'esprit, & qu'il aydoit à sçauoir ce qui est necessaire pour estre baptisé : on me dit aussi qu'il n'estoit pas besoin que ie sçeusse tant de choses, mais que i'eusse vne bonne volonté, & vne grãde affection de bien obeïr à Dieu, & ne le point offenser. Ce n'est pas le defaut d'esprit que i'apprehende en toy, mais la resolution de seruir Dieu toute ta vie, & de iamais ne quitter ma fille pour en espouser vn autre ; regarde si tu as assez de constãce pour ce poinct. Ce pauvre ieune homme seigna du nez, comme on dit, il ne pût iamais se resoudre à se ietter dãs le lien d'un mariage indissoluble. Or remarquez que ce n'est point le Neophyte qui nous a raconté de ce procedé, c'est le ieune hõme mesme, lequel a tâché depuis de renoüer ceste affaire, mais il n'en a encor pû venir à bout. O que les mariages des Sauvages ne donneront de peine ! C'est assez parlé du

pere , difons deux mots de fes enfans. Cét homme de bien en auoit pluſieurs, il luy en eſtoit reſté quatre; Dieu a pris pour ſoy ceſte année les deux plus ieunes , ſi bien qu'il n'a plus qu'un fils âgé de vingt à vingt deux ans, & vne fille, dont nous venons de parler , aagée d'environ dix-huiſt ans. Ce ieune homme eſtant môté aux trois Riuires cét hyuer dernier, pour aller à la guerre contre leurs ennemis, s'en alla tout droit logger chez nos Peres, ſans que perſonne luy eut donné ce conſeil; Il leur dit, que s'il ſe retiroit dans les cabanes des Sauuages, il ſe mettoit en danger d'offenſer Dieu, que l'exéple de la ieuneſſe fort diſſoluë le peruertiroit, & par conſequent qu'il les ſupplioit de luy dōner le couuert: De plus que deuât bien-toſt partir pour aller en guerre avec ſes Compatriotes, il ſouhaittoit qu'on luy conferaſt le ſainct Baptesme, pour ne mettre ſon ame dans les dangers où il alloit engager ſon corps. Nos Peres le receurent à bras ouuerts, le trouuerent bien inſtruit, & ayant conſideré de près ſes deportements, iugerent qu'ils ne pouuoient en ſaine conſciēce luy refuſer ce Sacrement, qu'il demandoit avec tant d'inſtance. Le voila donc fait Chreſtien, & nommé Vin-

cent ; son pere en ayant eu la nouvelle, s'en réioüit fort, mais non pas moy ; car i'auois resôlu de ne le point baptiser qu'il ne fust marié, pour la difficulté que ie preuoiois, & dans laquelle ie le vois de trouuer vne femme Chrestienne qui luy agréee, ou qui ne soit pas sa parente; Neantmoins Dieu m'a fait cognoistre iusques à maintenant que sa grandeur passoit la petitesse de mon cœur, peut-estre trop étroit & trop estrechy dans ces rencontres ; car ce ieune homme assisté des graces qu'il tire des Sacrements, a perseueré dans la resolutiō de n'épouser aucune fille iusques à maintenant qui ne fust Chrestienne ; s'il se conserue dans la netteté de conscience que Dieu luy a donnée depuis son Baptisme, ses paroles seront trouuées veritables: nostre Seigneur luy en fasse la grace.

Quant à l'autre Famille, dont le Chef se nommoit Negabamat, mais il porte maintenant le nom de celuy qui les a secouru, & qui les secoure encor puissamment; il a pris pour son Parain Monsieur Gand, en ceste consideration l'a nommé Noël, il fut baptisé avec sa femme & son fils aîné le iour de l'immaculée Cōception de la sainte Vierge; ils estoient tous vestus à la Françoisise des

liberalitez de celuy qui les presentoit au Baptême; la femme fut nommée Marie, & son fils Charles; il auoit trois enfans de soy, & deux adoptez; tous ont esté regenez en I E S V S - C H R I S T, nous en parlerons maintenant.

Cét homme est bien fait, & d'un bon naturel; comme on l'interrogeoit en son Baptême, & sur tout qu'on luy recommandoit de ne mettre son esperance qu'en Dieu, & non pas au secours temporel des hommes, il répondit d'une voix haute: L'ay passé une bonne partie de mon aage, ie ne suis pas pour viure long-temps en ce monde: c'est pourquoy ie n'appuye ma croyance ny ne fonde mon esperance sur les hommes qui ne mesçauroient prolonger la vie, mais sur celuy qui a tout fait, lequel m'en peut donner une eternelle. Quoy que les femmes soient naturellemēt honteuses, la sienne ne parut iamais s'étonner, encor qu'elle se veit dans un habit à la Frâçoise, qu'elle n'auoit iamais porté, la presence de nos François qui remplissoiēt l'Eglise ne l'émeut point; elle répondoit aux interrogatiōs qu'on luy faisoit d'une voix forte, & d'un visage rempli de ioye: Nous luy demandasmes par apres d'où prouenoit qu'elle ne s'étoit pas

76 *Relation de la Nouvelle France,*
montrée craintive deuant tant de monde,
elle répondit : Je ne pensois pas du tout à
ceux qui me regardoient, ie disois seule-
ment en mon cœur? Je n'iray pas en Enfer,
j'iray au Ciel, tous mes pechez vont estre
pardonnez, & puis il ne faut pas, disoit-elle,
que ceux qui croient en Dieu soient hon-
teux de dire leurs creances. Cette bonne
femme a de grandes marques de sa prede-
stination; elle prie Dieu volontiers, entend
volontiers sa parole, ayme la fréquentation
des Sacremens; elle est par fois retournée
de bien loin tout exprés pour se cōfesser &
communier, s'ennuyant fort quand elle est
empeschée d'entendre la Messe. Estant
dās les bois pour faire seicherie d'Orignac
& voyāt qu'elle retardoit trop long temps,
elle s'en vint à Kebec pour communier; le
Pere qui l'entēdit de Confession, par mé-
garde, ou pour l'éprouver, la laissa là sans la
faire approcher de la sainte Table: Cette
pauvre femme luy disoit; le suis venuë de
si loin, & avec tāt de peine, pour iouir d'un
si grand bien, & vous m'en priuez: ay-ie
donc fait quelque offense qui merite ce
châtiment? Elles'en alla trouver vn autre
Pere, & luy fit ses plaintes avec vne telle
candeur, qu'il en demeura tout edifié. Il

faut confesser que ces deux bonnes ames m'ôt trôpé, ie ne croyois pas que la Foy fut si fortement enracinée dans leurs cœurs; à peine estoient-ils Chrestiens, que Dieu les a visité ou esprouvé fort rudement. Ce nouveau Chrestien parlât vn iour à vn sien parët de nostre doctrine, & du secours que nous dônions aux Sauvages pour les reduire dans vne bourgade, luy dit que le sentiment commun de la pluspart de ceux de la nation, estoit que tout ce que nous en faisions n'étoit qu'un voile pour couvrir nostre malice, & que nous ne pretendions que la ruine du pays, & la mort de tous les habitants: Et qu'ainsi ne soit, dit-il à Noël, tu verras bien-tost tes enfans mourir deuant tes yeux, tu suiuras par apres, & si nous leur prestons l'oreille aussi bien que toy, nous passerons par le mesme guichet. Voila le bruit qui court, disoit ce causeur. Noël me vint raconter tout cecy sans se troubler, m'exhortât à prêcher fort & ferme contre cét erreur. Or soit que le Diable cognut la disposition du corps de ses enfans, ou que dieu voulut tirer sa gloire de la foy & de la cōstance de ces nouveaux Chrestiens: quoy que s'en soit, de cinq enfans qu'ils auoient, les voila quasi reduicts à vn. Bien-tost

78 *Relation de la Nouvelle France,*
apres ce discours, l'un de ses enfâs fut pris
d'une fiebure etique qui luy osterâ la vie
dans peu de iours, car il n'a plus que les os
qui luy percent la peau en plusieurs en-
droits. A quelque temps de là vn autre
qui estoit au seminaire, fut saisi d'une autre
maladie qui luy a duré depuis cinq mois, &
pour le present on ne luy donne plus que
peu de iours de vie. Son fils aîné, âgé d'en-
viron quatorze ans, qui estoit aussi nostre
Seminariste, luy seruoit de consolatiō dans
ses aduersitez, car en verité c'estoit vn en-
fant bien fait, & d'un excellent esprit : vne
defluxiō ou vne pleuresie le saisit inopiné-
ment, & apres luy auoir fait souffrir de
grandes douleurs, l'emporta dans peu de
iours dans nostre Maison, où on l'auoit ap-
porté pour estre pensé plus commodemēt.
Son pere ne bougea d'aupres de luy tandis
qu'il fut malade; sa mere le venoit visiter
tous les iours de plus d'une grande lieue.
C'est dans cette maladie que nous recon-
nusmes la foy du pere & de l'enfant, la fièvre
estant deuenue si chaude & si violente,
qu'elle le faisoit par fois extrauaguer. Si-
tost que ce pauvre enfant auoit quelque re-
lâche, son pere no^r appelloit, & nous prioit
de luy parler de Dieu pour bien disposer

son ame à la mort. Je l'ay veu par fois se ietter à genoux auprès de s^{on} li^{et} pour prier Dieu, & le faire prier à son fils; sa mere prioit de son costé, & tous deux firent vn vœu à Dieu pour la santé de leur enfant, mais avec vne tres-grande resignation à la volonté de Dieu: Ce n'est pas nous, disoient ils, qui commandons à la vie, si tu preuois, ô grand Capitaine du Ciel, que nostre enfant venât sur l'aage, ne te vueille pas obeyr, nous ne te demandons point la santé; mais comme tu es bon, donne luy secours, & pour son corps & pour son ame. L'enfât de son costé estoit fort bien disposé, témoignant qu'il ne craignoit point la mort; il se cōfessa, receut le Corps de Nostre Seigneur, & l'Extrême-Onction avec bon iugement, se remettant à la volonté de Dieu, sans luy demander la vie, si on ne luy faisoit demãder. Sa priere ordinaire estoit, *IE S V* ayez pitié de moy, fay moy misericorde, ie suis marry de t'auoir offensé: En fin se sentant proche de la mort, il nous dit; ie n'en puis plus, tenez, touchez m^{on} corps, il est desia froid, ie me meurs; on le fit confesser derechef, & l'absolution receuë, sa défluxion l'étouffa tout d'vn coup: Estât mort, i'aduertry François Xavier, qui se trou-

50 *Relation de la Nouvelle France,*
ua present de consoler son pere, craignant
que ce coup ne l'ébranlast, mais François
me dit, Noël a le cœur bon, si tost qu'il a veu
expirer son fils, il m'a dit que pendant qu'il
le voyoit souffrir, la tristesse affligeoit son
ame, mais que le voyant mort, & hors de
tout secours humain, son cœur s'estoit sèty
soulagé. En effect, ce bon homme me vint
trouver, & me dit; Nikanis, tu diras à nostre
Capitaine, il parloit de Monsieur le Gou-
verneur, que ie le remercie de ce qu'il a vi-
sitè mon fils dās sa maladie, & tu l'assèureras
que mon cœur est tout libre, & que ie me
souviens bien de la parole que j'ay donné
à Dieu de le servir toute ma vie; ie ne suis
pas vn enfāt pour la reuoquer; ie le prieray
toufiours, c'est luy qui dispose de nos vies,
nous n'en sommes pas les maistres. Ces pa-
roles consolèrent grandement Monsieur le
Cheualier de Montmagny, que ie nomme-
rois volontiers le Cheualier du S. Esprit,
tant ie le vois porté aux actions saintes &
courageuses, & rēplies de l'esprit de Dieu.

Après ceste mort, il se trouue que sa fille
adoptiue a vne toux dangereuse, & que son
plus petit fils s'en va mourant : en verité
ce bon hōme peut bien dire : *Probasti me, &
cognouisti me* : C'est ce qu'on luy inculquoit
souuent

souuent que Dieu vouloit prouuer sa foy. Ces coups de fleches luy estoient tirées du Ciel par amour. Ce n'est pas tout, sa femme subsistoit parmi toutes ces maladies, & secouroit ses enfans: Dieu la voulut affliger aussi bien que les autres, elle fut prise de la petite verole qui couroit, & fut la premiere qui entra dans l'Hospital nouvellemēt étably à Kebec. Deuant ces grandes atteintes, son mary auoit desia receu quelques attaques de ses gens: car estant descēdu à Tadoussac, les Sauvages se moquoient de luy, sçachant qu'il prioit Dieu, disans qu'il vouloit deuenir Iesuite; qu'il vouloit paroistre auoir de l'esprit, & que tout ce qu'il en faisoit, n'estoit que pour viure long-temps çà bas en terre, mais qu'il se trouueroit trompé. Vn de ses Compatriotes luy dit vn iour ie ne sçay quoy qu'il auoit veu en songe, luy enuioignant de l'executer s'il ne vouloit bien-tost mourir; Cela ne l'estonna point, il répondit qu'il demanderoit au Pere qui le gouuernoit si la chose estoit permise, qu'en ce cas il l'accompliroit, autrement non. On luy deffendit de la faire, il obeit sans scrupule, & sans reплика: Voila ce qu'opere la grace dans vn cœur qu'on appelle barba-

re, disons plustost dans les enfans de Dieu, puis qu'ils sont rédus tels par le Baptême.

Ie pensois finir le discours de ces deux Familles, mais puis que les vaisseaux me donnent encor loisir de parler, il faut que la douleur & la ioye qui partagent maintenant mon cœur, soient la conclusion de ce Chapitre. Quelques Sauvages de l'Isle retournant du país des Abnaguiois, ont rapporté icy vne petite verole extrêmement contagieuse; Ce mal qui tuë par tout ces pauvres peuples, est descendu iusques à Sillery, c'est à dire, en la Residence de Saint Ioseph, où nous r'assemblons les Sauvages. Apres nous en auoir enleué quelques-vns, apres nous auoir rauy vn vray Apostre de ces contrées, il s'est ietté sur les Chefs de ces deux premieres Familles Sedentaires avec vne telle fureur, que nous n'en sçauons pas encor le succez. François Xavier iadis Nenaskumat a esté pris le premier, on le fit incontinent porter à l'Hospital pour yestre promptement secouru : à peine y estoit-il entré, que Noël Negabamat se sentit assaillly du mesme mal; comme ie me disposois pour l'emporter à Kebec dans vn canot, afin de le loger avec les autres mala-

des, on m'escriuit que François Xavier me demâdoit, & que si ie le voulois voir pour la derniere fois, que ie me depeschasse. A mesme temps, voicy quatre Familles de Sauvages qui arriuent à Sillery à dessein de se rendre Sedentaires, & de grossir nostre Bourgade encommencée. Les conseils de Dieu sont estranges; il oste, il donne, il destruit, il bastit; en vn mot il est le Maistre, il fait ce qu'il veut, qu'il soit beny à iamais, s'il n'eust affligé le bon Iob, iamais ce grand flambeau n'eust esclairé le monde; s'il n'eust secoüé les premieres Colonnes de ceste nouvelle Eglise, & de cet arrest ou reduction des Sauvages, on n'en eut pas veu la fermeté. Il me fallut iouer vn estrange personnage; car faisant profession d'arrester les Sauvages, il me fallut chasser ceux qui se presentoient. Allez, mes chers amis, leur dis-je, retirez-vous, autrement la maladie vous pourra esgorger: l'amour que ie vous porte me fait vous donner ce conseil; ne vous esloignez pas neantmoins beaucoup, afin que nous puissiõs auoir de vos nouvelles, ils me promirent de m'obeïr de poinct en poinct, & là dessus se r'embarquent & s'en vont, me nommant le lieu où ils se retireroient. Cē

84 *Relation de la Nouvelle France,*
la fait, ie m'en vay dire à toutes les autres
Familles arrestées aupres de nous, qu'il
seroit bon qu'il s'esloignassent pour vn
temps; le ne sçay pas quels estoient les mou-
uemens de mon ame, mais ie sçay bien que
Dieu ne veut pas que le cœur de l'homme
s'attache à quoy que ce soit. Ayant donc
chassé, pour ainsi dire, & banny pour vn
temps ces pauvres brebis bien desolées,
le Pere Vimont qui nous estoit venu voir
à Sillery, & moy & vn ieune Sauvage, pre-
nons nostre malade dans vn canot, & le
portons en la maison de charité & de mise-
ricorde, c'est à dire, à l'Hospital, si tost qu'il
fut placé ie m'approche du liét de François
Xavier, & le voyant en vn tres-pitoyable
estat, ie me couure la face de mon mou-
choir, & m'appuye la teste sur son cheuet
sans luy pouuoir parler.

Ceux qui traouillent au salut des ames,
ont des tendresses pour leurs Neophytes
aussi bien que les meres pour leurs enfans.
Ce bon Sauvage vraiment Chrestien, se
tournant vers moy, me dit; Nikanis, ne t'at-
triste point, ie meurs fort volontiers, ie ne
crains point la mort, ie m'ennuye sur la
terre, j'espere que j'iray au Ciel: le vous
laisse à penser si ces paroles me perçoient

le cœur , le voyant fort oppressé : ie prie nos Pères qui estoient presents de luy apporter le saint Viatique , pendant qu'on l'alloit querir , ie le confessay. Monsieur le Gouverneur , Monsieur le Cheualier de l'Isle , & quantité de nos François , se trouverent presents à ceste action : Le malade ayant receu son Createur , ie priay encore qu'on allast querir les saintes Huiles pour luy donner l'Extrême Onction ; pendant ces allées & venuës , ce bon Neophyte fit son action de grace à Dieu , & comme ie luy eut déclaré qu'une Dame d'eminente qualité , Niepce d'un des plus grands du Royaume , auoit enuoyé ces bonnes Religieuses pour le secourir & tous les siens ; ie ne pouuois luy faire entendre la grandeur de Monseigneur le Cardinal , & de Madame la Duchesse d'Aiguillō sous autres termes , il s'écria : Vous qui auez tout fait , donnez vostre Paradis à ce grand Capitaine , & payez bien au Ciel tous les biens que nous fait sa niepce en terre. Vous estes tout bon , ayez encore pitié de celuy qui nous a logé , & tous nos enfans. Apres qu'il eut fait ses prieres , ie luy demanday s'il se souuenoit bien de cette grande veüe du Paradis , & de l'Enfer , qu'il auoit eu vn peu apres son Bap-

resme il y a plus d'un an : ie luy recom-
manday sur tout qu'il se donnast bien gar-
de de mentir ayant l'ame sur le bord des
léures, & nostre Seigneur encore present
dans son cœur. Nikanis, il se peut faire que
ie n'ay pas dit vray, me fit-il, car ie t'ay dit
que i'auois veu la demeure du grand Capi-
taine du Ciel; ie ne sçay pas si c'estoit sa
maisō, mais ce que i'ay veu estoit si beau &
si rauissant, que ie crû que c'estoit là sa de-
meure, il n'y a rien de semblable en terre,
i'ay encore ceste beauté si imprimée en
l'esprit, que ie ne croy pas en perdre iamais
la memoire. En fin nous luy donnasmes
l'Extrême-Onction, qu'il receut avec de
grands ressentimēts de douleur d'auoir of-
fensé Dieu. Comme il voyoit bon nōbre
de nos François prians Dieu pour luy à ge-
noux à l'entour de son liēt, il esleua sa voix,
& leur dit : Mes amis, vous me faites plaisir
de me visiter, & de prier Dieu pour moy;
ie vous assure que si ie vay au Ciel, com-
me i'espere, ie le prieray pour vous: Ces pa-
roles & la deuotion de ce bon Sauvage en
toucha plusieurs iusques aux larmes, nous
n'attendions pas de voir ces cōuersions de
nos iours. Ce n'est pas tout, à quelque
tēps de là, il fit venir ses enfans, qui se iec-

terent à genoux auprès de son liét, luy demanderent pardon, & le prierent de leur donner sa benediction, il leur donna de tres bons conſeils, leur recommanda la perſeuerance en la Foy, leur enioignit de nous obeïr, comme à luy-meſme, de viure en paix & en amitié l'un avec l'autre, & de ne rien mettre dans la foſſe apres ſa mort; puis faiſant le ſigne de la Croix ſur eux, il leur dit: Adieu mes enfans, ie prieray pour vous en Paradis.

Quelque temps apres, cōme ie le viſitois, ie luy demanday ce qu'il penſoit; ie penſe en Dieu, me ſit. il, mon cœur eſt toujours en luy, ie taſche de faire cōme vous; il me ſemble que vous penſez toujours en luy, ie veux faire le même, quel ſubieſt de conſuſion a vn cœur lâche comme le mien.

A même temps que cecy ſe paſſoit, ſa femme accoucha toute ſeule ſâs ayde d'aucune perſonne, elle accoucha le matin, & ſur le midy ie la vey trauailler, elle s'eſtoit retirée ſous vne méchâte écorce qui ne l'abrioit d'aucun vent; à deux iours de là elle porta elle-meſme ſon enfant à Kebec pour eſtre baptiſé, mais pour augmenter l'affliction de ceſte Famille, ceſte pauvre creature tomba bien-toſt apres en phreneſie, qui

luy dura quelque temps; de l'heure que i'écry cecy, elle est en son bon sens, mais nous sommes encor dans l'incertitude de la santé ou de la mort de son pauvre mary.

Reuenons à nostre autre Neophyte Noël Negabamat, sitost qu'il ne se sentit frappé de la maladie, il me dit: Nikanis, ie m'en vais à la mort aussi bien que les autres, cōme ie l'exhortois à diuertir son esprit de ceste pensée, il se mit à rire, Cela seroit bon, dit-il, si ie craignois la mort; nous autres qui croyons en Dieu ne la deuõs pas craindre: Tu sçais bien, adiousta il, que plusieurs Sauvages croyent que vous estes les Auteurs des maladies qui nous fõt mourir; sois assuré que ceux qui ont la foy n'ont point ces pensées; souuiēne toy seulement de tenir ta parole, & d'auoir pitié de nos enfans apres nostre mort, ie ne parle pas pour moy, car les miens sont morts, ou peu s'en faut, mais pour François Xavier, il ne faut point perdre la resolutiō que tu as prise d'arrester les Sauvages: Là dessus, il me nomma vne Famille, & me dit, quand ie seray mort, ceste Famille prendra ma place. Pour les presēs que nostre Roy no' a faits, le fils de Frāçois portera l'habit de son pere quand on fera quelques prieres publi-

ques pour le Roy, & vn tel Sauuage qu'il me nomma portera le mien; cōserue tousiours ces habits, afin que nos descēdans sçachēt combien le Roy nous a aymez. le vous cōfesse que ie fus bien étōné quand i'entendist tenir ce langage à ce pauvre homme; sa maladie n'a pas esté si forte ny si pressante que celle des autres. Le Pere de Quen qui visite souuentefois le iour les malades de l'Hospital, me mande que ce bon Neophyte s'est confessé & communié, & qu'on espere qu'il retournera bien-tost en sa maison à Sillery, mais que sa femme est retombée, & qu'elle est en danger de mort. Voila d'étranges épreuues, mais pour vne marque assurée que, *Non est malum in Ciuitate, quod non fecerit Dominus*, que Dieu est l'Authéur de ces afflictions : C'est que la foy de ces nouueaux Chrestiens que nous pensions deuoir estre ébrälée dans les tempestes, a fait comme les arbres qui iettent de plus profondes racines, plus ils sont combattus des vents; elle s'est affermie iusques à nous consoler sensiblement dans les plus viues sources de nostre douleur.

Enfin nous esperons le calme apres ceste bourasque, Dieu ne démolit point que pour mieux rebastir. Vous diriez que ces cala-

90 *Relation de la Nouvelle France,*
mitez attirent les Sauvages. Je me tiens
desia comme asseuré que nous en aurons
au double & au triple l'an prochain , si
nous auons dequoy les assister ; ils nous
ont donné leurs paroles, & desia quel-
ques-vasce sont r'approchez en attédant
que le froid dissipe le mauuais air que les
malades ont apporté avec eux. I'espere
que deuant que les vaisseaux soient arri-
uez en France , que nostre petit troupeau
se rassemblera , & se trouuera accreu de
plus de personnes qu'il n'en est mort. Ain-
si soit il.



C H A P T. VI.

Du Baptisme d'un ieune homme
Algonquin.

IE couchay bien amplement dans la Relation de l'an passé les grandes dispositions de ce ieune homme, lequel n'estant encor que cathecumene, ne paroissoit déjà réply des graces bien particulieres que Dieu accorde à ceux qui sont lauez dans le sang de son Fils. Je ne m'estonneray pas si apres auoir si souuent parlé des grandes simplicitéz de ces peuples, ils se trouuent en France quelqu'un qui reuoque en doute les biens que nous en publions, puisque moy mesme qui voit les merueilles de mes yeux, ne les puis quasi croire qu'en faisant reflexion sur la grandeur de Dieu, *Qui non est personarum acceptor*, qui d'un berger en fait un grand Roy & un grand Prophete, d'un pecheur un grand Apostre, & d'un Sauvage un Ange de son Eglise. Ce ieune homme dont nous parlons voyant l'Automme passé que nous retardions son Baptisme, prit resolution de s'en aller avec

92 *Relation de la Nouvelle France,*
vne escoüade de ses gens chercher quelque prouision dans l'espaisseur de leurs grandes Forests; il ne fut pas bien loing, que son cœur transi de crainte, le fit rebrousser chemin: ie ne sçauois plus, nous fit il, m'esloigner de vous, que ie ne sois baptisé. Quand ie iette les yeux sur les pechez que i'ay commis depuis que ie suis au monde, & que ie me represente le Baptisme comme vn bain qui les doit lauer, ie ne sçauois quitter ceux qui me doiuent conferer vn si grand bien, i'ay resolu de demeurer icy iusques à ce que vous m'ayez ouuert les portes de l'Eglise. Nous le remismes à la Feste de tous les Saints. Dans cette attente comme il nous visitoit souuent, & que par fois nous le faisons manger en nostre maison, il nous tint vne fois ce discours. Mes compatriotes s'imagineront peut estre que ie vous viens voir pour tirer de vous quelques commoditez temporelles, & peut estre encor vous autres pourriez vous auoir cette pensée, mais ie vous supplie de croire que ie ne vous demande rien, & que ie n'attends de vous que la seule instruction de mon ame, si Dieu paroïssoit çà bas en terre, ie vous quitte-rois là pour l'aller trouuer, ou plustost ie

vous inuiterois de le venir recognoistre avec moy, car vous estes l'ouurage de ses mains, comme tout le reste des autres creatures: mais puisque Dieu ne se fait pas voir en terre, & que nous n'auons pas la cognoissance de ses volonte, il faut de necessité que nous visitions & que nous importunions ceux qui nous la peuuent donner.

Vne autrefois il nous parla en ces termes: Mon cœur est fait d'une autre façon qu'il n'estoit il y a quelque temps, car auparauant que ie vous eusse cogneu, j'employois tout mon esprit à rechercher les commoditez de cette vie; à peine estois-je en vn endroit, que ie pensois trouuer mieux en vn autre; maintenant en quelque lieu que ie transporte mon corps, mon ame demeure toujours avec vous, elle n'a point de repos qu'en vos discours; iamais elle ne se lasse de vous ouïr parler de Dieu, nos cabanes me semblent des maisons estranges; & encor que ie sçache que Dieu est par tout, neantmoins il me semble que ie suis plus près de luy quand ie ne suis pas esloigné de vous. Quelques-uns de mes gens me reprochent que ie deuiens françois, que ie quitte ma nation

94 *Relation de la Nouvelle France,*
& ie leur respons, que ie ne suis ny fran-
çois, ny sauuage, mais que ie veux estre
enfant de Dieu. Tous les François ny leur
Capitaine ne sçauroient sauuer mon ame,
ce n'est pas en eux que ie crois, mais en
celuy qui les a fait eux mesmes. Il nous
tint ces discours en meilleurs termes en sa
langue, que ie ne les rapporte en la nostre.

Le voyant tres mal couuert dans vn
froid fort picquant, ie luy demanday s'il
n'auoit point d'autre robbe que celle qu'il
portoit: Ton frere, me fit-il, m'en a donné
vne il y a desia long-temps, mais ie ne la
porte point pour deux raisons. Premie-
rement ie crains mon corps, si ie luy don-
ne ses aises, & que ie le couure chaude-
ment, il me sollicitera de luy procurer
toufiours le mesme bien; & si ie ne le puis
recouurer par mon industrie, il m'indura
doucemēt à vous frequenter plustost pour
son bien particulier, que pour le salut de
mon ame, c'est ce qui m'a fait resoudre de
ne me point seruir de vos presens.

Secondement si ie me montre affection-
né à vos dons, ie seray incessamment im-
portuné d'une femme qui n'a guière d'es-
prit, laquelle me pressera de tirer de vous
tout ce qu'elle eroira que vostre bonté me

pourra accorder. Delà vient que j'ay pris resolution de mépriser mon corps pour mieux penser aux biens de mon esprit.

Au commencement, disoit-il, que j'allois voir vos Peres qui sont aux trois Rivières, ie pensois à part moy, peut-estre, que ces gens cy s'imaginent que ie les vient voir sous esperance de quelque secours temporel ; ils se trompent bien, disois- ie en mon cœur, ce n'est pas mon corps qui m'amene icy, mais le desir de sauuer mon ame, ie pensois aux biens de l'autre vie, & non pas aux commoditez de celle- cy que nous menons en terre. Parlons de son Baptême.

Il s'y disposa de longue main par de grands desirs d'estre fait enfant de Dieu & de son Eglise, & par de grands regrets de ses offenses ; il admiroit les effets de ce Sacrement que nous luy auions expliqué, il souhaittoit d'en auoir la iouissance. En fin le iour destiné s'approchant, il ieusna la veille, nous le menâmes à Kebec pour y receuoir ce Sacrement en la presence de nos François. Là il fut nommé Ignace par Monsieur Gand son Parrain. Sa modestie accompagnée d'une sainte liberté luy faisoit respondre avec grace & fran-

96 *Relation de la Nouvelle France,*
chise à toutes les interrogations qu'on luy
fit. Il fut baptisé le Dimanche dernier iour
d'Octobre, & le lendemain iour consacré à
l'honneur de tous les saints, il se commu-
nia publiquement en la Chappelle de Ke-
bec, les occupations que nous auons en ce
temps-là furent cause que ie ne pûs pas si-
tost l'interroger des sentimens que Dieu
luy auoit donné dans la reception de ces
deux grands Sacremens. Je le fis deux
iours apres par maniere de discours, luy de-
mandant si son cœur n'auoit point ressen-
ty de ioye dans son Baptême: Sa face s'é-
panoüit à ceste demande, & son ame gou-
stant vne autrefois les contétemens qu'elle
auoit receuë en ces mysteres sacrez, fit for-
tir ces paroles de sa bouche. Estant à la
porte de l'Eglise où on fait demeurer
les Cathecumenes deuant leur Baptême,
il m'estoit à voir qu'on me tenoit là pour
cognoistre ma derniere volonté, & pour
sçauoir si ie croyois, & si en effect ie
voulois estre Chrestien; mon cœur sentoit
vne grande presse d'entrer vistement
dans la maison de Dieu, comme si quel-
qu'un m'eust incité viuement à faire vne
chose à laquelle toute mon affection estoit
portée.

Je prenois vn singulier plaisir à toutes les interrogations qu'on me faisoit; Je disois en moy-mesme, en fin Dieu a eu pitié de moy, en fin la porte me sera ouverte, ie serois bien-tost de la famille des croyās, & de la nation des enfans de Dieu: Quand on m'imprimoit le signe de la croix au front, il me sembloit que le Diable s'enfuyoit, & qu'il n'auroit plus doresnauant de pouuoir sur moy. Comme on me fit entrer en l'Eglise, ie m'estonnois comme ie ne descendois point plustost dans les enfers, tous mes pechez se representans à ma memoire, mais ie prenois vn si grand plaisir qu'ils s'en alloient tous s'effacer en vn moment, que ie ne sçauois l'expliquer, ie m'estonnois comme Dieu m'auoit tant attendu pour me faire tant de biens tout en vn coup. Tout aussi-tost qu'on eut versé les eaux Sacrées sur ma teste, mon cœur se sentit tout changé. En effect il est tout autre qu'il n'estoit, car depuis ce temps-là il me semble qu'il n'attend pas que le peché vienne iusques à luy dans les occasions de mal faire: mais vous diriez qu'il sort hors de moy pour aller au deuant des choses mauuaises, pour les repousser & les esloigner avec vne tel-

le force, qu'il m'est aduis que ce n'est pas moy qui resiste. Il me semble aussi que ie suis deuenu comme sourd & aucugle, car ie ne prend point garde à ce qui se passe deuant moy. Hier il se fit vn grand bruit dans nostre cabane, les enfans faisoient vn tel tintamarre que tous mes gens s'en fascherent, & se mirent à crier & faire plus de bruit que les enfans mesmes, ie ne prenois point garde à tout cela, si on ne m'en eut aduerty; si bien qu'il me vint vne pensée si ie ne deuenois point sourd, mais ie m'aperceu bien que mon cœur me parloit si fort que ie n'escoutois point les creatures. *Magnus Dominus & magnitudo eius non est finis.* O que Dieu est grand, & qu'il est bon; si les Sauuages pouuoient tirer ces pensées & les sentimens d'un autre endroit que du Liure viuant, qui est Iesus-Christ, ie douterois s'ils disent vray, mais ils n'ont ny liure imprimé ny escrit à la main, & quand ils en auroient, ils n'y cognoissent rien, ils n'ont commercé avec aucun homme de la terre qui leur puissent donner ces pensées, c'est ce qui me fait dire que cette diuine source de lumiere & d'amour verse par soy mesme, ou par le ministere des bons Anges, ces saintes

pensées , & ses deux sentimens dans des cœurs iadis remplis de barbarie , & maintenant possédez de Dieu.

Pour la Communion, comme on commença de l'instruire sur ce mystere vraiment adorable, il s'écria tout remply d'étonnement, ô Sauvages, serez vous tousiours des chiens ; n'aurez-vous iamais d'autre nourriture que celles des chiens : Et comme on luy recommandoit de ne point declarer cette doctrine à ces compatriotes, qui n'ont pas encor la Foy : Non , non, fit-il, ne craignez point, ie sçay bien qu'ils ne sont pas tous capables de ce que vous m'enseignes : C'est pourquoy ie ne leur dy rien que ce qu'il faut dire à des fols pour les guerir de leur maladie: Cette response non attendue nous fit rire , car il la donnoit avec assez de grace & de candeur. Comme il voulut s'approcher de cette table, Monsieur Gand le Parrain le conduisant, Dieu luy donna vn grand sentiment d'humilité : Il me sembloit, disoit-il, que ie n'estois qu'une pauvre petite puce, & ie m'estonnois qu'un si grand Capitaine voulut entrer dans le cœur d'un si petit animal, ie ressentois neantmoins vn si grand desir de m'approcher de luy, que ie ne le

sçauois declarer. Il apportoit cette comparaison, si on retenoit long-temps vn homme dans vn pais estrange esloigné de ses parens & de ses amis, si apres auoir esté bien tourmenté, il trouuoit moyen d'euader & de retourner en sa patrie, avec quelle affection s'y porteroit-il, de quel doux plaisir ne iouïroit-il pas à la veüe de ses parens & de ses amis? Voila comme estoit mon ame, il me sembloit qu'elle sortoit d'une rude captiuité, & qu'elle courroit de toutes ses forces apres celuy qu'elle alloit receuoir, & non-obstant toute son ardeur, il luy sembloit qu'on la pressoit encor interieurement de s'approcher deluy quand elle l'eut receu, elle se trouua contente & satisfaite comme vne personne qui n'a plus rien à souhaitter.

Regi seculorum immortalī soli Deo honor & gloria, amen. Que le Dieu des Dieux soit à iamais beny. Je ne m'attendois pas de voir le reste de mes iours des effets si puissans de sa grace dans le cœur d'un barbare. Toutes les peines qu'on a prises, toutes les despences qu'on a faites pour le salut des Sauvages, sont plus que suffisamment payez par la conuersion de ce seul homme. Passons outre.

Depuis son Baptisme, il a mené vne

vie conforme à ces graces , en voicy quelques preuues. Les Algonquins de l'Isle qui sont ses compatriotes , estans descendus en grand nombre aux trois Riuieres, il se mit à les instruire avec vne telle ardeur , que les gens le tindrent suspect , si bien que quelques - vns le soupçonnerent de s'allier avec nous pour les faire mourir. Ils espioient toutes ses actions , prenoient garde où il alloit , ne l'abordant qu'en crainte , comme on feroit vn Negromantien. On ne l'inuitoit plus aux festins comme vn tres-meschant homme , dont ils se défoient , c'est vn deshonneur estans parmy eux que d'estre exclus de ces banquets , mais il ne s'en mettoit guiere en peine ; bref ie cognoissois l'amour ou l'auersion que qu'elqu'vn auoit de nostre créance par le bon ou mauuais visage qu'en luy portoit , ayant cette consolation la plus douce qu'vn homme puisse auoir en ce monde de se voir aymé ou hay pour Iesus-Christ. En fin les faux bruits que le Diable semoit contre la Doctrine de Iesus-Christ se dissipans , ceux qui auoient quelque desir de leur salut l'escoutoient volontiers. Il preschoit avec vne liberté vraiment apostolique , reprenoit hardiment

102 *Relation de la Nouvelle France,*
les vices deuant les plus apparens & les plus
orgueilleux de sa nation.

Qui pensons nous estre, disoit-il vn iour,
voulez-vous que ie vous declare qu'elle est
vostre grandeur? Il prenoit vn pois chiche
en sa main, & le tenant suspendu sur vn
grand brasier, il s'escrioit; voila ce que nous
sommes entre les mains de Dieu. Si ce pois
que ietiens de mesdeux doigts s'en orgueil-
lissoit, s'il estoit capable de receuoir mon
commandement, & qu'il me refusast obeis-
sance, s'il me disoit qu'il n'a que faire de
moy qu'il le soustiens au dessus de ce feu, ne
meriteroit-il pas que ie le laissasse tomber
dans ce brasier. Voila ce que nous deuons
attendre de la main de Dieu qui nous sou-
tient & qui nous conserue, si nous refu-
sons d'embrasser la Foy & d'obeyr à ses vo-
lontez.

Il trauailloit iour & nuict pour la conuer-
sion de ces pauvres gens, il agissoit & au-
pres de Dieu, & aupres de nous, & aupres
d'eux. Il faisoit des oraisons pleines de lar-
mes, s'en alloit dans le fond du bois, & là
prenoit vn chastiment sur son corps avec
des ronces pour attirer la misericorde de
Dieu, & appaiser sa colere contre son
peuple.

Il nous venoit auertir de ceux qui estoient mieux disposez, & nous donnoit aduis comme il se falloit comporter en leur endroit. Helas, leur disoit-il, par fois s'il ne tenoit qu'à donner ma vie pour vostre salut, que ie le ferois volontiers; Quand il veit que la necessité les contraignit de s'esloigner de nous, les Nauires tardans trop à venir, il s'escrioit avec vn grand sentiment: Il me semble qu'on marrache les entrailles, faut-il que tant d'ames se perdent faute de secours, le Diable qui ne les a pas créés sera-il tousiours leur maistre; Les Hiroquois leurs ennemis leur venans faire la guerre, il dit au Pere qui l'auoit particulièrement instruit aux trois Riuieres, qu'il falloit faire paroistre que ceux qui estoient baptisez n'estoient point poltrons, que Dieu leur donnoit du courage. Il se confessa, puis alla recognoistre l'ennemy, l'approchant de si pres, qui luy eut peu parler. Iamais on ne le veit troublé, ny iamais saisi de crainte, il leur reprocha par apres que le peu de cōfiance qu'ils auoient eu en Dieu les auoit perdu.

Les Sauvages sont fort liberaux les vns enuers les autres, mais ils font leurs presents à leurs parens ou à leurs amis, ou à

104 *Relation de la Nouvelle France,*
ceux dont ils esperent le reciproque. Notre Neophyte ayant fait quelque bonne chasse, ou quelque bonne peche, partage les malades & les pauvres necessiteux tous les premiers.

Il auoit vne sœur qu'il aymoit vniquement, il taschoit de luy procurer le Baptesme, mais deuant que ce bonheur luy arriuaft elle mourut, s'estant esloignée du lieu où elle peut receuoir ce Sacrement; cela le troubla fort notamment de ce qu'elle estoit morte deuant que ses pechez luy fussent pardonnez. Comme il estoit dans cette angoisse, il s'approcha de la Communion, & sortant de la table, il eut cette pensée, si ma sœur est damnée ce n'est pas la faute de Dieu, car il est tout bon, & n'a pas manqué de luy donner les moyens necessaires pour se sauuer; c'est donc elle qui a failly de son costé: or puis qu'elle a refusé l'amitié de Dieu, ie ne la veux plus aymer, car ie ne veux point auoir d'autres amis que les amis de Dieu; ie suis de son party. Depuis ce temps il perdit entierement la memoire de cette sœur qu'il auoit tant cherie.

Quelque iour apres cette mort, vn Sauvage son beau frere l'abordant, luy fit beau-

coup de reproches de ce qu'à son dire il ne luy faisoit point part des meubles de sa sœur, dont il pensoit qu'il fut saisi. Tu dis, luy faisoit-il, que tu crois en Dieu, & cependant tu commets vne espeece d'avarice ou de larcin, retenant pour toy seul ce qu'auoit ta sœur, si tu croyois comme tu le dis, tu ne cōmettrois pas ces actions. Ignace entendant ce discours, & plusieurs autres iniures & reproches que cet homme luy fit, repartit en cette sorte sans se troubler; Tu dis que ie croy en Dieu, tu le dis avec reproche, mais ie croy avec verité, & si ie n'y croyois pas, ie te ferois bien ressentir les iniures que tu me donne, mais ie t'assure que mon cœur n'est point alteré, qu'il ne te veut aucun mal, & qu'il souffre avec plaisir tous ces reproches que tu m'as fait; il y a quelque temps que ie n'aurois pas endure tes iniures, pour le present ie te donne parole, que non seulement ie ne te veux aucun mal, mais que ie prieray Dieu pour toy, & que dans les occasions ie te feray tout le plaisir qui me sera possible. Quand est du bagage de ma sœur, ie ne l'ay pas, sçache où elle l'a mis en depest, & l'emporte, i'aymerois mieux perdre tout ce que i'ay, que de te voir of-

106 *Relation de la Nouvelle France,*
senfer celuy qui à tout fait. Il disoit par
fois au Pere qui l'a instruit plus particulie-
rement; Mortifie moy en public deuant les
autres, afin que ceux qui veulent estre ba-
ptisez se persuadent qu'il faut exercer la
vertu quand on est enfant de Dieu. Voila
de grands effets de la grace. Que Dieu soit
beny à iamais des hommes, & des Anges,
des Schytes & des Barbares, aussi bien que
des Grecs. Ainsi soit-il.



CHAPITRE VII.

*De la Conuersion d'un Capitaine , & de
toute sa Famille.*

IL y a de deux sortes de Capitaines parmi les Sauvages , les vns le sont par droit de naissance , les autres par eslection. Ces peuples ne sont point si barbares qu'ils ne portent du respect aux descendans de leurs Chefs , si bien que si le fils d'un Capitaine a quelque conduite , sur tout s'il a quelque eloquence naturelle , il tiendra la place de son pere sans contredit. Celuy dont nous parlons , est Capitaine d'extraction , il est d'un bon sens , homme de courage ; mais comme il n'a pas le babil en main , aussi n'est-il pas dans la souveraine gloire des Capitaines ; ces barbares font bien souvent plus d'état d'un grand causeur que d'un homme de bon sens ; ils honorent neantmoins celuy cy , & l'ont en estime , luy deferant beaucoup en leurs conseils. Nous auons tâché un fort long-temps de le gagner à Dieu , mais il nous faisoit tousiours

de la resistance. Vn Sauvage voyant vn iour que nous pressions fort ce Capitaine d'embrasser la Foy, nous dit par apres en particulier, si celuy-là vous donne sa parole, tenez-vous assurez qu'il croit, car il ne vous déguisera point sa pensée: en effect iamais il ne nous a donné grande esperance de sa conuersion, iusques à ce que Dieu l'a contrainct de se rendre. Nous l'auions destiné pour estre le fondement & la base de la reduction de saint Ioseph, croyans qu'il s'arresteroit en la maison qu'on y faisoit bastir: Nous luy promettions du secours pour l'aider à défricher la terre; il nous prestoit assez l'oreille, escoutoit volontiers, notamment ce qui concerne l'autre vie, mais il n'auoit point de paroles pour nous répondre: En fin nous luy auons demandé depuis son Baptisme d'où venoit qu'il faisoit tant le retif; peut-estre, luy disions-nous, que tu croyois que nous estions des menteurs; non pas cela, répondit-il, ie n'ay point douté de vos paroles ny de vos promesses, mais ie vous diray franchement, que ie craignois que mes gens me tinssent pour François; c'est pourquoy ie ne voulois point quitter les façons de faire de ma nation pour embrasser les vostres, quoy que

ie les iugeasse meilleures. Je ne laissois point de croire dans mon ame ce que vous enseigniez de celuy qui a tout fait. Il faut auoüer qu'il a donné souuent des preuues de sa foy. Deuant qu'il fust Chrestien, il apportoit luy-mesme ses enfans en la Chapelle pour estre baptisez ; que s'ils estoient trop malades, il nous appelloit en sa cabane, il a procuré le mesme bien à l'vne de ses femmes, car il en auoit deux : Il a veu iusques à quatre de ses enfans mourir Chrestiens deuant ses yeux : Il entendoit les blasphemes de ses Compatriotes contre ces eaux sacrées, leur attribuant la cause de leur mort ; & nonobstant tout cela, pas vn des siens n'est passé en l'autre vie sans estre lauë du Sang de I E S V S - C H R I S T. Vne sienne fille aagée d'environ dix-huict à vingt ans, pressée d'vne forte maladie qui luy arrachoit la vie par violence, ne vouloit en aucune façon ouïr parler du Baptisme, s'imaginant que ceste medecine sacrée de nos ames n'ayant point guery les corps de ses freres, luy seroit fatale & nuisible ; son pauvre pere la voyant en danger de mort, la pressoit fort de la receuoir, quoy qu'il ne la demandast point pour soy mesme : Ne crains point, ma fille, luy disoit-il, ce n'est

110. *Relation de la Nouvelle France,*
pas l'eau qu'on te versera sur la teste quite
fera mourir , en voila tant qui sont ré-
chappez apres le Baptisme ; c'est pour le
bien de ton ame qu'on te veut baptiser , &
non pour abreger tes iours ; & comme elle
sembloit vn peu condescendre à ces paroles,
il nous pressoit de la baptiser au plustost. En
fin nous luy dismes que quand on la bap-
tiserait cent fois pour vn iour , ces eaux sain-
ctes ne luy seruiroient de rien , si elle ne
croyoit en son cœur , & si elle n'auoit re-
gret d'auoir offensé Dieu , qu'au reste elle
n'en donnoit aucune marque. Ce pauvre
homme entendant cela , la pressa tant , &
la catechisa si bien , qu'à la parfin elle nous
donna de suffisans indices de sa bonne dis-
position , on la fit Chrestienne , & peu de
temps apres , elle mourut. Or comme la ma-
ladie continuoit ses rauages , nous veismes
toute la cabane de ce pauvre Capitaine dans
l'affliction ; nous baptizames pour vn iour
treize personnes de ses parens & alliez ; &
comme il se trouuoit mal aussi bien que les
autres , enfin il se resolut de prendre pour
soy ce qu'il auoit procuré pour tant d'autres ;
il se nommoit en sa Langue Etinechkayat ,
& le nom de Iean Baptiste luy fut donné
au Baptisme. Ayant traîné fort long-

temps dans sa maladie, Nostre Seigneur luy rendit la santé; il l'en vint remercier dans la Chappelle de Kebec, si tost qu'il pût marcher; mais il ne tarda pas longtemps sans estre esprouvé: *Fili accedens ad seruitutem Dei sta in iustitia & timore, & prepara animam tuam ad tentationem*: Ces paroles du Sage se verifient tous les iours deuant nos yeux. Ce Neophyte n'auoit plus que trois enfans, c'estoient trois filles; l'une mariée, l'autre aagée d'environ trois ans, & l'autre d'un an: La plus âgée est morte sans enfans en la fleur de son aage; son pauvre pere la voyant trespassee, nous a renuoyé son corps de quarante lieues loing pour estre mis au cimetiere des Chrestiens. Il nous donna celle qui n'auoit que trois ans pour estre eleuée chez quelque Famille Françoisse, & afin qu'elle ne s'ennuyast pas il luy donna pour compagne vne autre petite fille sa parente, dont Monsieur Gand, vray pere des pauvres, prit le soin payant sa pension, comme nous faisons de ceux que nous tenons chez quelques Familles. Dieu a pris pour soy la fille de ce Capitaine, & a laissé l'autre; si bien qu'il ne luy reste plus qu'un enfant qui est encor à la mammelle d'un grand nôbre que Dieu luy auoit don-

né: Au bout du compte toutes ces afflictions ne l'ont point esbranlé. Le Pere qui résidoit à Sillery, où s'est fait la Reduction des Sauvages, entrant vn iour dans sa cabane, le treuva tenant & baisant vn petit Crucifix qu'on luy auoit donné; voyant le Pere, il luy dit: Nikanis, j'ay recours en mes afflictions à celuy qui est mort pour moy; sois assuré que ie croy en luy du fond de mon cœur; ie ne vous ay point menty quand ie vous ay donné parole que ie ne quitterois point la Foy.

Quelques Sauvages venus de Tadoussac logez dans sa cabane, n'auoient guiere d'inclination a nostre créace, se gaussant quād on en vouloit parler, luy, pour leur imposer silence dit tout haut qu'il croyoit en Dieu, & qu'il le vouloit prier, inuitant le Pere qui se trouua là de l'instruire, & de le venir voir tous les iours pour le même subiect; le Pere prenant donc la parole, demanda a ses nouveaux hostes, pourquoy Dieu auoit créé le Soleil, pourquoy il auoit formé les animaux: Ces grands causeurs, en matiere de badineries, n'eurent point de réponse à ces interrogations; nostre Neophyte les voyāt muets, prit la parole, & discourut fort bien de la Creation du monde, comme Dieu auoit

auoit fait le Soleil pour nous éclairer, les animaux pour nous nourrir, pensant à nous comme vn bon pere pèse à ses enfans. Son discours nous fit cognoistre que la Foy s'etracinoit tous les iours de plus en plus dedās son cœur. Il tient avec foy vne sienne parente baptisée à l'extremité. Ceste femme estant retournée en santé ne se soucioit guiere de son ame, quand on luy parloit des Sacraments elle se gaussoit, la Confession luy seruant de risée, Nostre Neophyte la reprit luy imposant silence pour vn temps, mais il ne luy changea pas le cœur; elle perseueroit tousiours dans ses railleries, se riant notamment du Sacrement de Penitence: En fin elle fut surprise tout en vn coup d'vn catarre qui luy ferma quasi le conduit de la respiration, & luy osta la parole; ayant perdu la langue, Dieu luy ouurit les oreilles. Le Pere qui l'instruisoit l'allant visiter, l'épouuanta: En fin te voila prise à la gorge, c'est à ce coup que le Diable te veut empêcher tout de bon de te cōfesser, tu as refusé de le faire estant en santé, peut-estre ne le pourras-tu plus faire estant malade. Ceste pauvre femme touchée de Dieu, fit signe qu'elle desiroit décharger sa conscience, & tout sur l'heu-

114 *Relation de la Nouvelle France,*
re, & dans sa cabane, le Pere luy donna les
signes qu'elle deuoit faire aux interroga-
tions qu'il luy feroit. Comme elle auoit
fort bon iugement, non seulement elle les
gardoit, mais elle s'efforça en telle sorte
qu'elle recouura vn petit la parole; bref,
ayât purifié son cœur, Dieu l'a remit en san-
té; elle se comporte maintenant comme
vne personne qui croit en Dieu, & qui a vo-
lonté de luy obeir.

Le gédre de nostre Neophyte auoit bien
de plus grandes dispositions à la Foy que
ceste femme: Ce bon homme retournant
des bois pour se confesser, le Pere auquel
il s'adressa luy demandant s'il ne prioit pas
Dieu en sa cabane: Non, dit-il, ie ne le prie
pas, pource que ie ne sçay pas encore ce
qu'il luy faut dire; mais ne pense-tu pas
quelquefois en luy, repliqua le Pere: Ah,
Nikanis, répondit-il, i'y pense incessam-
ment, i'ay assez de regret de ce que ie ne
sçay pas ce qu'il faut dire. En quelque lieu
que i'aille, ie pense tousiours qu'il me voit,
i'esperetousiours en luy, mon cœur veut
tousiours parler à luy, mais il ne sçait pas ce
qu'il luy faut dire. Le Pere fut bien conso-
lé voyant que ce bon homme faisoit orai-
son sans le cognoistre.

La dernière personne de la Famille de nostre Neophyte, qui a esté baptisée, c'est sa femme, laquelle est bonne & simple, se laissant conduire aisément au bien; plaise à nostre Seigneur répandre sur elle sa sainte benediction, & sur son mary, & sur tous ceux de sa cabane ou maison.

Quelques Sauvages ont voulu persuader à ce braue Capitaine de prendre vne seconde femme, à quoy il sembloit quasi obligé selon les loix ou les coûtumes de sa Nation; la femme mesme l'en a sollicité, & celaluy est arriué par deux fois à l'occasion de deux femmes qu'on luy a voulu donner en diuers temps: mais il respondit en ces termes: Vous venez trop tard, i'ay donné ma parole à Dieu; ie ne scaurois plus m'en dédire: Je luy veux obeir; ie luy ay dit, iet'obeiray, ie le veux faire. Quiconque a cognoissance de la liberté des Sauvages, & le besoin qu'ils ont de plusieurs femmes pour leur ménage, dira que la grace est bien forte qui renuerse les coûtumes du pais, bride les loix de la chair, & combat le propre interest.

CHAP. VIII.

*De la Conuersion & du baptesme
d'un Sorcier.*

I'Ay dit souuent qu'on dōnoit icy le nom de forcier à certains Iōgleurs ou charlatans qui se mêlent de châter, & de souffler les malades, de consulter les Diables, & de tuer les hommes par leurs sorts. Je me persuade qu'en effect il y en a quelqu'un entre eux qui a communication avec les Demōs; mais la pluspart ne sont que des trōpeurs, exerçans leurs iongleries pour tirer quelques presens des pauvres malades, & pour se rendre recommandables, ou pour se faire craindre. Celuy dont ie vay parler estoit de ceste cathégorie, il estoit redouté de ses gens, & tenu pour vn méchant homme; i'en ay souuent parlé és Relations precedentes, car nous auons eu quelques prises avec luy en la presence de ses Compatriotes; mais comme son art estoit fondé sur le mensonge, & que nous estions ap-

puyez sur la verité, nous le batismes si rudement, qu'il se rendit. Il nous venoit trouver en particulier pour se faire instruire; nous croyons au commencement qu'il n'auoit pas tant de desir de nous auoir pour amis, qu'il craignoit de nous auoir pour ennemis; mais Dieu qui est le Maistre des cœurs le touchoit interieurement, & le dispoisoit à vn bié qui surpasse nôtre cognoissance: Nous quittant pour aller à la guerre, il nous asleura qu'il auroit recours à Dieu, & qu'il croyoit en luy s'as feintise; il cognut bien que nous prenions ses paroles cōme vn compliment de Sauuage, qui ne fait pas difficulté de mētir; C'est pourquoy se trouuant par apres d'as les difficultez, & s'adresant à Dieu, il luy disoit: Les Peres ne pensent pas que i'aye recours à toy, & que i'ete prie, mais ils sont trompez; ne laisse pas pourtant de me secourir. Or comme plusieurs choses luy sont arriuées l'espace de deux ans qu'il a poursuiuy son Baptisme, i'en rapporteray succinctement vne partie: Voicy ce qu'il nous a raconté.

Comme nous eufmes quitté pour aller à la guerre, ie dy à mes camarades sur le soir qu'il falloit faire les prieres qu'on

118 *Relation de la Nouvelle France,*
nous auoit enseigné; ils se moquerent de
moy; ce qui fut cause que ie ne priois Dieu
qu'en mon cœur. Quand nous fusmes arri-
uez au pays de nos ennemis, nous estans iet-
tez trop auant, nous nous vismes en vn in-
stant inuestis de tous costez; alors ie fis le si-
gne de la Croix, & dis à Dieu: Tu es tout-
puissant, secoure moy, tu le peux faire: le
combat s'anima tout à coup, les flèches vo-
loient par l'air comme gresle tombe sur la
terre, elles passoient à l'entour de moy cō-
me la foudre sans me toucher, ie voyois tō-
ber mes camarades à mes pieds; les vns
tuez, les autres blesez, sans que ie receusse
aucun dōmage: en fin trouuāt iour au tra-
uers del'ēnemy, ie me sauue avec quelques
vns de mes gens, & cōme nous estiōs pour-
suiuis, nous allions cōme la tempeste; ceux
qui m'accōpagnoient, me disoient souuēt
qu'ils n'en pouuoient plus; pour moy leuant
souuēt mon cœur à Dieu, il me semble qu'il
me fortifioit en sorte, que ie ne senty iamais
aucune debilité, ny pour la faim, ny pour le
travail que nous endurions; estans arriuez
au lieu où no⁹ auiōs laissé nos canots, nous
n'auions rien du tout à manger; ie dy dere-
chef à ceux qui estoient restez avec moy,

qu'il se falloir adreſſer à Dieu; mais ils n'en tindrent conte. Je ne laiſſay pas de l'inuoker, luy preſentant ceſte priere : Toy qui as fait les oyſeaux, i'en ay beſoin, tu m'en peux donner ſi tu veux; ſi tu ne veux pas, il n'importe; ie ne laiſſeray pas de croire en toy. Ayant dit cela, ie fay le ſigne de la Croix, & me iette d'asvne Iſle pour chaffer, ie n'allay pas bien loing que ie rencontray vne vache ſauuage, ie la fais ſaillir à l'eau où nous la tuasmes, la voyant morte, ie remerciay celuy qui nous l'auoit donnée; & mes gens furent contraints de confeſſer que ce preſent venoit de ſa bonté.

Après nous eſtre vn petit rafraichis, nous pourſuiuiſmes noſtre chemin, arriuez que nous fuſmes au grand fleuve, nous deſcendiſmes dans les Iſles du Lac, où nous trouuaſmes quelques Sauuages preſſez de la faim; nos gens leur dirent qu'ayant fait ma priere à Dieu, il nous auoit donné à manger, ils me preſſerent fort de le prier pour eux, voyans leur neceſſité & la noſtre, car nous auions deſia conſômé ce qui nous reſtoit de chair de ceſte vache ſauuage. Je luy dis ces paroles : Ces gens ſont à toy, car tu as fait tous les hommes; ils ont faim,

120 *Relation de la Nouvelle France,*
& nous aussi ; donne nous à manger si tu
veux , tu peux tout , si tu as de bonnes
pensées pour nous , nous en trouverons ;
sinon , nous n'en trouverons point , mais
il n'importe , quand tu ne m'en voudrois
point donner , ie ne laisserois pas de croire
en toy : Ma priere finie , ie m'en vay
chasser , ie ne trouuay rien , ie pensois à
part moy , il ne m'en veut pas donner ,
mais il n'importe : C'est luy qui est le
Maistre. Comme ie remontois dans mon
canot , ie veis ie ne sçay quoy flotter sur
la riuere , ie pensois au commencement
que ce fut vn bois , mais voyant qu'il
couppoit le fil de l'eau , ie le poursuiuy ;
ie trouuay que c'estoit vn cerf qui tra-
uersoit d'une isle en vne autre : nous le
mismes bien - tost à mort , avec l'estonne-
ment de mes gens qui en firent curée avec
moy.

Au partir de là , ie me retiray vers
les Algonquins , où la contagion com-
mençoit desja. Or comme ie vous auois
frequenté , on me demandoit souuent
quelle estoit vostre creance , leur expo-
sant ce que vous m'auiez enseigné de
l'autre vie , ils se mocquoient de moy

s'estonnans que ie fusse si hebeté de croire des choses si éloignées des sens. Si ces Peres nous disoient, faisoient-ils, croyez en Dieu, & vous viurez long-temps en terre; vous ne serez point malades, vo⁹ aurez tous les cheueux gris deuât que de mourir; cette doctrine seroit bonne, tout le monde les croiroit, mais ils parlent d'une autre vie, & nous font perdre celle que nous viuons çà bas par leurs prieres. Voila ce qui ne vaut rien : Et toy-mesme, me disoient-ils, tu mourras bien-tost, puis que tu leur veux croire. Je disois à part moy entendant ces discours, ie ne pense pas que Dieu qui est si bon, me tuë pour croire en luy, & pour luy vouloir obeyr: en effect il m'a conserué, & tous ceux qui parloient contre luy sont morts. La maladie nous pressa si fort, qu'on laissoit les corps des Trépassiez sans sepulture; on ne les osoit aborder, & moy ie les enseuelissois & enterrois sans rien craindre, priant Dieu qu'il me conseruaist ce qu'il a fait. Voila ce que ce Neophyte nous racontoit.

Quittant le pays des Algonquins, ils s'en vint aux trois Riuieres, se presente à nos Peres pour estre instruit, ils le rebuterēt au commencement comme vn forcier qu'ils

122 *Relation de la Nouvelle France,*
croyoiẽt trop attaché à ses badineries, mais
sa perseuerance l'emporta ; on l'instruit en
particulier, & Dieu l'éprouue en public ; sa
femme & ses enfans, & son frere, meurent
de peste, il leur procure à tous le Baptesme
sans s'ébranler.

Vn Capitaine le fait prier de souffler vn
malade, luy offránt vn grand collier de por-
celaine, il renuoye le present, & dit tout
haut en public que son art de forcier est vn
art de tompeur, & qu'il ne le veut plus
faire.

Comme il se voyoit molesté de ses gens
aux trois Riuieres, il descendit à Kebec, où
il fit des merueilles au commencement ;
mais en fin les femmes qui ont de praué le
cœur de Salomon le penserent perdre ; il en
voulut épouser vne à laquelle vne autre pre-
tendoit, il se laisse emporter au ieu ; bref il
nous donna vn tel mécontentement, que
nous le chassâmes de la maison où nous l'a-
uions logé, & luy fîmes quitter l'habit à la
françoise qu'il portoit. Comme il se veit
traité de la sorte, il ouure les yeux & parle
au Pere qui l'enuoyoit en cette sorte. En me
chassant de cette maison, me fermez vous
la porte del'Eglise ; refusez-vous de m'in-

struire? Le Pere luy repliquant qn'on ne laisseroit pas de l'enseigner s'il vouloit obeir: il s'escria; Voila qui va bien, ie ne craignois que ce poinct, pour vostre maison & vostre secours, & vos habits, c'est dequoy ie ne me mets pas en peine, dit-il, ie pourray viure sans cela; mais i'auois grand peur que vous refusassiez de m'enseigner le chemin du Ciel: Ie voy bien que ie fais mal, mais ie ne veux pas perseuerer dans mon peché.

Comme nous crions certain iour contre leur façon de faire, il nous dit; Escoutez-moy à vostre tour, ie veux parler; si vous n'auiez non plus la cognoissance des Escritures que nous autres, si dieu ne vous auoit pas enseigné dauantage, si vos ancestres ne vous auoiét laissez que le ventre & la guerre comme à nous, peut estre ne seriez vous pas plus gens de bien que nous.

Vne autrefois vn des Peres qui l'auoit enseigné passant auprès deluy sans luy rien dire, comme en le mesprisant pour auoir perdu sa ferueur, il l'arresta tout court, & luy dit d'une voix haute; Qui pense-tu que soit Pigaryich? (c'est ainsi qu'il se nommoit deuant son baptisme) c'est vn gros arbre fortement enraciné dans la terre, crois-tu

124 *Relation de la Nouvelle France,*
le ietter à bas tout d'un coup? Donne, donne de grands coups de hache, & continue long-temps, & en fin tu le renuerferas; il a enuie de tóber, mais il ne peut, ses racines, c'est à dire, ses meschantes habitudes le retiennent malgré qu'il en ait; Ne perds pas courage, tu en viendras à bout.

Au mesme temps que nous le rebutions, il fut sollicité de retourner à ses iongleries; on luy fit des presents, on luy promit que le tout se feroit en secret, cependant quoy il eut vne grande difette des choses qu'on luy presentoit, iamaïs neantmoins on ne les voulut accepter, ny reprédré son tambour. En fin nous n'auons pas reconnu qu'il ait perdu la foy nonobstant ses débauches ou ses libertez: Il prioit Dieu tous les iours soir & matin en sa Cabane, & partout où il se trouuoit il publioit nostre creance sans craindre ses compatriotes. Le respect humain qui fait icy biē du mal, aussi biē qu'en Frâce, nel'empêche guiere de dire ce qu'il pense; C'est vn esprit prompt, hardy, que la crainte de l'enfer a retenu dans quelque deuoir depuis que la Foy s'est emparée de son ame. Or comme il voyoit que nous le renuoyons de temps en temps pour son baptésme, il nous a fort pressez, & par

de bonnes raisons. Puis que vous enseignez, disoit-il, que Dieu fait misericorde, & efface les pechez de ceux qui croiēt en luy, & qui sont baptisez, pourquoy me refusez-vous le Baptisme, moy qui tesmoigne publiquement le regret que j'ay de l'auoir offēsé? Si vous hayssiez mes malices, baptisez-moy, & elles seront effacées, & vous n'aurez plus dequoy haïr en moy. J'ay commis plusieurs pechez que ie n'aurois pas commis si vous m'eussiez baptisé, car j'ay tousiours eu cette resolution si iamais ie le pouuois estre, que ie respecterois mon baptisme, mais ne l'estant pas, ie suis comme vn chien, c'est pourquoy ie me laisse aller à mes passions, avec regret neantmoins. Nous le reprismes vne fois publiquement d'vne faute qu'il faisoit en nostre presence, luy sans s'estōner nous dit deuant tous les gens. Je ne croyois pas que cette action fut mauuaise, mais puis qu'elle l'est, j'ay regret de l'auoir commis, & iamais plus il ne m'adiendra de la commettre. Et puis il nous vint trouuer en particulier pour sçauoir la raison pourquoy nous condamnions cette action; luy ayant donné, il s'accusa soy mesme, s'estonnant de sa bestise.

Le voyans vn certain iour tout pensif & affligé, nous luy demandasmes ce qu'il auoit ; mon cœur est triste, respondit-il, car il me semble que Dieu ne nous ayme pas, puis qu'il nous commande des choses que nous ne sçaurions garder : il y a bien des pechez que ie ne crains point, mais il y en a qui me font peur. Je ne crains point l'yurongnerie, ny les festins à manger, ny la consulte des Demons, ny nos chanteries, ny l'orgueil, ny le larcin, ny le meurtre, mais ie crains les femmes : Dieu nous commande de n'espouser qu'une seule femme, & si elle nous quitte, de n'en point prendre d'autre : me me voila donc contraint d'estre seul, car nos femmes n'ont point d'esprit. De viure parmy nous sans femme, c'est viure sans secours, sans mesnage, & tousiours vagabond. Nous luy demandasmes s'il ne pensoit pas auoir assez de force avec la grace de Dieu de ne point quitter sa femme au cas qu'il en eut espousé une chrestienne : Ouy dea, repartit-il, car ie n'ay pas enuie de l'abandonner. Or luy fismes nous, si Dieu est assez puissant pour te donner la perseuerance au mariage avec une seule femme, pourquoy ne

pourra-il pas donner la mesme force à vne femme si elle est chrestienne ? Vous auez raisõ, repliqua-il, ie ne perdray point courage, mon esperance est en luy ; & quand mesme ie deurois estre seule le reste de mes iours, la vie n'est pas longue.

Le temps destiné pour son Baptisme s'approchant, nous le sondasmes plus particulièrement, nous luy dismes certain iour que s'il tomboit malade estant Chrestien, qu'il s'imagineroit que nous luy auions causé cette maladie ; il est vray, dit-il, qu'on vous croit les auteurs de la contagion qui recommence, mais ie me ris de tout cela, vous n'estes pas des Dieux pour disposer de la vie des hommes. Tes gens te diuertiront de la Foy, luy dismes-nous, tu es inconstant, tu ne tiendras point ferme. Il est bien vray que ie n'ay point d'esprit, respondit-il, mais quand tous les Sauvages me diroient, nous te tuërons si tute fais baptiser, ie leur dirois, tuez moy, il n'importe, ie veux estre baptisé ; puis que le grand Capitaine du Ciel le veut ainsi, ie luy veux obeyr, & non pas à vous autres qui n'aez ny force ny credit sur nos ames. Mais d'où vient, luy dismes-nous, que tu n'est pas aymé de tes Capitaines ?

I'en'enſçache qu'un, reſpondit-il, qui me
 haïſſe, & celuy là me décrie auprès des
 autres, il a depit de ce que ie veux aller au
 Ciel, voyant bien qu'il ira en enfer s'il ne
 quitte ſes femmes, ce qu'il ne fera iamais; il
 dit qu'il veut eſtre baptisé, mais ſi vous ne
 le baptiſez avec deux femmes, il ne le fera
 de long-temps : Or comme il void que ie
 ſuis pour eſtre baptisé deuant luy, quoy
 que vous ayez commencé de l'inſtruire
 deuant moy, il me porte enuie de ce que
 ie veux aller le premier en Paradis. Sa
 reſponce nous fit rire. C'en'eſt pas neant-
 moins la raiſon pourquoy il eſt moins ay-
 mé. Cela prouient de ce qu'eſtant libre,
 & d'une humeur hardie il paroïſt altier.
 Or les Sauvages ne ſçauroient ſupporter
 en aucune façon ceux qui paroïſſent vou-
 loir prendre quelque aſcendant ſur les au-
 tres, ils mettent toute la vertu en vne cer-
 taine douceur ou apathie, ne recognoiſ-
 ſant quaſi point de peché plus enorme que
 la colere.

En fin ce bon homme apres auoir frappé
 long-temps à la porte, fut admis au Sa-
 crement de Baptême, on luy fit porter
 le nom d'Eſtienne au ſortit de ce bain Sa-
 cré, il nous dit ; Il me ſemble que ie ſuis
 autre

autre que ie n'estois, que i'ay vne autre vie en moy, c'est tout de bon que ie veux obeir à Dieu. Nous luy fismes entendre qu'il estoit, à propos qu'il témoignaist à ses Compatriotes ses bonnes resolutions. Je l'ay desia fait, repliqua-il, i'ay publié par tout que ie voulois quitter mes méchantes habitudes, & qu'on m'auoit appris que les eaux du Baptisme ne me seruiroient de rien, si ie ne voulois viure selon la Loy de Dieu, & de son Eglise: mais ie leur diray encor vne fois puisque vous le desirez, ie leur feray festin, & declareray tout haut que ie suis enfant de Dieu, & que ie veux garder tout ce qui me sera commandé, renonçant à toutes nos sottises, &'foulant aux pieds toutes nos vieilles façons de faire. Dieu luy en fasse la grace.

Quelque temps apres son baptisme, nous l'auons marié en face de l'Eglise à vne veufue chrestienne. Les sainctes ceremonies que nous gardons en l'administration des Sacrements, suiuant l'ordre ou le Rituel Romain, rauissent & touchent ces bonnes gens. Luy & sa femme frequentent maintenant les Sacrements, i'espere que Dieu leur donnera sa sainte benediction.

Amen.

CHAPITRE IX.

Du Seminaire des Sauvages.

NOUS avons tenu cette année dans nos Seminaires des Montagnets, des Algonquins, & des Hurons. Les Seminariſtes ſont de conditions bien différentes auſſi bien que d'aages ; les vns nous ſont donnez pour touſiours, & nous les auons eleuez chez quelque familles, à cauſe de leur ieuneſſe ; les autres demeuroient avec nous afin d'eſtre inſtruiſts en la Foy, & es vertus chreſtiennes : les vns n'ont reſpiré que la liberté, les autres ſe ſont faits plainement inſtruire, & ont receu le ſainct Baptême: Bref, ie puis dire que le Seminaire ſ'eſt veu dans la bonace & dans la tempeſte, dans la proſperité & dans l'aduerſité: Mais pour deſcendre en particulier.

Celuy des Hurons qui a reüſſi par excellence, eſtoit vn homme aagé d'environ cinquante ans, il n'y a point d'aage qui ne ſoit propre pour le Ciel, on a tant crié qu'il falloit auoir ſoin particulierement des ieunes plantes, qu'on ne deuoit eſperer aucun

faisoit des vieilles fouches, & Dieu nous fait souuent cognoistre le contraire; Ce bon homme ayant ouïy parler de Dieu en son pays, prit resolution de descendre à Kebec, & d'y passer vn hyuer, afin d'apprendre à le cognoistre. En chemin il rencontra Ioseph Texatirhon qui sortoit du Seminaire, qui le confirma fortement dans son dessein, luy donnant vn chappelet pour marque de son amitié: Estant arriué aux trois Riuieres, il se presente pour estre receu, le voyant si aagé nous le rebutasmes, les Sauvages ne se font pas éconduire trois fois, s'ils n'ont vne grande passion d'obtenir ce qu'ils demandent; nous refusasmes celuy-cy plus de quatre, & cependant iamais il ne perdit courage; il s'adrescoit à nos François afin d'auoir entrée chez nous par leur moyen, mais le Pere qui deuoit auoir charge de luy le voulant conduire entierement, luy dit qu'il étoit trop aagé, & qu'il auoit l'esprit trop pesant, pour retenir ce qu'on luy enseigneroit. De plus, qu'ayant cognoissance de la Riuere, il s'en pourroit enfuir, & dérober ce qu'il pourroit attraper en nostre maison, cōme d'autres auoient fait, & par consequent qu'il s'en retournât en son pays pour se faire

132 *Relation de la Nouvelle France*,
instruire par nos Peres qui estoient là. A
tout cela il repartit avec iugement : Il me
semble, fit-il, que tu n'as pas raison de pre-
ferer des enfans à des hommes faits. Les
ieunes gens ne sont point écoulez en no-
stre pays, quand ils ditoient des merueil-
les, on ne les croiroit pas; mais les hom-
mes parlent, ils ont l'esprit ferme, on croit
ce qu'ils disent, c'est pourquoy ie feray
mieux mon rapport de vostre doctrine état
de retour au pays, que non pas les enfans
que tu recherche. Pour la crainte que tu as
que ie ne m'enfuye, & que ie ne dérobbé,
ie laisseray des gages entre les mains des
François qui vaudront bien ce que ie pour-
rois emporter, si ie voulois estre méchant.
Quand est de me faire instruire en nostre
bourgade, c'est chose penible pour les di-
uertissemēts qui suruiennent, tant d'un co-
sté des affaires, que de la diuersité des opi-
nions, & des sentimēts de mes Compatrio-
tes, qui n'ont pas la mesme volonté que
moy : c'est ce qui m'a fait resoudre de venir
çà bas pour traiter avec vous en paix, &
hors du bruit d'une chose de si grande im-
portance, si bien que j'ay resolu quand vous
m'èconduiriez de chercher quelque Fran-
çois qui me reçoie en sa maison, du moins

pour vn hyuer , afin qu'on m'enseigne ce que ie ne puis sçauoir de moy mesme. En effect, comme ce bon hōme veit que non-obstant ses responce nous ne le voulions pas admettre au Seminaire, il s'allie d'un françois qui le loge en sa maison, avec dessein d'aller tous les iours apprendre quelque chose de nostre creance chez vn truchement françois. Cependant nous attendiōs de iour à autre qu'il s'en iroit, étant homme desia aagé, & qu'il s'embarqueroit avec quelques vns de ses compatriotes qu'il voyoit tous les iours arriuer, & s'en retourner en leur pays, ayans leurs traittes ou leurs marchandises. Mais en fin Dieu l'auoit choisi & écrit au Liure de ses Eleuz.

Comme nous veismes que ses gens ne l'ébranloient point, nous le receusmes, & fismes descendre à Kebec, où sans mentir il a fait paroistre vn naturel bien éloigné de tout ce qu'on conçoit d'un Sauvage : il a aussi donné des indices d'une grace si particuliere, qu'à peine l'aurions nous pû croire, si nous ne l'auions veu de nos yeux. Il estoit doux, courtois, facile, prompt à faire plaisir à qui que ce fut, iamais oisif, il admiroit la beauté de nostre Foy: & voyant nos veritez si conformes à la raison, il les

134 *Relation de la Nouvelle France,*
goûtoit avec plaisir, se voyant suffisamment instruit pour le Baptême, il le demandoit avec vne affection si cordiale, qu'on ne luy pût refuser. Nostre Seigneur nous donna vn beau suiet de reconnoître sa constance. Quinze ou seize Hurons de ses compatriotes se trouuans engagez dans le commencement de l'hyuer parmy les François; & ne pouuant retourner en leur pays, demurerent assez long-temps proche du Seminaire, cōme la pluspart auoient plustost des pensées de guerre, où ils vouloient encor aller, & d'où ils venoient, que de la paix Euangelique. Ils se mocquoient de nostre Neophyte, lequel leur donnoit de bons conseils, avec vne prudence & vne dextérité fort remarquable : Mais voyant que ses paroles tomboient à terre, il s'éloignoit doucement de leur compagnie pour n'estre participant de leurs sottises. Ils luy reprochoient qu'il n'étoit plus Huron, qu'il auoit renoncé à son païs; mais ce bon Cathecumene ne se souciant guiere de leur blasme, leur répondoit doucement qu'il ne se dépouilloit pas de l'amour de sa nation, mais qu'il en quittoit les vices : Voicy comme en parle le Pere qui auoit soin du Seminaire Huron, il reprenoit ses compa-

guons de leurs fautes avec autant de prudence qu'on auroit peu desirer. Vne fois entr'autres, il me demanda deuant vn ieune Seminariste son compaignon, si les enuieux & les menteurs n'alloient point en enfer; luy ayant répondu que Dieu punissoit ces crimes selon leur demerite; il ne fit que ietter les yeux sur ce ieune homme, lequel se sentit tellement repris de ce seul regard, qu'il ne parut point de tout le reste du iour dans la maison.

Ie l'ay souuent entendu repeter durant la nuit ce que ie luy auois enseigné pendant le iour. Il portoit vne telle affection à nostre Seigneur, que la pluspart de ses songes n'étoient que de luy, recherchant même en dormant les moyens de luy plaire. Il prenoit grand plaisir, dit le mesme Pere, d'assister au seruice Diuin, il ieusnoit deux fois la sepmaine en Carefme, deuant qu'il fut baptisé: & comme on luy eut accordé le Baptisme pour la veille de Pasques, il voulut ieusner toute la sepmaine Sainte, ie ne le pouois quasi contenter, tant il auoit desir que ie l'entretinsse des choses de son salut: En fin il fut fait chrestien, & nommé Pierre Ateïachias, & le iour d'apres son baptisme, il communia avec de grands res-

136 *Relation de la Nouvelle France,*
sentiments de ces augustes mysteres. Comme ieluy eu parlé des œuvres de misericorde, il se mit en deuoir de les pratiquer; si bien qu'il donnoit à quelques pauvres le poisson mesme qu'on destinoit pour le dîner de nos Seminaristes, & l'en ayant repris; ne m'auez-vous pas dit, faisoit-il, que c'estoit bien fait d'estre charitable; ne vous ay-je pas veu vous mesmes faire de semblables aumosnes, pourquoy donc ne feray-je point ce qu'on m'enseigne? Il prenoit par fois vne hache, & s'en alloit couper du bois de chauffage pour quelques personnes necessiteuses, il secouroit tous ceux qu'il pouuoit, & avec vne telle demonstration d'amour, que tout le monde l'aimoit.

Depuis son baptesme, il assistoit tous les iour à la sainte Messe, recitoit deux fois le iour son chappelet, visitoit souuent le S. Sacrement de l'Autel: bref, il estoit dans de grandes resolutions d'estre à iamais fidelle à nostre Seigneur quand il nous fut rauy, par vn miserable accidēt, selon les hōmes, & peut-estre par vn trait d'vn grād amour, & d'vne douce prouidence selon Dieu. Se disposant pour s'en aller en son pays, & choisir ceux qu'il iugeroit propres pour amener au Seminaire, vn coup de vent

renuersa son canot , dans lequel il estoit avec vn ieune Algonquin : Celuy-cy se sauua à la nage, quittant aisément sa robe qu'il porçoit volante à la façon des Sauuages, mais nostre pauvre Ncophyte estant vestu à la françoise, ne pût resister à la tempeste, si bien qu'il fut noyé dans le grand fleuve qui a seruy de sepulchre à son corps : Pour son ame, ie ne puis quasi douter qu'elle ne soit au Ciel; car outre qu'il estoit nouvellement baptisé, & encore tout remply du S. Esprit; vous eussiez dit que Dieu le dispoisoit à ceste mort; car vn peu deuant que de s'embarquer, le Pere le voulant faire déjeuner pour ce qu'il auoit trauaillé, il le refusa; & comme le Pere le pressoit, il luy dit : I'ay pris resolution de ieusner au iourd'huy pour communier demain; ce qu'il fit: & peu de temps apres Nostre Seigneur l'appella à soy.

Venons à nos ieunes Montagnets & Algonquins: Ces ieunes enfans aagez de douze à quinze ans pour la pluspart, nous ont appris deux belles veritez; l'vne, que si les animaux sont capables de discipline, beaucoup plus les ieunes enfâs Sauuages: l'autre, que la seule education mène à ces pauvres enfans, ayâs l'esprit aussi bon que nos Euro-

138 *Relation de la Nouvelle France,*
peans; cōme on verra par ce que ie vay dire.

Vn petit asnon sauuage n'est pas né dans vne plus grande liberté qu'un petit Canadien; cependant quād ces enfans se voyent dans vn seminaire, ils se rangent doucemēt aux petits exercices qu'on exige d'eux: Ils font leurs prieres à deux genoüils soir & matin; cinq d'entr'eux estant baptisēz, assistoient tous les iours à la Messe: Quand ils estoient au Seminaire deuant le Baptême, ils ne l'entendent que iusques apres l'Euangile; ils seruent au Prestre à l'Autel avec autant de grace & de modestie, que s'ils auoient esté éleuez dans vne academie bien réglée. Ils se trouuent aux heures qu'on les instruis, s'entr'ayment les vns les autres; mais aussi leur faut-il donner la liberté de se recréer; & comme on ne les meine pas par la crainte, il faut prendre son temps pour les ranger par amour; à quoy ils sont assez prompts, demandans humblement congé à leur maistre quand ils se veulent vn peu éloigner du logis. Cōme on fait le Catechisme aux petits François les iours de Dimāches, ou le matin, ou bien apres Vespres, ils ont voulu estre de la partie; si bien qu'on expliquoit la doctrine de Iesus-CHRIST en deux Langues;

& nos Seminaristes jaloux de l'honneur qu'on faisoit aux petits François, quand ils répondoient bien; leur voulurent tenir teste, demandans mesme qu'on leur donnast par écrit quelque poinct du Catechisme, cōme ils voyoiēt qu'on en donnoit aux autres pour l'apprendre pendant la semaine; & en tout cela ils reüssissoient avec autant de grace & de gentillesse qu'aucun François, répondans aux questions qu'on leur faisoit avec vne petite gravité, & vne modestie qui gaignoit le cœur, & attiroit l'affection des spectateurs. Ils se confessoient allez souvent, & ceux qu'on iugeoit capables de la sainte Communion s'en approchoient avec preparation & respect.

La crainte du peché entroit profondement dans leurs ames; deux ou trois d'entre eux estant allez voir ces Hurons dont j'ay parlé cy-dessus, ils leur presenterent ie ne sçay quel potage ou sagamite dans laquelle il y auoit de petits morceaux de chair. Or comme c'estoit vn iour auquel il n'étoit pas permis d'en manger, & que d'ailleurs c'est vne grande incivilité parmy eux, & vne marque d'orgueil ou d'inimitié de refuser ce qu'on presente; ils prirent le bouillon détournant doucement les petits

morceaux de viande qui estoient dedans : Neantmoins estans sortis de là , leur ame fut saisie d'un scrupule , si bien qu'ils demanderent le soir au Pere qui auoit soin du Seminaire Montagnets & Algonquins, s'ils n'auoient pas offensé Dieu d'auoir mangé de ce bouillon ; pour moy, disoit l'un, ie n'ay point mangé de chair ; l'autre disoit qu'il en auoit auallé vn petit morceau par mégarde : bref, ils témoignèrent que leur cœur n'étoit pas content de ceste action, & prirent resolution de ne plus frequenter ceux qui les pouuoient porter au mal.

Pour ce que ie disois de la bonté de leur esprit , i'en tire la preuue des interrogations qu'ils faisoient à leur maistre: En voicy quelques vnes qu'il m'a donné par écrit. Le confesse que ces enfans sont éveillez, & qu'ils font paroistre beaucoup d'esprit, mais ie n'eusse pas crû qu'ils eussent tant raisonné, notamment en matiere de nostre creance. Escoutons leurs demandes : Vous nous dites que le baptesme est absolument necessaire pour aller au Ciel, s'il se trouuoit vn homme si bon, que iamais il n'eut offensé Dieu , & qui mourut sans Baptesme, iroit-il en Enfer, n'ayant donné aucune fascherie à Dieu, s'il va en Enfer,

Dieu n'ayme pas tous les gens de bien, puis qu'il iette celuy là dans le feu.

Vous nous enseignez que Dieu estoit avant la creation du ciel & de la terre; s'il estoit, où se logeoit-il? puis qu'il n'étoit, ny au ciel, ny en la terre? Vous dites encore que les Anges ont esté créés au commencement du monde, & que ceux qui desobeïrent furent iettez en Enfer: d'ailleurs, vous mettez l'Enfer dans le fond de la terre; cela ne se peut pas bien accorder, car si les Anges ont peché deuant la creation de la terre, ils n'ont pû estre iettez en Enfer, ou l'Enfer n'est pas où vous le placez.

De plus, vous asseurez que ceux qui vont en Enfer n'en sortent point, & cependant vous nous racontez des Histoires de quelques dannez qui ont paru au monde, comment cela se peut-il entendre?

Ceux qui liront cecy en croiront ce qui leur plaira; mais il est vray que ces demandes ont esté faites par de ieunes Seminaristes Sauvages âgez de douze à quinze ans. Comme on leur expliquoit que les Diables n'auoient pas de corps, & que se voulant faire voir aux hōmes, ils se couuroient de figures difformes; ils demanderent si quand ls paroïssient en forme d'hommes ou d'a-

142 *Relation de la Nouvelle France,*
dimal, on ne les pouuoit point tuer: Ah! que ie les tuërois volontiers, disoit l'un d'eux, puis qu'ils font tant de mal! Mais quand ils sont faits comme des hommes, disoient-ils, & qu'ils viennent parmy les hommes, sentent-ils encore le feu d'Enfer? D'où vient qu'ils ne se repentent point d'auoir offensé Dieu? s'ils se repentoient, Dieu ne leur feroit il pas miséricorde? Si Nostre Seigneur a souffert pour tous les pecheurs, pourquoy ceux là ne trouuent-ils pas de pardon auprès de luy. Voila encore vne autre question bien remarquable pour des enfans. Vous dites que la Vierge Mere de IESVS-CHRIST, n'est pas Dieu, & qu'elle n'a iamais offensé Dieu, & que son Fils a racheté tous les hommes, & payé pour tous; si elle n'a fait aucun mal, son Fils ne l'a pû racheter, ny payer pour elle? En verité toutes ces demandes m'étonnent, quand ie les considere en la bouche d'un enfant qu'on appelle Sauvage & barbare. Ie ne fay point mention des réponses que leur dōnoit leur Directeur, tant pour n'estre trop long, que pour autant que ie ne pretends point parler icy directement de nos actions, mais de celles des Sauvages. Or comme nos Se-

minaristes viuoient dans vne douce tranquillité, s'auançans de iour à autre en la cognoissance de Dieu, & en l'exercice des vertus proportionnées à leur aage, la maladie & la mort vindrent troubler nôstre ioye; l'vn deux traïna assez long-temps d'vne maladie fort languissante; ses compagnons l'auoient au commencement en auersion; mais comme on leur eut enseigné que Dieu prenoit plaisir aux actions de charité, ils le visitoient, luy portoient à manger, & si pour sa foiblesse il ne pouuoit pas faire la benediction deuant son repas, ils la faisoient pour luy; en fin la mort l'enleua le cinquième de Mars: il fallut pour le mettre au sepulchre chercher la terre sous six pieds de neige, tant il en est tombé ceste année.

Enuiron six sepmaines ou deux mois apres sa mort, l'vn des plus gentils & des plus adroits enfans du mesme Seminaire, fut saisi d'vne fiéure lente qui ne l'a pas encore quitté; nous voyôs bien qu'elle le menera au tombeau aussi bien que son compagnon. Quelque temps apres, le plus accompli de tous, fut enleué de ce monde par vne espece de pleuresie, & cela en moins de dix iours. Ces accidens nous firent résoudre de ne retenir avec nous que les cinq

144 *Relation de la Nouvelle France* ;
ou six plus petits qui ont encor esté atta-
quez de catarrhes & de rhumes, tant il est
difficile de faire subsister ces pauvres Se-
minaristes hors de la maison ou des caba-
nes de leurs parents. Le Diable voit bien
le fruit qu'on en peut esperer, c'est pour-
quoy il fait iouër tous les ressorts de sa ma-
lice pour renuerfer cette sainte entreprise,
il n'y perdra que ses peines.

Outre ces enfans, nous secourons tou-
siours quelques Sauvages proches de nos
habitations ; ce pauvre peuple est le vray
obiet de la misericorde, il a besoin d'estre
puissamment aydé. La charité a des bras
puissants, ie ne dy que deux mots à tous
ceux qui s'en seruent : *Date, & dabitur
vobis, mensuram bonam & confertam, & co-
agitatam, & superfluentem dabunt in sinum
vestrum.* Donnez d'une main, & recevez
de l'autre; I E S V S - C H R I S T y est engagé,
il verifera ses paroles : Quiconque fera
fructifier sa Croix, & son Sang, sera payé
à bonne mesure.

CHAPITRE X.

De la creance des superstitions, & de quelques costumes des Sauvages.

LES Relations des années precedentes estant remplies des façons de faire de nos Sauvages, ie ne pretends pas en parler icy plainement, mais bien coucher en peu de paroles ce que i'ay appris de nouveau sur ce sujet : que si i'vise de quelques redites, c'est que i'ay perdu la memoire de ce que i'ay récry par cy-deuant.

Premierement, pour ce qui touche leur creance, quelques-vns se figurent vn Paradis remplis de bluets; ce sont petits fruits bleus, dont les grains sont aussi gros que les plus gros grains de raisin. I'en'en ay point veu en France, ils sont d'un assez bon goust; c'est pourquoy les ames les aymēt fort. D'autres disent que les ames ne font que dancer apres le depart de ceste vie; il y en a qui admettent la transmigratiō des esprits, comme faisoit Pythagore, & la plus part s'imaginēt que l'ame est stupide, ayant quitté le

corps ; tous cryent pour l'ordinaire qu'elle est immortelle. Ils distinguent plusieurs ames d'vn même corps. Vn vieillard nous disoit il y a quelque temps que quelques Sauvages auoiēt iusqu'à deux & trois ames, que la sienne l'auoit quitté il y auoit plus de deux ans pour s'en aller avec ses parêts defuncts, qu'il n'auoit plus que l'ame de son corps qui deuoit décéder au tombeau avec luy. On cognoist par là qu'ils s'imaginent que le corps a vne ame propre, que quelques-vns appellent l'ame de leur Nation, & qu'en outre il y en vient d'autres qu'ils le quittent plustost ou plus tard selon leur fantaisie. En effect, i'en ay oüy quelques-vns qui asseuroiēt n'auoir point d'ames, ils entendoient parler de ces formes assistentes, dont ils se persuadent par fois qu'ils sont possédez, le Diable se seruāt de leur fantaisie, & de leurs passiōs, ou de leur melācolie, pouroperer quelques effects qui leur paroissent extraordinaires. Ils s'imaginēt que cela prouient de la diuersité de leurs ames, s'ils cessent de songer, ou d'estre poussez de quelque passiō non cōmune, ou de quelque Demō, ils disent que leur ame les a quitté, si le Diable réueille leur fantaisie, leur ame est de retour. Je pense auoir desia remarqué

qu'ils se representent l'ame comme vn ombre qui a des pieds & des mains , vn corps, vne teste, des dents; aussi croyent-ils qu'elle mange, ils ont trouué de la viande rongée par les ames, ils les ont ouïy siffler, comme ces petits grillers qu'on entend quelquefois à la campagne; ils s'en trouuent qui ont des pensées encore plus rauales que tout cela touchant les ames; car ils disent que le Diable se repaist de leur ceruelle, mettant au lieu des fueilles d'arbres seiches; c'est pourquoy ces pauures ames sôt folles & étourdies, n'ayãs point de ceruelle. Voila les tenebres où se perdent les hōmes qui ne sont point élairez du flābeau de la Foy. Ceux qui se souuiendront de la creance des anciens, tant Grecs que Romains, & des sottis opinions que ces Sages du monde ont eu touchant la Diuinité, & touchant nos ames, diront que toute la sagesse des hommes n'est que folie: *Sapientia huius mundi stultitia est apud Deum*. La Foy découure les veritez du Ciel & de la terre.

Il y a des superstitiōs en l'ancienne France aussi bien qu'en la nouuelle. Vne femme Françoise estant icy malade, vn autre femme luy dit qu'elle gueriroit, si on luy pendoit au col vn trousseau de clefs; voila

148 *Relation de la Nouvelle France,*
qui vient de vostre France, en voicy de la
nostre.

Quelques Sauvages malades voulans
reconoistre d'où procedoient leurs mala-
dies, mirent des os de Castors bien secs
deffous vne couverture, puis l'un de la
troupe se glissant deffous, mist le feu à ces
os avec des charbons bien allumez; cepen-
dans ses camarades chatoient & hurloient
à leur mode; en fin ces os reduits en cen-
dre, celuy qui s'estoit caché, sortit, leua
la couverture, ietta les cendres, & le feu
au vent, s'escriant qu'on prit bien garde
d'où venoit la maladie; le Pere qui veit
faire ceste superstition, demanda prou
comment on pouoit reconoistre par ce-
ste badinerie d'où leur mal procedoit,
mais on ne luy voulut pas apprendre ce
secret.

Le mesme Pere voyant quelques Al-
gonquins biẽ empeschez, frappās sur leurs
cabanes avec des bastons, leur demanda
ce qu'ils faisoient; ils respondirent qu'ils
taschoient de chasser l'ame d'une femme
trespassée qui rodoit là autour. On dit
qu'il y en a de si simples qu'ils tendent
des rets à l'entour de leurs cabanes, afin
que les ames de ceux qui trespassent chez

leurs voisins s'y prennent, si elles veulent entrer dās leurs demeures. Les autres brûlent quelque chose puāte pour diuertir les ames par ceste odeur, voire ils mettent sur leurs testes ce qui sent mal, afin que les ames ne les abordēt. Vn longleur brandilloit vn iour son épée dedās l'air, s'imagināt qu'il épouuenteroit vne ame nouuellemēt sortie de son corps. Ils ont grand peur que ces ames n'entrēt dans leurs cabanes, ou n'y fassēt quelque seiour, car elles emmeneroiēt quelqu'un avec elles en leur país. Vn certain ayāt veu vne fusée en l'air, & ne scachāt pas d'où elle étoit partie, ne pouuāt croire d'ailleurs que les François püssent lancer du feu si haut, asseuroit qu'il auoit veu vne ame qui s'égaroit dedās le iour; c'est ainsi qu'ils nōment l'air. Les femmes pendent au col de leurs petits enfans vn petit bout du nōbril qu'il apportēt en leur naissance; s'ils le perdoiēt, leurs enfans seroient tous hebetes & sans esprit, à ce qu'ils pésent: Quand on marche dans les tenebres, on ne fait guiere de pas sans chopper. I'ay déjà trop parlé de ce qu'ils font pour la guerisō de leurs malades, nous auons veu ceste année vn ieu solennel ou vn défy entre deux natiōs qui s'échaufferent fort & ferme pour guerir vn pauvre

150 *Relation de la Nouvelle France,*
patient. Les ioüeurs & les patiens s'en allerent en sa cabane au son du tambour, & de l'écaille de tortuë, qu'ils accompagnerët de cris & de chants à leur mode. Ceux qui parioient ou qui gageoient estoient assis de part & d'autre, regardäs leurs ioüeurs, chacun fauorisät sō party avec plusieurs gestes & plusieurs cris suiüans leur passion & leur affection: La conclusion fut, que l'ame des deux nations perdit quātité de porcelaine, & d'autres choses qu'ils auoient mis au ieu; car pour le malade il ne receut autre soulagement, sinon d'auoir la teste bien rompuë de tout ce grand tumulte. Apres que ces beaux medecins furët sortis, il enuoia querir vn de nos Peres qui auoit commēcé de l'instruire, illuy demande le Baptesme, le Pere le voulut tancer & rebuter, voyāt ceste sottise superstition, mais le pauvre patiët lui dit: Ce n'est pas moy qui les ay appelez ma mere a songé que ie guerirois, si on faisoit vn ieu solennel; c'est pourquoy elle m'a amené tout cét embarras säs m'en riē dire.

Au reste la creance & les superstitions des Sauuages n'est pas bien profondement enracinée dans leur esprit; car comme toutes ces resueries ne sont fondées que sur le mensonge, elles tombent d'elles

mesmes, & se fondent, ou se dissipent aux rayons des veritez qu'on leur propose tres-cōformes à la raison. Je n'ay veu que quelques vicillards bien opiniastres, dont le cerueau déseiché dans leurs vielles maximes, n'auoit plus d'humeur pour receuoir l'impression de nostre doctrine, si quelques vns retombent par fois en leurs badineries, c'est plustost par habitude que par vne grande creance qu'ils ayent en leurs superstitions, notamment depuis qu'on les instruit.

Pour ce qui concerne leurs coustumes, c'est vne affaire de plus grande haleine, il est plus aisé de bannir l'erreur de l'entendement, que d'oster les mauuaises habitudes de la volonté : Il n'y a pas beaucoup de peines à recognoistre & approuuer le bien, mais on en trouue à le pratiquer. *Vide meliora proboque deteriora sequer.* Il est vray qu'il ya quelques coustumes parmy les Sauuages qui s'aboliront aysément, d'autres non. En voicy de diuerses façons. La passion du ieu est violente, aussi bien en nostre France, qu'en la vostre. J'ay vne femme Sauuage ayant perdu tout ce qu'elle auoit, se iouer elle mesme : non pas

son honneur, mais bien son seruiſſe, c'eſt à dire, qu'elle euſt eſté comme eſclau ou ſervante du vainqueur ſi elle eut perdu; ils diſent qu'il arriue par fois qu'un homme ou vne femme s'eſtans ioüez eux meſmes, celuy qu'ils gagne, les retient vn ou deux ans, & les employe à la pêche, à la chaſſe, aux petites affaires domeſtiques; puis leur donne liberté. Les Sauuages ne ſçauroient exercer de ſeuerité, ny exiger avec rudelle aucun ſeruiſſe de leurs Compatriotes.

Vn Huron ayant ioüé toutes ſes richelſes, miſt ſa perruque en jeu, l'ayant perduë, le vainqueur le raziuſques au cuir de la teſte. On m'a dit qu'il y en a qui ioüent iuſques à leur petit doigt de la main, & que l'ayant perdu, ils le donnent à couper, ſans monſtrer aucun ſigne de douleur. Je croirois bien qu'un Sauuage d'une Nation pourroit bien couper le doigt à un Sauuage d'une autre; mais ie ne ſçaurois me perſuader qu'il exerce ceſte cruauté enuers aucun homme de ſon païs, ils ſe reſpectent ou ſe craignent trop les vns les autres, pour les eſtrangers, ils les mépriſent fort.

Pour conſeſion de ce poinct, ie puis di-

re que les Sauvages, quoy que passionnez pour le ieu, l'emportent par dessus nos Europeans. Ils ne font quasi paroistre iamais, ny de ioye pour leur gain, ny de tristesse pour leur perte, iouans avec vne tranquillité exterieure tres remarquable, fideles au possible, sans se tromper les vns les autres. Je ne sçay si i'ay fait mention d'une coustume qu'ont les Sauvages, de resusciter ou faire reuiure leurs amis trespassez, notamment s'ils estoient hommes de consideration parmy eux. Ils font porter le nom du defunct à quelque autre; & voila le mort resuscité, & la tristesse des parens entiere-ment passée. Remarquez que le nom se donne dansvne grande assemblée ou festin, on adioûte vn present qui se fait de la part des parens ou des amis de celuy qu'on fait reuiure, & celuy qui accepte le nom, & le present, s'oblige d'auoir soin de la famille du defunct, si bien que les pupils le nomment leur pere. Cette coustume semble fort louable pour le bien des pauures orphelins.

Ils gardent les mesmes ceremonies quãd quelque braue homme a esté massacré par leurs ennemis, s'il auoit quelque Collier de porcelaine, ou autre chose de valeur, ses

amis l'offrent à quelque bon guerrier, ou luy font quelque présent de leurs propres moyens, si cét homme les accepte avec le nom du defunct qu'on luy donne publiquement, il s'oblige d'aller à la guerre, d'y mener ceux qu'il pourra, & de tuer quelques ennemis à la place du trespasfé qui revit en sa personne.

On me dit encor que les Sauvages changent souuent de noms. On leur en donne vn en leur naissance, ils le changent en l'aage viril, & en prénent vn autre en leur vieillesse; voire mesme si quelqu'un est bien malade, s'il n'échappe de cette maladie, il quittera par fois son ancien, non comme s'il luy portoit malheur pour en prendre vn autre de meilleur augure.

Si vn Sauvage se remarie deuant trois ans apres le decez de sa femme, il n'est pas bien voulu des parens de la defuncte, ils tiennent cela comme vne espece de mespris, cét homme faisant voir qu'il n'aimoit point leur parenté, puis qu'il s'allie si tost d'une autre. Que si vne femme apres le decez de son mary en prend vn autre deuant ce terme sans le congé des parens du trespasfé, non seulement ils luy scaient mauuais gré, mais ils pillent son mary.

s'ils le rencontrent, & cette coustume est tellement passée pour loy, que nous l'avons veu pratiquer devant nos yeux: en sorte que celuy qui s'estoit ainsi marié, veit prendre ses Colliers de Porcelaine, & tout ce qu'il avoit, sans dire autre chose sinon que c'estoit luy qui se faisoit ce tort, pour avoir enfreint leur coustume.

Quand vne fille ou vne femme agréee quelqu'un qui la recherche, elle se fait couper les cheveux à la façon que les portent les filles en France pendant dessus le front; ce qui a fort mauvaïse grace, tant en l'une qu'en l'autre France, S. Paul defendant aux femmes de faire paroistre leurs cheveux. Les femmes portent icy leurs cheveux en paquets derriere la teste, en forme d'une trouffe qu'ils ornent de Porcelaine quand elles en ont; Si se marians à quelqu'un elles le quittent mal à propos, ou si s'estans promises, & ayans accepté quelque present, elles ne tiennent leur parole, leur pretendu mary leur coupe par fois ces cheveux; ce qui les rend fort mesprisables, & les empesche de trouver vne autre espoux. Cette coustume se garde plus estroittement chez les Algonquins, que parmy les Montagnets. Les

156 *Relation de la Nouvelle France,*
Sauuages ne s'allient pas aysément de leurs
parens, ie ne sçay pas encor les degrez aus-
quels ils se peuuent marier sans reproche
de leurs Compatriotes, mais il me semble
qu'ils sont bien plus reseruez que nous en
certain cas. Par exemple, si vn pere a deux
enfans, ils s'appellent frere & sœur, com-
me parmy nous, mais leurs enfans se nom-
meront aussi freres & sœur, & les descen-
dants de ceux-cy porteront le mesme nom
de frere & de sœur, & iamais ne se mari-
ront ensemble, s'ils gardent les bonnes
coustumes de leur nation; que s'ils les en-
fraignent, on ne leur dit autre chose, sinon
qu'ils n'ont point d'esprit. Vn Sauuage
ne fait point de difficulté d'espouser deux
sœurs à mesme temps, ou s'il en a desia
espousé vne, il peut prendre l'autre du vi-
uant de sa premiere femme, car s'il atten-
doit apres sa mort, il la reputeroit com-
me sa niepce, & ne l'espouserait pas sans
blasme. Ils enterrent leurs morts en sorte
que la teste du trespassé regarde l'Occi-
dent, c'est afin que l'ame cognoisse le lieu
où elle doit aller. Ils croyent, comme i'ay
dit, qu'elle s'en va où le Soleil se couche;
c'est là le pays des ames à leur dire. En
effect estans priuez du flambeau de la Foy,

ils descendent, *in regionem umbræ mortis*, où le Soleil de Iustice est couché pour eux éternellement.

Ils sont fort portez à croire les choses extraordinaires. Vn Sauvage de l'Isle nous disoit, il n'y a pas long-temps que le bruit estoit par tous les pays plus hauts iusques dans les Nipisirimens, qu'un de nos Peres d'icy bas auoit vescu cinq aages d'hommes, que le poil luy estoit tōbé quatre fois, qu'il grisonnoit pour la cinquiesme: là dessus il luy demandoit combien de fois encor il retourneroit en l'aage viril deuant que de mourir.



CHAP. VIII.

*Ramas de diuerses choses qui n'ont peu estre
rapportées sous les Chapitres
precedents.*

QVoy que les remarques que ie vay faire n'ayent quasi point de liaison les vnes avec les autres, elles donneront neantmoins tousiours quelque iour & quelque lumiere pour mieux recognoistre l'esprit des Sauvages. Vn Capitaine des Algonquins de l'Isle, homme d'esprit & bien eloquent pour vn Sauvage, ayant eu quelque different avec vn autre Algonquin, receut vn coup de hache à la teste qui luy pensa oster la vie. Et en effect il l'auroit perduë n'eust esté qu'un Sauvage detournant le bras de l'agresseur empescha la violence du coup. Cet homme se voyant tout baigné dans son sang, ne se troubla point, il s'assit froidement dans la cabane de celuy qui l'auoit frappé, sans faire paroistre aucun mouuement, ny de crainte, ny de vengeance, celuy qui auoit

fait le coup s'assit vn peu plus loing , ne paroissant nullement alteré. Vn de nos Peres aduerty de cette dispute, s'en court droit à la cabane , entre dedans , trouua tout le monde dans le silence aussi paisible & aussi froid que marbre, il n'eut pas creu qu'il y eut eu aucune querelle entre des gens si froids , & si paisibles en apparence, s'il n'eut veu le sang ruisseler de la teste de ce pauvre miserable ; il luy demande quil luy a fait cette playe , point de response, l'agresseur prit la parole, & luy dit; c'est moy qui l'ait fait, parce qu'il m'a fasché. Cela dit, il se teut. Le Pere tascha de les reconcilier, en fin ce Capitaine sortant, tint ce discours à ses gens. Mes neveux, netirez aucune vengeance de l'injure qui m'a esté faicte, c'est assez que la terre ait tremblé du coup qui m'a esté donné, ne la renuersez point par vostre colere. Quelque temps apres, cét homme superbe au possible estant guery , & voyant que les François vouloient tirer quelque satisfaction du Sauuage qui auoit mis l'an passé la corde au col du Pere Hierosme Lallemant; cét homme rehaussant sa voix, harangua en cette sorte : Ie m'estonne que ceux qui font estat de prier Dieu, & qu'ils

160 *Relation de la Nouvelle France,*
disent qu'il faut pardonner les offences,
puisqu'il Dieu les pardonne, vueillent
tirer vengeance d'une iniure qu'on leur a
fait il y a desia long-temps, on cognoist
assez qui ie suis, on sçait bien que c'est
moy qui tient la terre affermie de mes
bras, & cependant ayant receu il n'y a
pas long temps vn coup qui me pensa di-
uiser la teste en deux pieces, ie ne m'esmeu
point, ie ne conçu aucun desir de ven-
geance, pourquoy n'imiterez-vous pas
cet exemple? Que si le loup eut fait sor-
tir mon ame de son corps, ma bouche eut
prononcé ces dernieres paroles. Mes nep-
veux, ne troublez point la terre à l'occa-
sion de vostre oncle qui l'a tousiours main-
tenue: ie dy dauantage, si i'eusse senty la
terre ébranlée, ia me fusse efforcé del'ar-
rester, & de la mettre en son repos, avec
les deux bras de mon ame; & si ie n'eusse
peu en venir à bout, ie me fusse escrié
tout est perdu, le monde est renuersé. Je
ne me mesle plus d'affaires, ie me suis ac-
quitté de mon deuoir, i'ay pardonné l'in-
iure qu'on m'a faite, i'ay donné conseil,
on n'a pas voulu estre sage, la faute n'est
point de mon costé. Voila, disoit cet
homme plein de faste, comme les hommes
d'esprit

d'esprit se comportent , ô que l'orgueil a d'instruire, il arreste la colere, il semble donner de la patience; & au bout du conte, il ne fait rien qui vaille, iettant les hommes dans des tenebres plus sombres que la nuit; & leur faisant proferer des impertinences qui n'appartiennent qu'à des fols, & à des éceruelez. Changeons de discours.

Les Hiroquois ayant emmené vne pauvre vieille femme aagée de plus de soixante & dix ans, luy arracherent les ongles des pieds & des mains, luy appliquerent des flambeaux de feu en plusieurs endroits de son corps, ils la menoient avec d'autres prisonniers en leur país; comme ils vindrent à passer vn fault ou vne cheute d'eau où tout le monde met pied à terre; ceste pauvre femme sans faire semblant de rien, ramassa vne coquille qu'elle rencontra sur la greue, la serre sans mot dire; & la nuit tout le monde estant couché, elle coupe doucement ses liens avec ceste coquille, & s'enfuit à la dérobbé dans le bois; elle fit si bien, que ses ennemis ne la purent retrouver, elle arriua aux trois Riuieres le sixième iour apres auoir quitté les Hiroquois ayant en partie cheminé

162 *Relation de la Nouvelle France,*
tout ce temps-là , en partie nauigé toute
seule dans vn méchant canot d'Hiroquois
qu'elle trouua, & cela sans manger: En ve-
rité c'est vne chose bien étonnante qu'une
femmeagée près de quatre-vingt ans, tra-
uerse quasi toute nuë tant de brossailles,
ayant les pieds pleins de douleur , & les
orteils sans ongles, estant toute brûlée par
les costez, assaillie de mille esquadrons de
mousquilles, dont ces païs sont infestez ,
& passer cinq ou six iours dans ces tra-
uaux sans prendre aucune nourriture.

Quelque temps apres son arriuée, nous
assemblâmes vne vingtaine de vieilles fem-
mes, dôt la plus ieune auoit près de soixan-
te & dix ans pour les instruire en la Foy, sur
le declin de leur aage; celle-cy estoit du
nombre, comme on luy vint à décrire les
feux d'Enfer, encor vaudroit-il bié mieux,
disoit-elle, estre brûlé des Hiroquois, que
des Diables. Pour conclusion, elle fut ba-
ptisée avec quelques autres, & nous fit di-
re que tous les Demons & tous les hommes
ne sçauroient détourner la bonté de Dieu,
quand il plaist à sa Diuine Prouidence de
mettre vne ame au nombre de ses eleuz.
Vne autre femme vn peu moins aagée que
celle-cy, courut aussi grand risque de sa vie,

en la defaite de ses gens. Comme elle veit que les Hiroquois estoient aux prises avec eux, elle se iette dans l'épaisseur d'une grosse sapiniere, d'où elle entendoit les cris & les coups des combattants; & de peur que ses pas ou ses vestiges ne parussent, elle se cache dedans des eaux fangeuses & crouissantes qu'elle rencontra; comme elle n'étoit pas loin du Fort des Hiroquois, elle n'osoit partir de cette triste demeure: Enfin l'ennemy estant party, elle en sort deux iours apres le combat pour tirer vers l'habitation de nos François, elle n'étoit pas bien loin, qu'elle entend vn grand cry, elle crût que c'estoient encore les Hiroquois, se va ietter dans sa taniere, où elle passe encor vn iour entier; le lendemain pensant que tout estoit en paix, elle quitte ces eaux froides & bourbeuses; mais comme elle approchoit des François, elle entendit tirer de grands coups de canons; Ceste pauvre creature s'imagina que les Hiroquois attaquoient le Fort, & qu'on se battoit fort & ferme, elle se va replonger vne autrefois dans la fange, & y passer deux autres iours suiuvans: Bref, la misere la contrainant de sortir, elle s'en reuint doucement, tâchant de decouvrir à la dérobbée

164 *Relation de la Nouvelle France,*
si elle ne verroit pas l'ennemy; elle fut bien
étonnée quand approchant de nostre de-
meure, elle veit ses gens cabanez en asseu-
rance, elle les aborde, & leur conte son de-
sastre; & eux luy declarent comme les cris
qu'elle auoit entendu estoient des gens de
sa Nation, & non des Hiroquois; & que le
canon qu'elle auoit oüy se tiroit pour ho-
norer la venuë de Monsieur nostre Gou-
verneur aux trois Riuieres. Cët erreur eut
esté capable de faire mourir vn homme
bien robuste, & ceste femme n'en receut
autre mal, que celuy qu'elle endura dans sa
triste solitude. Il faut que ie touche icy
en passant vn trait de simplicité de quelque
Sauage: Comme on leur faisoit voir dans
la Chapelle vn tableau où Nostre Seigneur
est representé au milieu des Docteurs de la
Loy; ils consideroiët sa ieunesse, & la vieil-
lesse de ces Docteurs; & comme ils estoient
tous peints avec vn liure en main, & nostre
Seigneur aussi; ils prendrent garde que les
Docteurs regardoient tous däs leurs liures,
& lestenoient ouuerts, & que Nostre Sei-
gneur ne regardoit point dans le sien; cela
leur fit dire ces paroles: Le Pere a raison de
dire que ce ieune enfät scauoit tout; tenez,
prenez garde; faisoient-ils, comme il ne iet-

te point les yeux sur son liure, & ces vieillards regardent les leur fort attentiuement. La naïfueté de ces bonnes gens est par fois agreable. Il est temps de finir. La flotte nous laisse dans la tristesse, & dans la ioye; L'Hospital est chargé de tant de malades, qu'on est contraint d'en loger dehors sous des cabanes d'écorces. Les Sauvages sont grandement affligez, on dit qu'ils meurent en tel nombre es pays plus hauts, que les chiens mangent les corps morts qu'on ne peut enterrer. Les Rellgieuses Hospitalieres se sont portées avec vne telle ferueur dans ces pressantes necessitez qu'elles en ont alteré leur santé. Ceux de nos Peres qui visitent & qui assistent ces pauvres gens empestez, ne se portent pas mieux; ceste contagiõ seule se voulolt glisser parmy nos François. Quelques ieunes femmes nées sur le país en sont attaquées. Tout cela peut donner de la tristesse. La resignation de nos pauvres Sauvages, le recours qu'ils ont au Baptisme, le desir qu'ont quelques-uns d'aller au Ciel, le mépris de la vie, la perseuerance en la Foy dans ces tempestes, sont capables d'essuyer nostre douleur. La croix porte des fruiçts agreables en tout temps. Si iamais ces pauvres gens ont be-

116 *Relation de la Nouvelle France,*
soin d'estre secourus de bonnes ames qui
s'interessent & se liguent sainctement pour
leur salut, c'est en ce temps de calamité. Il
faut que la Foy se prouigne à la façon qu'elle
a esté plantée, c'est à dire, dans les calamitez;
& pource qu'on ne voit point icy de Tyrans
qui massacrent nos Neophytes; Dieu y pourroit
d'ailleurs, tirant des preuues de leur constance
par des afflictions bien sensibles, qu'il soit beny
à iamais. Nous supplions tous V. R. & tous nos
Peres, & nos Freres de la Prouince, voire de toute
la France, & tant d'ames sainctes, dans l'association
desquelles nous sommes entrez, de prier pour ces
pauvres peuples, & pour nous, & en particulier,
pour celuy qui est de toute son affection,

De V. R.

Tres-humble & tres-obeissant
seruiteur selon Dieu,

PAVL LE IEVNE.

*A Sillery, autrement en la Residence
de Saint Ioseph, en la Nouvelle France,
le 4. de Septembre 1639.*

RELATION
DE CE QVI S'EST PASSE'
DANS LE PAYS
DES HVRONS,
Pays de la Nouvelle France.





RELATION

de l'employ des Peres de la
COMPAGNIE DE IESVS,
QVI SONT AUX HYRONS
pais de la Nouvelle France.

Depuis le mois de Iuin 1638. iusques
au mois de Iuin 1639.

*Adressée au R. P. Paul le Jeune, Superieur
des Missions de la Compagnie de IESVS
en la Nouvelle France.*



ON REVEREND PERE,

Me voila donc obligé de
rendre compte à V. R. de
l'employ des Religieux de
nostre Compagnie en ces contrées : ie le

2. *Relation de la Nouvelle France,*
feray d'autant plus volontiers, vn peu plus
au long ceste fois, qu'estant encore pour le
present inutile à autre chose, ce ne me sera
pas peu de consolation de seruir au moins
à declarer le bien que la diuine misericor-
de commence à faire à ces peuples parmy
lesquels nous viuons, par l'entremise des
autres de nos Peres qui sont icy. Je croy
que vostre Reuerence y trouuera de quoy
benir Dieu, & s'affectionner de plus en
plus à nous assister de ses soins & charitez,
& sur tout de ses S.S. & prieres, que ie luy
demande tres-humblement, & à tous nos
Peres & Freres de par delà, pour tous tant
que nous sommes icy, & particulièrement
pour celuy qui en a le plus de besoin,
c'est

M. R. P.

*De la Resid. de la Conc.
de N. Dame, au Bourg
d'Ososané aux Hurons ce
7. de 1639.*

Vostre tres-humble
& tres-obeissant
seruiteur en N. Sei-
gneur.

HIEROSME LALEMANT

CHAPITRE PREMIER,

De la situation du païs, & du nom de Huron.

MOn dessein n'est pas de redire icy, ce qui se peut trouver dans les precedentes Relations, ou dans les autres Livres qui ont desia traité de ce sujet : mais seulement de suppleer au defect de certaines circonstances sur lesquelles j'ay reconnu qu'on desiroit quelque satisfaction.

Par le mot du païs des Hurons, se doit entendre à proprement parler, vne certaine petite portion de terre dans l'Amerique Septentrionale, qui en longueur d'Orient à l'Occident, n'a pas plus de 20. ou 25. lieuës, & en largeur de Septentrion au Midy, n'est pas en plusieurs endroiets considerable, & en pas vn ne passe sept ou huit lieuës. Son eleuation dans le cœur du païs, s'est trouuée de quarante-cinq & demy. Que si quelques-uns par le passé luy ont donné quelque peu moins ; pour accorder les deux, il faut dire que ceux qui la mettent à quarante quatre & demy ou

4 *Relation de la Nouvelle France,*
environ, l'ont prise à quelque nations voisine plus Meridionale, censée du nombre des Huronnes, comme nous dirons cy-apres.

Quant à la longitude, on ne l'a pû encore establir, selon le Regles de Geographie pour ne s'estre appliqué par accord en France, & icy, à l'exacte obseruation des eclypses. On attend la responce des obseruations qui en ont esté faiçtes l'année dernière, & cependant nous nous figurons estre esloignez de France d'environ treize cens lieües, tirant de la France à nous en droite ligne vers l'Occident, sous vn mesme parellelle d'esleuation; & de Quebec, la principale demeure de nos François en la nouuelle France, de deux cent lieües, quoy qu'on en fasse d'ordinaire plus de trois cēt pour arriuer de là icy, à raison des détours qu'il faut prendre, pour euitier la rencontre des ennemis de ces peuples.

Dans cette petite estenduë de terre, située à l'Est quart de Suest d'vn grand lac, appellé par quelques-vns Mer douce, se trouue quatre Nations, ou plustost quatre diuers amas ou assemblages de quelques fouches de familles par ensemble, qui toutes ayant communauté de langue, d'en-

nemis, & de quelques autres interets, ne sont presque distinguées que par diuerſes ſources d'ayeuls & biſayeuls, dont ils conſeruent cherement les noms & la memoire, elles ſ'augmentent toutes fois ou diminuent par l'adoption de quelques autres familles, qui ſe ioignent tantost avec les vnes, & tantost avec les autres, & qui ſ'en ſeparent auſſi quelquefois pour faire bande & nation à part.

Le nom general & commun à ces quatre Nations, ſelon la lague du païs eſt (yendat) les noms particuliers ſont Attignagantan, Attigneenongnahac, Arendahronons, & Tohontaenrat. Les deux premiers ſont les deux plus conſiderables, comme ayant receu en leur païs & adopté les autres. L'une depuis cinquante ans en ça; & l'autre depuis trente. Ces deux premiers parlent avec aſſeurance des demeures de leurs Anceſtres, & des diuerſes aſſietes de leurs bourgades au delà de deux cens ans, car comme il ſe peut remarquer dans le precedentes Relations, ils ſont contrains de changer de place au moins de dix ans en dix ans. Ces deux nations ſ'entrequalifient dans les conſeils & aſſemblées, des noms de frere & de ſœur. Elles ſont les

6 *Relation de la Nouvelle France,*
plus peuplées pour auoir dans le cours du
temps adopté plus de familles, & ces fa-
milles adoptées retenant tousiours les
noms, & la memoire de leurs souches, font
encore diuerfes petites Nations dans celles
où elles ont esté adoptées, s'y conseruant
vn nom general, & la communauté de
quelques petits interests particuliers avec
dependance à leurs deux Capitaines par-
ticuliers, l'vn de guerre, l'autre de conseil,
ausquels se rapportent les affaires publi-
ques de leur communauté.

Mais venons au nom de Huron, attribué
originairement à ces nations principales
dont nous venons de parler.

Il y a enuiron quarante ans que ces peu-
ples pour la premiere fois se resolurent de
chercher quelque route asseurée pour ve-
nir traiter eux-mesmes avec les François
dont ils auoiēt eu quelque cognoissâce, par-
ticulierement par le rapport de quelques-
vns d'entr'eux, qui allans à la guerre contre
leurs ennemis, auoient donné par occa-
sion iusques au lieu où pour lors les Fran-
çois tenoient la traite avec les autres bar-
bares de ces contrées. Arruez qu'il fu-
rent aux François, quelque Matelot ou
Soldat voyant pour la premiere fois cette

forte de barbares, dont les vns portoient lescheueux fillōnez; en sorte que sur le milieu de la teste paroissoit vne raye de cheueux large d'un ou deux doigts, puis de part & d'autre autāt de razé; en ensuite vn autre raye de cheueux & d'autres qui auoient vn costé de la teste tout razé, & l'autre garny de cheueux pendants iusques sur l'espaule, cette façon de cheueux lux semblant des hures, cela le porta à appeller ces barbares Hurons: & c'est le nom qui depuis leur est demeuré. Quelques-vns le rapportent à quelque autre semblable source, mais ce que nous en venons de dire semble le plus asseuré.

Ce n'est donc pas merueille si dans les Autheurs anciens il ne se trouue rien du nom de ces peuples; car pour ce nom François, ils ne l'ont que depuis le commencement de ce siècle. Pour leurs noms en leur langue, comme leur demeure est bien auant dans les terres, y ayant plus de vingt iournées de leurs païs aux endroits de Mer les plus proches, dōt presque les seuls riuages iusques icy ont esté conneus à nos Europeans. Leurs noms propres aussi bien que leurs personnes & leurs païs ont esté par le passé inconnus, particulièrement

§ *Relation de la Nouvelle France,*

estant si peu considerables en l'estêduë de leur terre, & façon de viure toute dans le commun des Sauvage & Barbares de cette partie Septentrionale de l'Amerique. Ces Sauvages continuans de venir tous les ans à la traite, on s'appriuoisa biẽ-tost avec eux, & prist-on en suite resolution d'envoyer quelques François pour hyuerner dans leur pais, & prendre de plus particulieres cognoissances de ces peuples, & de leur langue, laquelle ayant esté reconneüe convenir encore à d'autres nations voisines, delà vint que dans la suite des années, le nom de Huron s'estendit davantage, & s'appliqua encore aux peuples voisins qui avoient communauté de langage avec les susdites nations, quoy qu'elles fussent separées d'interests.

Mais ce nom dans les idées des Religieux de nostre Compagnie s'estêd encore bien plus avant, car y ayant deux sortes de Barbares dans ce tiers du nouveau monde, compris sous le nom de Nouvelle France, sçavoir les Errãs & les Sedentaires, nostre Compagnie s'estant proposé la conuersion des vns & des autres, elle y a deux missions principales, l'une pour les Barbares Errans & vagabonds, que l'on tasche ensemble de

reduire & de faire Chrestiens; l'autre pour les peuples plus Sedentaires. La premiere, comprend tous les pais qui sont depuis l'emboucheure du fleuve de saint Laurès dans la Mer Oceane iusques à nous, ce qui faict vn espace de plus de trois ou quatre cent lieuës d'Orient en Occident; sans parler de la latitude, particulieremēt du costé du Septentrion. Et la seconde, qui porte le nom de Mission des Hurons, comprend en suite tous les autres peuples qui sont particulièrement vers l'Occident & le Midy, tant que la terre se peut estēdre, & au delà, s'il s'y trouue des Isles habitées de creatures rachetées du Sang de Iesus Christ, capables du Paradis.

Cela presuppposé, ie laisse à iuger, si nous auons raison d'esleuer les yeux & les mains ou Ciel, pour prier le Maistre de la moisson d'enuoyer des Ouuriers à son champ, & si nous n'auons pas en suite sujet de nous escrier à qui il appartient sur terre, *mensis quidam multa, operarij autem pauci.*

Que si on demande, quand est-ce que nous serons venus à bout de ce grand dessein, veu qu'à peine auons nous encore faict vne démarche, & auancé d'un pas dans ce pais depuis que nous y sommes,

A cela ie respons premieremēt, que quand bien cela ne deūt estre accompli, qu'un peu deuant la fin du monde, si faut-il toujours commencer deuant que de finir. En second lieu ie dis, que s'il plaist à Dieu, donner autant de benediction à ce second siecle de l'aage de nostre Compagnie, dans lequel nous allons entrer, qu'il en a donné au premier; tel est maintenant en vie, qui pourra voir le tout & l'accomplissement de ce dessein. Je dis en outre, pour le temps du progrez & aduancement, qu'il sera quand il plaira à Dieu, de qui seul depend le tout, puisque *neque qui plantat, neque qui rigat est aliquid, sed qui incrementum dat Deus:* & qui veut que tous ceux qui trauaillent & contribuent à l'establissement de sa gloire, esperent de la sorte en luy, qu'ils soient dans vne entiere resignation à son bon plaisir, & dans vne genereuse attente des temps & des moments arrestez par sa sainte prouidence, sans bransler dans cette disposition, ny se laisser pour quelque retardement ou difficulté qui arriue,

Je croy toutefois pouuoir dire avec verité, qu'en ces 4. ou cinq ans que l'on s'est appliqué assiduëment à se rendre capable de contribuer à la conuersion de ces Peu-

ples , pluſtoſt qu'à y trauailler effectiue-
ment , on a plus faiët encore cependant
pour leur ſalut , qu'en quelques autres en-
droiëts , où on a paſſé les 20. & trente ans
deuant que d'en faire autant : quand il n'y
auroit que quelques centaines d'enſans,
qu'on y a baptiſé , & qui incontinent apres
le Baptesme s'en ſont enuolez au Ciel.

Au reſte ie ne penſe pas qu'il ſe rencon-
tre icy moins de difficultez capables d'ar-
reſter le cours de l'Euangile , qu'en aucun
autre lieu du monde. Comme on pourra
facilement reconoiſtre par ce qui en à eſté
dit dans les precedentes Relations : là où
on pourra voir , que nous auons affaire à
des Barbares , à qui on n'a encore iamais
preſché l'Euangile ; Barbares ſemblables à
ceux de la Floride , & autres de l'Amerique
dont pluſieurs hiſtoires font mention , avec
preſque vn general deſepoir de pouuoir
iamais rien profiter aupres d'eux en faiët
de Chriſtianiſme , ſinon avec des aſſiſtan-
ces & des procedures du tout extraordi-
naires qui font ſouuent douter de la ſolidité
de leur conuerſion ; & cependant pour en
venir à bout , nous n'auôs ny le ſecours ex-
traordinaire du Ciel par le don des langues
& des miracles ; ny ne pouuons auoir , au

12 *Relation de la Nouvelle France,*
defaut de ce moyen , celuy de l'esclat,
puissance, & Majesté de l'Eglise & de
nostre France , pour la grande & insur-
montable difficulté des chemins, non pas
mesme pour cette mesme raison , vn se-
cours & assistance mediocre pour subsister
dans cette barbarie , ou nous sommes à
tous coups menacez de mort , ou au moins
de bannissement : de sorte qu'ayant les
mesmes difficultez que les autres , nous
sommes destituez des secours & assistan-
ces ordinaiers & extraordinaires pour les
surmonter.

Après tout ie ne sçay ce que c'est , ny ce
que Dieu veut faire , ny par quel moyen ?
mais nous sommes tous pleins d'esperāce,
qu'avec patience & courage celuy à qui
rien n'est impossible , & qui de rien fait
tout ce qu'il veut, fera plus que nous n'osc-
rions dire. Ce qui s'est passé cette année
nous donne plus de sujet que iamais de le
penser de la sorte.

CHAP. II.

*De l'employ en general des Religieux de
nostre Compagnie en ces quartiers.*

ARriuant icy le 26. d'Aoust de l'an
passé 1638. i'y trouuay sept Religieux
Prestres de nostre Compagnie distribuez
en deux maisons ou Residences establies
aux deux Bourgs les plus considerables des
deux principales Nations, des quatre qui
composent les vrays Hurons, ainsi que
nous auons déduit au Chap. precedent.
Ie fis donc le huiëtiesme : & enuiron vn
mois apres arriuerent le P. Simon le Moy-
ne, & le P. François du Peron, qui accom-
plirent le nombre de dix. Six ont la plus-
part du temps demeuré en la Residence de
la Conception au Bourg d'Ossosane, le P.
François le Mercier, surnommé parmy les
Sauuages Chaüose. Le P. Antoine Da-
niel, surnommé An8ennen. Le P. Pierre
Chastelain surnommé Arioö. Le P. Char-
les Garnier, surnommé 8racha. Le P. Fran-
çois du Perron, surnommé Anonchiara:
Et moy à qui on a donné le nom d'Achienj

14 *Relation de la Nouvelle France,*
dassé. Et quatre en la Residence de S. Ioseph au bourg, de Teanaustaiaé. Le P. Iean de Brebeuf, surnommé Echon. Le P. Isaac Iogues, surnommé Ondessone, Le P. Paul Ragueneau, surnommé Aondecheté, & le P. Simon le Moyne, surnommé sane.

La raison de ces surnoms vient, de ce que les Sauvages ne pouuant ordinairement prononcer ny nos noms, ny nos surnoms, pour n'auoir en leur langue l'usage de plusieurs consonantes qui s'y rencontrent, ils font le possible pour en approcher, que si ils n'en peuuent venir à bout, ils cherchent en la place des mots vsitez, dans le pais qu'ils puissent facilement prononcer, & qui ayent quelque rapport ou à nos noms, ou à leur signification. Mais d'autant qu'il arriue quelquefois qu'il rencontrent assez mal à propos, la confirmation ou le changement des noms qu'ils ont donné pendant le voyage, se faiet dans le pais. Mais c'est assez de ce suiet; venons à nos occupations ordinaires en ces contrées.

Depuis les quatres heures iusques aux huit du matin, le temps est employé aux Messes & autres deuotions particulieres. Sur les huit heures la porte de la Maison

s'ouure aux Sauvages qui par le passé ne se fermoit plus iusques aux quatre heures du soir, tant pour se redimer de la vexation, que autrement on apprehendoit, les Sauvages ne semblant pas capables d'un refus d'entrer, au moins de iour, dans les cabanes qui sont dans leur païs, qui ne sont pour lors ordinairement fermées à personne, que pour prendre occasion de profiter de cette coustume, car autant de barbares qui vous viennent voir, ce sont autant de Maistres & d'escoliers qui nous viennent trouver, & vous deliurent de la peine de les aller chercher. Maistres, dis-ie, pour l'usage de la langue; Escoliers, pour les affaires de leur salut & du Christianisme.

Toutefois l'importunité de ces Barbares faineants au dernier point, deuenant insupportable, & presque d'oresnauant inutile, depuis qu'on a trouué le secret de leur langue, on a pris vne honneste liberté de n'y plus admettre que ceux avec lesquels on espere profiter. On a eu vn peu de peine d'arriuer à ce point, mais Dieu luy-mesme semble auoir conduit cette affaire, de sorte que nous en sommes heureusement en possession, avec vne consolation grande du dedans & dehors de nos maisons, excepté

26 *Relation de la Nouvelle France,*
peut - estre de quelques vns entre ces Bar-
bares qui ont l'esprit plus mal fait.

Ceux de nos Peres qui sont de garde, se
tiennent à leur tour à la cabane, & particu-
lièrement celuy qui tient la petite escole
des enfans, des Chrestiens & Cathecume-
nes: les autres s'en vont au Bourg, faire la
ronde & les visites de leur quartier, le
Bourg estant diuisé en autant de parties
qu'il y a de personnes intelligentes à la
langue, & par consequent capables de tra-
vailler. Mais pour le peu d'ouuriers, qu'il
y a pour maintenant, tel se trouue qui est
chargé de quarante cabanes, dans plu-
sieurs desquelles se trouuent quatre & cinq
feux; c'est à dire, huiet ou dix familles, ce
qui leur tailleroit beaucoup plus de beson-
gne qu'ils n'en pourroient expedier; si leur
courage ne leur donnoit des forces pour
cela, & au delà.

Ces visites consistent premierement à
voir, & à faire que pas vn, soit enfant, soit
plus aagé, malade ne meurent sans Baptes-
me, ou sans instruction; pour à quoy arri-
uer plus facilement, on les secoure & assiste
temporellement de tout ce que l'on peut,
& particulièrement de remedes, & sai-
gnées, qui ont de fort bons effects. En 2.
lieu

lieu, on veille à prendre les occasions d'instruire ceux qui se portent bien, & leur inculquer sur tout, les matieres des derniers Catechismes, ou conseils à parler selon l'air du païs; & les disposer à l'intelligence des suiivants. Mais sur tout on s'applique à recognoistre les terres ou personnes dans lesquelles le grain & la semence de la parole de Dieu aura pris racine, pour en suite les considerer & cultiver comme Catechumenes.

A quatre ou cinq heures, selon la saison, on se retire, & les Sauvages qui sont en nostre cabane s'en vont; en suite dequy on entre en conference, tantost des empeschemens & des moyens d'auancer la conuersion de ces peuples; tantost des cas qui regardent l'establissement d'une nouvelle Eglise, & le plus ordinairement des preceptes de la langue, & des mots & façons de parler qu'on a entendu de nouveau; dans lesquels exercices, & autres qui regardent le Spirituel & le deuoir particulier d'un chacun, le temps se trouue si court, qu'encore qu'il soit veritable, qu'il y ait icy disette de toutes les douceurs qui sont en France, n'y ayant que les quatre elemens; & du reste pas plus

18 *Relation de la Nouvelle France,*
de nourriture ordinaire, & de couuert que
ce qu'il en faut pour ne pas mourir de faim
& de froid; ie n'y entens toutesfois qu'une
seule plainte. Qu'il n'y a point de temps;
& en effet il n'y en a pas à demy.

Les Catechismes publics se font plu-
sieurs fois la semaine en ceste maniere,
Premierement, les iours de Dimanche &
de Feste, estant destinez pour l'instru-
ction propre & particuliere de nos Neo-
phytes & nouveaux Chrestiens, le matin
pendant le temps de la Messe, on leur
donne vne instruction en façon de pro-
ne, ou on a esgard à les instruire de ce
qu'ils doiuent sçauoir, & tout ensemble
former leur esprit à la pieté & deuotion
Chrestienne. L'apresdîné, apres les Ves-
pres on les nourrit à ce commencement
de la pure parole de Dieu, leur racomptant
vn Dimanche les histoires & la suite de
l'ancien Testament; avec reflexion sur le
profit qu'ils en doiuent tirer, & le Diman-
che suivant on en fait autant du Nouveau,
le tout pour se conformer à ce qui est es-
crit, *Hæc est vita æterna, ut cognoscant te*
Deum, & quem misisti Iesum Christum.

On prend vn iour ouurier de la semai-
ne, pour faire vn autre instruction pu-

blique à tous indifferemment, soit fidelles, soit infidelles: ce qui se passe en ceste maniere. Sur l'heure du Midy on s'en va crier par le bourg, ou avec la clochette inuiter, dans les ruës & carrefours, au conseil, mais au conseil des conseils, qui concerne l'affaire importante du salut. Au lieu où il n'a point de Chappelle, & ou nostre cabane est trop petite, on le fait le plus que l'on peut au dehors, & lors que le temps & la saison ne le permettent, on le fait au dedans; mais pour lors on n'admet que les hommes reseruant les femmes & les enfans au lendemain. Le monde estant assemblé, apres l'inuocation du saint Esprit, on dit ou l'on chante vne Oraison propre à cet exercice en langue Huronne. Apres quoy on commence l'instruction, qui est quelquefois interrompue par l'approbation ou obiections des Sauvages: à la fin de laquelle on leur fait faire quelques prières, & entr'autres vne petite, ou est enfermée l'acte de contrition. Al'issuë de cela, on se met à chanter le *Credo*, les *Commandemens*, le *Pater*, l'*Aue*, & autres prières, tant & si peu qu'on voit les Sauvages attentifs, & en estat d'en faire leur profit.

Outre ceste instruction commune, on en fait quelque autre iour de la semaine vne moins generale, où sont inuitées nommement les personnes qu'on desire y assister, qui sont les Capitaines & les plus notables du Bourg qui ont esté recogneus auoir quelque pieuse affection & inclination au Christianisme, & auxquels il importe particulièrement de faire bien entendre les mysteres de nostre foy, & qu'ils soient deuëment informez de ce que nous pretendons en ce país, par toutes ces sortes d'assemblées & d'appareil.

Outre tout ce que dessus, au lieu où les Catechumenes ne peuuent estre suffisamment instruits par des conferences particulieres de ceux qui ont soin de leurs cabanes, on les assemble tous les iours le soir, où en commun on leur donne l'instruction quel'on iuge le plus à propos, touchant ce qu'ils doiuent sçauoir deuant que d'estre baptisez.

On ne s'est pas contenté de traualler dans les Bourgs où nous auons des residences; mais nous sentans vn peu plus forts, que par le passé, d'ouuriers intelligens en la langue, on a entrepris des Missions par les Bourgs & villages du país; particu-

lièrement pendant l'Hyuer, qui est le seul temps propre à cela. Les Hurons en ceste seule saison faisant demeure en leurs cabanes, en tout autre temps estants ou à la guerre, ou en traite, ou à la chasse, ou à la pesche. On parcourra premièrement tout le pais qui le premier nous a receu, puis on poussera plus auant; & tousiours de plus en plus, iusques à ce que nostre tasche soit accomplie, qui comme nous auons desia dit, n'est bornée que des limites du Soleil couchant.

Ie ne parle point icy du soin du Seminaire erigé à Quebec en faueur de ces peuples; cét article estant esloigné de nous de 300. lieuës. C'est vn ouurage qui vn iour fera vn plus grand effect pour le seruice de Dieu en ces contrées, que ne se persuadent ceux que Dieu inspire d'y contribuer; quoy que peut estre ce ne soit pas de la façon qu'ils l'ont pensé.

Le libertinage des enfans en ces pays est si grand, & ils se trouuent si incapables de reglement & de discipline, Que tant s'en faut que nous puissions esperer la conuersion du pays par l'instruction des enfans; qu'il faut desesperer leur instruction, sans la conuersion des parens. Et par con-

sequent, tout bien considéré, la premiere chose à laquelle nous devons veiller, c'est à la stabilité des mariages de nos Chrestiens, qui nous donnent des enfans, qui de bonne heure soient esleuez à la crainte de Dieu, & de leurs parents. Voila le seul moyen de fournir les Seminaires de ieunes plantes, pour à quoy arriuer; quelques charitez seroient merueilleusement bien employées, par lesquelles on pourroit obuiuer aux difficultez qui se rencontrent à l'execution de la stabilité des mariages, contre la coustume immemoriable du pais, vne trentaine de personnes donnant vne fois pour toutes, chacune vne douzaine d'escus l'une portant l'autre, donneroient icy cinquante mariages stables, qui feroient, dans quelque temps, vn monde ou plustost vn Paradis tout nouveau. Que s'il y auoit quelque fondation pour cela; encore mieux: il en fera ce qu'il plaira à Dieu.

Cependant le Seminaire de Quebec pourra seruir, pour y retirer les enfans de nos Chrestiens qui se trouueront de bon naturel: il seruira en outre pour des personnes aagées, qui desireront tout de bon estre à loisir & plus en repos instruites: &

pour ce se veulent esloigner du païs pour quelque temps. Aussi bien si ceux qui retournent du seminaire, ne sont promptement liez par le mariage, le torrent des mauuaises coustumes & compagnies est si grand, qu'il faudroit du miracle pour y resister. L'aage en outre de tels seminaristes donnera du poids & de l'autorité à leurs paroles, & au rapport de ce qu'ils auront veu de bien parmy la Chrestienté de Quebec.

Nous auons aussi pensé d'appliquer quelques-vns à la connoissance de nouvelles langues. Nous iettions les yeux sur trois autres des Peuples plus voisins; sur celles des Algonquains espars de tous costez, & au Midy; & au Septentrion de nostre grand Lac: Sur celle de la Nation neutre qui est vne maistresse porte pour les païs Meridionaux; & sur celle de la Nation des Puants, qui est vn passage des plus considerables pour les païs Occidentaux, vn peu plus Septentrionaux: Mais nous ne nous sommes pas trouuez encore assez forts pour conseruer l'acquis, & songer ensemble à tant de nouvelles conquestes; de sorte que nous auons iugé plus à propos de differer l'execution de ce dessein enco-

re pour quelque temps , & de nous contenter cependant de prendre l'occasion que Dieu nous enuoyoit à nostre porte, d'entrer en quelque nation de la langue des Neutres , par l'arriuée en ce païs des *Seanochronons* , qui s'y sont refugiez, comme nous dirons cy-après ; lesquels faisoient vne des Nations associées à la Nation neutre.

Nous auons d'autant plus facilement quitté la pensée de nous appliquer pour le present , à la langue des *Algonquains*, que nos Peres de *Quebec* & des trois riuieres s'y appliquent fortement. Nous esperons de là , quelque braue ouurier, qui vienne icy rompre la glace, & nous donner entrée & ouuerture parmy ces peuples qui sont autour de nous , & n'ont l'usage d'autre langue , que de l'*Algonquine*. Plaise à la diuine Majesté donner benediction à toutes ces pensées & entreprises.

CHAP. III.

*De l'Estat general du Christianisme
en ces contrées*

ENuisageant de loin les affaires du Christianisme de la Nouvelle France, & particulièrement celle des Hurons, elle me sembloient bien à la vérité, vn ouvrage particulier de la Prouidence diuine. Mais ie me suis beaucoup dauantage trouué confirmé en ceste pensée, les ayant veus de pres. Qui n'eust dit, lors que pour la premiere fois, nos Peres arriuerent en ce païs, que le meilleur eust esté, qui en eust eu le pouuoir, de s'establiir dans les premieres & principales places, comme nous sommes maintenant; Mais si cela eust esté, qu'y eussions nous fait n'ayans aucune notion ny vsage de la langue, ny cognoissance des coustumes du païs, & de l'humeur des Barbares; Il y a grande apparence, que n'ayans rien d'ailleurs qui nous peût faire subsister dans l'esprit & l'estime de ces Sauvages, nous fussions tombez dans vn tel mespris general de

tout le païs, que nous eussions eu de la peine de nous en releuer, & nous mettre de long temps en estat de les assister effectiuement. Et en effect, ie ne sçay si ce n'est point de là qu'est arriué, qu'où a si peu profité au lieu où on s'estoit premierement estably.

Dieu donc disposa les affaires de la sorte, que nous fumes contraincts au commencement, d'arrester en vn petit coin du païs; où on a forgé les armes necessaires à la guerre, ie veux dire qu'on s'y est estudié à la cognoissance & vsage de la langue, & qu'on y a commencé à la reduire en preceptes, en quoy il a fallu estre à soy-mesme & maistre & escholier tout ensemble, avec vne peine incroyable, & de là au bout de trois années, on est venu, pour ainsi parler, enseigne déployée au bourg d Ossosané, vn des plus considerables de tout le païs; en l'année d'apres au bourg de Teanaustayaé le principal de tous, laissant entierement, & abandonnant la premiere demeure, à faute d'habitans, & de personnes capables de profiter de nos traualx, tous presque estans dissipez ou morts de maladie. Ce qui semble, non sans fondement, estre vne punition du Ciel, pour le mespris qu'ils ont fait de la

grace de la visite, que la diuine bonté leur auoit ménagée.

De premiere abord on a eu grand soing des enfans & des plus aagées malades à l'extremité, qu'on ne laissoit point mourir sans Baptisme, ou au moins sans instruction pour ceux qui en auoit besoin; Nos Peres entrant librement par toutes les cabanes pour ce suiet. C'est vn bien & vn aduantage qui ne se peut estimer; & ceux à qui il en a pensé couster la vie plusieurs fois, ainsi qu'il se peut voir dās la Relation de l'an passé, sont si satisfait de ceste conqueste, qu'ils en exposeroient encore mille s'il les auoient, pour se là conseruer.

Dans les instructions generales & particulieres, comme aussi dans les courses ou missions, on gaigne par fois quelques esprits: quoy que pour le present ce ne soient d'ordinaires que mocqueries, & menaces, qui seront, comme i'espere, la semence qui produira en son temps le fruiet de l'Euan-gile, & la reduction generale de ces peuples à la foy.

Nous auons quelquefois douté, sçauoir si on pouuoit esperer la conuersion de ce pais sans qu'il y eust effusion de sang: le principe receu ce semble dans l'Eglise de

Dieu que le sang des Martyrs est la semence des Chrestiens, me faisoient conclurre pour lors, que cela n'estoit pas à esperer: voire mesme qu'il n'estoit pas à souhaiter, considéré la gloire qui reuiet à Dieu de la constance des Martyrs, du sang desquels tout le reste de la terre ayant tantost esté abreuué, ce seroit vne espee de malediction, que ce quartier du monde ne participast point au bon-heur d'auoir contribué à l'esclat de ceste gloire.

Mais i'aduouie que depuis que ie suis icy, & que ie vois ce qui se passe, sçauoir les combats, les batailles, les attaques, & les assauts generaux à toute la Nature, que souffrent tous les iours icy les ouuriers de l'Euangile, & cependant leur patience, leur courage & leur application continuelle à poursuiure leur point, ie commence à douter si quelque autre martyre est nécessaire que celui-cy, pour l'effet que nous pretendons: & ie ne doute point qu'il ne se trouuast plusieurs personnes qui aymassent mieux tout d'un coup receuoir vn coup de hache sur la teste, que de mener les années durant la vie qu'il faut mener icy tous les iours, trauaillant à la conuersion de ces barbares.

Si vous les allez trouver dans leurs cabanes ; & il y faut aller plus souvent que tous les iours, si vous voulez vous acquitter comme il faut de vostre devoir : vous y trouverez vne petite image de l'Enfer, ny voyant pour l'ordinaire que feu & fumée, & des corps nuds deçà & delà noirs & à demy rostis, pisse-meslez avec les chiens, qui sont aussi chers que les enfans de la maison, & dans vne communauté de liét, de plat & de nourriture avec leurs maistres. Tout y est dans la poussiere, & si vous entrez dedans, vous ne ferez pas au bout de la cabane, que vous ferez tout couuert de noirceur de fuye, d'ordure & de pauvreté.

Leurs paroles souuent ne sont que blasphemes contre Dieu & nos mylteres ; & des iniures contre nous accompagnées d'ingratitude incroyable, nous reprochant que ce sont nos visites & nos remèdes qui les font malades & mourir ; & que nostre séjour icy est la seule cause de tous leurs maux. Si vous leur voulez parler pour les instruire, il faudra quelquefois attendre les heures entieres deuant que de trouver l'occasion de leur dire à propos vn bon mot ; & apres toutes vos peines & vos

visites, vn songe, qui est à proprement parler le Dieu du païs, en defera plus en vne nuit, que vous n'aurez auancé en trente iours: & vous pourroit bien, pour toute recompense, procurer vn coup de hache ou de fleche. S'ils viennent en vostre cabane, ne pensez pas que vous puissiez facilement leur refuser vostre porte; ny quand ils sont dedans, les gouverner à vostre mode. Ils se mettent où il leur plaist, & n'en sortent pas quand il vous plaist, Il faut qu'ils entrent par tout, & qu'ils voient tout, & si vous les volez empescher, ce sont querelles & reproches avec iniures. Et dans tout cela il faut filer doux: vn coup de hache est bien tost donné par ces Barbares: & le feu mis à vne escorce, & de recherche de iustice pour le crime, il n'y en a point dans le païs, & au plus qu'on en pourroit attendre, ce seroit quelques presens. De sorte qu'il faut tousiours estre en garde, & sur la patience, & faire estat qu'on n'a icy, & moins encore qu'en tout autre lieu du monde, aucun moment de sa vie assésuré.

Adioustez à ce que dessus, que vostre façon de loger, de coucher, & de viure estant en tout semblable à celle des Sauu-

ges ; la nature ne trouue guere de consolation parmy tous ces trauaux. Vn peu de bled d'Inde bouilly dedans l'eau, & pour le meilleur ordinaire du pais, vn peu de poisson puant de pourriture dedans, ou de la poussiere de poisson sec pour tout assaisonnement, voila le manger & le boire ordinaire du pais. Pour l'extraordinaire vn peu de pain de leur bled, cuit sous la cendre, sans aucun leuain, ou l'on mesle quelquefois quelques febves ou fruiets sauvages : Voila vne des grandes regales du pais. Le poisson frais & la chasse, sont choses si rares, qu'elles ne valent pas le parler, y ayant toutes les peines du monde d'en recouurer pour les malades. Vne natte sur la terre, ou sur vne escorce, est vostre coucher. Le feu vostre chandelle. Les trous par ou passe la fumée, vos fenestres qui ne ferment iamais. Des perches courbées couuertes d'escorces, vos murailles & vostre lambris, par où le vent basse de tous costez. En vn mot tout le reste à l'auenant des Sauvages, excepté le vestir, auquel encore faut-il commencer à se reduire.

Le ne d'y rien de la rigueur des saisons ; de l'incommodité des chemins qu'on ne peut faire qu'à pied ou sur le dos d'vn autre,

32 *Relation de la Nouvelle France,*
des dangers continuels des Ennemis du
païs, qui sont tous les iours à vos portes,
& remplissent tout de frayeur nouvelle,
arriuant à toute heure de quelque massa-
cre ou prisonnier qu'ils ont enleué, & de
leur resolution de venir brusler tout le
païs. Je ne dis rien dis-je de tout cela, &
d'infinies autres petites disgraces qui ac-
compagnent & s'ensuiuent de tout ce que
dessus. Pour conclurre en fin qu'il semble
qu'une seule année de patience & de cou-
rage, parmy ces combats & batailles con-
tinuelles vaut bien vn petit martyre, &
qu'ainsi, quoy qu'il n'y ait point encore de
sang de martyrs respandu, nous n'auons
pas toutesfois suiet de desesperer la con-
uersion de ces peuples.

Il en sera toutefois tout ce qu'il plaira à
Dieu: & on s'attend bien que le fort armé,
qui commande absolument dans ce païs
depuis tant de siecles, ne laissera pas si faci-
lement eschapper de ses mains tant de
vieilles & anciennes conquestes; & qu'il
fera tout possible pour prendre & exter-
miner tous ceux qui s'opposent à son em-
pire, & qui n'en cherchent que la ruine.
Mais qu'il fasse du pis qu'il pourra, tost ou
tard le tout réussira à sa plus grande con-
fusion

fusion, & à l'auancement de la gloire de Dieu, quand ce ne seroit qu'en iustificiant sa bonté & misericorde, sur ce païs. Et rien cependant n'arriuera sans sa permission, pour l'amour duquel mourir, c'est viure; & estre abbatur, c'est vaincre & triompher.

que si ce que dit vn des SS. Peres del'Eglise est veritable, que les bien-faits presents de la diuine Maiesté enuers les hommes seruent de caution & d'assurance pour ceux de l'aduenir; le repos, la confiance, la ioye & la consolation dans laquelle viuent icy les ouuriers de l'Euangile parmy ce premier genre de martyre, faict qu'on n'a pas suiet de redouter dauantage le second, que le premier.

Mais deuant que de passer plus auant à declarer l'estat particulier, & le détail du Christianisme en ce païs: ie prie vne fois pour toutes, tous ceux & celles qui iusques icy ont contribué aux moyens d'instruire ces Peuples, soit par leurs prieres, soit par leurs autres charitez & bien-faits; ou à qui Dieu en donneroit d'oresnauant la pensée, de considerer que le fruit apres lequel nous trauaillons, est fruit de l'Euágile, lequel s'il doit estre bon & de durée, ne vien-

dra qu'après beaucoup de patience : & par consequent de ne se point laisser d'exercer ceste charité, la plus grande qui puisse estre exercée en ce monde. Enuisageant tousiours ces affaires avec l'œil de la foy, qui seul leur en fera veoir le merite & l'excellence; & que de si grands ouurages ne se font pas tout d'un coup. Combien faut-il en France de temps & de peine, pour convertir vn seul heretique, ou bien quelque ieune ou vieux Pecheur? Hé qu'est-ce de cela en comparaison de la conuersion de tout vn monde, terrestre & brutal au dernier point, enuieilly depuis tant de siècles dans les erreurs & superstitions?

Nous nous trouuons icy comme au milieu d'une mer, où vn million de personnes se noyent : & ne sçachants auquel courir, nous sentons nos cœurs se fendre, & nous nous trouuons reduits au point d'experimenter ce que dit l'Apôstre des Gentils, *Charitas Christi urget nos*. Le malheur n'arriue qu'à faute d'ouuriers, ou plustost des moyens de les pouuoir faire icy subsister, & de les entretenir dans vn Pays, & parmy des peuples, où il faut par nécessité, avec Saint Paul, renoncer aux droicts de l'Euangile, & viure du

lien, au moins pour le present : si on ne veut, en vn moment, voir le tout renuersé & les affaires reduites au desespoir.

Je sçay bien que les difficultez d'apporter de dehors dequoy y subsister, sont extremes : mais apres tout, il ne laisse pas d'y auoir vn monde entier à conuertir ; & n'y a point de porte plus commode pour y passer, que celle où nous sommes auourd'huy & c'est ce qui afflige nostre cœur & nostre esprit.

Que si ces pertes nous sont si sensibles à qui ces peuples ne sont rien ; combien a-on suiet de croire, qu'elles sont considerables à celuy qui leur à donné l'estre, pour les rendre bien-heureux ; & de plus vne vie diuine, & son sang pour leur rachapt. Heureuses les Ames à qui le S. Esprit donne & conserue la deuotion de contribuer selon leur pouuoir à estancher la soif de I E S V S Christ mourant en Croix ; & à ramasser les gouttes de son sang precieux, ou pour mieux dire ; la marchandise dont ce sang adorable a esté le prix.

Ie ne puis icy obmettre la louïage qui est deuë à messieurs les associez de la Compagnie de la Nouvelle France, qui contiennent plus que iamais, à contribuer de ce

36 *Relation de la Nouvelle France,*
qu'ils peuuent pour vne si sainte entrepri-
se. Et cét ouurage aussi bien que tous les
autres de la Nouvelle France, aura à ia-
mais vne tres-particuliere obligation à
Monsieur le Cheualier de Mont-magny
nostre Gouverneur ; à la prudence, gene-
rosité, charité & zele duquel, il ne semble
pas qu'il soit possible de rien adiouster: tou-
tes lesquelles vertus & belles qualitez se
font aussi bien sentir icy à trois cent lieuës,
que nous sommes de son sejour, que sur les
lieux où il fait sa demeure.

Il y en a encore plusieurs autres, qui
meriteroiët vne bõne part à la loüange de
contribuer selon leur pouuoir à vn si saint
ouurage, Mais ce ne seroit iamais fait, &
c'est le point, que le liure de vie en cõserue
pour iamais la memoire. Pour nous, tout
ce que nous pouuons, c'est de leuer les
mains au Ciel, & de dire de tout nostre
cœur, *de vore cœli & de pinguedine terra, &
de super sit benedictio vestra.*

CHAP. IV

*De ce qui est arrivé de plus remarquable
en la Residence de la Conception au
bourg d'Ossossane, & particulièrement
de la nouvelle Eglise de ce bourg.*

LE nombre des enfans baptisez en maladie en cette Residence , est de 52. dont vingt-sept s'en sont enuolez au Ciel. Celuy des plus aagées qui ont esté baptisez à la mort , ou en extremité de maladie, de septante-quatre dont vingt-deux sont morts, & comme il est à presumer de la bonté & misericorde de Dieu, ont pris le mesme chemin du Ciel. Celuy des Catechumenes, baptisez en bonne santé, de quarante-neuf.

Deuant que de declarer ce qu'il y a eü de plus remarquable en tout cecy, il faut que ie parle de ceux qui ont dauantage participé à ce bon-heur, & qui nous rendront en suite, plus que iamais, d'adorables les secrets profonds, & les abysses de la sagesse, Bonté & Prouidence diuine sur

Les genrôhronons faisoient par le passé vne des Nations associées à la Nation Neutre, & estoient situez sur les confins du costé des Hiroquois les Ennemis communs de tous ces Peuples. Tant que cette Nation d'genrôhronons a esté en bonne intelligence avec ceux de la Nation Neutre, elle a esté bastante pour resister aux Ennemis, subsister & se maintenir contre leurs courses & inuasions: mais par ie ne sçay quel mescontentement, ceux de la Nation Neutre s'estans retirez & separez d'interests avec eux, ils sont demeurez en proye à leurs Ennemis, & n'eussent pas esté encore long temps sans estre du tout exterminiez, s'ils n'eussent songé à la retraite, & à se mettre à couuert de la protection, & association de quelque autre Nation.

Tout bien consideré, ils aduiferent qu'ils ne pouuoient mieux choisir que celle de nos Hurons. Ils deputent donc les plus intelligens d'entr'eux, pout en venir faire la proposition: qui fut faite aux conseils & assemblées particulieres & generales de tout le Pais: où en fin fut conclu, de les receuoir, leur arriüée ne seruant pas de

peu à la defense & conseruation du païs.

En suite de ceste resolution, le temps fut pris pour les aller querir, & assister en leur voyage: soit pour les soulager, au portage de leurs meubles & enfans, n'y ayant en toutes ces contrées autre voiture par terre, que celle de la teste, ou des espaules des hommes & des femmes; soit aussi pour les defendre de leurs ennemis communs, & leur faire escorte,

Quelque soulagement qu'on leur peust donner, la fatigue & les incommoditez d'un tel voyage, de plus de quatre-vingts lieues, où estoient plus de six cens personnes, dont les femmes & les petits enfans faisoient le plus grand nombre; furent si grandes, que plusieurs en moururent en chemin, & presque tous arriuerent malades, ou le furent incontinent apres.

Ce Bourg fut le premier du païs où ils aborderent, & aussi-tost que la nouuelle fut venuë qu'ils aprochoient, tout le monde sorti, pour aller au deuant; & les Capitaines s'y trouuerent, & exhorterent leurs gens avec tant d'ardeur & de compassion, à prendre courage, & assister ces pauvres estrangers, que ie ne sçay pas qui eust peu faire dauantage le Predicateur.

40 *Relation de la Nouvelle France,*
Chrestien le plus zelé pour les œuvres de
charité, & de misericorde.

Ils furent incontinent distribuez par les
principaux Bourgs du pais. La plus grande
part toutefois s'arresta en celuy-cy, com-
me vn des plus aysez & accommodez de
tous ; mais par tout où ils furent receus, les
meilleures places dans les cabane leur fu-
rent données ; les greniers ou quaiſſes de
bled ouuertes avec liberté d'en disposer
comme si elles leur appartenoint.

Le gros arriua en ce bourg, au mesme
temps que i'y arriuai avec quelques dome-
stiques intelligens à la saignée, & aux re-
medes, que nous auions amené de France :
& iamais rien ne se rencontra plus à pro-
pos. Car aussi-tost avec ce secours, on cou-
rut aux plus malades, qui estoient en dan-
ger de mort, pour auoir entrée par là, de
pouruoir à leur salut. C'est icy que nous
parurent premierement les secrets adora-
bles de la bonté de Dieu, sur ces pauures
refugiez, car ce secours vint si à propos
pour quelques-vns d'entr'eux, tant enfans
que plus aagez qu'il le trouua que depuis
leur arriuée iusques à la mort, il n'y eust
que le temps qu'il falloit, pour les instruire
& baptiser.

Depuis ce temps, ces malades donnerent tant d'occupation, qu'ils emporterent, l'espace de quelque temps, la plus grand part de l'employ de nos ouuriers, qui ne pouuoient retenir les regrets & les plaintes innocentes, de ne pouuoir pour ce suiet, vacquer à la culture de ceux de leur quartier, dont, comme nous auons dit, vn chacū est chargé. Mais ils ne s'apperceuoient pas, que tandis qu'ils gardent l'ordre de la charité, la misericorde de Dieu passe par dessus l'ordre de leurs pensées & industrie, & aduance luy mesme leur tâche, qu'ils estimoient de beaucoup reculer.

Deux mois donc ou enuiron apres l'arriuée de ces pauvres estrangers, leurs maladies commençant à diminuer: nos ouuriers eurent plus de temps & de loisir, de visiter les champs, que par le passé ils auoientensemencé. Et voila qu'aussi tost, contre toute leur attente, ils en aperçoient la plus part, tout disposez à la moisson, rencontrants les esprits de plusieurs de ceux qu'ils auoient par le passé cultiué, pleins de satisfaction, & de conuiction des veritez de la Foy, & ne desirans autre chose, que d'estre au plustost baptisez.

Leur ferueur passa si auant, que nous nous trouuâmes obligez de mettre en deliberation, si nous les differerions iusques aux temps qu'il semble que l'Eglise destine pour le Baptesme des Cathecumenes, sçauoir Pasques & la Pentecoste : mais l'un & l'autre se trouuoit trop esloigné ; tout bien consideré, il fut resolu, d'ouurir à ce commencement la porte à tous ceux qui se presenteroient, à mesure qu'ils s'en trouueroient capables ; puis qu'il estoit question d'une nouvelle Eglise, à laquelle il falloit songer de donner l'estre, deuant que des s'appliquer, à luy donner sa perfection. Que toutefois il y falloit proceder avec beaucoup de retenue, & nous souuenir tousiours que nous auons à faire à des Sauvages ; à la dissimulation & legereté desquels il ne semble pas qu'il y ait rien de pareil.

C'est ce qui nous fit conclure, de n'en receuoir au commencement, que fort peu, & des Anciens & plus considerables des Chefs de familles, & personnes mariées avec stabilité. Crainte que si nous en admettions d'autres, sans vne plus grande experience, les fondemens venans à crouler, nous ne vissions bien-tost tout l'edifice

à bas, & sa ruine totale auparavant son établissement, & le sepuchre de ceste nouvelle Eglise dans son berceau.

Ayant donc l'œil à toutes ces circonstances, & sur ce que la diuine Prouidence nous presentoit, on donna iour à la feste de S. Martin à trois chefs de famille des plus anciens, & plus considerables du Bourg. Donc l'vn fut baptisé avec sa femme, & trois de ses enfants. Des deux autres l'vn estoit veuf & sans enfants qui fussent petits; l'autre ne iugea pas que sa femme fust encore capable de ce bien, comme en effet elle ne l'estoit pas.

Enuiron vn mois apres, sçauoir à la Feste de la Conception de la sainte Vierge, se firent les seconds baptêmes de seize personnes: entre lesquels estoient trois ou quatre chefs de familles, avec leurs femmes & enfans; ce qui joint avec les precedens, en la famille de Ioseph Chih&aterih&a, celuy dont a esté parlé amplement en la derniere relation, faisant vne compagnie d'une trentaine de personnes, qui assisterent ensemble ce iour là à la sainte Messe pour la premiere fois, où se communierent tous ceux qui estoient en aage de le faire; il semble que nous auons tout

44 *Relation de la Nouvelle France,*
subiect de recongnoistre, & de remarquer
ce sainct iour, destiné à la memoire & à
l'honneur de la premiere grandeur de ce-
ste sainte Vierge; pour celuy de la Naif-
sance de ceste nouvelle Eglise, & du com-
mencement du bon-heur & de la benedi-
ction du païs.

Nous auons bien raison de croire, que
celle en l'honneur de laquelle est consacrée
ceste Feste, a mis la main à cet ouurage,
& l'a conduit depuis, au point que nous di-
rons cy-apres, & que nous voyons de nos
yeux, avec vne consolation, qui ne se peut
expliquer,

Il y eut trois ans à ce mesme iour, que
le vœu fut fait par nos Peres, pour obtenir
la faueur de ceste grand Princeesse, en l'e-
stablissement du Christianisme en ces con-
trées de ieusner la veille de ceste Feste, &
de dire tous les mois vne Messe, en l'hon-
neur de ceste sienne premiere grandeur: &
en outre que la premiere Chappelle que
nous bastirions dans le païs, seroit en son
honneur, & sous le titre de sa sainte Con-
ception. Ceste Chapelle a esté celle dans
laquelle se sont faits ces premiers Baptes-
mes, dans laquelle nous auons veul'effect

que nous pretendions, deuant que d'estre parfaictement deschargez de l'obligation de ce que nous auions promis, puis que la Chappelle n'estoit encore acheuée iusqu'au point, qu'on y peust dire la Messe avec bien seance, & ne sembloit estre capable que d'y faire les Baptismes, qui en effect y furent faits.

Que louange donc & action de graces soient à iamais renduës à ceste grande Reyne du Ciel, & de la terre, partous ceux qui ont & auront cy-apres interest à cét ouurage, & quant aux personnes qui ont vne pieuse & sainte affection pour cette entreprise, elle nous obligeront grandement de nous ayder à remercier ceste sainte Vierge de tant de graces que nous auons receu, & receuons continuellement de sa faueur & assistance, laquelle nous fait esperer que son sacré Fils nostre tres-honoré Seigneur & Maistre, qui seul pouuoir mettre le fondement de cét edifice, aura agreable d'y continuer sa benediction, & le conduire iusques au comble & au point de sa perfection.

Depuis ce iour on a continué par intervalles de baptiser ceux & celles qui se sont presentez, qu'on a iugé capables de ce bon-

46 *Relation de la Nouvelle France,*
heur, en sorte que le nombre des fideles
faisant profession du Christianisme, mon-
te presentement ce Bourg à pres de 60.
dont plusieurs sont semroronons, du
nombre de ces pauvres Estrangers refu-
giez en ce pais, comme nous auons dit au
commencement de ce Chapitre; la diuine
Prouidence les ayant attendu pour don-
ner commencement à cette nouvelle Egli-
se, comme predestinez de toute Eternité,
pour en estre vne partie des pierres fonda-
mentales. Dans ce nombre se sont trouuez
encore quelque autres Estrangers de di-
uerfes Nations qui depuis se sont retirez
en leurs pais, qui tost ou tard pourront
bien seruir à quelque dessein de Prouiden-
ce, Bonté & Misericorde de Dieu.

Iedy pres de 60. Fideles, faisants pro-
fession du Christianisme; car de baptisez
en extremite de maladie, il y en a beau-
coup d'autres dans le Bourg, mais qui
ayans recouré la santé, n'ont fait aucun
estat du bien qu'ils auoient receu, auquel
toutesfois il est croyable, au moins pour
quelques vns, qu'ils luy sont encore obli-
gez de la vie, temporelle.

Il faut aduotier que le trauail d'un en-
fantement spirituel, est grand pour le re-

gard de ces peuples Barbares & sauvages au dernier point ; mais aussi est-il véritable que la consolation est grande de voir ces pauvres creatures reduites à la reconnaissance , respect , & obeissance à leur Createur & Redempteur, & se ranger aux devoirs de véritables Chrestiens.

Seroit-il possible de retenir les larmes de ioye, voyant vn Dimanche matin , arriuer chez nous, pour entendre la Messe, ces pauvres gens partis de leurs cabanes à point nommé, & quelque temps qu'il fasse traverfer vn espace notable qu'il y a de leur Bourg à nostre demeure, nuds pour la pluspart , comme la main , excepté vne simple peau qu'ils ont sur le dos en forme de mante ; & dans la rigueur de l'hyuer quelques peaux à l'entour de leurs pieds, & de leurs iambes,

Mais sur tout quand on les voit se mettre à genoux, ce qui leur est vne posture du tout estrange & extraordinaire, faire leurs prieres à haute voix , en la presence du saint Sacrement, & se communier pessellemesle avec nos François. Il faut confesser que le contentement est tel, que le centuple la dedans , nous est richement payé, & au delà, & que nous n'aurons iamaïs suiet

48 *Relation de la Nouvelle France,*
d'estre en peine de voir en ce point accomplies les promesses del'Evangile.

On a soin l'hyuer de tenir en plusieurs endroiets de la Chappelle des foyers pleins de braise, pour remedier aux inconueniens qui s'en pourroient ensuiure du froid, & de leur nudité. Cela les satisfait de la sorte, que quelques-vns demeurent souuent de leur plein gré les heures entieres apres le seruice, à s'entretenir de nos mysteres, & à se faire instruire tousiours de plus en plus.

La premiere occasion qui se presenta apres leurs baptesmes, de faire paroistre leur deuotion, fut à la nuit de Noël, laquelle plusieurs passerent partie dans nostre cabane, partie dans la Chappelle nouvelle, qui se trouua en estat de seruir à ceste solemnité. On disposa les choses avec le plus d'ornement, & d'esclat qui fut possible, pour leur faire apprehender le merite de ce iour. Et la chose reüssit de la sorte, que ces pauvres gens ont souuent depuis demandé, quand est-ce que cette nuit reuiendrait, ou plustost cette sorte de beau iour: car ces peuples n'ayans aucun vsage de chandelles, voyant quantité de lumieres qui brilloient & esclattoient
dans

en l'année 1638. & 1639. 49

dans ceste Chapelle, auoient quelque sujet de doute s'il faisoit iour ou nuict.

Nostre Chrestien, ainsi appellons nous Ioseph Chigatenha, tant par ce qu'il a esté le premier en ce Bourg, & seul neuf ou dix mois avec sa famille, faisant profession du Christianisme, nonobstant tous les discours & les persecutions de langue de ses Compatriotes; que par ce qu'il est incomparablement eminent par dessus tous les autres, en connoissance & pieuse affection à nos mysteres, & à l'esprit du Christianisme. Ce braue Chrestien dis-ie ne manqua pas en ceste occasion de prendre souuent la parole, & y faire fonction de frere aîné, en instruisant & enseignant ses cadets avec vn aduantage & succez tout particulier, pour auoir tout ensemble l'esprit, la parole, la probité, la reputation, la cognoissance de nos mysteres, & l'affection en vn eminent degré; de sorte que nous commençons à le regarder plustost comme vn Apostre, que comme vn Barbare de ces contrées. Ah, disoit-il, mes Freres, que veulent dire ces lumieres brillantes & eclatantes au milieu de la nuict, sinon que celuy dont nous honorons maintenant la memoire, a par sa naissance

30 *Relation de la Nouvelle France,*
dissipé les tenebres & l'ignorance du monde; ce qu'ayant fait pour la premiere fois depuis tant de siecles, il nous va auourd'huy pour la premiere fois en ces contrées, faisant la mesme grace & misericorde. Ce sont des desseins & des iugemens qu'il ne faut qu'adorer, pourquoy c'est qu'il ne l'a pas fait plustost, mais c'est vne grace & vne faueur pour nous, qui ne se peut priser, ny recognoistre suffisamment, que la prouidence ait menagé ce bien à nostre país, pendant que nous sommes encore en vie.

De tels & semblables discours entre-tint ce bon Chrestien vne bonne partie de la nuit, le petit troupeau de ceste Eglise naissante, laquelle il n'edifia pas moins de ses exemples que de sa parole. Car entre-autres ne se contentant pas d'une Messe, il en entendit cinq tout de suite, la plus part à genoux: Ce qui pour vn Barbare, qui n'a iamais sçeu que c'estoit de ceste contenance, pourroit bien passer pour vn petit martyre. D'autres à son imitation n'en entendirent guiere moins, & tous se confesserent, communierent; & donnerent en ceste occasion tant de contentement & de satisfaction, qu'on n'en pou-

noit plus souhaiter dauantage.

Je puis dire le mesme à proportion de toutes les grandes Festes & Dimâches, qui depuis ont suiuy, auxquels on garde tout ce qui se peut des ceremonies de l'Eglise; entr'autres celle du pain benir, que ces bons Neophytes font chacun à son tour, avec beaucoup de deuotion, particulièrement quelques-vns.

Ce n'est pas que pour conduire le tout de la sorte, il n'y faille apporter beaucoup de peine & de soin, & autant pour le moins qu'à esleuer des enfans malades, mais le contentement d'auoir en fin mis ces enfans au monde, ou plustost dans la grace du Christianisme, & le desir & esperance de les voir deuenir hommes dans l'Eglise de Dieu, fait qu'on ne sent presque point son mal, & qu'on est tout disposé à en souffrir beaucoup dauantage.

Ceste grace de Dieu sur ces peuples; n'est conceuable qu'à ceux qui scauent iusques à quel point ces pauures Barbares sont terrestres, & d'eux-mesmes esloignez, & incapables de conceuoir & estimer les choses de l'esprit & de l'Eternité, mais celui à qui rien n'est impossible, & qui n'est pas moins puissant en vn temps qu'en vn

52 *Relation de la Nouvelle France,*
autre, semble en fin agréer, de susciter de
ces pierres & rochers des vrayes enfans
d'Abraham, & de l'Eglise.

Ce qui apres l'assistance du Ciel semble
auoir le plus contribué à l'aduancement de
cét ouurage, sont; Premièrement, la pa-
tience & le courage des Peres qui ont esté
icy par cy-deuant, qui ne se sont pas rebu-
tez ny lassez dans l'attente des temps &
des moments de la diuine Prouidence: &
qui nonobstant toutes les persecutions &
dangers de massacre, dont ils se sont veus
à la veille souuent, & particulièrement
l'année precedente, n'ont rien relasché de
leurs soins & charitez à visiter & assister
les malades, voire mesme dans les cabanes
de ceux qui sembloient leur vouloir le
plus de mal.

Et il semble en effet que Dieu ait vou-
lu tesmoigner que c'estoit là le grain, qui
auoit produit ce fruit, disposant les cho-
ses de la sorte, qu'au mesme mois d'Oc-
tobre, auquel l'année d' auparauant on auoit
conclu leur mort, ça esté en ce mesme
mois l'année d'apres, que pensants estre
encore bien esloignez de la recoïte, ils
ont aperceu les fruits tous meurs & prests
à cueillir.

En second lieu, l'exemple de nos François seculiers ou domestiques, n'y a pas de peu seruy. Nous n'experimentons que trop la force de cét article, soit pour le bien, soit pour le mal. Et ie ne doute point que l'affaire ne se fust plustost aduancée, si tous les François qui ont monté en ce país iusques icy, eussent esté d'une vie irreprochable. Au moins est-il assuré que les Barbares ne nous eussent pas si souuent arresté, leur proposant les Commandemens de Dieu, & représenté le contraire de ce que nous enseignons dans les actions & les œuvres de quelques personnes. Mais Dieu disposant les affaires au poinct que nous les voyons, semble auoir inspiré à Messieurs de la Compagnie de la Nouvelle France de si bonnes pensées & resolutions là dessus, & Monsieur le Cheualier de Montmagny nostre Gouverneur y apporte vn si bon ordre, que nous esperons que cette pierre d'achoppement ne se trouuera plus en nostre chemin. Et en effect ceux qui sont icy de present, non seulement meinent vne vie irreprochable, mais en outre vivent & se comportent de la sorte, que nous auons tout suiet de croire que Dieu en leur consideration,

34 *Relation de la Nouvelle France,*
a donné vne particuliere benediction a cét
ouurage, auquel ils s'estudient selon leur
pouuoir & industrie, de prendre vne bon-
ne part.

Je mets au rang des causes de l'aduance-
ment de ce mesme ouurage, les discours &
comportemens de Ioseph Chihgatenhga,
ce bon Neophyte, duquel nous auons des-
ia plusieurs fois parlé, qui semble auoir
esté ce leuain de l'Euangile, qui a faict le-
uer toute la masse de cette nouuelle Eglise
des Hurons, non seulement en ce bourg,
mais encore par tout ailleurs où nous
auons trauaillé à faire des Chrestiens,
soit en celuy de Teanaustayé où nous
auons vne Residence, soit aux Missions;
s'estant trouué par tout aux meilleures oc-
casions, pour faire profession publique, &
rendre cōpte de sa foy & de sa conuersion.
En quoy il s'est comporté par tout avec
vne satisfaction pleine & entiere de ses
compatriotes, qui ne se lassent iamais de
l'entendre. Vous vous rebutez, mes Freres,
(leur dit-il quelquefois) sur ce que les af-
faires de vostre salut que vous proposent
les François, sont choses nouuelles, &
leurs propres coustumes qui renuersent les
nostres. Vous leur dites, que chaque païs

a ses façons de faire: que comme vous ne les pressez pas de prendre les nostres, aussi vous estonnez-vous de ce qu'ils nous present de prendre en cela les leur, & de recognoistre avec eux le mesme Createur du Ciel & de la Terre, & le Seigneur vniuersel de toutes choses. Je vous demande, quand au commencement vous veistes de leurs haches & chaudieres, apres auoir recognu qu'elles estoient incomparablement meilleures & plus commodes que nos haches de pierre, & que nos vaisseaux, de bois & de terre, auez vous pour cela reietté leurs haches & chaudieres, parce que c'estoit chose nouuelle à vostre pais, & la coustume de France de s'en seruir, & non pas la vostre. Que s'ils nous present de croire ce qu'ils croyoient, & de viure conformement à ceste creance, nous leur en auons beaucoup d'obligation: car en effet si ce qu'ils disent est vray, comme il est, nous sommes les plus miserables gens du monde, si nous ne faisons ce qu'ils nous disent.

Je n'aurois iamais faict, si ie me voulois estendre plus au long sur tous les discours, ou plustost sur toutes les faillies de l'esprit de Dieu, qui semble parler souuent par la

d iij

56 *Relation de la Nouvelle France,*
bouche de ce bon Neophyte. Je dis saillies
de l'esprit de Dieu, car nous ne sçavons
que penser autre chose, le voyant quel-
quefois se mettre à benir Dieu, & le louer
rout en la mesme façon & maniere, que
furent autrefois les enfans dâs la fournaise,
sans que iamais il ait eu cognoissance de ce
que la sainte Escriture nous en apprend.

Je ne me trouuerois pas moins empes-
ché, si i'auois entrepris de declarer tous
les actes de vertu remarquables, & tous
les bonsexemples qu'il a continué de faire
paroistre depuis le temps de la derniere
Relation, soit en santé, soit en maladie,
soit dans la prosperité, soit dans l'aduer-
sité.

Quand il fut question d'aller querir
ces pauvres estrangers dont nous auons
parlé cy-dessus, il ne se contenta pas d'al-
ler à my chemin comme plusieurs autres;
mais il fit le voyage entier, & prist tant de
peine & de soin à les assister, par des mo-
tifs veritalement Chrestiens, qu'estant
icy de retour, il en tomba malade d'une
fièvre qui luy dura 40 iours, pendant les-
quels on le tint par plusieurs fois pour de-
sesperé. Il pleût toutefois à Dieu donner
benediction aux remedes & aux charitez

dont nous l'assistâmes, en sorte qu'au bout des 40 iours il se trouua entierement hors de danger. Au plus fort de son mal, estant surpris de resuerie, ses discours & extrauagance n'estoient que des choses de Dieu & de la Foy: il se leuoit quelquesfois tout nud, & se tenant aupres du feu: Qu'ils viennent, qu'ils viennent, disoit-il, qu'ils me bruslent, & qu'ils voyent si c'est tout de bon que ie croy, où si c'est seulement du bout des levres.

Depuis ce temps, ceste bonne Ame nous a semblé de plus en plus se remplir du S. Esprit, & entrer dans le sentier des Saints, dont il a donné plusieurs autres preuues, tant aux attaques contre la chasteté, & la Religion, qu'aux exercices de charité & de misericorde.

Ie ne sçay à quoy ie dois attribuer, ce qui luy arriua l'Esté passé, lors qu'estant à la pesche, il pleut par tout le pais, & spécialement tout à l'entour du lieu où il estoit, ce qui causa vn grand degast de poisson, & cependant il ne plût iamais à l'endroit où il se trouua avec ceux de sa cōpagnie, & fit sa pesche fort heureusement. Vne chose est asseurée, qu'il n'obmit iamais en tout ce temps de prier,

58 *Relation de la Nouvelle France,*
& faire prier Dieu matin & soir tous ceux
qui estoient avec luy : Outre que tous les
iours il se retiroit seul dans le bois , pour
vacquer avec moins de diuertissement ; &
plus long-temps à l'oraison.

En fin , il me semble que ce soit ce bon
grain de l'Evangile , & du meilleur , qui
rend non seulement 60. mais 100. puis
qu'à la S. Ioseph de l'an passé, n'y ayât que
luy en sa famille de baptisez , faisants pro-
fession du Christianisme ; vn an apres au
mesme iour , il y en auoit près de cent
dans le païs , faisants la mesme profession,
à la conuersion desquels il n'auoit pas peu
contribué.

Je ne m'estendray point dauantage en
ce Chapitre, ny aux suiuaunts , sur plusieurs
autres particularitez des affaires qui se sont
passées , nommément sur les Baptesmes,
tant des enfans que des adultes malades ;
tant pour éuiter la longueur , que pour ne
donner de l'ennuy à ceux qui pourront
ietter les yeux sur ce Narré. Car quoy
qu'en plusieurs il y ait beaucoup de choses
considerables, & qui sont ouurages excel-
lens de la bonté, iustice & Prouidence de
Dieu sur ses Creatures, il en est toutefois
de ces affaires , comme des ouurages de

peinture ou de sculpture , desquels si les traits sont subtils & delicats , ils ne se peuvent voir de loin avec contentement , pour excellēs qu'ils puissent estre , & demandent des personnes qui ne soiēt point esloignees pour les voir de près , & en concevoir le merite. Ces cas donc seront reseruez à l'entretien des saintes Ames au seiour bienheureux de l'Eternité. Qui cependant nous ayderont encōre , s'il leur plaist , à remercier la diuine Maiesté , aussi bien des faueurs particulieres & occultes , que des esclatantes & generales.

I'aurois tous les torts du monde si ie fermois ce Chapitre , deuant que d'adiouster vne autre cause de l'aduancement de cēt ouurage. Ce sont les saintes prieres & deuotions de tant de bonnes Ames qui sont en France , & qui prennent vne si grande part , & vn si grand interest à toutes ces affaires.

Ie me suis quelquefois estonné de l'ordre quetenoit autrefois ce grand Apostre des Indes S. François Xauier , inuitant & coniurant la diuine Maiesté de l'assister à l'entreprise de la conuersion des infidelles des contrées où il estoit , en vne sienne Oraison qu'il disoit tous les iours à ce suiet,

60 *Relation de la Nouvelle France,*
& qui se trouue dans sa vie, il y met en premier lieu les prieres des saintes Ames, comme les plus puissants moyens qu'il eust de flechir Dieu, & le porter à faire misericorde à ces pauvres Errans.

Mais l'experience me fait sortir de l'estonnement, car considerant dans la recolte de ceste année, ce qu'il plaist à Dieu nous faire esperer à l'aduenir de nos travaux en ces contrées, & cependant le peu de proportion de nos forces avec tels ouvrages, ie me sens forcé de recognoistre que comme dans le Ciel, qui roule dessus nos testes, il y a des Estoilles & des constellations si puissantes, que la premiere & principale vertu productiue de certaines richesses de la terre leur est attribuée; ce qui se fait ordinairement par les Philosophes, lors qu'ils ne rencontrent icy bas aucune cause proportionnée à l'effect: Que pareillement dans le Ciel de l'Eglise, il y a des Estoilles & des constellations mystiques si puissantes à influer sur les affaires que nous auons entre les mains, que la premiere & principale vertu productiue des biens que nous pouuons faire icy, leur doit estre attribuée, puis qu'en effect nous n'y voyons point icy bas d'autres causes pro-

portionnées à ses effects.

Je pretens par cecy en faire vne reconnoissance , & vn remerciement general, duquel chaque sainte Ame & communauté prendra s'il luy plaist la part qu'elle y pretend , & qui luy est deuë , si elle n'ayme mieux quittant ses droits, attendre de Dieu sa recompense.

CHAPITRE V.

De la Residence de S. Ioseph au bourg de Teanaustay; De ce qui s'y est passé de plus remarquable, & principalement de la Naissance & establissement de la nouvelle Eglise de ce bourg.

LA resolution estant prise de quitter la demeure d'Ihonatiria, à faute d'habitans , la pluspart ayant esté emportez ou dissipez par la maladie , comme a esté dit cy-dessus , & plus amplement encore en la precedente Relation : on ne fut pas long-temps à aduiser de quel costé il seroit à propos de tirer. Le bourg de Teanaustayaé estant le plus considerable de tout le

62 *Relation de la Nouvelle France,*
païs, & qui par consequent estant vne fois
gagné à Dieu, donneroit vn grand branle
à la conuersion de tout le reste.

Mais quelle apparence d'entamer ceste
affaire, & moins encore d'en venir à bout;
ce bourg ayant esté vn peu auparauant vne
des principales boutiques, où s'estoient
forgées des calomnies les plus noires, & les
desseins les plus pernicieux contre nous.
Iusques-là que les Capitaines auoient pu-
bliquement exhorté la ieunesse à nous ve-
nir massacrer à ce bourg-icy où nous estiõs
d'Ossofane. Toutefois celuy à qui rien n'est
impossible, a donné plus de facilité à l'vn
& à l'autre que nous n'eussions iamais osé
espérer.

Appuyé donc sur Dieu seul, le P. Iean de
Brebeuf se transporte à ce Bourg, parle aux
particulieres, puis au Cõseil, & faiët si bien,
qu'il gagne les vns & les autres; de sorte
qu'en peu de temps ils arrestèrent de nous
receuoir dans leur bourg, & de nous y don-
ner vne cabane. Ce qui fut executé, la pre-
miere Messe y fut dite le 25. de Iuin, au grand
contentement de nos Peres, qui auoient de
la peine de croire ce qu'ils voyoient; tant vn
peu auparauant, ce bourg nous auoit eu en
abomination.

Il est vray que ceste cabane est si pauvre & si chetive , que si le Sauueur du monde n'eût autrefois pris luy-mesme dans la necessité, le logement de l'estable de Bethleë, nous aurions de la peine de luy donner tous les iours vne espee de nouuelle naissance en celieu , qui n'est couuert que de meschantes escorces , par où le vent entre de tous costez. Mais la necessité & l'impuissance de mieux , nous excuse facilement enuers la diuine Maiesté. Voila la premiere année accomplie depuis l'establissement de ceste Residence : voicy les fruiëts qu'elle a porté.

Enfants baptisez en danger de mort , au nombre de 49. dont dix-huict s'en sont enuolés au Ciel. Des autres qui sont réchapez , ie ne sçay si plusieurs n'en ont point l'obligation au saint Baptisme.

Adultes baptisez dans la maladie , apres auoir esté instruits au nombre de quarante-quatre, dont vingt-six ont pris , comme il est à esperer , le mesme chemin du Ciel. De ceux qui sont racheptez , quelques-vns ont fait profession d'en auoir l'obligation au saint baptisme; mais tous ceux qui luy ont ceste obligation, n'en ont pas, à nostre grâd regret, tel ressentimēt qu'ils deueroiēt.

Adultes Cathecumenes baptisez en plaine santé avec leurs enfans, au nombre de vingt-huict.

Venons aux particularitez les plus remarquables de ces baptêmes.

Le premier baptisé dans ce bourg ayant esté vn pauvre malheureux Hiroquois, prisonnier de guerre, qu'on menoit à vn autre bourg voisin, pour le donner en recompense, aux parents de ce braue Tarazane, qui fut pris ces années passées par les ennemis, comme il a esté remarqué dans les précédentes Relations. Je ne scay si ie ne dois point vn peu arrester à considerer & admirer l'adorable Prouidence de Dieu, sur ce pauvre mal heureux, & sur ses semblables, au nombre de 12. ou 13. baptisez par les Peres de ceste Residence, mais j'ayme mieux laisser ceste reflexion à ceux qui ietteront les yeux sur ce Narré, & m'arrester seulement à remarquer quelques circonstances de ces rencôtres qui les rendent plus considerables.

De long-temps les Hurons n'ont eu plus de bon-heur & dauantage sur leurs ennemis, que l'année derniere. Estants allez à la guerre avec quelques Algonquains leurs voisins, ils prirent pour vn
coup,

coup , de leurs ennemis environ quatre-vingts , qu'ils amenerent en vie dans le païs. Outre cét aduantage le plus considerable de tous , ils en ont eu d'autres de moindre importance , qui en tout leur ont donné plus de cent prisonniers.

Tous ceux qui ont esté destineez pour les Bourgs où nous auons des residences, ou pour les voisins; ont esté, graces à Dieu, instruits & baptisez ; & presque pas vn sans des rencontres si particulieres, qu'il y a suiet de croire, qu'il y auoit en leur fait quelque conduite speciale de la diuine Prouidence & de leur predestination. En plusieurs on n'a eu que le temps precisément qu'il falloit pour leur instruction & baptisme : d'autres apres estre baptisez, se sont trouuez si consolez , qu'ils ne se pouuoient tenir de mettre en chanson ce suiet de leur consolation, qu'au moins dorefnauant ils estoient asseurez d'aller au Ciel. D'autres ont refusé genereusement de contrefaire des actions sales & impudiques, à quoy on les vouloit porter : D'autres en suite ont fait paroistre tant de constance dans leurs tourmens, que nos Barbares prirent resolution de ne plus souffrir qu'on baptisast ces pauures infortunez, re-

66 *Relation de la Nouvelle France,*
putans à mal-heur pour leur païs, quand
ceux qu'ils tourmentent ne crient point
ou fort peu.

En effet, cela nous a donné depuis tant
de peine, qu'il n'y en a eu pas vn pour le-
quel baptiser il n'ait fallu donner des batail-
les contre ceux qui en sont les Maistres &
les Gardiens. Et quelquefois a esté neces-
saire de redimer ceste violence de quelque
present.

Entre ceux qui ont fait paroistre plus de
constance & plus de cognoissance de leur
bon-heur, a esté vn nommé Ononelgaia,
& en son baptisme Pierre, qui fut vn des
prisonniers de cete principale défaite,
dont nous venons de parler, Capitaine
des Oneischronons nation d'Hiroquois.
Celuy-cy étant attaché à vn pieu sur vn
théatre, non guiere loin d'un sien compa-
gnon attaché à vn autre, où nos barbares
les tourmentoient à l'enuy les vns des au-
tres, par l'application des flammes, des ti-
sons, & des fers ardents, avec des façons
cruelles au delà de tout ce qui s'en peut es-
crire, & de toute l'imagination de ceux
qui ne l'ont point veu. Pierre, dis-je,
voyant ce sien compagnon perdre patien-
ce dans ces tourmens, le consoloit & l'en-

courageoit par la representation du bonheur qu'ils auoient rencontré dans leur mal-heur, & de celuy qui leur estoit préparé apres cette vie. En fin le voyant mort, ah, dit il, mon pauvre camarade, as-tu demandé pardon à Dieu deuant que de mourir ? craignant que ce qu'il auoit tesmoigné de douleur, ne fut quelque peché considerable.

Ce braue courage qui meritoit vne meilleure fortune, ne fut iamais plus tourmenté par nos barbares que depuis la mort de ce sien compagnon. Car celuy-cy estant mort plustost qu'ils ne s'attendoient, ils deschargerent tous ensemble le reste de leur fureur sur celuy qui restoit. La premiere chose donc qu'en suite ils luy firent, fust qu'un d'eux lui cerna avec vn cousteau la peau de la teste, laquelle il escorcha, pour emporter la chevelure, & la garder selon leur coustume fort precieusement.

Après vn tel traictement, à peine croyoit-on qu'il restast en vn corps si usé de tourmens aucun sentiment de la vie: mais voila qu'il se leue subitement, & ne voyant sur l'eschaffaut que le cadaure de son cher compagnon, il arme ses mains qui

68 *Relation de la Nouvelle France,*
estoit toutes en lambeaux , d'un tison , pour ne pas mourir en captif , & defendre ce peu de liberté qu'il auoit recourée vn peu auparauant la mort. La rage & les cris de ses ennemis redoublent à ce spectacle , ils accourent à luy les fers tous rouges à la main. Son courage luy donne des forces , il se met en deffences , il darde ses tisons sur ceux qui l'approchèt plus pres , il abat les eschelles pour leur rompre chemin , & se sert des feux & des flammes dont il venoit d'esprouer la rigueur , pour repousser fortement leur assault. Le sang qui rejalloit de sa teste sur tout son corps eust fendu de pitié vn cœur qui eust eu quelque reste d'humanité : mais la fureur de nos barbares y trouuoit son contentement. Les vns luy iettent des charbons & des cendres ardentes , les autres de dessous l'eschafaut trouuent passage à leurs tisons. Il voit de toutes parts quasi autant de bourreaux que de spectateurs , lors qu'il éuite vn feu , il en rencontre vn autre , & ne fait aucune démarche qu'il ne tombe dans le mal-heur qu'il fuit.

En se defendant vn long temps de la sorte , vn faux pas le fait tomber en arriere

par terre. Ses ennemis en mesme temps fondent sur luy, le bruslent derechef, puis le iettent au feu. Ce courage inuincible se releue du milieu des flammes, tout reue-
stu de cendres qui s'estoient imbuës dans son sang. Deux tisonstous flambans en ses mains, il setourne vers le gros de ses ennemis, pour leur donner la peur encore vne fois auant que de mourir. Pas vn n'est si hardy que de l'attendre, il se fait place & marche vers le Bourg, comme pour y mettre le feu.

Il auance enuiron cent pas, qu'on luy iette vn baston qui le renuerse à terre; ruant qu'il se releue, on est sur luy, ils luy coupent les pieds & les mains, & ayants pris le reste de ce corps tronçonné, ils le tournent de tous costez sur neuf diuers braziers, qu'il estouffa quasi tous de son sang. En fin ils le fourrent sous vn tronc d'arbre tout en feu, renuersé par terre; afin qu'en mesme temps il n'y eut partie de son corps qui ne fust cruellement bruslée. Ce fut alors que la nature, deuant que ceder à la cruauté des supplices, fit vn dernier effort que iamais on n'eust attendu. Car n'ayant ny pieds ny mains, il se roula dedans les flammes, & s'en estant mis hors, marcha

70 *Relation de la Nouvelle France,*
plus de dix pas sur les coudes & sur les genoux du costé de ses ennemis, qui s'enfuirent de luy, redoutans les approches d'un homme auquel rien ne restoit que le courage, qu'ils ne pouoient pas luy raur, si non luy arrachant la vie.

Ce qu'ils firent en fin, vn d'eux luy couppant la teste avec vn cousteau : coup heureux qui luy donne la liberté, car nous auons suiet de croire que ce braue courage iouït maintenant dans le Ciel de la liberté des enfans de Dieu, puisque mesme ses ennemis crioyent tout haut qu'il y auoit plus que del'humain là dedans, & que sans doute le baptisme luy auoit donné ses forces & ce courage, qui surpassoit tout ce que iamais ils auoient veu.

Quelques Sauvages ont rapporté avec admiration, & quelque espee de conuiction des veritez que nous leurs preschōs, qu'un peu deuant qu'il receut le dernier coup qui luy apporta la mort, il leua les yeux au Ciel, & s'escria avec ioye; Allons donc, allons, comme s'il eust respondu a vne voix qui l'iuaitoit.

Certes il semble qu'il ne s'agissoit d'autre voyage que de celuy du Ciel, ou sans distinction le captif s'il le veut a autant de

droict & d'accez que celuy qui est en liberté. On apprit des autres prisonniers ses compagnons de fortune & de misere ce qui suit.

Quelques Auanturiers de la bande de nos Hurons & Algonquains , ayans en ceste principale défaite deuancé leur troupe qui estoit de trois cens hommes ; pour decouvrir s'il n'y auoit point d'ennemis en embuscade , s'en trouuerent plustost plus proches qu'ils pensoient. Ils ne furent pas toutesfois tellement surpris , que la plupart ne peût se retirer vers le gros : vn d'eux seulement fut atrappé par les ennemis , qui se voyans descouuerts prirent resolutiõ de s'en retourner avec ceste seule conqueste , quoy qu'ils fussent au nombre de cent. Mais le captif les voyant en ceste disposition , leur donna à entendre que ceux qui venoient apres eux n'estoient pas en tel nombre qu'ils n'en peussent facilement venir à bout : Il leur dit cela d'vn tel air , & d'vn tel accent , qu'ils le creurent , & se resolurent de faire vn fort , & là d'attendre tout le gros de leurs ennemis. Mais ils furent bien estonnez à l'approche de nos Barbares d'en voir la multitude , & de se voir entournez de la sorte , qu'à peine

72 *Relation de la Nouvelle France*,
auoient-ils le moyen de fuir. Toutefois y
ayant encore quelque endroit par où ils
pouuoient eschapper, apres auoir déchar-
gé leur colere sur leur captif, qu'ils mirent
aussi-tost en pieces, on mit en deliberation
ce qu'il y auoit à faire.

La pluspart opinant à la fuite, Ononksaia
ou Pierre, celuy dont nous venons de par-
ler, iettant les yeux au Ciel, & voyant le So-
leil sans aucun nuage. Ceste resolution, dit-
il, seroit passable, si le Ciel estoit couuert &
si le Soleil ne deuoit estre spectateur de ce-
ste lascheté; mais cela n'estant pas, il faut
combattre tant que nous pourrons, & puis
vn chacun aduisera à ce qu'il a à faire, ainsi
dit, ainsi executé. Mais nos Hurons & Al-
gonquains iouïrent si bien leur personna-
ge, que n'en ayant tué sur la place que 17.
ou 18. ils prirent tout le reste en vie, à la re-
serue de quatre ou cinq qui leur eschape-
rent. Et les ayans tous amenez au pais, ils fu-
rent distribuez partous les bourgs, où on
leur fit souffrir ce qu'il n'est pas possible
d'expliquer.

Je ne puis toutefois obmettre icy vne
circonstance des cruantez quel'on exerça
sur celuy qui le premier depuis mon arri-
uée en ce pais, y fust amené prisonnier de

guerre, ce fut le premier iour de Decembre, ce qui donna occasion de le nommer en son Baptisme François, en l'honneur de saint François Xavier, dont le lendemain nous faisons la feste. Ce pauvre mal-heureux la nuit de ses tourmens (car il est de l'essence d'y employer au moins toute vne nuit) fut entr'autres entrepris par vn de nos Barbares: qui luy ayant commandé de mettre les mains contre terre, les luy perça l'vne apres l'autre avec vn fer ardent, & ne cessa de les hausser & baisser, & les tirailler le long du fer, iusques à ce que le feu en fut esteint. On a dit qu'vne autre luy en fit autant aux pieds: il ne falloit plus que luy ouurir le costé, pour estre en quelque maniere semblable à celuy dont le sang luy auoit esté vn peu auparauant appliqué par le S. Baptisme, & cela pareillement ne luy manqua pas: car vn peu deuant que d'expirer, on le luy ouurit pour luy arracher le cœur. Si ceste espece de tourment n'a seruy à ce pauvre infortuné pour se consoler de se voir en ceste façon semblable à celuy qu'il ne connoissoit que pour ne le pas ignorer, & autant seulement qu'il estoit necessaire pour l'experimenter son Sauueur; au moins a-il

seruy à d'autres qui ont resenty des touches particulieres de l'obligatiō que nous auions à ce bon Seigneur & Maistre, qui par les playes qu'il a voulu receuoir pour nous, nous a deliuré des feux & des tourmens, dont ceux que nos Barbares exercent enuers leurs captifs ne sont qu'ombres & figures passageres.

Nos Barbares qui scauent le desplaisir que nous auons de ces cruautez, & en particulier de leur inhumanité à manger les corps de ces pauvres victimes apres leur mort, trouuerent le moyen pour nous faire despit, de ietter par vne cabane vne des mains de ce pauvre defunct, comme nous donnant nostre part du festin. Nous fusmes surpris voyans à nos pieds ceste main percée; & considerans que c'estoit la main d'un Chrestien, nous l'enterrasmes en nostre Chapelle, & priasmes Dieu pour le repos de son ame.

On feroit vn Roman des aduentures de ce pauvre captif. Il estoit Agnierhonon de Nation, qui fait vne des cinq des Hiroquois, la plus esloignée de nos Hurons, il partit de son païs pour venir aux nations des Hiroquois les plus proches de nous, avec dessein d'y traiter quelque pource-

laine qu'il portoit, pour des castors. Mais estant arrivé, au lieu de faire ce pourquoy il estoit venu, il se met à iouer, & perd tout ce qu'il avoit apporté. Honteux de retourner au pais sans autre effect, il prend resolution de s'arrester là quelque temps, & voyant vn peu apres que quelques-vns du lieu où il estoit s'en venoient à la guerre en nos quartiers, il se met de la partie, mais leurs desseins ayants mal réussi, il fut du nombre des captifs, & amené en ce bourg, où il fit la fin que nous venons de représenter.

Mais laissons ces pauvres captifs, & venons à d'autres sortes de baptesme & de conuersion.

Ce n'est pas l'ordre de la Nature de dōner les fruiets de la terre sinon apres vne année es coulée des influences des astres, du Ciel, & du travail des hommes: mais la grace ne s'attache pas tousiours aux loix de la Nature, & il a pleû à Dieu en dispenser en l'establissement de la nouvelle Eglise de ce bourg. Ou apres six mois de travail on a veu ce qu'en plusieurs années on n'a peu faire ailleurs. En suite donc des instructions generales & particulieres qui ont esté données aux habitans de ce bourg

76 *Relation de la Nouvelle France,*
par les Peres de ceste Residence, selon
l'ordre declaré au chap. 2. le premier des
Cathecumenes qui se declare pour con-
uincu & resolu de suiure la Vocation & se-
monce du S. Esprit, qui en suite demanda
instamment le Baptême, fut vn bon vicil-
lard d'environ 70 ans nommé Aochiati.

On ne fust pas long temps à reconnoi-
stre qu'il parloit tout de bon, & qu'en ef-
fect il croyoit, & vouloit tout ce qui estoit
necessaire pour receuoir le Baptême. Et
quoy qu'en suite on eust suiet d'esperer
qu'il ne feroit pas moins qu'il promettoit,
toutefois sa qualité de Sauvage nous em-
peschoit de nous haster en ceste affaire, &
de luy donner contentement aussi-tost
qu'il le desiroit. Mais le temps le pressant
d'aller à vne traite, où il deuoit passer trois
mois de temps avec beaucoup de dangers
de sa vie, il redoubla ses instances, priant
qu'on donna ceste consolation à son ame,
qui ne pouuoit autrement, disoit-il, estre
en repos; puis qu'apres la mort, ceux qui
n'estoient point baptisez alloient en des
feux qui ne s'esteignent iamais.

Nonobstant toutes ces instances, on iu-
gea à propos de le differer, & se contenta-
on de le bien instruire & informer de l'acte

de contrition : & ce pour bonnes raisons & considerations. Mais il semble que la diuine Prouidence nous voulut faire voir clairement qu'elle l'auoit destiné de toute Eternité pour estre la premiere pierre fondamentale de la nouuelle Eglise de ce bourg. Car deux iours apres son depart , le voila surpris d'un si mauuais temps , & aduertiy par tant de personnes des embusches des ennemis , qu'il fut contraint de rebrousser chemin , & de reuenir icy attendre vn temps plus fauorable, & de meilleures nouuelles.

Au mesme temps de son retour , se trouua icy ce braue Chrestien de la Residence de la Conception Ioseph Chihgatenhga, les discours & la conuersation duquel l'ayant eschaufé plus que iamais , il redoubla ses instances du baptisme , qui en fin fut accordé le 20. de Decembre , & fut nommé Mathias , comme celuy sur lequel estoit tombé le sort de premier Chrestien de ce bourg , comme de Cathecumene baptisé en pleine santé , & avec solemnité. Et il se trouua que sa cabane portoit le nom de ce saint Apostre , conformément à la deuotion qu'on a eüe de mettre chaque cabane de Sauvages, des bourgs où nous tra-

78 *Relation de la Nouvelle France,*
uaillons, tous le patronage & la protection
de quelque sainct ou saincte du Paradis.

Ce qui nous fit plus facilement condescendre à son delir, fut qu'il estoit tous les iours sur le poinct de se mettre en chemin, & que quatre ou cinq iours auparavant il auoit protesté à quelques Chefs du bourg qu'il estoit prest de quitter toutes les dantes & superstitions diaboliques du pais, mais particulièrement la dante des Nuds, dont il estoit le chef & le Maître. Ce bon homme apres auoir respondu & satisfait à toutes les abrenonciations qui se trouuent dans les ceremonies du Baptesme, pendant la Messe, repassant dans son esprit s'il y auoit plus rien de mal à quoy il eust de l'attache, ne luy estant rien venu dont il douta, que le Petun; il demanda aussi-tost si le petun estoit defendu, & donna à entendre qu'il estoit tout prest de le quitter, & abandonner en cas qu'il ne fust pas permis de s'en seruir. Ceste resolution peut passer pour des actes des plus heroïques que puisse faire vn Sauvage, qui se passeroit ce semble aussi-tost de viure que de petuner.

Avec ce bon homme qui estoit veuf, furent baptisées deux siennes petites filles, lesquelles il cherissoit vniquement, ce

qui n'estoit pas vne petite marque de la foy, & de son affection au Christianisme, veu l'imagination commune de tout le païs que le Baptelme fait mourir toute sorte de personnes, mais particulièrement les enfans.

L'exemple de celuy - cy fut suiuy quelques iours apres d'onze autres personnes, choisies du nombre des Cathecumenes, qu'on auoit soigneusement instruits, & qui ne cessoient de demander le baptelme. Ces douze ou quinze donc se trouuâs tous ensemble à la Messe le premier iour de l'année 1639. c'est le iour que nous remarquerons & recognoistrons à iamais pour celuy de la naissance de cette Nou. Eglise, comme celuy de la Conception de la Vierge, pour la naissance de celle de la Residence de la Conception.

Depuis ce temps on a continué de fois à autre de baptiser ceux & celles qui se sont trouuez disposez & capables de ce bien; de sorte que le nombre des persônes baptizées en ce Bourg, faisans profession du Christianisme, monte de present à pres de trente, comme nous auons dit cy-dessus.

Je ne m'estendray point icy sur le contentement & la satisfaction que nous don-

80 *Relation de la Nouvelle France,*
ne ce petit troupeau , & particulièrement
quelques-uns : non plus que sur les causes
qui ont précédé & concouru à ce saint Ou-
rage , le tout estant semblable , & presque
en rien différent de ce que nous auons de-
duit au Chapitre précédent , parlant de la
naissance de la Nou. Eglise de la Residence
de la Conception. Quand il n'y auroit que
la resolution , & la confiance de ces Neo-
phytes , à faire profession du Christia-
nisme au beau milieu de leur Nation , l'une
des plus peruerfes de la terre ; où ils se
trouuent dans les attaques continuelles des
railleries & calomnies , des craintes &
frayeurs, des mal-heurs dont on les menace
de tous costez ; en suite de ce qu'ils se
sont faits Chrestiens: Quand, dis-je, il n'y
auroit que ce point, nous aurions tout su-
iet d'estre contents. Et cét article semble si
considerable, qu'il merite qu'on en parle
vn peu plus au long , mais cela se fera plus
commodement en l'un des Chapitres sui-
uants ; où nous traicterons des trauerses
& difficultez qui se sont trouuées , & se
rencontrét encore tous les iours en la nais-
sance & establissement de ces nouvelles
Eglises. Disons auparauant quelque chose
des Missions.

CHAP. VI.

*De ce qui s'est passé de plus remarquable
dans les Missions.*

DE dix Peres de nostre Compagnie qu'il y a icy, s'en estant trouué sept sur la fin de l'année passée (non sans vne grace & faueur tres speciale de Dieu) qui entendoient la langue de nos Sauvages, & la parloient suffisamment pour conuerser avec fruit parmy eux, & leur donner les instructions necessaires pour leur salut: Et trois autres derniers venus, qui deux ou trois mois apres leur arriuée, par le secours & assistance des autres, qui ont heureusement reüssi à reduire cette langue & preceptes, & en faciliter l'entrée à ceux qui viennent de nouveau, se trouuoient capables de tenir vne petite escole, pour enseigner les enfans à prier Dieu: On considera que trois des anciens, avec vn nouveau, pouuans en quelque façon suffire au travail de la vigne de chaque Residence, on pourroit se seruir d'un ancien avec vn

82 *Relation de la Nouvelle France,*
nouveau, pour aller battre la campagne, &
seruir aux desseins de la diuine Prouiden-
ce sur quelque predestiné.

Le Bourg sur lequel d'abord on ietta les
yeux, fut celui de Scanonaenrat, tant par-
ce que c'est vn des plus considerables du
pays, faisant luy seul vne nation entiere,
des quatre qui composent les Hurons, ain-
si que nous auons declaré au Chapitre pre-
mier, que parce qu'il n'est esloigné que de
cinq quarts de lieues de la Residence de
sainct Ioseph. D où s'ensuiuoit, que si Dieu
donnoit benediction au travail qu'on auoit
à prendre en ce bourg, les Peres de cette
Residence pourroient facilement entrete-
nir & arrouser le champ, qui auroit esté en-
semencé.

Si nous n'eussions eu esgard à la puissan-
ce du Maistre que nous seruons, & dont
nous portons la parole, sans doute il y
auoit dequoy s'effrayer, & se rebuter de
ce dessein, les barbares de ce bourg pas-
sans en commun discours des habitans de
ces contrées pour les Demons du pays.
Maistant s'en faut que cette qualité qu'on
leur donne nous destournast, que plustost
elle nous porta, appuiez vniquement sur le
seul fondement & ressort de telles entre-

en l'année 1638. & 1639. 83

prises, qui eist IESVS-CHRIST, à donner d'ores
resnauant à ce bourg le nom de saint Mi-
chel, en l'honneur des saints Anges ; aus-
quels nous ne desesperions pas que ces
pauvres peuples vn iour seroient plustost
semblables, qu'à ceux dont on leur don-
noit le nom.

Le ne sçay si ce fut de l'inuention & stra-
tagement de l'ennemy commun des hom-
mes, qui n'agreoit pas vne telle resolution ;
que le iour que les deux Peres partirent,
deuant arriuer au giste sur les quatre heu-
res du soir, en cette mesme heure ils s'esga-
rent de la sorte dans les bois, qu'ils n'y ar-
riuerent qu'aux quatre heures du matin du
lendemain, ayans marché douze heures
durant & toute la nuict, chargez pour la
pluspart du temps chacū d'un paquet, dont
en fin ils furent contraincts de se décharger
du pl^r pesāt, & le cacher proche d'un ruis-
seau, pour le pouuoir plus aisément retrou-
uer, quand on seroit en estat de le pouuoir
chercher.

Il auoit neigé vne bonne partie du iour
& si la nuict eut esté telle qu'il sembloit
qu'elle deuoit estre les deux Peres possible
n'en eussēt pas esté quittes à meilleur mar-
ché que quelques-vns de nos Sauvages qui

84 *Relation de la Nouvelle France,*
s'estans pareillemēt, quelque temps apres,
esgarez dans les bois pendant la nuit, fu-
rent trouvez morts le lendemain. La neige
qui estoit tombée, leur fit plus de bien que
de mal; car elle leur seruit à appaiser la
faim, & surtout la soif, qui dans le travail
& le soucy de personnes esgarées ne leur
donnoit pas peu de peine. Et, à leur rap-
port, la neige n'est pas vn si mauuais man-
ger qu'on pourroit penser: ou pour mieux
dire, la necessité est vn maistre cuisi-
nier.

Quoy que s'en soit, ils se trouuerent sains
& saufs à la maison sur les quatre heures du
matin, & leur paquet laissé proche d'vn
ruisseau, où estoit vne bonne partie de la
Chappelle, fut heureusement retrouvé le
mesme iour.

Il pleut à Dieu disposer les affaires de la
sorte, que l'on fit rencontre d'vne cabane
dans le bourg de saint Michel, la plus
commode quise pouuoit rencontrer, pour
ce qu'on y pretendoit. Il n'y auoit qu'vn
seul feu ou famille, qui estoit iustement ce
qu'il falloit pour estre deschargez du soin
du viure: il s'y trouua vn petit retranche-
ment propre à y dresser vne Chappelle,
où l'on dit tous les iours la Messe, tant

qu'on y demeura, qui fut l'espace de trente iours.

De premier abord, on parle à l'assemblée des Capitaines, qui estoient au nombre de dix ou douze, à qui on declare ce qu'on pretendoit : qui estoit de leur donner & à tout le bourg, la cognoissance d'un seul Dieu, & de I E S U S - C H R I S T N. Seigneur & Redempteur. Pourquoy leur donner mieux à entendre les Peres portoient ordinairement un Crucifix pendu au col. Le conseil agree la proposition de ce dessein, avec des formes & des complimens qui surpassent de beaucoup l'imagination ordinaire qu'on a des Sauvages.

Dès le lendemain, l'un des Peres commença, à faute de la clochette, d'aller faire une criée par tout le bourg, selon la coutume du pays pour les assemblées generales : en suite de laquelle on ne manqua pas de voir bien-tost la cabane toute pleine. Il y avoit trop de nouveauté & d'appareil, pour en attendre moins, mais la confusion obligea les iours suivans d'en exclure les enfans, & leur assigner le temps d'après les assemblées pour venir à la petite escole.

Ce concours toutesfois si general ne du-

86 *Relation de la Nouvelle France,*
ra pas long-temps. On voit bien-tost la separation du bon grain d'avec le mauuais, & qui estoient les brebis entendant la voix du Pasteur, & qui ne l'estoient pas. Les premiers continuoient d'y venir, & escoutoient volontiers : les autres apres avoir satisfait à leur curiosité, ne s'y trouuerent plus, ou s'ils y venoient, ce n'estoit que pour y broüiller, & pour y commettre des insolences. C'est ce qui obligea de changer de batterie, & de s'appliquer totalement à la visite des cabanes : ou apres qu'on auoit reconnu plus particulièrement les terres où le grain auroit pris racine, on pourroit faire des assemblées particulieres de ceux qu'on auroit reconnu auoir quelque pieuse affection au Christianisme qu'on leur auoit publié.

L'experience nous a fait voir par tout que c'estoit de la sorte qu'il en falloit vser, au moins avec ces Barbares, parmy lesquels nous viuons. Au commencement qu'on les aborde, il est à propos, voire necessaire, de faire tant de predications publiques que l'on peut, puis dans la continuation s'il arrive du desordre, & de l'insolence, on se contête des visites dans les cabanes, & des susdites assemblées particu-

lières, & seulement de fois à autre renouveler le cry, en la publication de l'Evangile, pour servir au moins à iustifier vn iour la bonté & miséricorde de Dieu sur ces peuples.

On iugea aussi que des assemblées particulières de Capitaines & plus anciens du bourg, pourroient estre de grand profit, Ce que iugeans bien qu'on ne pouuoit pas espérer que par quelque attrait temporel, il fallut se résoudre de ietter chaque fois quelques pains de petun au milieu de l'assemblée, lesquels aussi tost estoient couppez par morceaux, & distribuez par les principaux Capitaines, ou par leur ordre. Ce qui réussit comme on le pretendoit. C'est en ces assemblées où se trouua quelquefois le Chrestien de la Conception Ioseph Chegatenhxa, dans lesquels il fit merueilles de bien parler & expliquer nos mysteres.

Mais il faut aduoüer, que si Dieu ne met fortement la main à tels ourages, il n'y a rien à gagner que des paroles, & des propositions qui s'en vont en fumée. Il s'en est trouué tel dans ces assemblées particulières de Capitaines, qui iettant la peau ou mante bas, venoit tout nud proche des

Peres, presentant sa teste & tout son corps à baptiser, mais c'estoient des sailles qui n'estoient pas de saison, dont le lendemain on ne voyoit ny fruit, ny fleur.

En fin tout bien consideré, l'estenduë d'un mois, qui estoit le temps qu'on s'estoit proposé, s'en allant escouler, on se resolut de prendre ce qui sembloit paroistre de plus assure: & le sort tomba sur quatre chefs de famille, qui furent baptisez solennellement: dont l'un estoit nostre Hoste. Ce qui donna beaucoup de cōsolation aux Peres, & deux autres Capitaines du bourg; dont l'un semble estre plus du nombre de ceux pour lesquels les Anges viendroient du Ciel au defect des hommes, pluostost que Dieu manquant à leur pourvoir des moyens de se sauuer, tant ce bon homme & toute sa famille se sont trouuez raisonnables, & exacts observateurs de la loy de Nature. Leurs femmes toutefois & leurs enfans ne furent point baptisez, la crainte & la frayeur restant encore trop grande dans ce bourg, aussi bien que dans le reste du pays, que le baptisme faisoit mourir, ou rendoit ceux qui le receuoient suiets à mille maux & miseres. En quoy est de plus considerable la resolu-

tion de ces pauvres Neophytes, dont quelques-vns se sont portez au baptesme, aussi bié que plusieurs autres aux autres édroits, avec cette pensée. En deusse-ie mourir.

Ce fut le premier iour de l'an 1639. que ces baptesmes se firent, dont le lendemain qui estoit Dimanche, ces Neophytes s'estant trouvez ensemble pour la premiere fois à la Messe, au nombre de cinq ou six, on pourroit remarquer ce 2. iour de la presente année, pour la premiere de la naissance de ceste Eglise nouvelle, le nombre estât suffisant pour porter le nom d'assemblée ou Congregation. Quelques iours apres on en baptisa quelques autres, & en suite encore d'autres en diuerses occasions & visites qui ont esté faites depuis en ce bourg: de sorte que de present le nombre des Chrestiens qui y monte à vne vingtaine, quelqu'autre personnes, soit enfans ou plus aagées, y ont esté baptisées en extremité de maladie ou misere, comme entr'autres vn pauvre prisonnier Hiroquois, qui y fut amené pendant que les Perés y estoient pour la premiere fois. Ce pauvre mal heureux ayant duré 24 heures apres son baptesme, on aprit qu'en sa derniere & funeste nuit il auoit fait effort, pour

90 *Relation de la Nouvelle France,*
s'estouffer de luy-mesme. Cela obligea de
l'aller trouver, vn peu deuant qu'on exer-
çast sur luy les dernieres cruautéz, & luy
faire recognoistre sa faute, le porter à s'en
accuser, & en demander pardon ; ce
qu'ayant fait, on luy donna l'absolution, &
deux heures apres il bouilloit dans vne
chaudiere. dont ceux de la cabane des Pe-
res furent inuitez de venir prendre leur
part.

Voilà la principale Mission de cette an-
née. C'estoit bien le dessein d'en faire au
moins vne ou deux autres semblables pen-
dant le reste de l'hyuer, qui est le seul temps
qu'on peut iouir des Sauvages : qui en
toute autre saison sont en guerre ou en trait-
te. Mais s'estant trouué plus de peine & de
soin à nourrir & eleuer les enfans spiri-
tuels de ces trois nouvelles Eglises, qu'on
n'auoit eu à leur donner la vie de la grace,
& beaucoup plus d'affaire à l'affermisse-
ment qu'à l'establissement de ces Ouura-
ges, il a fallu vacquer au plus pressé. On
n'a pas laissé de faire quelques courses en
diuers endroits de moins de durée, qui
ont eu de bons effets. En voicy quelques
exemples.

Le 30. de Decembre iour de saint An-

Oré, vn de nos Peres estant allé au Bourg de Tahententaron, que nous auons surnommé de saint Ignace, esloigné d'environ 2 lieuës de celuy de la Residence de saint Ioseph, il y baptiza vn ieune enfant fort malade, & vn vieillard d'environ quatre-vingts ans, qui n'auoit autre maladie que celle de sa vieillesse; mais au reste se trouuoit tout disposé à escouter. Et en suite donna à entendre qu'il croyoit, & estoit tout resolu de faire ce qu'il falloit pour estre sauué. Le Pere sentit de l'inclination à ne point differer plus long-temps à le metre en estat de ce faire, & là-dessus le baptize.

Deux iours apres, iour de feste de S. François Xauier, la nouuelle estant venuë asseurée de l'arriuée d'un prisonnier de guerre, Hiroquois de nation, au susdit bourg, qu'on y auoit amené des dernieres bourgades du païs, pour le donner à quelque parent de ceux qui auoient esté pris autrefois par les Ennemis. Le mesme Pere qui y auoit esté deux iours auparauant, fut député avec vn autre, pour aller promptement à la despoüille de ce pauvre malheureux; & traualler pour leur part au gain de son Ame. Comme ils approchent du

92 *Relation de la Nouvelle France,*
bourg, ils aperçoient vne fosse que l'on
faisoit ; ils demandent pour qui ? on res-
pond que c'est pour vn tel vieillard mort
le jour precedent, & c'estoit iustement ce-
luy qu'on auoit baptisé, qui estoit mort le
lendemain de son Baptême. Ils s'enque-
rent des nouvelles de l'enfant qui fut bapti-
sé en mesme temps ; & ils apprirent qu'il se
portoit mieux. Passant plus auant, ils arri-
uerent à la cabane où estoit ce pauvre pri-
sonnier. C'estoit vn ieune hōme de 22 ans
d'aussi bonne grace, & aussi bien fait qu'on
en puisse rencontrer, qui ne sembloit auoir
rien de barbare, que la misere & la condi-
tion où il estoit. Il portoit deux mains tou-
tes faigneuses des doigts qu'en riant & par
plaisir on luy auoit coupez par auance du
traitement qu'on s'attendoit de luy faire la
nuiet suivante.

Ce pauvre ieune homme, aux premie-
res paroles que luy dirent nos Peres, parut
si abatu de la douleur qu'il souffroit, & de
son mal-heur, que l'on douta si on en pou-
uoit esperer beaucoup de contentement,
on s'aduisa de tirer quelque image de N.
Seigneur. A cette veue l'esprit de ce ieune
homme se resueille ; il escoute ce qu'on
luy dit. Et pour le faire court, il donne tou-

te la satisfaction necessaire pour ce qu'on pretendoit; voire meisme se met à chanter son acte de contrition, tesmoignant beaucoup de contentement & de consolation, il fut dont baptisé.

Mais voicy où parut particulièrement adorable la Prouidence diuine sur ce pauvre infortuné: car les affaires ne s'estant pas trouuées telles qu'il falloit pour le laisser à la disposition de ceux de ce bourg, on prit resolution de le remener d'où il estoit party, pour aduiser de rechef à ce qu'on en feroit. Mais y estant vne fois arriué, il n'en sortit plus, & passa là par les cruautéz ordinaires aux Barbares de ces côtrées: comme s'il n'y pouuoit mourir; qu'auparauant il n'eust esté baptisé, & comme s'il n'y auoit autre affaire pour luy en nos quartiers, que d'y rêcontrer cette heureuse fortune, par laquelle il se trouua en estat d'eschanger son extreme misere en vne felicité Eternelle.

Au commencement du Printemps, les Chrestiens des Bourgs où nous auons des Residences, & qui font les 2. principales Eglises ou assemblées, s'estans dissipez, & allez qui deçà qui delà, les vns en traite, les autres à la pesche, d'autres principale-

94 *Relation de la Nouvelle France,*
ment à la guerre: les ouuriers de l'Evangi-
le se trouuerent avec vn peu de relasche.
Après auoir donc vn peu respiré des tra-
uàux passez, & s'estre rafraichis spirituel-
lemēt, on en a appliqué ce qu'on a peu aux
Missions, & aux visites des bourgs & bour-
gades du païs, avec dessein de ne laisser
pas vne cabane de Sauvages, dans laquelle
on ne se presente, & qu'on n'y parle &
agisse autant qu'il faut, pour seruir aux
desseins de Dieu sur ses Esleus. Pour ce fu-
iet, quatre Peres ont esté destinez, deux
d'vn costé, & deux de l'autre, qui apres
auoir parcouru leur quartier, retournent
sur leurs pas pour arrouser ce qu'ils ont
semé. Leur soin principal est d'auoir l'œil
aux enfans, vieillards & malades, sans
negliger l'instruction des autres. Nous
auons tout suiet de croire que Dieu reçoit
beaucoup de contentement de cēt exerci-
ce: & nos consciences se trouuent en fin
par là en repos, & en assurance, que rien
n'est oublié, de ce qui peut estre fait main-
tenant pour sa gloire & pour son seruice en
ces contrées. Ces Missions depuis Pasques
iusques à l'Ascension, nous ont donné
28 baptisez, dont plusieurs sont allez
au Ciel, comme nous le presumons de la

bonté & misericorde de Dieu. Mais ie n'estime pas moins l'impression & la disposition qu'on a laissé dans les esprits & les cœurs de tous ceux du pays, ce qui en son temps, comme nous espérons, servira aux desseins de la Prouidence diuine, & nous donnera des fruiets lors que nous y penserons le moins.

Entr'autres baptisez par les Peres destinez aux Missions, ont esté onze prisonniers de guerre, de douze qui furent amenez au pays sur la fin du mois de May de cette presente année. Ce ne fut pas sans peine & trauail qu'ils vindrent à bout d'une telle entreprise, pour les difficultez qui se rencontrent aux baptêmes de telles personnes, comme nous auons plus amplement déclaré au chap. 5. mais il faut aduouer qu'il n'y a rien que la charité ne surmonte.

Il semble que Dieu nous voulut confirmer en ce rencontre dans la pensée que l'experience nous auoit desia fait auoir d'autres occasions semblables. Que les baptêmes de telles personnes n'estoient pas sans vne speciale disposition de la bonté & misericorde, sur ces pauures mal heureux, & sans que luy-mesme y mit la main,

Celuy seul des douze qui ne fut pas baptisé, ne fut pas celuy qui y eust moins de vocation & d'attrait. On trouua moins de resistance à l'aborder de la part des Sauvages qui le gardoient, qu'on n'auoit faict aux autres: On eust le moyen de luy rendre plus de tesmoignages de bõne volonté & affection, & cependant il ne fut iamais possible d'obtenir de ce mal-heureux aucun agreement de ce qui luy estoit dit & représenté. On l'attaque par trois diuers iours, & le suit en la part où on le menoit, on ne peust iamais rien gagner sur cet esprit, voire mesme empescha-il pour vn temps qu'un sien compagnon ne se fit baptiser, qui d'ailleurs tesmoignoit autant d'inclination & de pieuse affection à estre instruit, que ce mal heureux en auoit d'auersion: mais vne fois ayant esté trouué separez, on accomplit enuers ce 2. ce dont la compagnie de l'autre l'auoit destourné, l'ayant rencontré en aussi bonne disposition qu'auparauant.


Dés 12. il y en eust deux qui furent destinez pour ce bourg d'où i'escris, & abandonnez à l'ordinaire, par ceux qui en estoient les maistres, aux cruantez ordinaires du pays. Tous deux estoient du nombre

nombre des baptisez: dont l'un particulièrement fit paroistre vne constance dans ses tourmens , au delà non seulement de ce que iamais on n'a veu , mais peut-estre au delà de ce qu'on eust peu s'imaginer si on ne l'eust veu. L'espace des deux premieres heures de la nuit qu'il fut tourmenté de toutes les façons , avec tisons ardens , haches bruslantes , & autres ferremens tout en feu qu'on luy appliquoit par tout , il ne branla ny remua non plus que s'il eust esté de marbre. Il ne le plaignit iamais , ny ne ietta aucun cry , non pas mesme vn souspir qui tesmoignast de la douleur: ce qui mettoit en furie ceux qui le tourmentoient , qui imputent à grand malheur quand ils font rencontre d'une telle constance , ils eurent beau faire , ils se laisserent plustost de le tourmenter , que luy de souffrir ; luy-mesme s'arrestoit & se presentoit à ceux qui plus le vouloient tourmenter : & tandis qu'ils le faisoient ils s'entretenoit aussi froidement avec tous ceux qui le vouloient questionner , de mesme que si c'eust esté vn autre qu'on eust tourmenté : & au default d'entretien il ne cessoit de chanter , & souuent repetoit dans sa chanson Aronhiac Eskenonteta, ie m'en vay donc au Ciel.

Quoy qu'il n'y eust pas vn des nostres presens pour le faire ressouvenir de son bonheur. Lors qu'on l'aborda pour l'instruire la premiere fois, vous eussiez dit qu'on luy eust porté vne nouvelle qu'il y a trente ans qu'il attendoit, & à laquelle de longue main il s'estoit préparé, tant il agreea & conceut tout d'vn coup le poinct de l'affaire. Toutes ces rencontres nous font toucher au doigt les secrets adorables de la predestination de Dieu sur ses Esclens. En fin le matin venu, nos Barbares le firent mourir promptement, voyans que la prolongation de ses tourmens estoit celle de leur confusion, & qu'ils ne perdoient que leur peine sans en retirer ny donner au public aucun plaisir, qui consiste sur tout à entendre crier ces pauvres victimes de leur fureur. Vn entr'autres qui pendant son instruction n'y auoit pareillement donné beaucoup de contentement ayant esté donné à quelques peuples esloignez; ceux-cy par ie ne sçay quelle consideration se resoluënt de luy donner la vie, & de le remener à son pais; mais lors qu'on fut sur le poinct de l'y conduire, comme si son baptisme ne luy eut deu de rien seruir s'il fortoit de ces contrées, il tomba dans vne

maladie, qui luy apportant la mort luy donna la vie, & fust l'accomplissement de sa predestination.

Je ne sçay si ce que nos Sauvages apprehendent de mal-heur du presage de constance de leurs prisonniers leur arriuera: Je prie Dieu qu'il le destourne de dessus leurs testes: mais ie sçay bien qu'ils ont tout suiet d'ailleurs de l'apprehender. Ces 12. prisonniers sont les premices d'une guerre qu'ils ont entrepris de nouveau cette année contre vn Peuple puissant, nommé Senontouerhonons, les plus proches de tous leurs ennemis, avec qui depuis quelques années ils auoient la paix. Ils voyent bien que cela ne leur peut apporter que malheur: mais quelques-uns de leurs ieunes gens ayans recommencé l'année passée à tuer quelqu'un de cette Nation; le resouuenir & le resentiment de ceux de leurs parens, qui autrefois ont esté maltraitez par ces peuples, a fait resoudre tout le païs, à reprendre la guerre contr'eux, & les attaquer plustost qu'à reparer la faute.

no'upfoujor  **S** II
plus d'un mal, & les
plus de mal, & les
plus de mal, & les
plus de mal, & les

C H A P. VII.

De diuerses traueses & difficultez qui se sont rencontrées en la naissance de ces nouuelles Eglises: & de celles qui se presentent encore tous les iours en leur establissement.

C ONSIDERANT de près aussi bien que de loing ce pais des Hurons, & autres peuples voisins, il m'a tousiours semblé vne des principales forteresses, & comme vn donjon des Demons. Et en effect ie ne pense pas qu'il y ait personne qui ayant considere ou veu les difficultez d'y aborder, & d'y iustifier; le souuerain Empire, & le repos avec lequel les Demons y ont dominé depuis tant de siecles, en fasse vn autre iugement.

La resolution des ouuriers de l'Euangelien ces dernieres années, de les venir attaquer en vn tel Fort, & leur donner l'alarme, les auoir irrité iusques au point qu'on a bien veu: particulièrement ces deux dernieres années, qu'ils auoient coniuré leur

ruine. Mais comme ils ne peuvent pas tout ce qu'ils veulent, leurs efforts ont abouti, où depuis le commencement du monde ils sont arriuez & arriueront à iamais; sçauoir à la plus grande gloire de Dieu, & à leur confusion, comme on a peu voir aux Chapitres precedés. Ce n'est pas toutefois l'humeur de ces esprits orgueilleux de se rendre si tost: tant plus leur confusion est grande, tant plus leur rage croist, qui leur fournit tous les iours de nouvelles inuentions de trauerser les affaires de Dieu; sur tout quand ils voyent qu'il s'agist de l'estenduë du Royaume de Iesus Christ, de luy former de nouvelles Espouses; en vn mot d'establir de nouvelles Eglises ou assemblées de Chrestiens, cela allant à la ruine fondamentale de leur Empire, & au renuersement de leurs principales pretentions.

En effect, lors que j'arriuy icy sur la fin du mois d'Aoust, j'y trouuay les esprits des Sauvages en assez grand repos, & comme dans le regret & le repentir de ce qui s'estoit passé, s'estonnans de leur auenglement & peu d'esprit d'auoir de tels ombrages, & de si mauuaises inclinations pour des personnes comme nous,

qui ne leur faisions que du bien. Mais apres le retour des traictes, on n'eust pas plustost redoublé les bateries des Predications & instructions, tant generales que particulieres; & à trauailler tout de bon à l'establissement de l'ouurage que l'on pretendoit, que voila les langues qui se desliant plus que iamais: on renouuelle toutes les plaintes & les cris. Que depuis que nous estions au pais, & que nous y auions semé nostre doctrine, on n'y voyoit plus que mal heur & misere; on n'y voyoit plus de vieillards; que tout le pais s'en alloit en decadence & en ruine; qu'apres auoir fait mourir tous ceux du quartier ou nous nous estions mis d'abord, nous allions par tous les autres bourgs pour faire le mesme dégast; que si on n'arrestoit la cause de tous ces maux, bien-tost on verroit toute leur nation aneantie.

Ces discours ne se tenoient pas seulement dans le particulier & en cachette, mais aussi en public & dans nos cabanes mesmes, & aux assemblées de nos Catechismes. Il s'est trouué quelquefois qu'en mesme temps qu'un Pere alloit par le bourg sonner où faire la crieé pour assembler le monde; au mesme temps quelque

Capitaine mal affectionné sortoit de sa cabane, lqui faisoit vn cry contraire, disant qu'on se donnast bien de garde d'y venir; que nous estions forciers, qu'n'auions autre dessein que de les perdre & ruiner? qu'il falloit plustost songer à se défaire de nous, que de croire & faire ce que nous disions.

Ces mesmes discours se sont faits pendant les Catechismes, ou ces organes du diable interrompoient le Catechiste, pour faire leur Presche, avec des blasphemes qui donnoient bien auant dans le cœur de nos Peres; mais qui pour cela ne leur estoient pas la parole, pour respondre à ces fols, & les traiter comme il falloit; non pas toutefois tant selon leur mérite, qu'avec la patience & la compassion avec laquelle il faut agir avec ces pauvres malheureux.

L'insolence de telles personnes d'autorité, augmente beaucoup la hardiesse des enfans & des personnes du commun, desquelles en suite il n'a pas fallu peu souffrir. On a veu les plotes de neige, les bastons, les troignons de bled, & autres fatras, à faute de pierres, (qu'on ne trouue pas tousiours quand on veut en ce pais) voler sur les testes des Peres, pendant mes-

104 *Relation de la Nouvelle France,*
me les Catechismes : & le long de la journée , par les trous de la cabane qui seruent de fenestre & de cheminée. Pour ne point parler dauantage de plusieurs autres disgraces qui s'ensuiuent tous les iours , viuans parmy vn peuple barbare , contre lequel nous n'auons ny ne pouuons auoir aucune defense.

Quelques vns des plus aduisez entre les Capitaines & anciens, voyans bien que cela est contre les droicts de l'alliance dont ils font profession avec les François , en font bien quelquefois des excuses , & tâchent d'y apporter quelque ordre : mais le tout se fait si froidement , & avec si peu d'autorité , que cela souuent augmēte plus le mal , qu'il ne le guerit.

Toutes ces imaginations de ces pauures Barbares , que nous sommes la ruine & la perte de leur païs , s'augmente autant de fois que quelque mal-heur leur arriue de nouveau, soit maladie, soit famine, laquelle regne maintenant en quelques endroits du païs , particulièrement au bourg de la Residence de la Conception , nous imputans tous ces mal-heurs , comme si nous en estions la cause, ou qu'y pouuans apporter remede , nous ne le voulussions pas.

Sur ce que nous leur predisons les Eccly-
psés de la Lune & du Soleil, dont ils ont
beaucoup de peur, ils se sont imaginez que
nous en estions les maistres, que nous sça-
uions toutes les choses à aduenir, & que
c'est nous qui en disposons. Et en ceste cō-
sideration, ils s'adressent à nous pour sça-
uoir si leurs bleds reüssiront; où sont leurs
ennemis, & en quelle quantité ils vien-
nent; ne se pouuans persuader qu'en tou-
tes choses nous n'en sçachions dauantage
que leurs forciers, qui font profession de
descouurir semblables secrets. Et voicy
ce qui les confirme encore dauantage dans
leur imagination; car la coustume du país
estant qu'aux necessitez publiques on a
recours aux Sorciers les plus fameux; ceux
cy ne manquans pas de promettre mer-
ueilles, pourueu qu'on leur fasse des pre-
sens; nous ne pouuons pas, en telles occa-
sions nous taire: particulierement depuis
que nous auons des Chrestiens qui se
trouuent engagés & enuoloppez dans tel-
les affaires, nous parlons donc & disons ce
qu'il faut: Mais aussi tost à les entendre,
nous voila declarez atteints & conuain-
cus de ce dont on nous accuse. De ne
pretendre autre chose que la perte & la

106 *Relation de la Nouvelle France,*
saine du monde, puis que nous ne les vou-
lons pas deliurer de leurs miseres, ny leur
permettre qu'ils se pouruoient des reme-
des ordinaires pratiquez dans leurs pays,
de tout temps contre leurs mal heurs,
particulierement dans la creance qu'ils
ont que c'est nous qui en sommes la cause.
Et en suite on ne menace de rien moins
que de coups de hache, & de toute sorte de
massacre.

Ces discours se tiennent plus souuent
que tous les iours, à l'occasion des affli-
ctions particulieres, particulierement de
leurs maladies. Car comme ils n'ont point
d'autres Medecins que Sorciers ou Magi-
ciens, & que la pluspart de leurs remedes
consistent en des dances, festins, ceremo-
nies, & circonstances du tout diaboliques;
nous ne pouuons pas ne leur declarer que
tout cela ne vaut rien, & qu'ils iouient en
fin à se perdre, & tout leur pays. Cela les
met au desespoir; car d'un costé ils ne se
peuvent resoudre de quitter ces remedes,
qu'en quittant l'esperance de viure, qui est
cependant leur souuerain bien : de l'autre
ils voyent des personnes qui les menacent
de la colere & de la Iustice de Dieu, s'ils
continuent de s'en seruir. Il est croyable

que ce desespoir les portera vn iour à faire pis qu'ils n'ont encore fait par le passé, mais nous seruons vn maistre qui sçaura bien tirer sa gloire dequoy que ce soit qui puisse arriuer : Et on est bien resolu de faire voir que ceux qui le seruent ne craignent rien sinon deluy desplaire.

Les Demons, pour souffler & eschauffer dauantage cette fournaise, semblent auoir acheminé quelques estrangers en ces contrées des derniers confins de la terre. Ce sont barbares des pays voisins de l'Océan, qui ont habitude avec certains Europeans Insulaires, qui se sont habituez aux costes de la mer, tirant aux Midy ; & qui sont personnes qui ont tousiours paru esgalement mal affectionnez à l'Eglise Romaine, & à ceux de nostre robe. Ces barbares estrangers, dis. ie, se trouans en ces quartiers par ie ne sçay qu'elle rencontre, ont donné à entendre que ces Europeans, dont nous venons de parler, ayans sceu que nous estions icy, leur auoient dit de nous, que nous estions gens à perdre & ruiner le monde : qu'il y en auoit comme nous en leur pays en Europe, mais qu'ils y estoient cachez sans oser se monstrier, &

108 *Relation de la Nouvelle France,*
qu'autant qu'on en attrappoit on les faisoit
mourir.

Toutes ces rencontres ont tellement
confirmé ces pauvres gens en leur imagi-
nation, qu'aux premieres prises que nous
avons avec eux à l'occasion de leurs inso-
lenees, c'est aussi tost à tomber sur ces re-
proches, & à prier qu'on ne les fasse pas
languir, mais qu'on les depesche prom-
ptement comme on fait les autres. Il s'est
trouvé des proches parens, cōme neveux,
qui à la mort de leurs oncles ont fait tout
leur possible pour leur faire dire que c'e-
stoit no⁹ qui les faisoit mourir, afin d'avoir
fondement de descharger leur ressentiment
sur nous, & se consoler de la mort
des personnes qu'ils cherissoient tendre-
ment, par le massacre de ceux qui en au-
roient esté declarez la cause, par la bouche
des defuncts. Mais Dieu n'a pas permis que
ceux qui, peut-estre, pendant leur vie l'a-
voient dit plusieurs fois en general, le con-
firmassent pour leur regard à la mort, mais
plustost ont tesmoigné tout le contraire.

Nonobstant tout ce que dessus, c'est vn
plaisir de faire reflexion sur ce qui se passe
le long d'une sepmaine : car ramassant en-
semble les divers sentimens qu'on a recon-

neu, traictant avec les Sauvages qu'on a visité : vous y voyez ce semble clairement l'esprit de Dieu & du diable se combattans dans leur esprit & dans leur cœur. On voit vn iour tout le monde qui se tuë de dire qu'il croid, & qu'il veut estre baptizé : vn autre iour tout se trouue renuersé & desesperé. Ce contraste est vn signe manifeste de combat & de bataille : mais il faut aduoüer que nous ne voyons pas encore de quel costé panche l'entiere victoire. Et si nous n'auions autre principe pour nous conduire dans nos esperances, que ce qui paroist aux yeux, nous aurions sujet de penser que l'affaire est encore fort esloignée, mais comme il n'y a rien d'impossible à Dieu, & que sa benediction depend souuent de certains temps & moments, & de certains ressorts qui nous sont inconnus, il nous faut attendre avec patience & courage tout ce qu'il luy plaist en ordonner.

L'excellence est, que les plus spirituels entre ces pauvres Barbares ne pouuans comprendre le suiet & le motif qui nous a fait quitter la France, & venir de si loing avec tant de peine & de trauail, ne nous voyans pretendre aucun profit ny aduan-

no *Relation de la Nouvelle France,*
tage de nostre demeure parmy eux, ny
des biens que nous leurs faisons conti-
nuellement; ils concluent, qu'il faut donc
que nous pretendions leur ruine; puisque
nous ne pouuons pas ne pretendre quel-
que chose de grand dans vne telle résolu-
tion.

On a beau leur dire que c'est pour leur
annoncer les biens & les richesses de l'au-
tre vie, ils n'y conçoient rien: n'appre-
hendans autres biens que ceux qu'ils voyët
de leurs yeux. Et comme on est contraint
de leur dire que les biens que nous leur
preschõs ne se voyent qu'après la mort; ces
discours où la mort entre, les confirment
plus que iamais dans leur imagination que
nous les faisons mourir. De sorte que les
plus moderez, & mesmes quelques-vns de
nos pauvres Chrestiens, pensent tout sim-
plement qu'il en est ainsi; mais que ce que
nous en faisons, c'est par amour & affe-
ction que nous auons de leur faire voir
Dieu au plustost, & de les rendre iouys-
sans de ces biens dont nous faisons tant
d'estat. Mais là dessus ces pauvres gens se
trouuent bien empeschez. Les vns disent
qu'ils ne voyent pas comment ayans de si
mauuaises iambes ils pourront faire vn si

grand voyage, & arriuer iusques au Ciel. D'autres teſmoignent auoir deſia peur, & craindre de cheoir de ſi haut : ne pouuans pas aprehender cōment ils ſe pourront tenir la long-temps ſans tomber. Vous en trouuerez qui ſont en peine ſ'il y aura du petun, diſant qu'ils ne ſ'en peuuent paſſer. Bref ce ſont des foibleſſes inimaginables, qu'à ceux qui les voyent. Or apres tout, ce ſont creatures raiſonnables, capables du Paradis & de l'Enfer, racheptez du ſang de IESVS-CHRIST, deſquelles il eſt eſcrit: *Et alias oues habeo quæ non ſunt ex hoc ouili, & illas oportet me adducere.* Et pour cēt effect il les enuoye chercher dans les buiſſons, & par tout.

Les orages dont nous venons de parler eſtoient à la verité conſiderables, & de cōſequence, puis qu'ils alloient à la ruïne ou à l'eſloignement des vniques ouuriers de cette vigne. Ce ne ſont paſ toutesfois ces rencontres qui nous ont donné plus de peine & de ſoucy: mais bien dauantage, les tempeſtes & les tentations ſuruenuës à nos Neophytes depuis leur baptême, & la naiſſance de ces nouuelles Eglises, dont nous auons parlé dans les Chapitres precedens. Veul la tendreſſe de ces ieunes plan-

112 *Relation de la Nouvelle France,*
res, & le peu de fond qui se trouue dans le
naturel & le genie des Barbares, pour ai-
der la semence de l'Euangile à y ietter de
grandes & profondes racines.

Si vn pauvre Barbare se fait Chrestien,
aussi tost il est accueilly de tous ceux de sa
cognoissance, qui le lamentent & le déplo-
rent comme s'il estoit desia perdu, & que
ce fust fait de luy. Les vns l'asseurent, si
c'est l'hyuer, qu'au Printemps (s'il est en-
core en vie) tous les cheueux luy tombe-
ront. Les autres, qu'il ne faut plus qu'il fasse
estat d'aller à la chasse, en traite, ou à la guer-
re, deuant estre assure, que par tout doré-
nauant il sera mal-heureux. On donne l'ap-
prehension aux femmes qu'elles ne porte-
ront plus d'enfans, bref on les menace tous,
ou plustost on les assure que ce qu'ils crai-
gnent le plus au monde, ne manquera pas
de leur arriuer.

On leur represente en outre, que les
voila doresnauant frustrez de festins, &
par consequent de l'vnique douceur ou
beatitude du pays. Qu'il faut necessaire-
ment en suite qu'ils renoncent à tous les
droicts & entretiens de l'amitié enuers
leurs proches & compatriotes. Et si ce sont
Capitaines qui ayent charge de faire les
criées

criées, & les ceremonies, qu'ils fassent estat de se voir despoüillez de leur credit & auctorité.

Et voila la plus forte batterie, & qui en effet en empesche le plus, & en a le plus esbranlé du nombre de ces pauvres Neophytes. Car en effet, la pluspart de leurs danses, festins, Medecins & medecines, ceremonies & coustumes estant ou manifestement diaboliques, ou remplies de tant de ceremonies impertinentes, qu'il est presque impossible de les iuger ou interpreter exemptes de superstition, ou pact & communication tacite avec le diable; on est contraint de tenir tout pour suspect, & d'en donner le scrupule à nos Catechumenes & Neophytes. Arriuant donc, ce qui arriue tous les iours, que quelqu'un de la famille, par exemple, tombe malade: voila aussi tost le pauvre Catechumene ou Neophyte poursuivy de toute la parenté, à ce qu'il ait à faire venir le Medecin, c'est à dire le visiteur ou Sorcier, & faire mettre en execution les remedes ordinaires du pais, qui sont les ordonnances du Sorcier, lequel on n'agist que dependemment de la cognoissance que luy donne le diable, de la nature de la maladie, & des re-

h

114 *Relation de la Nouvelle France,*
medes qu'il y faut apporter ; on ordonne
des choses qui ne sont qu'abomination ou
diableries. Que fera en ces rencontres vn
pauvre Neophyte ? S'il le fait , il renonce
publiquement à la profession ; s'il ne le fait,
le voila dans la haine & l'abandonnement
des siens , qui luy reprochent , qu'à son
tour on l'assistera comme il a assisté les au-
tres ; & que pour lors il ait recours à de
mal-heureux estrangers, qui ne sont venus
à leurs païs que pour les perdre & les rui-
ner.

A la verité toutes ces rencontres ne
seruiroient que de matiere & de suiet de
victoire & de triomphe à ces nouveaux
Champions , s'ils auoient assez de resolu-
tion & de courage : mais le mal de tous les
maux est au dedans de ces pauvres crea-
tures. Leur esprit, pour la pluspart, est foi-
ble au dernier poinct , pour concevoir &
apprehender les choses qu'ils ne voyent
pas, & pour se soustenir dans ces attaques
par l'esprit de la Foy , en l'esperance du fu-
tur. Et leur cœur semble incapable de
pouuoir resister aux assauts de l'affection de
la nature corrompue enuers les proches;
& pour les douceurs & commoditez
de cette vie , dans laquelle depuis vn si

long temps ils ont mis leur souverain bien.

L'attache qu'ils ont là dedans, fait que ce qui leur paroïssoit au commencement facile, lors qu'ils ne le mesuroient que par la raison, leur devient dans l'exécution si difficile : que vous les voyez à tous coups donner du nez en terre, & perdre courage, se plaignans que le Christianisme ne leur sert de rien, & ne leur apporte aucun profit en cette vie.

Ces ressentimens se renouellent autant de fois que quelqu'un d'eux leur devient malade, ou se meurt, ou que quelque autre malheur leur arrive. Vous diriez, à les entendre parler, qu'ils n'ont pretendu, se faisant Chrestiens, que de viure longtemps, eux ou au moins leurs enfans. Et ie ne sçay si ce qui se trouue dans la façon de proposer les Cōmandemens de Dieu, où il est promis vne longue vie à ceux qui honorent pere & mere, ne les abuse & trompe point pour l'ordinaire.

Ie ne m'estonne plus d'où vient que les Epistres des Apostres sont si fort remplies du *modicum nunc si oportet contristari in variis tribulationibus*. Ils escriuoient à des Cathecumenes & Neophytes qui ne sçau-

roient estre assez estançonnez de ce costé là. Et nous nous trouuons fort souuent dans la mesme peine, que ce grand Apostre des Gentils, qui disoit, *Filioli quos iterum parturio, donec formetur Christus in vobis.*

Il semble que le passage du chapitre 14. de l'Euangile de saint Luc, ne se peut mieux entendre que de nos pauvres barbares, lors qu'il y est parlé de ceux qui tous les derniers furent inuitez au souper de l'adorable Homme Dieu, pour parfourrir les places qui estoient vuides dans la table du banquet, & supplier en fin au defaut de tous ceux qui auparauant auoient esté inuitez. C'estoient des personnes qu'on alla chercher dans les sentiers, parmi les ronces & les brossailles, & qu'on auoit commission d'amener, & faire entrer par force. Nous n'auons icy & n'y pouuons auoir, ny la force de la contrainte, ny les chaines des biens-faits, au point qu'il faudroit, pour rendre ces peuples entierement nostres. Tout nostre force est au bout de la langue; & en la monstre & production de nos liures & Escritures, dõt ils ne cessent tous les iours d'admirer les effets. Ce qui nous sert vniquement enuers

ces peuples, au lieu de tout autre motif de crédibilité. Leur faisans voir par là, que ceux qui nous ont précédé, & qui ont esté depuis le commencement du monde, ont peu nous donner cognoissance & assurance de ce que nous leur preschons; là où eux ne peuvent auoir aucune marque, que ce que leurs peres leur ont enseigné n'a point esté controuué par eux, ou par d'autres qui leur en ont voulu faire accroire.

Il est croyable que quelque grand don de miracle, seroit bien capable d'esbranler les vns, & confirmer les autres. Mais outre que tous ceux qui ont veu les miracles du Sauueur du monde, & ceux des Apostres, n'ont pas pour cela creu, au moins avec fermeté & constance, il semble que Dieu nous ait mesme voulu faire voir par experience, que ce n'estoit pas cela à quoy il tenoit. Et qu'il falloit quelque autre chose que des miracles pour conuertir des Sauvages, aussi bien que pour conuertir toute autre sorte de personnes.

Au plus fort de l'Esté dernier, les champs d'alentour le bourg de la Residence de la Conception estans tous grillez de chaleur & de seicheresse à faute de pluye, les habitans estans au desesper, s'adresserent à nos

Peres , qui firent vœu de dire quelques Messes. Le lendemain on n'eut pas plus tost commencé la premiere, qu'il commença à pleuvoir vne pluye la plus favorable qu'on eust peu souhaitter, qui dura trois iours. Ce ne furent sur le champ qu'admirations & remerciemens ; mais en suite , de renoncer à leurs superstitions, c'est à quoy ils ne se peuuent résoudre.

Au bourg de la Residence de saint Ioseph, vn des principaux & plus anciens Capitainer, nommé Ondihorrea, estant par maladie reduit à l'extremié, & ayant au commencement refusé nos visites & nostre assistance , apres auoir experimenté en vain tous les remedes ordinaires du pais pour le recouurement de sa santé: Estant abandonné & comme aux abois de la mort, se sentit porté par quelque espeece de vision qu'il eust de nous escouter en fin, & receuoir le bien & les bons offices que nous luy desirions rendre en telle occasion, comme à celuy qui auoit le plus contribué à nostre establissement dans ce Bourg. Le voila donc instruit & baptisé; & aussi tost le voila sur pied, avec l'estonnement de tous ceux qui l'auoient vn peu

auparavant tenu pour desespéré, auxquels comme à toute autre sorte de personnes qui le venoient voir de tout le païs, il ne se laissoit iamaïs de leur racôter ce qui s'estoit passé; & qu'il tenoit entierement sa vie du baptesme qu'il auoit receu.

Qui n'eust pensé que cette rencontre en vne personne si considerable, n'eust deu esbranler tout le païs? mais tant s'en faut qu'elle ait profité à personne: que celuy mesme à qui elle est arriuée, qui en tesmoignoît tant de recognoissance, apres auoir assisté vne fois à la Messe, n'y est pas retourné pour la seconde; voyant qu'en suite de la profession qu'il feroit du Christianisme, il luy falloit quitter certaines confrairies diaboliques, dont il estoit le chef; & les fonctions & exercices du ministère de Satan, en qualité d'ancien & principal Capitaine, à qui il appartient de regler & maintenir les coustumes du pays.

Je pourrois produire quelques autres exemples semblables des merueilles qu'il a pleu à Dieu de faire en de pareille rencontres, lesquelles si elles ne font miracles, n'en sont guieres loin. Mais ce n'est pas icy ce que nous pretendons. Cecy seulement soit dit, pour faire voir qu'il sem-

120 *Relation de la Nouvelle France,*
ble que ce n'est pas à vn defect des mer-
ueilles, que le retardemēt de la conuerſion
generale de ces peuples doit eſtre attribué:
& qu'il y a quelque autre choſe d'où de-
pend ce bon heur, qu'il faut attendre avec
patience de la main de Dieu.

Au reſte, il ſemble que Dieu nous ait
encore voulu faire voir, que ce n'eſt pas
ſeulement pour le temps paſſé qu'il a choi-
ſi les pauvres, & non les riches: les per-
ſonnes de peu de conſideration aux yeux
du monde, & non pas celles qui ſont dans
l'eſclat, & en dignité, pour eſtre les pier-
res fondamentales de ſon Eglise, mais en-
core au temps preſent. Toutes les perſon-
nes les plus conſiderables des bourgs où
nous auons trauaillé à faire des Chreſtiens;
ou on fait la ſourde oreille; ou, apres auoir
embraſſé le Chriſtianisme, l'ont d'eux
meſmes abandonné; ou ſe ſont compor-
tez de la ſorte, reprenans leurs mauuiſes
couſtumes, avec volonté d'y perſeuerer,
que nous auons eſté contraints de leur
donner aduis de ne ſe plus trouuer à l'aſ-
ſemblée des Chreſtiens, reſolus de voir
pluſtoſt le tout reduit au neant, que de
ſouffrir vn tel meſlange, & des taſches &
des rides ſi enormes dans ces nouuelles

Esposes, que nous pretendons offrir à celuy qui a respandu son sang diuin, pour leur donner l'estre & la vie : & qui nous a icy enuoyé pour en recueillir les fruiets. Cette douce rigueur que nous auons exercée enuers ces pauures esclaués de Satan, n'a pas seruy de peu à releuer l'estime de nos mysteres & du Christianisme, dans l'esprit de tous ceux qui en ont eu la cognoissance, & a commencé à les desabuser de la creance que plusieurs ont, que lors que nous desirons & les pressons de se faire Chrestiens, & d'en faire profession, c'est nostre interest & nostre affaire, non la leur; & qu'il n'y a rien pour eux à y profiter.

Après tout, ie ne sçay si nous auons plus de suiet de plaindre & deplorer ces desastres, que de nous en resiouir, & remercier Dieu des lumieres & du courage qu'il donne à quelques-vns de ce petit troupeau : n'y ayant pas vne de ces trois Eglises, dans laquelle il ne se trouue des Chrestiens, en la procedure desquels il ne semble pas qu'il y ait rien à souhaiter de plus net & de plus accompli, avec des tendresses de conscience & vn recours cordial à la confession, qui ne furent iamais du creu d'un

122 *Relation de la Nouvelle France,*
Sauuage. Ce que nous auons dit aux Chapitres precedens , suffira pour le present. C'est vn leuain que le S. Esprit va formant & conseruant, qui en son temps seruira & fera debons effects comme nous esperons, & nous nous promettons de la bonté misericorde de Dieu.

Ie n'ay rien dit icy , pour éuiter la longueur, de la difficulté que ces Barbares ont de chommer les Dimanches : ces peuples ne viuans qu'au iour la iournée , & y ayant de la peine à le faire autrement. Ie n'ay point aussi parlé de la peine qu'il y a de garder le Carefme, qui se trouue tousiours en la saison , dans laquelle est le retour de leur chasse; & par consequent l'vnique temps de l'année auquel ils ont quelque peu de chair; non plus que de tout plein d'autres difficultez qui se rencontrent en l'establissement de ces nouuelles Eglises; dont l'vne des plus considerables est l'instabilité de leurs mariages; ce sont difficultez qui se conceuront aysément, & mieux peut-estre que ie ne les pourrois expliquer: Venons à la principale de toutes leurs difficultez, où pour mieux dire à la source de tous leurs mal-heurs.

CHAP. DERNIER.

Du regne de Satan en ces contrées. Et des diuerses superstitions qui s'y trouuent introduites & establies, comme premiers principes & loix fondamentales de l'estat & conseruation de ces Peuples.

IE n'entreprends pas de traiter ceste affaire à fonds. Quiconque l'entreprendroit, se trouueroit à mon iugement plus empesché que ne fust iamais Hercule à escurer les estables d'Augée.

Ce que ie pretends, n'est autre chose que de parcourir quelques actions particulieres qui se sont passées cét hyuer au seul bourg de la Residence de la Conception, où i'ay fait ma principale demeure, dans lesquelles nous nous sommes trouuez obligez d'examiner les tenants & aboutissants de ces miseres, en consideration de nos Chrestiens, à la conscience desquels nous estions obligez de pouruoir.

Iettans les yeux sur les coustumes & fa-

124 *Relation de la Nouvelle France,*
cons de faire de ces peuples , elles nous
auoient tousiours bien paru , comme de
vieilles mares puantes, toutefois nous n'en
auions quasi veu par le passé , que le dessus.
Mais depuis qu'à l'occasion de nos Chre-
stiens, il nous a fallu fouïller dedans , &
remuer ce cloaque, il n'est pas croyable
combien on y a trouué de puanteur & de
misere.

Vn vieillard de ce bourg nommé Taor-
henehé, auoit depuis enniron deux ans vn
chancre au bras, qui du poignet où il com-
mença , luy estoit tousiours monté vers
l'espaule, & commençoit à entrer dans le
corps. L'on dit que par le passé il n'auoit
oublié aucune ceremonie, ou pour mieux
dire, aucune superstition de celles qui se
pratiquent dans le païs, pour le recouure-
ment de sa santé. Cét hyuer dernier, vn
peu deuant que de mourir, il donna à en-
tendre aux Capitaines qu'il desiroit quel-
que chose pour sa consolation , & pour
faire vn dernier effort de sa guerison. On
assemble le Conseil , on depute des per-
sonnes , pour aller apprendre ses desirs,
qui aboutissoiēt à cinq ou six chefs: A quel-
que nombre de chiens d'vne certaine fa-
çon & couleur pour faire festin trois iours

durant: à quantité de farine pour le mesme
suiet: à quelques danses & choses sembla-
bles: mais principalement à la ceremonie
de l'andagyander, qui est vn accouple-
ment d'hommes avec filles qu'il se fait à
l'issuë du festin, il specifica qu'il falloit 12
filles, & vne treizieme pour luy.

La response portée au conseil, on luy
fornit aussi tost ce qui se pouuoit donner
sur le champ; & ce de la liberalité & contri-
bution volontaire des particuliers, qui se
trouuerent là, où en entendirent parler.
Ces peuples faisant gloire en telles ren-
contres, de se despoüiller de ce qu'ils ont
de plus precieux. En suite, les Capitaines
furent par les ruës & carrefours, & par les
cabanes crier à pleine teste, declarants les
desirs du malade, & exhortants qu'on eust
à y satisfaire promptement.

Ils ne se contentent pas d'y aller vne
fois, ils y retournent trois & quatre, avec
des termes & des accents tels, qu'en effect
on eust iugé qu'il y alloit du bien de tout
le païs. Ils ont cependant soin de marquer
le nom des filles & des hommes qui se
presentent pour l'exécution du principal
desir du malade, & dans l'assemblée du
festin, on les nomme tout haut, apres

quoy s'ensuiuent les congratulations de toute l'assistance, & les meilleurs morceaux qui sont portez à ces deputez & deputées, qui doiuent iouer de si mal-heureux personnages à l'issuë du festin, apres quoy s'ensuiuent les remerciements de la part du malade, & de la santé qu'on luy a redonnée, se professant tout à fait guery par vn tel remede.

Ce miserable jeu continua deux iours, le troisieme il ne se fist pas, quoy qu'il se deust faire selon le premier dessein & intention du malade. On nous a voulu faire croire que ce fust nous qui en fusmes la cause, pour auoir tesmoigné le desplaisir & la peine que nous en auions. Quoy qu'il en soit, toute la ceremonie se passa, sans que le malade pour cela s'en porta mieux, & bientoist apres il mourut. Dans son dernier festin auant la mort, il dit qu'il mourroit volontiers, & qu'il n'auoit qu'vn seul regret de se voir priué des bons morceaux dont toute sa vie on l'auoit honoré dans les festins. Ceste ame estoit trop de chair, pour goustier les choses de l'esprit.

Deuant que le fort de la maladie eust attaché ce pauvre mal-heureux sur sa natte, il venoit quelquefois en nostre cabane,

& en suite dans nostre Chappelle; ou apres auoir consideré toutes les images; ie ne sçay, disoit-il, qui est celuy-là, monstrant l'image de nostre Seigneur, mais il n'y a que luy qui me fasse peur.

Il auoit bien raison de le dire, particulierement apres auoir tant de fois mesprisé ses sainctes sermons. On fit tous les efforts imaginables pendant sa maladie pour le gagner à Dieu; mais cét esprit railleur n'auoit de la langue que pour demander des pruneaux & des raisins, & des oreilles pour entendre la responce: hors de cela on luy rompoit la teste, ou se mettoit à railler.

On redoubla les efforts à sa mort; & en fin on fit tant, qu'au moins en apparence il tesmoigna desirer le baptisme. On l'instruit donc plus particulierement encore que par le passé. Mais comme il auoit toute sa vie, mesprisé nos mysteres, & qu'il venoit tout fraichement de donner vn scandale public, on iugea à propos qu'il donnast quelque marque de sa bonnevolonté, & qu'il n'y auoit point de fiction, ny en sa foy, ny en sa penitence.

On luy propose donc qu'il eust au moins à inuiter deux ou trois personnes du

128 *Relation de la Nouvelle France,*
bourg, des plus considerables, auxquels il
s'estoit adressé pour ces meschâtes actions;
& qu'en leur presence il tesmoignast le de-
sir qu'il auoit du baptesme; & son desplai-
sir & regret de ce qui s'estoit passé pendant
sa vie si detestable & abominable. Il re-
ceut fort froidement ceste proposition, &
ne se voulut mettre en peine de l'execu-
ter. Ce qu'estant adiousté, avec plusieurs
autres indices de peu de disposition qu'il y
auoit en luy, on fut contraint de l'abandon-
ner.

Ce miserable vn peu deuant que de
mourir, tomba en pasmoison, de laquelle
reuenant il dit, à ce qu'on nous a rapporté,
qu'il venoit de l'autre monde, où il n'auoit
rien veu de ce que disent les François; mais
bien qu'il y auoit rencontré plusieurs de
sa famille & parenté, qui luy auoient fait
tres-bon accueil, l'asséurants qu'il y auoit
long-temps qu'on l'attendoit en bonne
deuotion, & qu'on se dispoisoit pour faire
en sa consideration force danses & festins
excellens. En effect se le persuadent de la
sorte, pour s'y trouuer dans le mesme
equipage & appareil qu'il auoit veu les au-
tres, il se fist peindre tout le visage de rou-
ge; se fist apporter & mettre dessus-foy ce

qu'il auoit de plus beau , on luy donne son plat & sa culier; & là dessus meurt.

Ce barbare passoit dans le iugement commun des Sauvages , pour vn des plus hōnestes hommes & des plus gens de bien de tout le país. Que si vous leur demandez, en vertu de quoy? c'est, disoient-ils, que c'estoit vn homme paisible, qui ne faisoit mal à personne, & qui se plaisoit fort à se réioüir & faire festin. Si le iugement des Sauvages est veritable, ie laisse à penser ce que valent tous les autres.

A l'occasion de ce mal-heureux qui s'estoit plusieurs fois seruy des remedes dont nous venons de parler, & qui auoit certaine danses & chansons affectées en toutes les ceremonies qui se faisoient à son occasion. Nous apprismes qu'il n'y a point, ou presque point de famille en ces contrées, dont les chefs n'ayent quelques danses, festins & autres ceremonies affectées pour le remede de leurs maladies, & le bonheur de leurs affaires : mais que le tout a esté enseigné par les Demons, soit en la façon que nous dirons tantost, soit en leur apparoissant en songe, tantost en forme de corbeau, ou autre oyseau; tantost en forme de couleuvre, comme il estoit arriué

130 *Relation de la Nouvelle France,*
celuy dont nous venons de parler, ou d'autre animal, qui leur parle, & leur declare le secret de leur bon-heur, soit pour le recouurement de leur santé, quand ils seront tombez malades, soit pour le bon succez de leurs affaires. Et ce secret s'appelle Ondinoc: c'est à dire, desir inspiré par le Demon. Et en effect si vous demandez à celuy qui desire en cette maniere qu'elle est la cause de ce desir, il n'a autre responce, sinon on days ihatonc oki haendaerandic, la chose sous l'apparence de laquelle mon Démon familier m'apparoist m'a donné cét aduis.

Ces Ondinons sont toujours accompagnez de festins ou de dances, dont les ceremonies, & mesmes les chansons qui s'y chantent, sont pour la pluspart dictées, par le Démon, qui exprime le tout avec des precautions & menaces, que tout est perdu si on manque à la moindre circonstance. C'est ce qui fait, que lors que les Capitaines vont publier les desirs des malades, ou autres personnes qui ont songé, & qu'ils disent que c'est l'Ondinonc d'vntel, aussitost chacun se met en peine, & s'applique de tout son pouuoir à donner contentement & satisfaction à qui il appartient.

Cecy semble entierement confirmé par la formule, de laquelle se seruent les Capitaines, apportants à la personne les choses qu'elle a desirées, au temps de la premiere assemblée. Escoute vn tel, ou vne telle, crient-ils, & toy voix de Demon (sçauoir quil'as inspiré) voila ce qu'vn tel, ou vne telle donnent. Et en disant cela, ils iettent les presents sur la malade.

C'est la forme dont on s'est seruy dans vne ceremonie qui s'est passée pendant que i'escriuois ce que dessus; à l'occasion d'une femme malade, qui selon l'vn de ses desirs, fust dansée d'une danse particuliere trois heure durant, par cinquante personnes. On a esté trois iours à se preparer à ceste danse, & le iour qu'elle s'est faite, les Capitaines firent plus de cinq criées publiques, tantost pour aduertir qu'on commençast à se lauer le corps, tantost que l'on se graissast, tantost quel'on se parast d'une parure, & puis d'une autre. En fin vous eussiez dit que le feu estoit au bourg, & que tout alloit estre consommé. La derniere crie se fist, pour exciter tout le monde à s'y trouuer, & d'entrer auparauant l'arriuée de ceux qui deuoient danser, deuant lesquels vint vn Capitaine

qui apportant le reste des desirs de la malade, fist sa clameur en la forme que nous venons de dire, suiuit vn peu apres la compagnie des danseurs hommes & femmes, à la teste de laquelle marchoient deux maistres de ceremonie, chantants, & la Tortuë en main, de laquelle ils ne cessoient de iouer. Cette Tortuë n'est pas vne veritable Tortuë, il n'y a que l'escaille & la peau, disposez à faire vne espee de tambour, dans lequel iettans certains petits noyaux, ils en font vn instrument semblable à celuy dont se seruent quelques enfans en France pour iouer. Il y a ie ne sçay quoy de misterieux dans ceste apparence de Tortuë, à laquelle ces peuples attribuent leur origine. Nous sçaurons avec le temps ce qui en est.

Ces maistres de ceremonie se mettent tantost à la teste de la malade, qui est au milieu de la cabane; & tantost se diuisant, l'vn demeurât à la teste, & l'autre allât aux pieds. Tous les autres qui dansent font vne espee d'oüale, & ne cessent de tourner à l'entour de la malade tant que les maistres de la ceremonie chantent, & iouent de la tortuë. Il ne sembloit pas qu'on y peust apporter plus de soin, & de

myſtere; & qu'il fut poſſible d'y auoir plus d'application, que celle que chacun auoit à bien iouer ſon perſonnage, & cependant la malade ne ſe plaignit d'autre choſe, ſi non qu'on n'auoit pas gardé toutes les formes, & qu'elle n'en gueriroit pas, comme en eſfect elle empira.

Cinq ou ſix iours apres, elle ſe fait porter en vn autre bourg, où elle a eſté danſée & redanſée derechef, avec auſſi peu de ſuccez, & le meſme meſcontentement de ſa part. Retournée qu'elle a eſté icy, on a recommencé à luy ordonner de pareils remedes, & entr'autres force feſtins de Feu, de la nature deſquels a eſté amplement parlé aux precedentes Relations. En fin au milieu de l'vne de ces ceremonies, ceſte pauvre mal-heureuſe a miſerablement expiré, paſſant d'vn feſtin de feu, à vne autre, mais qui a bien d'autres mets, & d'autres ſeruices; & pour comble de mal-heur n'a aucune iſſuë.

Elle eſtoit fille d'vn Sauvage, qui eſt en reputation d'eſtre vn des plus riches & des plus conſiderables du païs en nombre de ſorts dits Aſcyandies, ou diables familiers, qui y ſoit, & qui pour l'affection qu'il leur portoit voulut que cette ſienne fille

qu'il cherissoit vniquement portast le nom d'Ascandic : ce barbare fut prié de prester ces sorts pour vne ceremonie du jeu de Plat, dont nous parlerons cy-apres, sa filles'y en va, ou se fiant sur les thresors de son pere, elle se met à parier comme les autres ; comme elle estalloit les sorts, la voila surprise de la maladie, qui fit tant danser de monde, & dont en fin elle mourut, comme nous venons de dire. Tous lesquels malheurs ne sôt attribuez à autre chose qu'aux defauts & manquemens aux formes & circonstances des ceremonies.

C'est la plainte ordinaire des Capitaines que tout se va perdant, à faute de garder les formes & coustumes de leurs ancestres. Si on brusle vn prisonnier, & que la ieunesse là dedàs soit insolente, vn vieillard se met à crier & tempester qu'on iouë à perdre le pais, que c'est vne affaire d'importance & qu'on n'y procede pas assez serieusement. Si on resuscite vn Capitaine, ou, pour mieux dire, son nom, quand on vient à chanter la chanson des morts, si deux femmes ne sont entrées pour donner le ton, tout est perdu, & on ne s'attend à voir que testes cassées sous vn tel Capitaine qui prend le nom.

Bref, c'est la servitude & l'esclavage le plus estrange qu'on se puisse imaginer ; & jamais galerie ne craignit tant de manquer à son deuoir, que ces peuples ont de frayeur de faillir à la moindre des circonstances de toutes leurs mal-heureuses ceremonies, s'ensuiuant de ce defect, non seulement la priuation de ce qu'ils attendoient, mais encore punition sensible, que le diable pour ce suiet exerce sur ces pauvres mal-heureux. Les plus iudicieux d'entr'eux aduoüent franchement leur misere, & disent nettement que les seuls demons sont les veritables maistres du pais. Que ce sont eux qui reglent & ordonnent tout, soit en songe, soit autrement : qu'ils voyent bien cela, mais qu'il n'y a point de remede ; qu'ils ont tousiours vescu de la sorte, & qu'il n'y a apparence ny moyen de viure d'autre maniere, autrement que tout seroit perdu.

Les Capitaines & anciens disent, que s'ils auoient entrepris ce changement, ils verroient bien-tost leur bourgs abandonnez, & que chacun infailliblement se retireroit, où il verroit les coustumes du pais obseruées, & où il trouueroit les remedes ordinaires de leurs maladies. Cétar-

136 *Relation de la Nouvelle France,*
ticle est le pretexte que prennent quelques-
vns de ces plus anciens & Capitaines, pour
ne se pas encore rendre aux sermons du
sainct Esprit. Celuy qui leur frappe si sou-
uent l'oreille, ouvrira la porte du cœur
quand il luy plaira.

Outre les Ondinons ou Desirs dont nous
venons de parler, dictez par le demon qui
apparoist sous quelque forme empruntée, il
y a d'autres secrets & desirs moins conside-
rables qui viennent de certains songes,
dont ils croient leurs demons les auteurs,
auxquels ils n'osent refuser d'obcir, à moins
que de s'exposer à vn danger de quelque
grand mal-heur. Les plus considerables
pour le iugement & l'experience d'entre
nos Chrestiens, nous ont donné à enten-
dre qu'il ne se fait quasi dans le païs aucune
danse ny festin qui ne vienne de ce mesme
principe du démon : d'où vient qu'on y
tient toutes ces choses pour si augustes, que
nous n'en ferions pas davantage pour les
choses les plus saintes & sacrées de nos
mysteres.

S'il arriue quelquefois que les enfans se
veulent resjouir, & danser quelques-vns
des danses qu'ils ont veu danser à leurs ce-
remonies; aussi tost on les tanse, & reprend,

on fort rudement. Comme si en France on voyoit quelques personnes profaner vne chose sainte; qui ne doit auoir autre vſage que celuy auquel elle eſt conſacrée.

Que dire là deſſus à nos pauvres Chreſtiens, quand ils demandent ſ'ils pourront aſſiſter aux feſtins, qui ſont les ſeuls repas extraordinaires du païs? Tout le meilleur poiſſon & la chair ne ſe mangeant ordinairement qu'à tels feſtins? Ou en outre pour le plus ſouuent, on exige des aſſiſtans, des preſens & des ceremonies, qu'on a bien de la peine d'excuser d'hommage rendu à ce cruel tyran & uſurpateur de l'empire de Dieu; voire meſme que pluſieurs à ces feſtins ſemblent de veritables ſacrifices, ſur tout quand il s'agit d'un chien qui ſe tuë, & ſe mange particulieremēt en quelques rencontres, avec telles circonſtances & ceremonies, qu'il ne ſemble pas qu'on en puiſſe faire un autre iugement. Mais ce n'eſt pas maintenant de quoy il eſt queſtion, venons à d'autres hiſtoires.

Vne femme natifue de ce bourg, mais mariée dans un autre prochain nommé Angytenc, ſortant vne nuit de ſa cabane avec vne ſienne petite fille entre ſes bras, au temps que l'on faiſoit dans le bourg vne

138 *Relation de la Nouvelle France,*
feste semblable à celle que ie m'en vay raconter : veist en vn instant, dit-elle, la Lune fondre sur sateste, qui aussi tost luy parut comme vne belle grande femme, tenant vne petite fille semblable à la sienne entre ses bras.

Ie suis, luy dit ce spectre, l'immortel seigneur general de ces contrées, & de ceux qui y habitent : en foy dequoy ie veux & ordonne que tous les quartiers de mon domaine ceux qui y habitent t'offrent des presents, qui soient du creu de leur pais. Des Khionontaterons ou Mation du petun : des Attigandarons ou Nation neutre, des robes d'xtay : des Askicganerons, ou Sorciers, vne ceinture & chausses, avec leur ornement de pors-espics : des Ehonkeronons ou de ceux de l'Isle, vne peau de cerf. Et continuë ainsi à luy nommer quelques autres nations, dont il vouloit que de chacune on luy fit quelque present, & entr'autres nomma les François qui habitoient en ce pais, comme nous dirons incontinent.

La solemnité qui se fait maintenant dans le bourg (adiouste ce Demon) m'est fort agreable ; & ie pretends bien que l'on en fasse plusieurs semblables dans tous les au-

tres endroits & bourgs du pays. Au reste, luy dit-il, iet'ayme; & en ceste consideratiō ie veux que doreſnauāt tu me ſois ſemblable, & que comme ie ſuis tout de feu, que tu ſois auſſi au moins en couleur de feu. Et là deſſus luy ordōne vn bōnet rouge, vne plume rouge, vne ceinture, chaufſes, ſouliers, & le reſte de ſes veſtemens auēc leurs ornemens rouges : qui eſt en eſſet l'appareil avec lequel elle parut dans la ceremonie qui fut faite en ſuite à ſon occaſion.

Ceſte pauvre creature retourne en ſa cabane, & auſſi-toſt qu'elle y eſt arriuée, la voila par terre avec vn tournoyement de teſte, & vne contraction de nerfs, qui fit iuger qu'elle eſtoit malade d'une maladie, dont le remede eſt vne ceremonie, qui en la langue de nos barbares s'appelle Onon-harōia, ou tournoyement de teſte ; moſpris du premier ſymptome de ceſte maladie, ou pluſtoſt belle ſuperſtitiō. La malade fuſt confirmée en ceſte creance, ne voyant en ſonge qu'allées & venues, & clameurs par ſa cabane ; ce qui l'a ſit reſoudre de demander au public qu'on luy celebrat ceſte feſte.

Sa deuotion, ou pluſtoſt celle du diable pour nous faire deſpir & traucrſer les affai-

140 *Relation de la Nouvelle France,*
res du Christianisme qui estoient en leur
premier lustre & esclat, la porta à s'adres-
ser à ce bourg icy ou nous sommes d'Os-
fosane ou residence de la Conception,
d'où, comme nous auons dit, elle estoit
nativue. On vient donc de sa part en faire
la proposition aux Capitaines, qui aussi-
tost assemblent le conseil. Où il fut de-
claré, que ceste affaire estoit vne de celles
qui estoient des plus importantes pour le
bien du pais, & qu'il falloit bien se donner
de garde de manquer en telle occasion, de
donner tout contentement & satisfaction
à la malade.

Le lendemain matin on publie l'affaire
par le bourg, & exhorte-on puissamment,
qu'on eust à aller promptement querir la
malade, & à se preparer à la feste. On y
court plustost que d'y aller, de sorte que sur
le midy la voila qu'elle arriue, ou plustost
qu'on la porte sur les espaules, dans vne
certaine espee de hotte, avec vn conuoy
de vingt-cinq ou trente personnes qui se
tuoient de chanter.

Vn peu deuant qu'elle arriuaist, on assem-
ble le conseil general, auquel nous fusmes
inuitez. Trois de nos Peres s'y en vont
sans sçauoir de quoy il estoit question. D'a-

bord on leur donne à entendre qu'on auoit desiré de nous voir en ce conseil, pour sçauoir nostre aduis sur la proposition qu'une telle malade auoit fait, & ce que nous en pensions. La responce & substance fut qu'ils ne pouuoient faire vne plus mauuaise affaire pour le pays : que c'estoient des hommages qu'ils continuoient de rendre aux malins esprits, desquels par consequent ils confirmoient de plus en plus l'empire sur eux, & sur le païs, & qu'il ne leur pouuoit arriuer que mal-heur, continuant de seruir vn si mauuais maistre.

Le principal Capitaine qui sous main dirigeoit toute l'affaire, homme adroit & delié si iamais la terre en porta, au lieu de parler à propos de ce que nous auions dit, s'adresse à toute l'assemblée, & se met à crier, courage donc ieunesse, courage femmes, courage mes freres, rendons à nostre païs ce seruice si necessaire & important, suiuant les coustumes de nos ancestres. Et continuë vn grand discours de mesme air & accent, puis d'une voix vn peu plus basse, s'adressant à ceux qui estoient à l'entour de luy : c'est, dit-il, le conseil que i'auois donné à mes nepueux les François, l'Automne passé. Vous verrez cét Hyuer,

142 *Relation de la Nouvelle France,*
leur disois-je plusieurs choses qui vous de-
plairont, des Ononhgaroia, des staerohi,
& semblables ceremonies: ne dites mot ie
ie vous prie, leur disois-je ne faites pas sem-
blant de voir ce qui se passera, avec le tēps
cela pourra changer. On nous a dit autre-
fois aux trois Rivières & à Quebec, adiou-
sta-il, que pourveu que dans quatre ans l'on
creust, c'estoit assez.

Comme il continuoit semblables dis-
cours, entrent les deputez de la part de la
malade, qui venoient signifier son arriuée
au conseil, & dire de sa part qu'on luy en-
uoyast deux hommes & deux filles parées
de robes & de coliers de telle & telle fa-
çon, avec tels & tels poissons & presents
en main; & ce pour apprendre de sa pro-
pre bouche ses desirs, & ce qu'il luy falloit
pour sa guerison: aussi-tost proposé, aussi
tost executé.

Deux hommes donc & deux filles s'en
vont chargez de tout ce que la malade
auoit désiré, & retournerent aussi-tost
nuds d'un costé comme la main, excepté
le brayé; tout ce qu'on auoit porté, estant
demeuré à la malade, mais de l'autre char-
gez de demandes qui estoient les impor-
tantes, & celles dont l'accomplissement

deuoit commencer le recouurement de sa santé, ce qu'on luy auoit porté ne passant que pour compliment & agreement de son arriuée. Les deputez donc declarent vingt-deux presents qu'elle desiroit qu'on luy fist, qui estoient ceux que le diable luy auoit specifiez en son apparition, ainsi que nous auons dit vn peu auparauant. L'vn estoit six chiens d'vne certaine façon & couleur. Vn autre estoit cinquante pains de petun. Vn autre, vn grand canot; & ainsi du reste, & entr'autre fut nommée vne couuerture bleuë, mais avec ceste circonstance, qu'il falloit qu'elle appartint à vn François.

Le rapport fait par les deputez, les Capitaines se mettēt à exhorter tout le monde de satisfaire promptement aux desirs de la malade, leur représentant & inculquant sans cesse l'importance d'vne telle affaire. On s'y eschauffe de la sorte, que deuant que nos Peres fussent sortis de l'assemblée, on auoit desia fourny quinze de ces presens.

On attaque cependant nos Peres à diuerfes occasions & reprises, & les exhorte. on de ne pas espargner au moins ce qui les regardoit & dependoit d'eux. Nos Pe-

res à cela respondent qu'on se mocque de nous, & que si c'est pour ce suiet qu'on nous a appellez au conseil, que le malade s'en peut bien retourner, si sans nostre contribution & nostre hommage rendu au diable & à ses ordonnances elle ne peut guerir.

Nonobstant cela, vne demie-heure apres que nos Peres furent retournez à la cabane, vn Capitaine y vint de la part du conseil : pour nous dire que tout estoit fourny, excepté la couverture qu'on attendoit de nous, suiuant le desir de la malade. Ceste recharge n'eut autre responce, sinon qu'en cas qu'on ne voulust pas passer outre en ceste ceremonie, qui n'estoit encore qu'à son commencement, & qu'on voulust renvoyer la malade d'où elle estoit venuë, qu'en ce cas nous ferions volontiers au public present d'une couverture, ou de quelque autre chose de plus grande valeur.

Voila la premiere ceremonie de la feste. Ieluy eusse volontiers donné le nom de premier acte, si r'eusse peu estre assure de la catastrophe de toute l'affaire, pour le qualifier selon son espece; ce terme toutefois nous seruira d'oresnauant.

Le second acte donc, ou la seconde ceremonie de ceste feste, fut que tous les presents estans fournis & portez à la malade, avec les formes ordinaires dont nous auons parlé cy-deuant, sur le soir on fit vn cry public, pour aduertir toutes les cabanes & toutes les familles de tenir leurs feux, allumez & les places de part & d'autre toutes disposées pour la premiere visite que la malade y deuoit faire sur le soir.

Le Soleil donc estant couché, au son de la voix des Capitaines qui redoubloient le cry, on attise les feux, & les entretient-on avec grand soin, la malade faisant recommander par tout qu'on les fasse les plus grands & les meilleurs qui se pourra, & que cela seruiroit beaucoup à son soulagement.

L'heure venuë qu'il luy fallut partir, ses nerfs, ce dit-on se desserèrent, & la liberté de marcher mieux qu'auparauant luy fut renduë, mais il semble plus asseuré que celane se fit qu'apres auoir passé par quelques feux, ce qui est l'ordinaire; quoy que s'en soit deux Sauvages se tinrent tousiours à ses costez pendant sa promenade, luy soustenans chacun vne main; & elle ainsi

148 *Relation de la Nouvelle France,*
appuyée, marcha au milieu des deux, & s'en
alla par toutes les cabanes du bourg.

Dans les cabanes des Sauvages, qui sont
en longueur & en façon comme des ber-
ceaux de jardins, les feux sont au beau mi-
lieu de la largeur; & plusieurs feux dans la
longueur selon le nombre des familles, &
la grandeur de la cabane, distâts ordinaire-
mēt de deux à trois pas. C'est par le milieu
des cabanes, & par consequent par le beau
milieu des feux que passa & marcha la ma-
lade pieds & jambes nuës, c'est à dire, par
plus de deux & trois cent feux, sans se faire
aucun mal, voire se plaignant continuelle-
ment du peu de feu qu'elle trouuoit qui ne
la soulageoit point contre le froid qu'elle
fentoit aux pieds & aux iambes. Ceux qui
luy soustenoient les mains passerent aux
deux costez du feu; & l'ayant conduite de
la sorte par toutes les cabanes, ils la rame-
nerent au lieu d'où elle estoit partie, sçauoir
en la cabane où elle auoit sa retraicte, &
ainsi se finit le second Acte.

Suiuit le troisieme, qui selon les formes
& coustumes consiste en vne manie gene-
rale de tous ceux du bourg; qui excepté
peut-estre quelques Vieillards, se mettent
à courir par tout ou a passé la malade, ma-

rafchiez ou barbouillez à leur mode, avec des deformitez espouuantables de visage, à l'enuy les vns des autres, faisant par tout vn tintamarre, & des extrauagances telles, que pour les exprimer, & les mieux donner à entendre, ie ne sçay si ie les dois comparer, ou à nos malcarades les plus extrauagants, dont on ait ouïy parler, ou aux baccantes des anciens, ou plustost aux furies d'Enfer. Ils entrent donc par tout, & ont pendant le temps de la feste sur tous les soirs & les nuits des trois iours qu'elle dure, liberté de tout faire, sans qu'on leur ose rien dire. S'ils trouuent des chaudières sur le feu, ils les reuersent; cassent les pots de terre, asflomment les chiens, jettent le feu & les cendres par tout, si bien & si beau, que souuent les cabanes & les bourgs entiers en bruslent. Mais le point estant, que tant plus on fait de bruit & de tempeste, tant plus la personne malade en ressent de soulagement, on ne se soucie de rien: & chacun se tuë à faire pis que son compagnon.

Nos cabanes qui sont dans les bourgs, ne sont pas exemptes des fructs d'une telle feste. La porte de la cabane de la Residence de saint Ioseph fut brisée trois fois

248 *Relation de la Nouvelle France,*
en vne pareille ceremonie. Pour ceste residence icy où ie suis , de la Conception, nous auons esté plus en repos pendant telles tempestes , pour estre esloignez du bourg d'environ vne portée de mousquet. Voila quel est le troisieme acte, venons au quatriesme.

Le Soleil du lendemain estant leué, tout le monde se dispose à aller derechef par toutes les cabanes où la malade a passé, & particulièrement en celle où elle est retirée. Et ce pour proposer à chaque feu, son propre & particulier desir ou Ondinonc, selon que chacun en peut auoir eu lumiere & esclairement en songe; non pas tourefois ouuertement, mais par Enigmes. Par exemple, quelqu'un dira ce que ie desire & que ie cherche, c'est ce qui porte vn lac dedans soy, & par cela il entend vne courge ou calebace. Vn autre dira, ce que ie demande se voit à mes yeux, qui seront marquez de diuerses couleurs, & par ce que le mesme mot Huron, qui signifie œil, signifie aussi de la rassade, on a entrée à deuiner qu'il en desire sçauoir quelque sorte de grains de ceste nature, & de diuerses couleurs. Vn autre donnera à entendre qu'il desire vn festin d'Andagandet, c'est

en l'année 1638. & 1639. 149

à dire, force fornications & adulteres. Son Enigme estant deuiné, on ne manque pas de personnes qui satisfont à son desir.

Ie ne m'estonne plus que Satan ait si fort agreable ceste feste & solemnité, selon qu'il le tesmoigna à ceste pauvre mal-heureuse creature dont il s'agist : puis qu'en icelle toutes les facultez interieures & exterieures semblent trauailler à luy rendre vne espeece d'hommage & de reconnoissance. Et il semble qu'entre toutes les ceremonies de la feste, il fasse vn particulier estat de celle cy, où l'esprit mesme trauaille de la sorte à son occasion, comme il se peut voir en ce qui suit.

Aussi-tost donc que l'Enigme est proposé, aussi-tost on s'esuertue de le deuiner: & en disant c'est cela, en mesme temps on le jette à la personne qui demande & propose ses desirs. Si c'est en effet son mot, elle s'escrie qu'on l'a trouué, & là dessus c'est vne resioüissance de toute la cabane, qui se met d'aïse à frapper contre les escorces, qui sont les murailles de leurs cabanes: & en mesme temps, la malade se sent soulagée, & ce autant de fois qu'on trouue les desirs de ceux qui les ont proposé par Enigme. Il se trouua dans le conseil qui fut tenu

150 *Relation de la Nouvelle France,*
pour conclusion de ceste presente cere-
monie, ou cela s'examina selon les formes
& coustumes que cent Enigmes auoient
esté trouées ceste fois.

Que si ce que l'on deuine n'est pas le
mot de celuy qui a proposé l'Enigme, il
dit qu'on en a approché, mais que ce ne
l'est pas: il ne laisse pas pour cela d'em-
porter ce qu'on luy a donné, pour le mon-
strer par les autres cabanes, & par là leur
faire voir & donner mieux à entendre que
ce n'est pas cela, afin que par l'exclusion de
plusieurs choses on ait plus d'entrée à dire
ce que c'est. Il est vray qu'apres il reporte
ce qu'on luy a donné, soit qu'on ait en fin
trouué son desir, soit qu'on ne l'ait pas
trouué, ne reseruant que ce qui estoit ve-
ritablement son mot. Quelques vns ob-
seruent le tout fort religieusement, mais ie
ne doute point qu'il ne se glisse aussi là
dedans beaucoup de frasque & de fripon-
nerie. Tant y a que voila le 4. acte, qui
avec le precedent recommence toutes les
trois nuits, & les trois iours que dure la
feste.

Le cinquiesme ou dernier se commence
le 3. iour. Cela consiste en vn second voya-
ge ou promenade de la malade par les ca-

banes qui ferme toute la feste, & ce pour proposer son dernier & principal desir, non pas ouvertement, comme elle auoit fait d'abord en arriuât, mais par Enigme, comme les autres ont fait les iours precedents. C'est icy où le diable triomphe, & fait le maistre & le seigneur tout de bon. Car premierement, ceste pauvre mal-heureuse sortant de la cabane est assistée de nombre de personnes, qui la suiuent, & de quelques-uns qui vont deuant, tous file à file, & vn à vn sans dire mot, avec des visages, des mines & des contenance de personnes affligées & penitentes: & sur tous la malade qui paroist seule au milieu, & dont tous les autres deuant & derriere sont vn peu esloignez; de sorte que le voyant marcher comme ils marchent, il est impossible de faire vn autre iugement, sinon que ce sont personnes qui pretendēt de donner de la compassion, & flechir à misericorde quelque puissance souueraine qu'ils reconnoissent estre le principe & la cause du mal de la personne dont il s'agit; & de la volonté duquel en dépend, à leur iugement, la continuation ou la guerison, & en effect, c'est cela mesme.

Or il ne faut pas que pendant que ce-

152 *Relation de la Nouvelle France,*
ste espee de procession dure, pas vn Sauvage paroisse au dehors des cabanes : de sorte que de si loing qu'on en voit, ceux qui assistent le malade, se tuent de faire des signes & des gestes qu'on ait à se retirer, & à rentrer au dedans.

Entrée qu'est la malade dans les cabanes, c'est à racompter sa misere d'une voix plaintive & languissante : donnant au reste à entendre que sa guerison dépend de la satisfaction à son dernier desir, dont elle propose l'Enigme. Aussi-tost vn chacun s'applique à en trouver l'explication, & en mesme-temps iettent-ils à la malade ce qu'ils ont pensé que ce pouvoit estre, ainsi que nous venons de declarer.

Ceux qui assistent la malade ramassent tout ; & sortent chargez de chaudieres, de pots, de peaux, de robes, de couvertes, de capots, de coliers, ceintures, chausses, souliers, de bled, de poisson, bref de tout ce qui est dans l'usage des Sauvages, & qui leur est peu venir en pensée, pour arriuer à la satisfaction du desir de la malade.

Voila ce qui paroist, & non sans grand fondement, aux yeux esclairez de la lumiere de la foy, de veritables trophées de Satan ; ou plustost vne ceremonie ac-

complie de foy & hommage que ces peuples rendent à celuy qu'ils recognoissent pour ſouuerain maistre & Seigneur, d'où ils eſtiment que depend tout leur bon heur ou mal-heur.

En fin, la malade fait tant, & donne tant & tant d'ouuertures pour l'explication de ſon Enigme, que l'on trouue ſon mot. Et auſſi-toſt voila vne clameur & reſiouiffance generale de tout le monde, on frappe par tout contre les eſcorces, ce ne ſont que congratulations qu'on luy fait, & de ſa part des remerciemens de la ſanté qu'elle a recouree. Elle retourne pour ce ſuiet vne troiſieſme fois par toutes les ſabanes, apres quoy ſe tient le dernier conſeil general, ou on fait rapport de tout ce qui s'eſt paſſé, & entr'autres du nombre des Enigmes trouuez. S'enſuit le dernier preſent de la part du public, qui conſiſte à parſournir & combler le dernier deſir de la malade par deſus ce que celuy des particuliers qui l'aura deuiné, aura peu donner, & là ſe termine la ceremonie.

Il eſt à preſumer que la veritable fin de cet Acte & ſa cataſtrophe, ne ſera autre que d'une Tragedie, n'eſtant pas la couſtume du diable de ſe comporter autrement.

Toutesfois ceste pauvre mal heureuse s'est trouué apres la feste plus soulagée de beaucoup qu'auparavant, quoy qu'elle ne fust pas entieremēt libre & deliurée de son mal. Ce qui est attribué par les Sauvages à l'ordinaire, au defect & manquement de quelque circonstance & perfection de la ceremonie; ce qui entretient ces peuples dans les frayeurs continuelles, & applications si exactes aux formes & particularitez de leurs ceremonies.

Ie ne sçay si selon l'ordinaire du diable de ne s'abstenir iamais d'un mal, que pour en faire vn autre, il n'auoit pas dessein de faire mourir en contr'eschange, la petite fille de ceste femme, dont nous auons parlé au commencement de ceste histoire.

Tant y a qu'apres la feste elle deuint grandement malade: & qui porta celuy de nos Peres qui auoient charge de la cabane où elle estoit de la baptiser comme en extremité au desceu de sa mere; apres quoy la petite fille se porta mieux: nous ne sçauons pas toutefois au vray ce qui est depuis arriué, soit à la mere, soit à la fille, qui sont retournez à leur bourg.

Pendant la maladie de la fille, vne bruslure qui luy arriua, pour laquelle on cher-

choit quelque remede, ayant donné ac-
cez au susdit Pere au feu où elle estoit avec
sa mere. Les caresses qu'on fit à la fille,
appriuoisoient l'esprit de la mere; de sorte
que le Pere trouua entrée suffisante pour
l'aborder, & luy faire raconter tout ce qui
s'estoit passé. Ce fust de sa bouche que
nous eumes la confirmation & l'esclaircis-
sement de ce que dessus, que nous auions
desia appris d'ailleurs, tant pour ce qui re-
gardoit ceste histoire particuliere, que
pour la nature de la maladie en soy, & ce
par des personnes qui auoient eu le mes-
me mal, & qui auoient esté gueris par vn
semblable remede. Elle nous apprit tou-
tefois plusieurs circonstances, que nous
ne sçauions pas; & en outre nous dit que
le diable apres le refus que nous luy fismes
de donner la couuerture qu'il auoit ordon-
née, qu'on nous demanda, luy estoit ap-
paru de nuict, & luy auoit dit que nous
faisions bande à part, & que partant non-
obstant nostre refus, elle ne lairroit pas
de guerir, le reste alloit bien: qu'au reste,
doreinauant il ne nous mettroit plus de la
partie.

Si cela est, ie ne sçay pas comme il l'en-
tend, où si c'est vn tour du mestier qu'il a

156 *Relation de la Nouvelle France,*
exercé dès le commencement du monde
Quimendax est ab initio. Mais il est asseuré
que depuis ce temps , il n'a pas laissé de
nous faire solliciter, soit à la Residence de
sainct Ioseph en cas pareil, soit icy en quel-
ques autres rencontres, & tousiours avec
aussi peu de succez.

Il faut qu'à ce propos ie raconte en pas-
sant ce qui est icy arriué pendant que l'es-
criuois ce que dessus. Vn Sauvage d'un
bourg voisin est entré chez nous , por-
tant derriere soy vn pacquet d'une robe
de Castor , disant qu'il la venoit traiter
pour vne couverture , ou quelque autre
piece d'estoffe ; la response a esté , qu'il n'y
en auoit point à la maison qui fut à cet vsa-
ge. Helas , dit-il, ie n'en demande qu'un
petit morceau grand comme le coude. On
se douta aussi tost qu'il y auoit de l'Ondi-
nonc : C'est pour quelque personne mala-
de : luy dit-on ; Helas ouïy , respond-il,
l'ay vne pauvre petite fille aagée de quatre
ans ou enuiron, qui depuis l'Automne der-
nier est dans le plus piteux estat qui se puis-
se voir. l'ay fait iusques icy tout ce que l'ay
peu pour le recouurement de sa santé.
En fin le Sorcier l'a visitée pour la dernière
fois , & a dit que son ame desiroit ce que ie

Je suis venu vous demander, & qu'au plustost ie vous vinste trouver pour ce sujet.

Il n'en fallut pas davantage. Incontinent vn de nos Peres se dispose pour partir avec le Sauvage, & aller trouver la petite fille là part où elle seroit, sous pretexte de luy porter quelque douceur, qui passe icy pour medecine. Il y va, la trouve telle qu'on auoit dit, la baptise sans faire semblant de rien, parcourt quelques autres cabanes selon leur loisir, pour voir s'il n'y auoit point encore quelque autre proye à enleuer des mains de Satan. Et voila d'ordinaire ce qu'il gagne, à rechercher de nous des hommages & des recognoissances de sa souueraineté en ces contrées, cette pauvre petite fille est morte heureusement quelque temps apres.

Ce Loup infernal ne gagneroit guiere davantage sur les otiailles que sur les Pasteurs, si toutes estoient semblables à Ioseph Chisaienhya, ce braue Neophyte, duquel nous auons parlé aux Chapitres precedens. Ce bon homme nourrit en sa cabane vne Brenesche, qui est vne espee d'oye sauuage; qui a desia esté ie ne sçay combien de fois l'Oudinonc, ou le songe de tout plein de personnes; & pour laquelle

Il en suite auoit de luy, ie ne sçay ce qu'on ne luy a pas presēté. Ce n'est pas toutefois ce qui luy a donné plus de peine, que de refuser ceux qui se sont presentez pour la traiter: mais bien dauantage, de refuser à ses amis qui la luy ont demandé pour ce sujet iusques à l'importunité: mais encore, dit sa femme, s'ils nous la demandoient, sans dire que c'est l'Ondinonc, mais vous diriez qu'on veut que ce soit expressement pour cela, ils ne tiennent rien! Plaise à Dieu nous donner plusieurs familles de Barbares semblables à celle-là. Mais retournons à nostre histoire.

Il arriue quelquefois que le diable en ceste grande ceremonie dont nous venons de parler, a recommandé entr'autres choses à la personne malade, de faire maison nouuelle. En ce cas, il ne faut pas qu'elle retienne chose du monde de ce qui luy appartient: elle doit donc donner tout ce qu'elle a, à mesme que ceux du bourg pendant les trois iours, vont proposer leurs desirs par les cabanes. Et il est quelquefois arriué, que pour vn seul plat de bois retenu par affection & attache, le Diable s'en est si fort ressentý; qu'outre qu'il n'a pas accordé la guerison, il a marqué en songe à

la personne malade, le lieu & l'endroit où elle en deuoit mourir, pour auoir manqué, en ce point d'obeïſſance & de deference à ſes ordres, ce qui en effect eſt arriué.

Vne ceremonie ſi ſolemnelle nous porta à en rechercher la ſource & l'origine; & nous auons trouué par le rapport des anciens, tant de ce bourg, que de celui de la Reſidence de S. Ioseph. Que les auteurs tant de ceſte feſte, que de toutes les autres ceremonies du païs, & nommement des danſes nuës, & choſes ſemblables, ne ſont autres que les Demons.

On nomme la Nation & le bourg où cela commença, & le Capitaine qui les ayant aperceu ſur vn lac paſſer le temps de la ſorte, les pria inſtamment d'aborder à ſon Bourg, & leur enſeigner tous ces beaux myſteres. Ce qu'apres beaucoup d'instance, & de ſacrifices de chiens, que ce Capitaine leur fit, ils s'accorderent en fin.

Or nos barbares aduoient que de là ſ'eſuiuit la mort du Capitaine & la ruine du bourg, & apres celle de toute la Nation, dont quelques reliquats à peine reſtent refugiez parmy eux, deſquels ils ont appris plus particulièrement toutes les ceremonies de ces ſolemnitez. Toutesſois

160 *Relation de la Nouvelle France,*
ils assurent que ceux qui par apres les ont
practiqué, s'en sont bien trouuez; & par-
tant que les mal-heurs de mortalité & de
misere, qui les achemine à vne pareille fin,
ne doivent pas estre attribuez à cela, com-
me nous leur disons & preschons cōtinuel-
lement, mais à nostre demeure parmy eux, à
laquelle seule ils s'en prennent.

Au reste, le corps des Hurons n'estant
qu'un amas de diuerſes familles & petites
Nations, qui se sont iointes les vnes aux
autres pour se maintenir contre leurs enne-
mis communs, chacune a apporté ses dan-
ſes, les couſtumes & ceremonies particu-
lieres toutes emanées du meſme principe,
qui se sont communiquées à tout le pais, &
qui se font en suite dependemmet du ſon-
ge ou de l'ordinonc d'un chacun, quand il
est malade, ou par l'ordonnance du Medec-
cin du pays, ou viſiteur qu'on a eu ſuict de
nommer Sorcier ou Magicien, comme
nous pourrons dire cy-apres. Et telles af-
faires s'appellent chez-eux Onderha, c'est
à dire la terre; comme qui diroit, le ſou-
ſſien & la manutention de tout leur Estat.
Voila nous diſent les anciens & les Capitai-
nes ce que nous appellons affaires d'im-
portance.

Pour plusieurs de ces superstitions il y a des Confrairies instituées, auxquelles & particulièrement aux Maistres d'icelles il se faut adresser.

Tous ceux qui ont esté autrefois le suiet & l'occasion de la danse ou de la feste sont de la Confrairie, auxquels apres leur mort succede vn de leurs enfans : quelques-vns en outre ont vn secret ou vn sort qui leur a esté déclaré en songe avec la chanson; pour s'en servir deuant que d'aller, par exéple, au festin de feu : apres quoy ils manient le feu sans s'offenser.

Voicy vne histoire qui se passa pendant le temps de cette grande ceremonie. Vn des ieunes gens du bourg des plus considerables, courant l'vne de cestrois nuits, & faisant l'enragé fit rencontre d'vn spectre ou demon, avec lequel il eut quelque parole, ceste rencontre luy renuersa de la sorte la ceruelle, qu'il tomba, & en effet en deuint fol. De remede fust de tuer promptement deux chiens, & entr'autres vn qu'il cherissoit vniquement, dont on fit festin : en suite dequoy il se porta mieux, & en fin retourna en son bon sens.

Ce ne seroit iamais fait ; si j'auois en-

162 *Relation de la Nouvelle France,*
trepris de dire tous les tenans & about-
tissans de ces misères. En voila assez de
cette façon, venons à d'autres myste-
res.

Sur le milieu du mois de Mars, la sai-
son de pescher à la Seine estant venue, on
parla de la marier selon la coustume du
païs à deux ieunes filles, ou plustost à
deux enfans, qui n'eussent iamais eu con-
noissance d'homme : Et en suite de faire
les nopces ou le festin, auquel selon la
forme, la Seine seroit au milieu, & les
deux ieunes filles aupres. C'est là où on
exhorte puissamment la Seine à prendre
bon courage, & de faire en sorte que
la pesche soit heureuse, comme a esté dit
plus amplement aux precedentes Rela-
tions.

On ietta les yeux entr'autres sur vne
de nos petites Chrestiennes, aagée de
quatre ou cinq ans, pour estre l'une des
deux mariées; On nous en donne aduis,
nous voila aussi tost à la recherche du
fond de l'affaire, pour aduiser à ce que
nous auions à dire là dessus. Il se trou-
ue donc qu'il y a quelques années que les
Algonquains, qui sont peuples voisins
tres-intelligens, & excellents en toute sor-

se de pelche, y estans allez en cette saison, pour pescher avec la Seine, du commencement ne prirent rien. Surpris & estonnez d'un succez, qui leur estoit si extraordinaire, ils ne sçauoient que penier. Là dessus, l'Ame, le Genie, ou l'Oki de la Seine, car nos Sauvages l'appellent de toutes ces façons, leur apparoit en forme d'un grand homme bien fait, tout mécontent & en colere, qui leur dit. J'ay perdu ma femme, & ie n'en puis trouuer qui n'ait cogneu d'autres hommes deuant moy : voila ce qui fait que vous ne réussissez pas, & ne réussirez iamais iusques à ce qu'on m'ait donné contentement sur ce poinct.

Les Algonquains là dessus tiennent conseil, & aduisent que pour appaiser & donner satisfaction à la Seine, il luy falloit presenter des Filles en si basage, qu'il n'eust plus de suiet de se plaindre; & que pour plus grande satisfaction, il luy en falloit presenter deux pour vne, ils le font donc en la maniere que j'ay marqué cy-dessus dans un festin, & aussi-tost leur pesche réussit à merueilles.

Les Hurons leurs voisins n'en eurent pas plustost le vent, que voila vne feste

164 *Relation de la Nouvelle France,*
& solemnité instituée , qui depuis a tous-
iours duré, & se celebre tous les ans en cer-
te mesme saison. Cela estant , ie laisse à
penfer ce que nous dîmes & conseillâmes
aux parents de la Fille : mais voyez le
grief ; car toute la famille profitant no-
tablement d'un tel mariage , vne partie
de la pesche, luy reuenant l'année quelle
se faict ; en quoy luy estant deuë & affe-
ctée en consideration d'une telle alliance ;
refuser son contentement à tel mariage,
c'est se priver & frustrer toute vne
famille de la plus grande douceur , & de
la meilleure rencontre qui se fasse dans le
païs.

Ie ne sçay si Dieu eut agreable de mettre
particulierement la main à cette affaire,
pour la rompre tout à fait, tant y a que la cé-
rimonie ne se fit, ny d'une façon , ny d'au-
tre.

Vne des dernieres folies qui se soit pas-
sée en ce bourg a esté à l'occasion d'un
malade d'un bourg voisin , qui pour sa
santé , songea on receut l'ordonnance du
Medecin du païs , qu'on luy fist vn ieu de
plat. Il en parle aux Capitaines , qui aussi-
tost assemblent le conseil , arrestent le
temps , & le Bourg qu'il falloit aller in-

uiter pour ce ſuiect , & ce bour fut le nôtre. On depute de là pour en venir faire icy la propoſition ; elle eſt agréée , & en ſuite on le prepare de part & d'autre.

Ce jeu de plat conſiſte à faire ſauter dans vn plat de bois quelques noyaux de prunes ſauvages, chacun blanc d'un coſté , & noir de l'autre, d'où ſ'enſuit perte ou gain ſelon les loix du jeu.

Il eſt hors de mon pouuoir de repreſenter l'application & l'aſtiuité de nos Barbares à ſe preparer , & à rechercher tous les moyens & les augures de quelque bonheur & ſucces en leur ieu. Ils ſ'aſſemblent les nuits , & les paſſent partie à remuer le plat, & à recognoiſtre qui a la meilleure main ; partie à eſtaller leurs ſorts, & à les exhorter. Sur la fin ils ſe mettent à dormir dans la meſme cabane , ayans au prealable ieufné , & s'eſtans abſtenus quelque temps de leurs femmes : le tout pour auoir quelque ſonge fauorable , & le matin c'eſt à raconter ce qui ſ'eſt paſſé la nuit.

Enfin on aſſemble tout ce qu'on a ſongé qui pourroit apporter bon-heur , & en remplit-on des ſacs pour porter. On

166 *Relation de la Nouvelle France,*
recherche en outre par tout, ceux qui
ont des sorts propres pour le jeu, ou des
Ascandics ou diables familiers, pour as-
sister celuy qui tient le plat, & estre le
plus proche de luy, lors qu'il le remue-
ra. S'il y a quelques vieillards dont la
presence soit recogneuë efficace, & aug-
menter la force & la vertu de leur sort,
on ne se contentepas de porter leurs sorts,
mais encore les charge-on quelquefois
eux mesmes sur les espauls des ieunes
gens, pour les porter au lieu de l'assem-
blée. Et d'autant que nous passons dans le
pays pour maistres forciers, on ne man-
que pas de nous aduertir, de nous mettre
en priérés, & faire force ceremonies pour
les faire gagner.

On n'est pas plustost arrivé au lieu de
l'assignation, que chaque party se ran-
ge de costé & d'autre de la cabane, &
la remplissent depuis le haut iusques en
bas, dessus & dessous les Andichons, qui
sont escorces faisant comme vn ciel de
liét, ou couverture respondant à celle
d'enbas colé sur terre, sur laquelle on se
couché la nuit. Il s'en met sur les per-
ches couchées & suspenduës le long de
la cabane. Les deux ioueurs sont au mi-

en l'année 1638. & 1639. 167

lieu , avec leurs asseſſeurs qui tiennent les ſorts, Chacun de ceux qui ſont à l'aſſemblée , parie contre quelqu'autre ce qu'il veut : & on commence le ieu.

C'eſt pour lors que tout le monde ſe met à prier ou marmoter ie ne ſçay qu'elles paroles , avec des geſtes & des empreſſemens de mains , d'yeux , & de tout le viſage : le tout pour attirer à ſoy le bonheur , & exhorter leurs Demons de prendre courage , & de ne ſe pas laiſſer tourmenter.

Quelques vns ſont deputez pour faire des execrations & des geſtes tout contraires , à deſſein de repouſſer le mal-heur de l'autre coſté, & en faire peur au Demon du parti contraire.

Ce ieu ſ'eſt ioué. cét Hyuer pluſieurs fois par tout le païs ; mais ie ne ſçay comment il eſt arriué que ceux des bourgs où nous auons des Reſidences y ont touſiours eſté mal heureux au dernier poinct ; & tel bourg y a perdu trente colliers de porcelaine, chacun de mille grains , qui eſt en ce païs , comme ſi vous diſiez en France cinquante mille perles ou piſtoles. Mais ce n'eſt pas tout , car eſperants touſiours regagner ce qu'ils ont vne fois

perdu, ils ioüent sacs à petun, robes, souillers & chausses, en vn mot tout ce qu'ils ont. De sorte que si le mal-heur leur en veut, comme il est arriué à ceux-cy, ils reuiennent à la maison nuds comme la main, ayans quelquefois perdu iusques à leur brayé.

Ils ne s'en vont pas toutesfois deuant que le malade les ait remercié de la santé qu'il a recourée par leur moyen, se professant tousiours guery à la fin de toutes ces belles ceremonies; quoy que souuent ils ne la fassent pas longue apres en ce monde.

Le bon est qu'en suite de ces pertes, nos Barbares retournent à la maison, ne manquent pas de nous venir reprocher, que voila iustement à quoy profite de croire, & qu'on voit bien en effet que tout ce que nous prétendons, n'est que de ruiner les lieux où nous faisons nostre demeure, & ainsi peu à peu ruiner tout le pais. Que depuis que nous sommes avec eux & qu'on leur a parlé de Dieu ils ne songent plus, leurs sorts & Ascandics n'ont plus de forces, ils sont mal-heureux par tout, btes il n'y a misere qui ne les accompagne.

Je serois infiny si ie voulois raconter tout ce qui s'est passé de semblable à ce que dessus, qui regarde les ceremonies publiques, les danses differentes, les festins d'etaerohi, ou du feu, & de semblables superstitions, qui se sont dis-jepassées cét hyuer dernier en ce seul bourg d'où i'escry : où toutefois ie puis dire avec assurance, qu'on en a moins fait qu'en pas vn autre bourg du pays. Je ne puis me resoudre voyant la longueur ou cela me porteroit, à entamer le narré, & le discours à fonds des autres superstitions particulieres, qu'on descouvre tous les iours. Je me contenteray de ce qui suit.

Quelques vns de nos Barbares, & entr'autres vn de nos pauvres Renegats, racontant vn iour à vn de nos Peres les avantages qu'ils ont à retenir & conseruer leur Ascandic, ou diable familier, que le Pere l'exhortoit de quitter. Helas, dit-il, que me dis-tu là ? quand ie vay en traite ie n'ay qu'à ouurir le sac où il est, ie luy recommande de me faire auoir vn colier de pourcelaine de tant de grains, vne robe ou mante de tant de peaux de castor; ie luy iette en hommage & recognois-

sance quelques grains de pourcelaine, & quelque piece ou morceau de castor; finalement ie fais le festin : Ie m'en vay là dessus, & ce que i'ay pretendu ne manque iamais. Ma femme, dit-il, tremble quand iela tire pour luy parler, mais c'est yne femme : Le Pere le pria de le l'y faire voir. O, dit il, mon nepueu voila yne grâde demande; mais que donneras tu? Cét homme passe pour vn des plus sages & des plus reservez du bourg, & en effet il l'est ! iugez du reste. Ce pauvre malheureux est allé à la guerre avec des regrets de nostre part qui ne se peuuent expliquer, & des craintes des mal-heurs quilay peuuent arriuer, & en suite à sa famille, qui est grande & considerable.

Vn autre se plaignant que son sort n'auoit plus de force, ny pour la pesche, ny pour la chasse, ny pour la traicte, mais sur tout pour le jeu. Le Pere luy demanda, que faudroit-il pour luy rendre sa vertu? vn festin, respond le barbare, mais quoy ien'ay ny chair, ny poisson.

Ie ne sçay comme qualifier les festins au regard de nos Sauvages, c'est l'huyle de leurs onguents, le miel de leurs medecines, le preparatif de leurs maux, l'e-

foille de leur conduite, l'Alcyon de leur repos, le ressort de leurs ressorts & Ascandies, bref l'instrument general ou condition sans laquelle rien ne se fait. C'est à cela & pour cela que sont reservez les meilleurs morceaux desquels toute la famille se priuera pour les conseruer pour les occasions d'un songe ou de maladie. Le Diable ayant gaigné qu'on luy gardast tousiours & reseruast on le meilleur & le plus beau: Et c'est ce qui donne suiet de les qualifier veritables sacrifices, particulièrement lors que le songe ou la maladie demande le massacre d'un chien, comme nous auons tantost dit; ce qui n'arriue que trop souuent.

Mais pour retourner à nos Ascandies ou diables familiers, la responce commune de ceux que nous persecutons sur ce sujet; est, qu'il n'y a personne qui n'en ait, & que s'ils n'en auoient, ils seroient en tout & par tout mal-heureux. Il est vray, qu'il y a en cela du plus & du moins: quelques vns en ont en nombre & de plus exprés & plus efficaces que les autres. Les vns les acheptent des Nations voisines, particulièrement des Algonquains qui sont en reputation d'en auoir d'excellens,

172 *Relation de la Nouvelle France,*
& c'est la marchandise la plus chere & precieuse du pais, les autres les ont herité de leurs parens. C'est de la façon qu'en auoit eu le Chrestien susmentionné de ce bourg, Ioseph Chihyatenhya, qui aussi-tost qu'il eut appris que cela estoit contre les commandemens de Dieu, & luy desplaisoit, le ietta bien loing au premier voyage qu'il fit: par ou depuis lors qu'il repasse, il a tousiours peur qu'il ne se remette dans son sac, comme il est arriué à plusieurs, qui par despit de n'auoir pas eu ce qu'ils auoient demandé ayans ietté leur Ascandic, l'ont apres trouué, ou dans leur sac, ou dans quelque vne de leur quaisse.

Je ne diray rien des Visiteurs ou Medecins, nommez en leur langue Ocata: ny aussi des Apotiquaires, ou donneurs de remedes, nommez Ontetsans. Je diray seulement que les premiers se seruent souuent d'eau ou de feu pour recognoistre l'estat & le mal de la personne malade, & prononcer en suite leurs ordonnances: & ce tousiours avec les circonstances de tortuë qu'ils remuent, dont nous auons parlé cy-d. ssus, & de chanson qu'ils chantent, & autres circonstances du tout impertinentes.

Les seconds ne donnent aussi d'ordinaire leurs remedes qu'avec l'appareille de semblables circonstances, & des exhortations à leurs remedes, d'auoir l'effect pretendu. Que si l'Ocata, ou Visiteur a prononcé que c'est vn sort; l'Apotiquaire ou l'Aretlan ne manque pas de faire voir quelque chose dans sa main par souplesse ou autrement, & quelquefois dans la matiere qu'il a fait vomir, de ce qui dans le sens commun de ceux du pais passe pour sort.

Les genroronons, qui sont ces estrangers arriuez de nouveau en ce pays, dont nous auons parlé aux Chapitres precedens, sont excellens pour tirer vne fleche du corps & en guerir la playe, mais la recepte n'a point de force qu'en presence d'une femme grosse: dont le diable a rendu la circonstance grandement considerable en ces pays, soit à bon heur, soit à mal heur en miller rencontres & occasions, mais il faut briser icy.

En voila assez pour faire voir vn eschantillon de l'estat miserable de ces pauvres peuples parmi lesquels nous viuons. Ce qui ne peut qui ne donne de la compassion à tous ceux qui ont vne foy sainte

174 *Relation de la Nouvelle France,*
& viue, de ce que les hommes font à Dieu,
& Dieu aux hommes, & de ce que nous
deuenons apres la mort.

Je prie tous ceux qui ietteront les yeux
sur ce narré de considérer le besoin que
nous auons de leurs saintes prieres & de-
uotions : veu les combats & batailles que
nous auons à liurer & à soustenir tous les
iours, pour establir en ce pays yn autre Sou-
uerain que celuy qui depuis tous les siecles
y a si tyranniquement vsurpé l'empire de
Dieu & de IESVS CHRIST, pour les droicts
& la gloire duquel puissions nous tous estre
consommez. Ainsi soit-il.





